


*John Quincy Adams.*



ADAMS 241.11





Digitized by the Internet Archive  
in 2010





*J. Adams.*

G. VANDER MUELEN

I N

HISTORIAM

P O M P O N I I

D E

ORIGINE JURIS,

*Et omnium Magistratum & suc-  
cessione prudentium, Exer-  
citationes.*

P A R S P R I M A,



TRAJECTI ad RHENUM,

---

Ex Officina FRANCISCI HALMA, Academiae  
Typographi, clc lcc xci,

G. VANDER MUELEN

HISTORIAM

FORM 141

ORIGINALS

ADAMS 24.11

PARS TRIMA



TRAJECTI ARMINIUM

In Orkney, Frasergo, Hama, Academie  
Typographi, c/o J. de xer





*Illustri & Generoso*

V I R O

**D. D. EVERARDO**  
de WEEDE, TOPARCHÆ  
de WEEDE, de DYCK-  
VELT, RATELES &c. DE-  
CANO BEATÆ MARIE,  
PRÆSIDI ORDINUM  
TRAJECTENSIIUM, ET  
EORUNDENOMINE

\* 2

CON-



· D E D I C A T I O .

CONSESSUI ORDINUM  
GENERALIUM, QUI HA-  
GÆ COMITIS EST, AD-  
SCRIPTO, AGGERUM,  
QUI SUPERIOREM LEC-  
CÆ PARTEM CINGUNT,  
PRÆFECTO, OLIM BEL-  
GII FOEDERATI AD RE-  
GES GALLIARUM &  
BRITANNIARUM LE-  
GATO, & NUPER EADEM  
LEGATIONE AD REGEM  
INVICTISSIMUM & PO-  
TENTISSIMUM GULIEL-  
MUM TERTIUM, VERÆ  
FIDEI DEFENSOREM, IN  
PERPETUAM RUENTIS  
BRITANNIAE SERVI-  
TUTEM STATOREM,  
VINDICEM, RESTAU-  
RA



DEDICATIO.

RATOREM, RELIGIONIS  
CONSERVATOREM, EU-  
ROPÆ AB IMPORTUNA  
IMMINENTE UNIUS DO-  
MINATIONE LIBERATO-  
REM, PATRIÆ NOSTRÆ  
PRÆSIDIUM, REFUGIUM,  
DILICIAS, ORNAMEN-  
TUM, TEMPORUM FELI-  
CITATEM, SÆCULI GLO-  
RIAM, FELICITER & SUM-  
MA CUM LAUDE FUN-  
GENTI.

S. D.

G. VANDER MUELEN.



Uicunque ad excolendam  
divinam illam & coelitus  
nobis datam juris civilis  
disciplinam, divinarum atque  
humanarum rerum scientiam,

\* 2

ani-



## DEDICATIO.

animum applicare velit , eum  
haud poenitebit , antequam  
sanctissimum Themidis templum  
intrat , omnem suam industriam  
atque operam, in veteris memoriæ  
priscarumque literarum acquiren-  
da sibi cognitione collocasse , &  
Romanæ antiquitatis perlustrasse  
monumenta. Quippe , cum jus  
illud ex variis partibus juriumque  
speciebus , quæ in veteri repub.  
diversis obtinuere temporibus ,  
collectum sit atque compositum ,  
nec te Vir Illustris & Generose ,  
cujus præclara & summa domi fo-  
risque sapientia , conjuncta cum  
singulari publici privatique juris  
scientia , omnes in tui admiratio-  
nem rapit , fugere potest , quan-  
tum usum , quantam utilitatem ,  
quantum



## DEDICATIO.

quantum denique momentum & pondus ad eas, quas adhuc habemus cancellatas legum Romanarum reliquias, percipiendas cognoscendasque adfert ex veteribus monumentis eruta Romanæ antiquitatis cognitio; qua neglecta, non solum difficillimè earum intellectum consequi possumus, verum & in multos incidimus errores, qui nos sæpissimè alienis ribus exponunt & jurisconsulti nomini atque famæ non levem inurunt ignorantiaë maculam.

Dixit olim Mutius Scævola turpe esse jurisperito jus ignorare, in quo versatur. Sed non minus profectò turpe est, ea ignorare, quibus quis non instructus, ad juris Romani, tot actionum for-

## DEDICATIO.

mulis , tot cujusdam priscae forensis artis tenebris involuti , notitiam pervenire nequit. Hinc adeo insignes olim admisit errores Accursius, aliique juris Romani commentatores , quod inclytæ veteris reipub. fabricam , magistratus eorumque jurisdictiones & imperia , judicia & eorum antiquas formulas , aliosque priscos mores & ritus ignorarunt. Idem nobiscum sentiens Pomponius , voluit præclarum , nobilissimum & pulcherrimum ( ut interpretes vocare solent ) in frontispicio Pandectarum *de origine juris & omnium Magistratum &c.* titulum nobis ob oculos ponere, tanquam tabellam , in qua compendio depinxit priscae florentis Reipub.



## D E D I C A T I O.

Reipub. Romanæ imaginem, augustissimæ antiquitatis formam; ut hac scilicet: ratione faciliorem ad ejus notitiam consequendam viam aperiret iis, qui juris civilis studio sese tradere animum induxerunt; & simul ab oblivione vindicaret tot clarissimorum jurisprudentiæ antistitum memoriam, qui & ante principes, & sub eorum imperio claruere; quorum docta & æqua responsa, imperiali ornata auctoritate, nobis sunt agendorum norma. Nul-  
 tus dubito Vir Illustris & Generose, quin ex hisce facile perspicias, oleum & operam non perdidisse, qui antehac viri doctrina & eruditione florentissimi, in hanc Pompo-  
 nii Historiam de *origine juris* & om-

## DEDICATIO.

*nium Magistratum & successionem Prudentum*, operas suas contulêre, & ad eam illustrandam adjecerunt animum, suisque commentariis exornarunt, quorum in numero *Corasius, Muretus, Budæus, Cujacius, Gotofredus, Balduinus, Bachovius, Coccejus*, aliique plurimi. Quis non credit tantorum virorum notis & commentariis contineri, quicquid de hac re disputari queat; ita ut nihil de ea jam dicatur, quin dictum sit prius. Attamen hæc cogitatio me avocare non potuit, quo minus quicquid hac in parte pro virili in chartam conjeci, in lucem propellerem: præsertim cum animadverterem, tam amplum hanc materiam nobis præbere evagandi  
cam-



## DEDICATIO.

campum , ut , quamvis tantum  
doctissimorum virorum agmen  
ei curam suam impenderit , ta-  
men nonnulla & posteris eruen-  
da atque explicanda reliquerint.  
Quamobrem quantum pro mea  
tenuitate possum , de publico be-  
nè merendi studio inflammatus ,  
ea , quæ ad subjectam materiam  
pertinentia , ex probatis veterum  
monumentorum auctoribus col-  
legeram, te potissimum auspice Vir  
Illustris & Generose , divulgare  
volui. Non equidem , quod ex-  
istimem a me aliquid proficisci  
posse , quod nomen tuum cla-  
rius vel ornatius efficere que-  
at , vel quod omnibus penè sen-  
sibus orbatus , fieri posse mihi  
persuadeam , ut eximias animi  
tui

## DEDICATIO.

tui dotes , quarum omnes capti  
magnitudine obstupescimus , exi-  
gui ingenii mei illustrem momen-  
to. Neque enim obscurum est ,  
sed omnes summoperè admiran-  
tur in publicis gerendis negotiis  
summam tuam sapientiam , &  
industriam, animi singularem mo-  
derationem , sagacitatem incom-  
parabilem , de instantibus nego-  
tiis judicandi verissimè faculta-  
tem , de futuris conjiciendi calli-  
ditatem , ut ait Thucydides de  
summo Atheniensium Imperatore  
Themistocle. Testantur id ipsum  
tot variæ , eæque amplissimæ le-  
gationes , quas pro salute , com-  
muni tranquillitate & gloria fœ-  
derati nostri Belgii suscepisti ;  
quibus feliciter obeundis, tam be-  
ne



## DEDICATIO.

ne de republ. meritus es , ut constanti bonorum omnium civium voce concelebratum , te revera PATRIÆ ESSE PATREM , justitiæ sacerdotem, libertatis, qua hucusque illibata fruimur , assertorem & vindicem , atque tot belli calamitatibus concussæ & & labefactatæ reipub. sustentatorem ; ita ut meritò ad præcipuam nostræ reipub. salutem , præsidium atque ornamentum te natum omnes uno ore prædicent , publicisque tuis in eam meritis, sese in perpetuum tibi devinctos fateantur libentissimè. Quæ causa & me ejusdem reipub. civem impulit, ut divulgando tuis sub auspiciis hoc industriæ meæ exiguum monumentum , tibi persuaderem ,

## DEDICATIO.

derem , me nullam prætermittere  
voluisse testificandæ meæ erga te  
Vir Illustris summæ observantiæ  
occasionem. Quamquam non  
ignarus meæ conditionis , hoc  
officii genere me gratiæ tibi refe-  
rendæ longè imparem esse con-  
fitear ; præsertim quando me-  
cum reputo quantum tibi debeo ,  
pro tot tantisque muneribus &  
beneficiis , quibus Trajectensem  
Ecclesiam , cui nomine Decani  
præes , & affecisti , & quotidie ad-  
juvas , quorum ejusdem collegii  
membro , participem esse , mihi  
contigit. Spero tamen Vir Illustris  
& Generose , hoc , utcunque sit le-  
ve & parvum munus , tibi non fore  
ingratum , tanquam summæ erga  
te reverentiæ & grati animi in-  
genium



# DEDICATIO.

genuum testimonium. Interim  
Deum optimum max: veneror, ut  
te Vir Illustris & Generose diu in-  
columem bono Reipub. , cui to-  
tum te dedisti, conservet. Dabam  
Trajecti ad Rhenum. MDCXCI



AD

# AD LECTOREM.



*Q*uæro tibi Lector benevole, in Historiam Pomponii de Origine Juris & omnium Magistratuum & successionem Prudentium, exercitationes meas. In quam licet multi viri doctrina & eruditione florentissimi operas suas collocarint; attamen, cum eorum commentariis, non omnia, quæ de subiecta materia veterum monumentorum auctores nobis tradiderunt, contineri animadverterem; vel quædam malè explicata, nonnulla observatione digna, ab illis prætermissa perspicerem; subit animum tot virorum doctissimorum eruditissimis notis & observationibus, meas, utcunque sint tennes, adijere. Mecum illud Plinii reputans. Naturam non ita lassam & effœtam esse, ut nihil jam laudabile pariat. Nullus itaque dubito, quin probaturus sis animum, quo Reipub. litterariæ inservire & prodesse volui. Sin expectationi fortasse non respondeat opusculum; In magnis voluisse sat erit. Nullum sine venia placuit ingenium. Parce itaque faveque nostro. Nec cuiquam tam clarum (auctore Plinio) statim ut possit emergere, nisi illi fautor commendatorque existat.

G. VAN.



G. VANDER MUELEN

I N

HISTORIAM POMPONII

D E

# ORIGINE JURIS,

& omnium Magistratum & Successione prudentium Exercitationes.

---

INSCRIBITUR TITULUS DE ORIGINE  
JURIS, ET OMNIUM MAGISTRATUM  
ET SUCCESSIONE PRUDENTIUM.

**O** *Rigine juris.*] Quamvis hujus tituli inscriptio-  
tam latè pateat, ut, & jus naturale & divinum  
morale, & positivum amplectatur; attamen de  
jure civili tantum intelligenda est: quoniam in hoc ti-  
tulo, nihil aliud docetur, nisi quâ viâ jus civile in  
eam formam, quæ nunc habetur, redactum, ad Roma-  
nos pervenerit.

Originem juris nonnulli duplicem statuunt; natura-  
lem scil. quam internam vocant, quæ consistit in cau-  
sis & principiis, ex quibus *jus civile* collectum est: Et  
civilem & Historicam Reipub. Rom. propriam; quæ  
etiam externa vocatur, posita in existentia seu tempo-  
re, quo jus Romanum seu civile incepit, & quomo-  
do progressum habuerit; ut in hoc tit. videre est.

Prima origo, quæ *naturalis* vocatur, est naturalis ra-  
tio seu æquitas, fons omnis juris cum publici, quo  
omnes gentes utuntur; tum etiam privati, quod quis

A

popu-

populus sibi constituit, subnixum æquitate tanquam fundamento: quippe jus sine æquitate summa est injuria; recta ratio sive æquitas naturalis legis anima est, quare quemadmodum tantisper homo vivere dicitur, dum animam circumfert; ita tantisper vivit lex, quamdiu æquitas cum lege conjuncta pari passu ambulat, & ei tanquam assidua comes lateri adhæret. Hinc *legum periti* dicuntur boni & æqui notitiam profitentes. l. i. ff. de just. & jur.

---

Gaius lib. i. ad legem 12. Tabularum.

*Facturus legum vetustarum interpretationem, necessario prius ab urbis initiis repetendum existimavi: non quia velim verbosos commentarios facere, sed quod in omnibus rebus animadverto id perfectum esse, quod ex omnibus suis partibus constaret. Et certe cujusque rei potissima pars principium est. Deinde si in foro causas dicentibus nefas, ut ita dixerim, videtur esse, nulla præfatione facta, judici rem exponere: quanto magis interpretationem promittentibus inconueniens erit, omissis initiis, atque origine non repetita, atque illotis, ut ita dixerim, manibus, protinus materiam interpretationibus tractare? namque nisi fallor, istæ præfationes & libentius nos ad lectionem propo-*  
*sitæ*



*sitæ materiæ producunt : & cum ibi venerimus evidentio rem præstant intellectum.*

**F***Acturus legum vetustarum interpretationem.* ] Leges vetustæ a Cajo *Jcto* appellantur leges XII. Tabb. fons omnis publici privatique juris, ut inquit Liv. Vetustæ dici possunt, quatenus summam continent æquitatem, & cum naturali seu divino morali jure consentiunt; eatenus enim æternam perpetuamque causam & originem habent: vel quatenus sunt aliis legibus ex illis desumptis anteriores & tempore priores. Hoc sensu legimus apud Tacit. 3. *Annal. cap. 26. Vetustissimi mortalium*, id est, *primi mortalium*: & 2. *Annal. cap. 43. Quia Silani filia Neroni vetustissimo liberorum pacta erat*: id est, *natu maximo, primo*: Sic *vetustas* dicitur *ætas superior*. Et eo sensu *vetustæ* leges a Cajo vocantur leges XII. Tabb. quia longe anteriores & priores aliis legibus erant; ideo legum fontes a Cicerone appellantur. *Anno totam civilem scientiam, descriptis omnibus civitatis utilitatibus ac partibus XII. Tabb. contineri inquit in j. de Orat.*

Anno 299. missi sunt in Græciam tres legati ad petendas leges: anno ab U. C. 302. creati decemviri ad leges ferendas: unde primum decem tabulæ, postea adjectis duabus XII. tab. conflatæ sunt, ex quibus fluere cæpit jus civile *l. 2. §. 6. h. t.* quod a parvis initiis ad tantam crevit magnitudinem, ut mole laboraret sua; ad duo quippe librorum, & ter centena usque versuum millia tempore Imperatoris Justiniani excreverat. Quia autem verendum erat, neminem fore hominem, qui ad hanc excolendam scientiam animum applicaret, quam sibi tanquam immensum oceanum ob oculos ponebat, quo facile posset immergere, utpote quæ nullis librorum finibus concluderetur; tandem Sacratissimus Imperator Justinianus, bellis feliciter peractis, & hosti-

bus suis domitis, faciliorem juris prudentiam addiscendi viam nobis pandere voluit: itaque inutilibus reiectis, adjectis necessariis, tot leges, tot librorum ac versuum millia, curâ & studio viri magni & excelsi Triboniani, Magistri & Exquæstoris sacri Palatii. *Proëm. Inst.* §. 3. & 4. in unum corpus collegit, & in unam redegit juris consonantiam. §. 2. *eod.*

*Interpretationem.* ] Interpretatur, qui rem exponit, explicat, explanatque. Cic. 2. *off.* *Nequicquam aliud est Philosophia, si interpretari velis, quam studium sapientie.* Sic obscurè dicta interpretari apud Quint. lib. 3. cap. 2, 4. id est, explicare, exponere. Interpretari legem, & aequitate explicare. Cic. 7. *Philipp.* Interpretari etiam dicitur is, qui corrigit, arctat, prorogat, extendit; ita ut interpretatio sit correctio, prorogatio, &c. quæ nominis significatio in hac lege huic voci quam cæteræ conjunctior erit. vid. l. 1. §. 6. ff. *ad Senatuscons. Tertyll. l. fin. Cod. de leg. & cons. & gloss. ad h. t.*

*Urbis.* ] Urbs est oppidum muro cinctum: ita dicta ab *urvo* aratri curvaturâ: seu ut alii volunt ab *orbe*, qui ducebatur aratro, quo extruendi essent muri. Antiqui enim junctis bobus Tauro in dextra & Vacca in sinistra. (Hetrusco ritu) in excitandis urbibus, interiore aratro circumagebant sulcum, intra quem urbem conderent: *Hoc faciebant religionis causa die auspicato, ut fossâ & muro essent munita: terram, unde exsculperant, fossam vocabant: & introrsum factum murum: postea quod fiebat orbis, urbs.* ait Varro 4. *de ling. Lat.* Et idem *Oppida, quæ prius erant circumducta aratro, ab orbe & urbo, urbes: & ideo colonie nostræ omnes in litteris antiquis scribuntur urbes: quod item condita ut Roma.* Unde Virg. 5. *Æneid.*

*Interea Æneas urbem designat aratro.*

Et 2. *Georg.*

*Apta dies legitur, quâ mania signet aratro.*

Confirmat idem Pomponius in l. 239. ff. *de verb. sig.*

*Urbs*



*Urbs* inquit *ab urbo appellata est. Urbare est aratro definire. Et Varrus ait urbem appellari curvaturam aratri, quod in urbe condendâ adhiberi solet.* Unde territorium dictum quasi tritorium, tritum bubus & aratro. Quemadmodum autem in condendis urbibus aratrum adhibere veteres solebant; ita in destruendis eo etiam utebantur: ut videre est in *l. 21. ff. quib. mod. ususfruct. amitt.* Ita ut civitas amplius non esset, ubi aratrum inductum fuerat: morem hunc describit Cic. 2. *Philipp.* cum inquit; *Ut vexillum videres & aratrum circumduceres, cujus quidem vomere portam Capuæ penè perstrinxisti.*

Urbs aliquando pro ipsa civitate ponitur: scil. pro civibus, qui in ea degunt, ita apud Virg. 4. *Æneid.*

*Invadunt urbem somno vinoque sepultam.*

Per quandam antonomasiam urbs propriè dicta est *ROMA*, quum cæteræ dicuntur oppida, ut apud Quintil. *lib. 9. cap. 2.* Quemadmodum cum Poëtam dicimus, apud Græcos *Homerum*, apud Latinos *Virgilium* significamus, ut inquit *Imperator*, & quoties juris alicujus fit mentio, non addito cujus sit civitatis, jus Romanum intelligitur: ita quando de urbe non expresso nomine civitatis alicujus sermo est, Romana intelligenda civitas. Hinc Alphenus, *urbem ait esse Romam, qua muro cingitur. l. 82. ff. de verb. sig.*

*Genitor urbis Quirinus.* Apud Ovid. *met. 15.* Isidorus *lib. 8. cap. 6.* *Roma sola urbs, cætera oppida.* Quæ ab Augustino de *civ. Dei lib. 2. cap. 5.* vocatur *urbs fortium virorum. Lucem orbis terrarum, atque arcem omnium gentium* vocat Cic. in *orat. 4.*

*En hujus nate auspiciis; illa inclyta Roma.*

*Imperium terris animas æquabit Olympos:*

*Urbis initiis.*] Cum cæperit, cum nata fuerit Roma: ab infantiâ ejus, ut inquit Florus *lib. 1.* De origine sive primordio ejus non consentiunt scriptores. Sunt, qui *Romam* ante Romulum conditam volunt; & initio appellatam *VALENTIAM*: deinde ab Euandro Ro-

mam nominatam fuisse, Græco scil. nomine, ῥῶμη, quod robur sive valentia est. Alii sentiunt Trojâ captâ, quosdam ex Achivis in ea loca, ubi nunc Roma est, devenisse per Tyberim: deinde suadente nobilissima captivarum fœmina, cui *Romen* nomen erat, incensis navibus posuisse sedes, & extructum oppidum *Romen* ab ea fuisse appellatum. Nonnulli & originem & appellationem urbis a *Romo* Æmathionis filio deduxere. Verum eorum opiniones solido destituuntur fundamento: Vero magis consentaneum est, a Romulo & Remo fratribus Romam conditam esse anno primo septimæ Olympiadis, 250. vel 252. ante nativitatem nostri salvatoris. vid. *Dionys. Halicarn. lib. 2. c. 2. Liv. lib. 1. cap. 6. & Flor. lib. 1. cap. 1. Primus ille urbis & imperii conditor Romulus fuit.* Romulus dictus quidam autumant ab arbore *Ruminali*, id est, *ficu*, sub qua Romulus & Remus pueri inventi sunt cum lupâ, præbente infantibus *Rumen*, id est, mammam: Hinc subrumi, qui sub mammis sunt & iis aluntur. Ficus illa in Comitio ad tempora usque Neronis nongentos circiter annos stetit. vid. *Tacit. lib. 13. cap. 58.* ubi inquit. *Eodem anno Ruminalem arborem in Comitio, que super octingentos & quadragintos ante annos Remi Romulique infantiam texerat: mortuis ramalibus & arescente trunco diminutam, prodigii loco habitum est: donec in novos fœtus reviresceret.* Liphius damnat illum numerum, quem vid. in notis suis ad hunc locum. Vel eandem potius quam supra descripsimus nominis originem retinebimus, scil. a Græco vocabulo ῥωμη Romam dictam vel nominatam fuisse, quod Latinis Robur; unde etiam dicti ῥωμῶ, ῥῶνυλῶ: ῥῶνῶ enim vir fortis, ut μῶμῶ irrisio dicitur. Sic ῥῶμῶ, & fortitudo & vir fortis. Latinis *Remus* a ῥῶμῶ, ῥωμύλῶ, inde Latinis Priscis *Romulus*: itaque si a Romulo & Remo Romam nominatam volumus, eandem nominis derivationem retinere possumus. *Romulus & Remus a virgine*, id est, *robore appellati.* Festus.



*Perfectum esse quod omnibus suis partibus constaret.*] Perfectum id judicat Cic. *in orat.* 2. cui nihil addi potest, cui nihil deest, sed omni ex parte absolutum est. *l. penult. Cod. ad Senatusc. Silan. l. 19. §. 11. ff. de aur. & argent. leg. Arist. lib. 15.* Metaphysicus perfectum ait esse, cum secundum speciem propriæ virtutis, nulla desit particula, & finis adest: & Cic. *1. de Nat. Deor.* *Aptum undique perfectum, expletum omnibus suis partibus & numeris.*

*Cujusque rei potissima pars principium est.*] Principium rei cujusque maximum est, quippe quod rei dimidium est; unde est quod semper dicere solemus, semper cujusque rei initium, originis & causæ rationem habendam esse. *l. 8. in p. ff. mand. l. 1. §. 30. ff. depos. l. 12. ad S. C. Maced.* Principium plus est quam dimidium totius operis. *Arist. Eth. 1.* cui convenit tritum illud Horatianum.

*Dimidium facti qui benè cepit habet.*

Contra vero vix feliciter procedunt, quæ male inchoata sunt: Principium malum, malo etiam excipitur fine. *Ut mala posuimus initia, sic cetera consequentur:* inquit Cic. *ad Attic.* Enim vero cum dicebant veteres, principium esse dimidium totius, hoc nimirum docere nos voluerunt, in quacunque re, quam suscipias, plurimum operæ esse ponendum, ut illam recte inchoes, merito si quidem non vereatur aliquis confirmare, principium non esse totius dimidium, sed ad ipsum quoque operis finem pertinere. *Polyb. Hist. lib. 5. cap. 31.*

*Si in foro.*] Forum dicendum non *forus* ut barbarè enuntiavit *Isidorus*. Forum est, quo res vænium ab anonariis, causæ distrahendæ a litigatoribus conferuntur. Sic *Varro lib. 4.* Quo conferrent suas controversias, & quæ vendere vellent, & quo quæque ferrent, forum generatim appellarunt, a ferendo nempe. Ita ut brevissime possit definiri locus, quo res feruntur venales ut ait.

Festus. Salust. in *Jugurt.* Erant haud longè ab eo itinere, quo Metellus pergebat, oppidum Numidarum, nomine Vacca, forum rerum venalium totius regni maxime celebratum: ubi & incolere & mercari consueverant Italici generis multi mortales. Plenior est Etymologia, quæ duplex genus fori complexa est: fuit unum *judiciale*, alterum *venale*. Utrumque suos mores, sua officia, suosque præfectos sortitum. Illi magistratus, qui juris disceptandi, dicundi, jubendique potestatem habent, præerant. Unde forum agere dicuntur magistratus, qui conventum juris dicundi gratia habent, hinc Cicero *epist.* 6. lib. 3. *fam. ad Appium.* Cum interea, credo equidem, malevoli homines (late enim patet hoc vitium & in multis) sed tamen probabilem materiam nacti sermonis, ignari meæ constantiæ, conabantur alienare a te voluntatem meam, qui te forum Tarfi agere, statuere multa, decernere, judicare dicerent. Et ad Attic. *Epistola* 16. lib. 5. Huic Ædiles plebei, Curules, Cereales, præfecti annonæ præponebantur. Foro huic venali pro rerum varietate, quæ venales comportabantur, varia nomina imposita fuere. Sic forum *Boarium* in quo boves apud Liv. lib. 9. Forum *Suarium* in Varr. lib. 1. in quo sues vendebantur. *Piscarium Olitoriumque*, in quo pisces & olera: sicut forum *Cupedinis*, in quo cupedinarii negotiabantur. Sic forum *aleatorium* ab Augusto vocatum, in quo solitus erat aleâ ludere. Ita enim apud Suet. *Lusimus per omnes dies, forumque aleatorium calefecimus.* vid. Alexand. ab Alex. *dier. genial.* lib. 2. cap. 12. A Cajo vero hic forum *judiciale* intelligitur, in quo jus reddebatur, lites & judiciariæ controversiæ excercebantur, quod Julius Paulus vocat *auditorium* l. 4. ff. *si cert. pet.* l. 54. ff. *de re jud.* Hoc autem forum & causarum officina, & veluti quoddam juris quod cujusque esset, deribitorium est. Non omnes autem lites coram eo ventilabantur tribunali; verum publicæ tantum: privatæ enim, quæ ad centum viros pertinebant, sub tecto in Basilicis concertabantur.



tabantur: publicæ in aperto sub dio perorabantur, eamque ob causam illæ *Basilicane*; hæ *subdiales* vocabantur; *Frans. Polæt. hist. for. Rom. lib. 1. cap. 2.* Populus Romanus diu unicum habuit forum, in quo lites dirimebantur, quod *Latinum* sive *Romanum* & *Latium* appellebatur. Hinc *Stat. Sylv. de equo Domitiani*

*Stat Latium complexa forum.*

*Addita quid Latio Flavia templa foro.*

apud *Mart. lib. 9. Epigram. 4.* Romani fori fit mentio apud *Propert. lib. 4. eleg. 2.*

*Romanum satis est, posse videre forum.*

Alterum Cæsaris forum dictum est, ubi Veneris templum ab eo extructum fuit, in quo Cæsar passus est loricam statuam sibi fieri: de hoc foro canit *Ovid. lib. 3. trist. 1. vers. 27.*

*Hæc sunt fora Cæsaris inquit:*

*Hæc est à sacris, quæ via nomen habet.*

*Vid. Appian. bel. civ. lib. 2.* Tertium forum ab Augusto excitatum est cum æde *Martis Ultoris*. Hæc tria fora judiciaria fuerunt. Hinc *Ovid. lib. 3. trist. 12. vers. 25.*

*Scena viget studiisque favor distantibus, ardet:*

*Proque tribus resonat Terna Theatra foris.*

Et *Martial. lib. 3. epigram. 38.*

*Causas inquis agam Cicerone disertius ipso,*

*Atque erit in triplici par mihi nemo foro.*

De aliis foris vid. *Alex. ab Alex. dier. genial. lib. 2. cap. 12.*

*Nulla præfatione uti.* ] ab hoc more olim Areopagitæ maxime alieni erant, nullum admittentes orationum præmium: quod suspecta essent, quæ iudicis animum afficere & commovere poterant. Cautum itaque apud eos fuisse constat, ut qui causam dicat, neque præmio utatur, nec ad miserationem, nec invidiam adducat: ne cui plus in misericordia, quam in causa spei esset. Unde apud *Apulej. lib. 10. Placuit salubre consilium,*

& illico jussus praeo, pronuntiat: PATRES IN CURIAM CONVENIRENT. Quibus protinus jure consuetata loca residentibus, rursum praekonis vocatu, primus accusator incedit. Tunc demum clamatus inducitur reus: & exemplo legis Atticae Martique judicii, causa patronis denuntiat praeo, neque principia dicere, neque miserationem movere. Unde Quintil. lib. 6. Athenis affectus movere per praekonem etiam prohibetur orator. Verum apud Romanos moris fuisse videtur, ut in foro causas orantes aliquam praefatione utantur. Sed quali uti debeat vid. in l. 3. ff. de his quae in testam. del. vel induc. &c. scilicet, ut causarum patronus judicem roget vel supplicet eum benigne audire. Ita Junius Zeno Anton. Augusto. *Rogo domine Imperator audi me patienter.*

*Illotis manibus.* ] id est abruptè, temerè, & nondum praeparatis audientium vel legentium animis. Ducta Metaphora à sacrorum ceremoniis, ad quas accedere non liceret, nisi summa cum puritate, ne ulla labe vel macula contaminarentur. Ita Cajus noluit ad interpretationem sanctae Themidis oraculorum, scilicet legum vetustarum, tanquam rei sanctissimae illotis & impuris manibus accedere.

*Istae praefationes* ] rationem reddit quare praefationem praemittere voluerit. 1. quia illae praefationes nos ad lectionem materiae invitant. 2. ut evidentiorum & lucidiorum nobis praestent intellectum. *Ut nobis mens legis & statuentis constet, recurrendum ad praefationes & proemia legum, statutorum, aliarumque constitutionum.* Rebuff. ad h. r.

*Pomponius* ] fuit Pomponius Papiniani discipulus, Felici Alexandri Severi Imperatoris tempore ann. 975. legum peritissimus, ut nominatur a Lampridio, vixit. Philosophiae Stoicae praeeptionibus imbutus fuit, ut declarant verba, *rerum mixtura* in l. 30. ff. de usurp. & usuc. quae Senecae doctrinam redolent lib. 2. *natural. quaest. cap. 2.* Volunt nonnulli male hoc caput a Triboniano



boniano Pomponio attribui, propter styli discrepantiam, & errores quosdam, qui in eo occurrunt: cum istiusmodi ignorantiam rerum reipub. suæ in virum eximium in consilio Principis existentem non cadere existimandum sit, Coccej. *de orig. jur. ad hunc T.* Verum cum aliunde non certum constet, quisnam hujus legis autor sit, quare non æque in hoc, quam in cæteris, quæ nobis a Triboniano tradita sunt, ei fidem haberemus: donec alter e cælo ceciderit Tribonianus, qui de legis hujus autore nos certiores fecerit. Quod enim in nonnullos incidimus errores, non statim ideo accusandus Tribonianus, quasi nobis falsum obtrudisset authorem: quippe divinum potius quam humanum est nunquam labi vel errare. Sapientiâ, doctrina, & eruditione florentissimi, maximos sæpe admittunt errores. Vid. Henel. *de veter. jurisc. cap. 30.* & Bertrand. *lib. 1. dt jurispr.* ubi inquit de Pomponio. *Is est qui magistratum & jurisconsultorum successionem & quasi juris civilis profapiam eleganti & brevi stylo deduxit, &c.* Celeberrimæ illius legis secundæ de origine juris autor, in qua initia & progressum Reip. Romanæ magistratum & juris consultorum veterum nomina & successionem, ad sua usque tempora eleganti stylo contexuit. Henel. *cit. loc.* & in ipsius laudem hosce cecinit versus.

*Juris origo tibi sic dicta ejusque periti:*

*Ut summus dici juris mereare sacerdos.*

*Ad discendum atas tibi sera hand ulla, parato*

*Discere, pes quanquam tumulo jam insisteret alter.*

Ipse enim declarat Pomponius *lib. 7. epist.* *Ego discendi cupiditate, quam solam vivendi rationem optimam in octavum septuagesimum annum duxi.* Reliquit autem suæ eruditionis atque doctrinæ multa egregia & speciosa monumenta, quæ passim in corpore juris extant.

*Processus*] processus hic non barbarè significat viam ac rationem quâ utimur in foro in causis agendis. Verum eleganter significat progressum juris civilis, quo  
ad

adeam magnitudinem, quæ hodie extat pervenerit. Procedere enim eleganter dicitur de eo, qui magnos pro-  
 vectus & progressus in aliqua re, cui operam dat, facit. Ita Cic. epist. 16. ad fam. *Longius in dies discendo excer-  
 cendoque procedere.* Idem de Claris orat. *Gradus tuos &  
 quasi processus dicendi studio cognoscere.* Sic etiam Suet.  
 de claris Gramm. *Scriptit se in græcis litteris magnum pro-  
 cessum habere.* Eodem sensu apud Flor. in prolog. *Qua-  
 tuor gradus processusque ejus inveniet.*

*Civitas*] cum multa & attentione & lectu digna de  
 civitate ejusque origine a diversis auctoribus disputata  
 sint, non abs re alienum fore persuasus sum, hanc ma-  
 teriam paullo altius repetere, & in brevi quasi tabella  
 ejus originem ac fabricationem depictam lectori intu-  
 endam exhibere: fortasse aliquam voluptatem præbi-  
 turus sum illis, qui juri publico dederunt operam: cum  
 ejus juris objectum sit cui potissimum applicatur.

*Est autem civitas liberorum hominum natura equalium,*  
*naturalis libertatis, qua quisque sui juris est, jacturam fa-*  
*cientium, sub uno eodemque summo imperio sociata & unita*  
*multitudo.* Unio enim ista seu societas arctissimum ci-  
 vilitatis vinculum est, quo rupto tota corruiet societatis  
 fabrica. Diximus civitatem esse multitudinem libero-  
 rum hominum naturâ æqualium; quia naturâ omnes  
 homines sunt æquales: creavit enim initio Deus homi-  
 nem liberum nullius nisi creatoris imperio subjectum:  
 unde acres adhuc stimuli quasi innati ad libertatem,  
 quam semel nactus est conservandam, nisi fortior sua-  
 deat ratio, ei renunciare, qualis est illa, quâ ad semet-  
 ipsum conservandum & defendendum homo impelli-  
 tur. Vocatur autem hæc libertas à Cicerone *potestas*  
*vivendi ut velis,* & à Justiniano definitur *facultas natu-*  
*ralis quod cuique facere libet: nisi lex aut vis sit impedi-  
 mento,* quæ à civitate vel summo imperio originem ha-  
 bet. Talis scilicet facultas, quæ a me ipso dependet, &  
 a nemine mihi potest eripi: ita ut meo non alieno vi-  
 vam



vam arbitrio, & omnibus meis actionibus dictis ac factis regulam & modum statuam, ad quam eas formare cupio: Quamobrem nemo jure mihi potest esse impedimento, ne exequerer, quæ exequi in animum induxi: & inclinationi contraria mihi imponere negotia. Quippe quoniam naturâ sumus æquales; id est, liberi nati, alteri in alterum imperium excercendi nulla competit facultas, quo libertatem socii sui aliquatenus imminueret. Quivis in statu naturali sibi imperat, & cuique pro ratione suarum actionum stat propria voluntas & arbitrium, consentiens cum rectâ ratione & æquitate naturali: qua duce nullo pacto errari potest, ut inquit Cic. 1. *de ll.* Hanc libertatem potestatemque *naturalem* vocamus, quia cum ipso homine nata est: per hominem autem marem tantum intelligimus, exceptâ sceminâ: utpote quæ potius ad parendum, quam imperandum nata videatur, itaque ea libertate gaudere nequit, multis motus rationibus, de quibus inferius sermo erit. Quoniam autem tali libertate caret, maribus æqualis non est, & consequenter tanquam pars civilem societatem constituens, considerari nequit: Diximus enim civitatem ex æqualibus eodem jure gaudentibus excitatam esse. Æquales autem sibi invicem dici non possunt, quorum alter alterius imperio subest: Nullus autem dubito quin omnes mihi concessuri sint, sceminam maris potestati subjectam esse, & Deum & naturam voluisse: ideoque tanquam pars civitatem augens, non vero constituens considerari debet. Non destituti sumus argumentis cum ex sacris litteris, tum etiam ex ratione petitis, quibus hæc veritas adstruitur. Qui a limine tantum sacras paginas salutaverit ignorare nequit, Deum Adamum totius humani generis parentem primum ex pulvere terræ finxisse. Deinde omnipotentem profundo somno eum obruisse, & de costis ejus tulisse unam ex quâ ædificavit Evam. Genes. 2. *cap. 21*. Non dicitur creata Eva, quia non ex nihilo erat producta: verum ædificata ex præ-

existente

existente materiâ ossibus & carne, ex quibus hominis constat corpus: Rudem scilicet illam massam finxit in effigiem similem & conformem viro. Quam autem aliam ob causam primo loco creatus Adamus, nisi ut secundum tritum illud proverbium (quod qui tempore prior jure potior sit) sibi imperium jure vindicare posset, cum in mulierem, tum etiam in cæteras creaturas, jam antea ipsi a Deo concessum. Nam cum de naturâ summi imperii sit, ut dividi non possit, rationi consentaneum erat, illud in unum conferri: Deinde quamobrem ex costa viri extracta, nisi ut posset inde concludere, se nihil habere a se, sed ab alio scil. viro, ideoque se ad Adamum pertinere, utpote ex corpore ejus desumptam; & consequenter se ejus esse, cujus fuisset materia, ex quâ ædificata erat: nihil enim magis rationi & æquitati convenit, quam meum id esse, quod ex re mea factum est: ex quo fluit imperium, quod mihi in illud, quod ad me pertinet, habeo, scilicet ut sim arbiter & moderator rerum mearum, ideoque potestas de illis disponendi, pro arbitrio mihi competit, modo caveam ne iis abutar: Concedit lex naturæ in statu naturæ mihi rerum ad me pertinentium usum, abusum vero vetat: Re enim suâ male uti est contra bonos mores, ideoque a jure naturæ vetitum. Nulla igitur inter marem & foeminam intercedit æqualitas, tum juris, cum etiam virium, quibus indigent, qui in statu naturæ vivunt, quamobrem Romani olim voluere ut mulieres essent in perpetuâ tutela, ut legimus apud Cic. *orat. pro Muren.* Stat itaque fixum, quando definimus civitatem esse multitudinem liberorum hominum naturâ æqualium, solummodo mares intelligi; mulierem, liberos a viro progenitos tanquam accessorium ejus, sub una eademque persona comprehendi: Verum ut distinctius civitatis structuram lectori explicemus, sciendum est olim mortale genus in familias divisum fuisse; cujus familiæ, quæ tanquam parva respublica erat, finis & caput erat vir seu pater familiæ, cæteri ut uxor &



& liberi membra & quasi cives erant, a patrisfamilias tanquam principis civitatis nutu dependentes: ita ut monarchicum penes eum resideret imperium: ipsi compete-  
 bat facultas leges & jura dandi, quæ norma & regula essent secundum quam ceteri negotia perage-  
 rent; ei itaque soli incumberebat cura nequid familia ali-  
 quid detrimenti caperet; uxori & liberis obsequendi solâ gloriâ relicta. Ita ut ille totam haberet administra-  
 tionem, solus omnibus imperaret; a nemine vero re-  
 gebatur, a nullo enim nisi Deo imperium tenebat; quare nemini nisi summo rerum omnium conditori ra-  
 tionem suæ administrationis reddere obligatus erat. Hæc fuit humani generis conditio, antequam in civitatem coaluissent mortales. Quanquam vero hanc libertatem flagrantissimè cupiant homines, tamen propter innu-  
 merabilia pericula & incommoda, quæ homini in statu naturali ab homine imminet, pati debuerunt multum de illa detrahi, si salvi & incolumes esse vellent: Quis enim ignorat Saturno in Tartara misso aureâque de-  
 lapsâ ætate, ferream statim prodiisse omnium scelerum matrem. Tum exui pudor & modestia cepit, visque & ambitio incedere; omnia ad se trahere, aliena tan-  
 quam sua rapere mos erat, homo homini lupus erat, in-  
 mutuum advolabant perniciem, non hospes ab hospite tu-  
 tus erat, sibi invicem diffidentes. Tot tantisque molestiis tandem fatigati mortales, cogitare ceperunt, quâ potissi-  
 mum ratione a se hæc pericula depellerent, suasque possessiones & facultates in securitatem assererent. Nul-  
 lum autem efficacius remedium peti potuerunt nisi ab homine ipso, a quo malum metuebant; scil. ut quisque sibi socios quæreret, quorum ope & auxilio adeo potens esset, ut nisi summo cum inuasoris periculo opprimi posse videretur; nam quoniam quisque omnibus modis sui ipsius conservationi incumbit, summa ope declina-  
 re studet ea, quæ sibi nocitura videntur, quam obrem non ita facile illum oppugnaturus est, quem non sine  
 morte

morte dubiâ debellare dubitat. Talem vero securitatem accessio duorum vel trium præstare nequit, cum additio vel conspiratio unius vel paucorum ab altera parte iterum incitaret hostem ad impetum faciendum: quare oportet ut numerus in unam eandemque societatem coeuntium tantus sit, ut exiguam manum facile repellere possit. Postquam numerus satis validus est, nihil tamen efficiet, si singula societatis membra libertatem naturalem conservare vellent, quippe, si quisque ad propriam defensionem suis viribus, suo arbitrio utitur, nullaque sit animorum concordia, summa oriretur confusio, sibi invicem essent impedimento, quo minus communis salus defenderetur, & singulorum utilitas promoveretur: ita ut tandem tota societas mutua illa diffensione labefactaretur & ad interitum vergeret: Quemadmodum enim vis unita fortior, ita distracta debilior. Ergo ut communis salus conservetur, singulorum actiones ad unum eundemque finem & scopum collimare necesse est, ita ut omnium sit una voluntas, quod commode fieri nequit, nisi plures vel unus societatis utilitati tuendæ ac promovendæ præponatur, cujus voluntati ceteri voluntatem suam subjiciant, ita ut illius voluntas, qui societati præest, sit pro voluntate omnium, & quicquid ille ad conservationem communis salutis pertinere statuerit, id cæteri ratum habeant. Quemadmodum patris familias in familia tantum conspicitur majestas, cæterorum in obediendo partes consistunt, ita in civitate summi imperantis tantum auctoritas & majestas venerari debet. Ejus est leges condere, mandata dare, negotia civibus imponere, boni civis officium ea sine morâ exequi. Ex hac submissione summus imperans satis validam acquirit potestatem, qua communem pacem, & salutem intactam & illibatam ab improborum hominum machinationibus conservare queat. Si quis morem gerere recusat, eum tanquam perturbatorem societatis & hostem e civitate ejicere vel

alio



alio quocunque modo in eum animadvertere potest. Quid enim saluum, quid incolumè esset, si cuique e plebe summam majestatem, ex qua nostram pendere vitæ beatitudinem & salutem demonstravimus, pedibus conculcaret, ad vetus Chaos iterum delaberetur respub. omnium miseriarum fontem & scaturiginem. Ut enim summum Olympi cacumen Poëtæ semper quietum esse ajunt, propterea quod altius sit, quam ut eo ventorum tempestatumque vis perveniat, ita majestas atque auctoritas eorum, qui summo imperio ornati sunt, sublimior & excelsior existimari debet, quam ut perditorum hominum pestiferis flatibus & improbis machinationibus concuti & labefactari possit, si propriæ saluti & conservationi inserviamus. Ex illâ igitur animorum concordia & voluntatum unione, & renunciatione libertatis, naturalis perfecta nascitur civitas, seu societas civilis, unicum præsidium, ad quod confugere necesse erat mortalibus, si semetipsos tot tantisque periculis & miseriis, quibus in statu naturali viventes vexabantur, liberare vel-  
lent. Longius quidem quam par fuit de hac disputavi materia, verum spero ut mihi lector hoc facile condonaturus sit, si diligenter examinaverit, quanta ejus sit utilitas.

2. Pomponius lib. singulari Enchridii.

*Neceßarium itaque nobis videtur ipsius juris originem, atque processum demonstrare.*

§. I. *Et quidem initio civitatis nostræ populus sine lege certa, sine jure certo primùm agere instituit: omniaque manu à regibus gubernabantur.*

**C***ivitas nostra.*] Scil. Romanæ. Significat hic *civitas* habitatores, congregatam hominum multitudinem. Ita etiam in *l. 27. ff. si cert. pet.* Erat hæc civitas ex agrestium hominum incondita multitudo a Romulo fundata. Liv. lib. 1. cap. 8. Legibus autem tum ad sacra, tum ad politicum regimen pertinentibus, brevi Romulus populum ita formavit, ut cuilibet morariori genti non tantum par esset, sed jure præferri potuerit.

*Populus sine lege certâ.*] *Principio rerum, gentium, nationumque imperium penes Reges fuit. Populus nullis legibus tenebatur. Arbitria Principum pro legibus erant,* inquit Justinus lib. 1. cap. 1. Per ora Principum divinitus jura emanabant: Quod justum illi judicassent id pro lege erat. Dionys. Halicar. lib. 4. cap. 1. Cic. 3. de ll. *Omnes antiquæ gentes Regibus quondam parvèrè; quod genus imperii primo ad homines justissimos & sapientissimos deferrebatur.* Nonnulli sentiunt melius & optabilius esse regi a Principe quam lege scripta; Quia Rex justus in singulis causis judicat secundum æquitatem, quæ sibi videtur. Hinc Plato formavit Rempub. sine lege scriptâ, sed quæ regeretur a viris prudentibus. Et apud Liv. lib. 2. cap. 3. Regem hominem esse, a quo impetres, ubi jus ubi injuria opus sit, gratiæ esse locum & beneficio: & irasci & ignoscere posse: inter amicum & inimicum discrimen esse. Leges rem surdam inexorabilem esse, salubriorem melioremque inopi, quam potenti: nihil laxamenti & veniæ habere, si modum excesseris periculosum esse. In tot humanis erroribus solam innocentiam vivere. Verum contraria opinio huic præferenda videtur. Debent enim certæ esse leges, quibus respub. tanquam suo fundamento fundatur, & quæ regula & norma sunt, secundum quam cives actiones suas dirigere, negotia & commercia peragere necesse habent. In hoc enim Reges cæteris hominibus æquales sunt, scil. quod homines nati iisdem humanæ naturæ imbecillitatibus, ut



ut odio, iræ, invidiæ, aliisque pravis animi agitationibus obnoxii sint; iisque agitati sæpissime, ab eo quod justum & æquum est, animus deflectitur & amore proprio flagrantēs sæpe publicæ utilitati privata comoda anteponunt, non sine gravi civium damno. Quamobrem nonnulli, inter quos Vasquius, Aristoteles, alique, melius, commodius ac tutius gubernari rempub. per legem quam principem censuere. *Ubi lex imperat Deum præesse, cum lex sit imago Dei, ratioque pura & ab omni affectu libera: ubi vero homo imperat affectum ut immanem belluam adjungi, qui ira, odio, cupiditate possit agitari,* inquit Arist. 3. polit. cap. 12.

*Agere instituit*] id est incepit; sæpius hoc sensu apud scriptores occurrit. Terent. in prologom. Eunuch. 19.

*Quæ proferentur post, si perget lādere*

*Ita ut facere instituit.*

Sic etiam Cic. in Verr. *Verum ut institui dicere,* id est, cepi. Et pro Cluentio. *Quæso ut me judices sicuti facere instituistis, benigne attenteque audiat.* Notandum verbum *instituere* hic non ad populum referri in eo sensu, in quo significat *decernere, statuere*, quod imperii est, quasi penes populum fuisset istius arbitrium: Verum sensus est, quod populus Romanus initio civitatis Romulo imperii habenas moderante, agere incepit secundum leges & jus incertum; ab ore quippe Romuli pendens; quod ex sequentibus videre est.

*Omnia manu a regibus gubernabantur*]. nempe potestate & arbitrio regis. Libido regum pro legibus habebatur. Justin. lib. 2. cap. 7. & Tacit. 3. Annal. *Notis Romulus,* inquit, *ut libitum imperitaverat.* Notandum hic tres esse regiminis species. Vel enim uni, vel pluribus siue concilio multorum permittitur rerum summa: porro illud concilium vel ex omnibus civibus, ita ut singulis ferendi suffragium jus sit; vel ex quibusdam tantum personis constat. Ex hisce diversis civitatum formis diversa nomina orta sunt. Si unus summæ rerum

præst, *Monarchia* dicitur : si plures , non vero omnes imperii teneant gubernacula , *Aristocratia* vocatur. Si omnibus denique administratio permiffa fit , *Democratia* appellatur. Respub. Romana nunquam magis floruit quam sub unius imperio : pluribus eam administrantibus , seditionibus bellisque intestinis adeo sæpissime divulgata atque dilacerata fuit , ut jamjam interitura videretur , & hostibus internecivo odio erga eam accensis , prædæ futuram metuendum esset. Et meo judicio *Monarchicum* regimen abstractè , ut Logici loquuntur , consideratum , nulla habita ratione personæ imperantis , qui eo sæpissime abutitur , eamque ob causam periculosum , cæteris civitatum formis præferendum existimo.

*Urbecula est felix , quæ præconem audiat unum.* Olim oraculum Soloni redditum fuit. Qui de præstantia dictarum specierum plura desiderat , adeat Hobbef. de civ. cap. 10. ubi quæ optima sit ex contentione commodorum & incommodorum cujusque regiminis ostendit.

---

§. 2. *Postea aucta ad aliquem modum civitate , ipsum Romulum traditur populum in triginta partes divisisse , quas partes Curias appellavit ; propterea quod tunc Reipublicæ curam per sententias partium earum expediebat. Et ita leges quasdam & ipse curiatus ad populum tulit. Tulerunt & sequentes reges , quæ omnes conscriptæ extant in libro Sexti Papirii : qui fuit illis temporibus , quibus Superbus Demarati Corinthii filius , ex principalibus viris. Is liber , ut diximus , appellatus jus civile*



civile Papirianum, *non quia Papirius de suo quicquam ibi adjecit, sed quòd leges sine ordine latas in unum composuit.*

**A**Ucta ad aliquem modum civitate] scil. aperto asylo: *A*eo enim ex finitimis populis turba omnis sine discrimine liber an servus esset avida novarum rerum perfugit: id primum ad cœptam magnitudinem roboris fuit. Liv. lib. 1. cap. 8. Quid enim urbs civibus orbata, quam urbis imago. Hinc Plin. lib. 7. epist. 31. *Cupio patriam omnibus quidem rebus augeri, maxime tamen civium numero: id enim oppidis firmissimum ornamentum.*

Hoc primum urbis incrementum aliud excepit, scil. raptus virginum *Sabinarum*, *Antemnatium* aliarumque, quæ Romam profectæ erant, studio cum spectandi ludos, quos Romani *Consualia* vocant, quia *Conso*, id est, *Neptuno* consiliorum Deo sacra, tum etiam videndæ novæ urbis cupiditate flagrant. Gravissima inde orta bella, donec tandem mulierum precibus fatigati, ad quos injuria hæc pertinebat, non tantum pacem, sed etiam ex duabus civitatibus unam fecere, regnum confociarunt, & imperium omne Romam contulerunt. Liv. dict. lib. cap. 8. & 9. Ab eo tempore magis magisque accessione aliarum nationum *Cenensium*, *Antemnatium*, *Crustuminum*, eo crevit civitas, ut decedens Romulus loco 3000. peditum, & 300. Equitum, quos secum adduxerat, reliquit peditum 46000. & equitum 1000. Dionys. Halicar. lib. 2. cap. 16.

*In triginta partes divisisse.*] Romulus, arrepto imperio, cogitavit non in civium multitudine, nec amplis profundisve fossis, summam rempub. sitam esse: sed aliud quid esse quod fervet civitates, & ab exiguis profectas initiis magnas facit, boni scil. magistratus, & æquæ leges, sine hisce insanit & furit semper bellua illa multorum capitum. Statum igitur, quem judicavit optimum

reipub. imposuit, & quidem a se ipso tanquam capite totius civitatis incepit: deinde ad cætera membra descendit. Primo itaque se ipsum summo imperio ornatum, venerabilem & augustum sumptis imperii insignibus, tum maxime licitoribus facere voluit: Quamobrem trecentos etiam armatos circa se habuit, quos *Celeres* appellavit, non tantum ad custodiam corporis, verum ad defensionem quoque summæ majestatis adversus omnes fordidas & pestíferas concussiones, quas homines perditissimi, novarum rerum cupidi, communis tranquillitatis perturbatores meditantur. Deinde ad universam multitudinem bene ordinandam animum applicuit: eam igitur divisit in tres partes, unde tribus dictæ sunt, singulas tribus in decem curias. Alii tribus a tributo dictas volunt, quod populus Romanus in tribus divisus conferre solitus fuerat. Non consentiunt de hac re Dionysius & Livius, neque de tempore, quo tribus & curiarum nomen inventum fuerit. Dionysius *Romulum*; Livius Regem *Servium Tullium* tribuum auctorem dicit. Ille ante bellum Sabinum, Hic post illud peractum, populum in tribus & curias divisum memoriæ prodidit.

Narrat quippe Dionysius Romulum universam multitudinem in tribus divisisse, & singulis suos præfecisse duces; tribus singulas iterum in decem curias partitum fuisse: singulas curias singulos agros sortiri jussisse, excepta ea parte, quæ publicis & sacris obeundis muneribus inserviret. Livius contra, inito foedere cum Sabinis & confociato regno, tres equitum centurias & triginta curias a Romulo factas, iisque a mulieribus Sabinis nomina imposita fuisse, tradit. *Ex bello, inquit, tam tristis lata repente pax, cariores Sabinas viris ac parentibus, & ante omnes Romulo ipsi fecit. Ita quum populum in curias triginta divideret, nomina earum curiis imposuit. Id non traditur, cum haud dubio numerus aliquanto major hac mulierum fuerit, etate ac dignitatibus suis, virorumve,*



*an sorte lectæ sint, quæ nomina Curii darent. Eodem tempore tres equitum Centuria conscriptæ sunt. Ramnenses a Romulo, Tatienses a Tatio, Lucerum nominis & originis causa incerta est.* Dionysius in ipso civitatis primordio, antequam adversus Sabinos bellum gessisset, populum in tres tribus, & illas tribus iterum in triginta curias divisisse. Livius post bellum peractum, in triginta curias populum divisum fuisse scribit. Nonnulli hac in re Dionysii, alii Livii opinionem amplectuntur. Nos autem videbimus, num hæc dissensio aliqua ratione tolli possit. In eo ambo consentiunt Romulum auctorem tribuum fuisse, verum de tempore non conveniunt, quo populus in tribus divisus fuit. Legimus apud Livium Romulum civitate jam condita, statim reipub. curam suscepisse, & vocata ad CONSILIUM multitudine jura dedisse populo, legesque condidisse: quod universam multitudinem convocaverit id causæ fuisse videtur, nimirum, ut omnium consensu & voto leges promulgerentur & comprobarentur, quod jus hoc ipso tempore populo concessum, deinde ipsi semper integrum inviolatumque mansit. Neminem hominem adeo insanum fore mihi persuadeo, ut crederet illud concilium sine ullo ordine concurrisse: quippe tanta fuisset orta confusio, ut ab illa præsertim incondita agrestium multitudine nullum negotium peragi potuisset. Itaque nullus dubito, quin Romulus, antequam illam multitudinem ad concilium vocavit, optimam quam potuit excogitaverit rationem, qua convenirent & suffragia darent, hanc autem rationem eo tempore reipub. utilissimam & optimam fuisse nemo negabit. Præterea admodum verosimile est illud *consilium*, cujus mentio fit in *cap. 8. lib. 1.* idem esse quod *comitia*, propterea quod sæpissime hæc nomina confundit. Sic enim inquit *lib. 3.* ubi de Cæsonis Quintii judicio. *Judicii die quum accusaretur solum vertisse, exilii causa, nihilominus Virginio comitia habente, collegæ appellat; dimisere concilium.* Idem agens de

Manlii iudicio: *In Lucium Petilinum concilium populi indictum est.* Et lib. 5. de multâ agens, quæ M. Posthumio publicanô a Carviliis dicta erat, ita scribit: *Multa certande cum dies advenisset, conciliumque tam frequens adesset, ut multitudinem area Capitolii vix caperet.* Et paulo post *Comitia* vocat, quod antea *Concilium* plebis appellaverat. Et *Comitia*, inquit, *quæ vi, armis prohibitum erat.* Ex quibus clare perspicimus apud Livium sæpissime comitium idem quod concilium esse. Unde consequenter fuit idem illud concilium sive comitium ex triginta partibus constituisse, ideoque idem fuisse quod *Comitia Curiata*, nulla enim ante ea comitia instituta fuisse legimus. Est autem *Concilium concio plebis coacta comitiis curiatis per Tribunos & minores magistratus.* Polet. *Hist. for. Rom. lib. 3.* Itaque si eodem sensu concilium in dict. cap. octavo explicemus, commodè Dionysius cum Livio conciliari posse videtur. Si talis fiat sensus explicatio scil. Romulum ab initio quidem populum divisisse in tres tribus, & has iterum in triginta curias, ex quibus illud comitium sive concilium constabat, verum illis, post datam Sabinis civitatem, omnemque Sabinum populum per singulas tribus & partes distributum, a mulieribus Sabinorum nomina imposuisse, & vocasse Ramnenses a Romulo, Tatienses a Tit. Tatio Sabinorum rege, Luceres a Lucumone Etrusco, sive ab Ardeatibus, qui cum Lucero Romulo regnante, fortunarum suarum domicilium Romæ collocarunt. Vid. Sig. lib. 1. de antiq. jur. civ. Rom. Pigh. lib. 1. annal. Rom. Has autem tribus Livius centurias equitum vocat, quod ex singulis tribubus singulæ equitum centuriæ conscriptæ erant. Vid. Onuphr. Pavin. in descrip. civit. Rom. lib. 2.

[*Quas partes Curias appellavit.*] Ita Dionys. lib. 2. cap. 2. In tres partes divisa multitudine singulis singulos præfecit duces præclarissimos. Deinde unamquamque iterum in 10. partitus, totidem iis duces præposuit. Harum autem partium majores tribus, minores curias appel-



appellavit: A curâ scilicet, propterea, ut subjicit Pomponius, quod reipub. curæ per sententias partium earum expediebantur. Hinc Varro de *ling. lat. lib. 5. Curia* (inquit) *ubi Senatus rempub. curat. Illa etiam curia dicitur, ubi cura sacrorum publica.* Item Festus *lib. 3. Curia locus est, ubi publicas curas gerebant. Curia etiam nominantur, in quibus unusquisque partis populi Rom. quid geritur, quales sunt hæ, in quas populum Romulus distribuit, numero triginta.*

Hinc Curiones sunt, qui consumuntur & marcescunt curis. Plaut. in *Aulularia.*

*Volo ego ex te scire, quid sit Agnus Curio.*

Eucl. *Quia ossa atque pellis est, ita curis macer.*

Est autem Curia triplex significatio, ut videre est apud Sigon. *lib. 2. cap. 3. de antiq. jur. civ.* Vel significat locum, vel cœtum quendam civium, qui inde Curiales dicti sunt, vel jus quo ipsi Curiales donati sunt. Fuit Curia Romæ duplicis generis: Una in quâ Sacerdotes res divinas, sacra, & ceremonias cultusque Deorum curabant. Ita apud Var. de *ling. lat. lib. 4. Curia duorum generum.* Nam & *ubi curarent sacerdotes divinas, ut Curia veteres, & ubi Senatus humanas, ut Curia Hostilia, quod primus eam ædificavit Hostilius Rex sub veteribus.*

Ita in Calabria curia tantum sacrorum ratio gerebatur; teste Sex. Pompejo *lib. 2. de verb. sig.* Hinc etiam Curia Saliorum in Palatio. Altera est ubi senatus conveniebat, deliberaturus de Repub. Quamobrem Curia domus senatoria nuncupata est, nobis *Stadthuys*, imo aliquando pro ipso Senatu accipitur. Ut ait Cic. in *3. de orat.*

*Leges quasdam tulit.* ] ferebat leges, qui rogabat populum per verba *VELITIS, JUBEATIS.* Et is, qui rogabat populum, legislator vocabatur. Ita ut hodie perperam legislator dicitur, qui ex plenitudine potestatis suo arbitrio condit legem; hi non legumlatores sed conditores vocandi sunt: qualis potestas solis sum-

mis imperantibus concessa est. *l. ult. Cod. de ll.* Formula rogandi populum occurrit apud Gell. *lib. 5. cap. 19.* VEL ITIS JUBEATIS. QUIRITES UTI. LUCIUS VALERIUS. LUCIO. TITIO. TAM JURE. LEGE. FILIUS. SIBI SIET. QUAM. SI. EX. EO. PATRE. MATRE. Q. FAMILIAS. EJUS. NATUS. ESSET. UTI. Q. VITÆ. NECIS. Q. IN. EO. POTESTAS SIET. UTI. PATRI. ENDO. FILIO EST. HÆC. ITA. UTI. DIXI. ITA. VOS QUIRITES. ROGO. Item illa apud Livium *lib. 22. cap. 10.* Rogatus in hæc verba populus est, VEL ITIS JUBEATIS, *hoc sic fieri, si res pop. Rom. Quiritium, ad quinquennium proximum, sicut velim eam salva servata erit, hisce duellis, datum donum duit, populus Romanus Quiritium.* Si populus intellexisset Rogationem, vel eam approbabat, vel rejiciebat suffragiis suis. Suffragiorum autem genera tria erant: *Voce, manu, pedibus vel tabellis.* Tabella judicium, fuit voce pedibus senatus usus est, unde pedaria sententia dicebatur: Voce etiam populus in comitiis. Si populo placeret, quod continebatur in suffragio voce aut tabella, observandum in legibus jubendis UTI ROGAS. vetandi, ANTIQUO dictum Scriptumve esse. Ita apud Livium *lib. 6.* Cum uti Rogassent primæ tribus dicerent. Et idem *lib. 30.* De pace uti rogata omnes tribus erant jusserunt. *lib. 8. cap. 37.* M. Flavius Tribunus plebis tulit ad populum, ut in Tusculanos animadverteretur: quorum eorum ope ac consilio Veliterni Privernatesque populo Romano bellum fecissent. Tribus omnes præter Polliam antiquarunt legem: id est, vetarunt nequid crudelius in eos consuleretur. Et Cic. *lib. 1. ad Attic.* In hac causa Piso, amicitia P. Clodii ductus, operam dat, ut ea rogatio quam ipse fert, & fert ex S. C. & de religione antiquaretur: id est abrogaretur. Idem *lib. 1. epist. 14.* Cum dies venisset rogationi ex S. C. ferendæ, concursabant barbatuli juvenes, totus ille grex Catilina, duce filiela



*liola Curionis, & populum ut antiquarent rogabant. Niso autem consul, lator rogationis, idem erat dissuasor. Opere Clodiana pontes occuparant. Tabellæ ministrabantur, ita ut nulla daretur UTI ROGAS.* Tota lex in æs incidebatur, & publicè populo legenda proponebatur. Unde Ovid. 1. *Metam.*

- - - - *Nec verba minacia fixæ*

*Ære legebantur:*

Æs autem, in quo leges incidebantur, in tot tabulas secebatur, quot commodum erat. Sic duodecim tab. lex appellationem accepit: non quia duodecim tantum leges essent, sed quot totidem tabulis continebatur. Ant. August. *de leg.* Leges quas Romulus tulit ex Dionysio aliisque scriptoribus colligi possunt, quarum quasdam nonnulli ab æquo iure alienas existimarunt; inter quas ea numeratur, quâ sancivit, NE MULIERI JUS DIVORTENDI ESTO. Cum tamen viro permetteret uxorem repudiare, si stuprum commisisset, aliud ve quid peccasset. Item quâ patri summam auctoritatem potestatemque concedebat in liberos, venundandi & occidendi permittebat libertatem: ita tamen si postea ab emptore manumitteretur, in potestatem patris filius rediret; nisi tertia secuta esset venditio: ita verba legis sese habent; SI PATER TER VENUNDUIT, FILIUS A PATRE LIBER ESTO. Tulit & alias leges, quas omnes studiosè collegit Lipsius.

*Curiatas.*] Leges, quas Romulus tulit ad populum, *Curiate* a Pomponio vocantur, quia populus in triginta Curias divisus, curiatim convocatus suffragia dabat Vid. sup. Sic Centuriatæ leges dicebantur, quæ comitiis centuriatis a S. Tullio Romanorum rege institutis ferebantur: Is enim postquam censum instituisset *rem saluberrimam tanto futuro imperio*, ut inquit Livius, universum populum secundum illum censum pro fortunarum facultate divisit in Classicos & infra classem. Classicos in quinque classes divisit, classes iterum in 193, cen-

centurias: Quarum prima classis eorum fuit, qui habebant centum millia æris, id est, secundum nostram computationem mille philippeum, seu ter mille florenorum; & eorum fuerunt equitum centuriæ 18. peditum 80, 40, juniorum & totidem seniorum; juniores dicebantur, qui annum attigerant 17; seniores qui annum excefferant 46: quibus addidit duas centurias fabrorum ad machinas bellicas faciendas. Observandum vero interjecto tempore primæ hujus classis cives tantum classicos fuisse dictos, aliarum classium, ut secundæ, tertiæ, quartæ & quintæ infra classem vocatos fuisse.

Secundæ classis eorum erat, qui non habebant minus quam 75000 æris, nostrorum 750 philippeum sive 1950 florenorum, eorum fecit centurias viginti, decem juniorum, decem seniorum.

Tertia classis eorum erat, qui non infra 50000 æris vel 500 philippeos possidebant, eorum viginti centurias fecit, decem juniorum & totidem seniorum.

Quarta classis eorum erat, qui non infra 25000. æris sive 250 philip. habebant, quorum etiam 20 fuere centuriæ, decem juniorum & totidem seniorum.

Quinta classis eorum erat, qui non minus habebant quam 11000 æris, quorum fecit triginta centurias, quindecim juniorum & totidem seniorum. Qui erant infra classem, id est, qui hoc censu minus possidebant, ab omni reipub. administratione remoti erant, & jure suffragii carebant, neque militatum ire poterant; hujus generis erant *proletarii* & *capite censi*. *Proletarii* appellati, qui prole juvabant rempub. & sic dicebantur tenuissimi & pauperrimi ex plebe, non amplius quam mille quingentum æris in censum deferentes. *Capite censi* vocabantur, qui nullo aut perquam exiguo & parvo ære censebantur. Gell. Noct. Att. lib. 13. cap. 10. *Classicis* vero scilicet quinque primarum classium civibus potestatem Rex concedit secum tractandæ reipub. per *comitia*



*tia centuriata*, in quibus singulæ centuriæ suum faciebant suffragium. Verum pro hoc honore tenebantur suo sumptu ire militatum, & pro censu tributum pendere, a quibus oneribus immunes erant, qui infra classem esse dicebantur, ut *proletarii* & *capite censi*. Hæ vero centuriæ licet initio nihil commune habuerint cum *curiis* & *tribubus*, postea tamen classes tribuum partes esse inceperunt, ita ut tandem qui tribum esset adeptus, eodem tempore & classem & centuriam obtinuisset. Sig. *de antiq. jur. civ. lib. 1. cap. 4.* Centuriata comitia indicendi tres fuere causæ. *Magistratum creatio, legumlatio, & judiciorum exercitatio.* Dionys. *lib. 4.* Magistratus autem apud Romanos alii erant majores, alii minores: illi his creabantur comitiis, hi non item. Erant autem majores magistratus, *consules, prætores, censores*, eo quod majoribus fierent auspiciis. Gell. *Noct. Att. lib. 13. cap. 14.* Consules hisce comitiis creari videre est apud Liv. *lib. 1. in fin.* ubi inquit, *Duo consules comitiis centuriatis a præfecto urbis ex commentariis Servii Tullii creati sunt, L. Junius Brutus, & L. Tarquinius Collatinus.* Qui se paullo post consulatu abdicavit, propter nomen Tarquinii civitati invisum. Liv. *lib. 2. cap. 2.* Prætores illis comitiis creatos fuisse testis est Gellius. *cit. loc.* iisdem quippe auspiciis, quibus consul creari mos erat: id est, iisdem comitiis. De censoribus ita inquit *lib. 13. cap. 14. Patriciorum auspicia in duas divisa sunt potestates. Maxima sunt Consulum, Prætorum, Censorum, &c.*

Verum aliquis fortasse nobis objiciet, *Dictatorem, Interregem, Magistrum equitum*, magistratus esse majores, attamen hisce comitiis non fuisse creatos. Responderi potest hisce comitiis tantum fuisse creatos magistratus majores ordinarios, non autem extraordinarios, quales sunt illi. Creabatur *dictator* a Consule: Juebatur enim consul, si senatui videretur dictatorem dicere, suo pro arbitrio, (modo esset vir consularis.) Dictator

Etator autem dicebat magistrum equitum, qui habebat  
 summum jus in equites & *accensos*; id est, milites in  
 mortuorum locum subrogatos. Num *Proconsules* co-  
 mitiis centuriatis fuerint creati? non puto: Sed legi-  
 mus apud Livium *lib. 26. cap. 18.* Cornelium Scipio-  
 nem centuriatis proconsulem in Hispania dictum fuisse.  
 Verum responderi potest hisce comitiis P. Corne-  
 lio Scipioni non magistratum, sed solummodo imperium  
 ad bellum mandatum fuisse. Quidam enim mitteban-  
 tur ad jus in Provincia & bellum administrandum, alii  
 ad bellum tantum mittebantur, & hi non dicebantur  
 magistratus, sed esse dicebantur cum imperio: Qui  
 creari solebant tributis comitiis sine auspiciis, quare il-  
 lam Scipionis creationem extraordinariam fuisse dici-  
 mus, fortasse propter cladem acceptam in Hispania. Vid.  
 Sig. *de antiq. jur. civ. lib. 3. cap. 14.* Decemviri legum au-  
 ctiores, & *Tribuni militum consulari potestate*, hisce comi-  
 tiis etiam fuere creati. Alteram causam comitia centu-  
 riata indicendi diximus fuisse legumlationem: docet id  
 Liv. lib. 8. Leges, quæ hisce comitiis ferebantur, veræ  
 leges dicebantur, distinctæ ideoque a plebiscitis. Hinc  
 legimus *in Inst. lib. 1. tit. 2.* *Legem esse id quod populus*  
*Romanus Senatorio magistratu interrogante (veluti consule)*  
*constituebat.* Plebiscitum plebs plebeio magistratu (ve-  
 luti tribuno) constituebat. Tertia causa fuit judicio-  
 rum exercitatio. Verum notandum non omnia judi-  
 cia ad comitia centuriata pertinuisse: *Verum tantum cri-*  
*men perduellionis.* Nam *majestatis judicium* in foro a præ-  
 tore exercebatur. Perduellionis in *Campo Martio* a  
 populo. Perduelles dicuntur, qui hostili animo adversus  
 remp. vel principem animati sunt. *l. fin. ff. ad L. Jul.*  
*majest.* Hos quia populus tanquam hostes habebat, po-  
 stea hostes perduelles dicti sunt. Hinc Cajus *in l. 234.*  
*ff. de verb. sig.* inquit, quos nos hostes appellamus, eos  
 veteres perduelles appellabant. Sic *bellum* ab antiquo  
 verbo *Duellum* originem habet. Personæ autem, quibus  
 jus



jus erat convocandi comitia, erant *Consules, Praetores, Censores, Dictatores, Interreges, Tribuni militum potestate consulari, Decemviri*. Liv. lib. 10. & Dionys. passim. Verum notandum *Interreges & Censores* non in omnibus jus comitia convocandi habuisse: quippe legum ferendarum causa comitia Censores habuisse nullibi occurrit: Itaque cum legum censoriarum apud auctores fiat mentio, censorum subscriptio tantum intelligenda est: sic etiam *Interreges* neque judiciorum, neque legum causa unquam comitia habuere, cum imperii brevis eas promulgandi non permetteret. Jus suffragia ferendi omnibus compete-  
 bat, qui in centuria erant descripti, tam in urbe quam extra urbem in Italia morantes, scilicet civitate & jure suffragii donati. Locus, quo habebantur Comitia, inauguratus esse debebat, erat autem extra *pomarium* in *Campo Martio*, inauguratus locus dicitur ab *Auguribus* ad eam rem dictatus. Augures erant ejus generis sacerdotes, qui ex avium volatu & cantu, ex pullorum & gallinaceorum pastu, aliisque simillimis signis nunciabant, num res quam erant facturi, feliciter succederet, nec ne. Horum tanta Romae erat auctoritas, ut nihil majoris rei, nisi illis adhibitis, publicè privatimque gereretur. Tempus Comitii destinatum *dies comitiales* vocabantur. Sed notandum quod diebus sacrificiorum, ludorum, & feriarum, ea haberi vetitum erat: neque etiam haberi poterant nisi praemissis auspiciis. Vide Gell. lib. 13. cap. 14. Hæc de legibus, quæ Curiatis & Centuriatis comitiis ferebantur, ideo leges curiatæ & centuriatæ dictæ. Tributam legem nunquam a nemine dictam contendit Sig. lib. 3. de antiq. jur. provinc. Contra Nicol. Gruch. Lex enim, inquit, tantum curiata & centuriata dicta est. Pro tributa plebiscitum dixerunt. Plebiscitum est quasi plebis statutum: & definitur quod plebs plebejo magistratu interrogante (veluti tribuno) constituebat. §. 4. Inst. de jur. nat. gent. & civ. Et in eo differt a lege, quod

quod lex Senatorio magistratu interrogante (veluti Consule) ab universo populo lata, omnes omnino cives tam patricios & senatores, quam plebem obligaret. *Plebiscitum* vero non patricios, id est, qui ex origine senatoria erant, nec nobiles Romanos, verum plebes tantum obligabat. Differt enim in eo plebs a populo, quo species à genere: quippe appellatione populi universi cives continentur connumeratis etiam patriciis & senatoribus: plebis autem appellatione cæteri cives, exceptis patriciis & senatoribus, significantur. §. 4. *cod.* Est enim vilior pars populi: unde Cic. *pro Mil. plebs & infima multitudo.*

*Plebiscitum* igitur est lex, quam plebs, non populus accepit. Gell. *lib. 13. cap. 20.* Nam & *plebiscita* & *privilegia* translato nomine leges appellaverunt. Donec primum tandem ad tollendas discordias inter patres & plebem *L. Valerio & M. Horatio coss.* lex centuriatis comitiis lata fuerit, qua sanciebatur: *Ut quod tributim plebs jussisset, populum teneret:* quâ lege Tribuniciiis rogationibus acerrimum telum datum est. Liv. *lib. 3. cap. 55.* Deinde *Q. Hortensius* dictator post ultimam secessionem legem tulit; *Fure, quod plebs statuisset, omnes Quirites tenerentur.* Gell. *lib. 15. cap. 27.* Sig. *in fast. ab U. C. 467.* Plin. *lib. 16.* Liv. *lib. 17.* *Plebiscita* itaque deinde leges appellata fuere & universum populum tenere.

*Tulerunt & sequentes reges.* ] Sex post Romulum numerantur reges, qui, prout reipub. facies postulabat, diversas & varias tulerunt leges. Numa Pompilius imprimis, cujus inclyta religio & justitia erat, consultissimus vir, ut illa quisquam ætate poterat, omni divini humanique juris peritus. Liv. *lib. 1. cap. 18.* varias tulit leges, quarum plurimæ respiciebant rem divinam, nonnullæ quoque ad civilem societatem pertinebant; quas partim collegit Justus Lipsius, partim habet Gellius *lib. 4. cap. 3.* Plin. *nat. hist. lib. 14. cap. 12.* Dionys.



*nyf. Halicar. lib. 2.* Miror quoties illarum legum harmoniam & consonantiam, non tantum cum legibus divinis moralibus, verum etiam legibus Ebræorum ceremonialibus confidero, ita ut non in totum a vero aberrare mihi videatur, quisquis ex Mosis divini-que fontis præceptis haustas fuisse asserit. Quamobrem ipsum Numam Pompilium, quem Pythagoreum vocarunt ob disciplinæ similitudinem (quamquam non sine errore, cum multis ante Phythagoram annis eum floruisse ex *Cic. lib. 2. de orat. & Liv. lib. 1. cap. 18.* constet) a Judæis institutum, eorumque imbibisse doctrinam censet *Clemens Alexandrinus*, eamque legem, quâ cavetur, *Ne Dii cum simulacris colerentur*, ex legibus Mosaicis desumptam putat. Ita enim inquit *Strom. 1.* *Numa autem Rex Romanorum erat quidem Pythagoreus, ex iis autem, quæ a Mose tradita sunt, adjutus, prohibuit Romanis, ne homini aut animali similem Dei facerent imaginem.* Et *Plutarch. in Numa epist. 65.* *Fam hujus de statuis scita undequaque Pythagore placitorum sunt germana: Neque enim ille sensui aut dolori ulli expositum rerum principium esse, sed invisibile, incorruptum, sola mente existimavit apprehensibile, hinc vetuit Romanis, ne hominis vel bestię formam tribuerent ipsi Deo.*

Quæ lex tam sanctè Romæ servata fuit, ut in centum & septuaginta annis nullam imaginem nec effictam nec depictam fecerint: idem testatur *Clemens*. Et *Plutarch. in Numa.* *Neque fuit apud eos ante vel post picta vel ficta imago Dei, sed primos centum septuaginta annos templa extruxerunt & templa Diis: Simulacrum per id tempus nullum habuerunt, nefas esse putantes exprimere augustiora humilioribus, neque adspirari aliter ad Deum quam mente posse.* Sane inquit *Seldenus* quisquis credere velit, *libros illos septem de disciplina sapientiæ, Græcè conscriptos, in agro Petilii Scribæ circa annum ab V. C. DLXX. sub janiculo repertos, Numæ ex arcule inscriptione tributos, & postmodum Senatus jussu crematos, ipsius Numæ reverà fu-*

C

isse,

isse, is, Numam in iis, sive disciplinam aliquam Ebraicam, sive ejusdem propaginem tradidisse, non immerito forsitan existimabit. lib. 1. cap. 2. de jur. nat. & gent. Vid. Liv. lib. 40. cap. 29. Neque ulla in eis scripta fuisse, nisi Pythagoricæ disciplinæ consona tradiderunt Cassius Hermina & C. Piso. Sane si Pythagoris disciplinam redolerent, quæ istis libris continebantur, quis dubitare potest, quin illa Ebræorum doctrinæ consentanea fuerint: quippe constat Pythagoram multa eorum, quæ a Judæis recepta sunt, in suam transtulisse disciplinam. Origines adversus Celsum lib. 1. Fertur Hermippum in libro primo de legislatoribus prodidisse, Pythagoram philosophiam suam a Judeis ad Græcos traduxisse. Imo adjicit Clemens Alexandrinus eum circumcisum fuisse, & quidem ritu judaico, ut vult Laërtius de vitis philosop. lib. 8. De eodem ita Ambrosius, Cum ex populo judæorum genus Pythagoras duxerit, ut plerique arbitrantur, ex ejus disciplinâ derivavit etiam magisterii præcepta, merito magnus apud philosophos habitus, qualem, ut ajunt, vix reperis ullum.

Sic etiam lex illa, quâ cautum erat a piissimo rege Pompilio, ut quis festis diebus ab omni opere abstineret, ex iisdem divini fontis præceptis, id est, Ebræorum legibus desumpta videtur, ejusque auctorem Numam nuncupat Plutarch. in ejus vita. In profestis & omnino in Sacerdotum festis, per urbem præcones præcedebant, qui ut quiescerent & ab omni opere abstinerent jubebant. Hinc Servius ad Virgil. lib. 1. Georg. annotavit. Quod pontifices sacrificaturi, præmittere calatores suos solebant, ut ubi viderint opifices adfidentes opus suum prohibeant, ne pro negotio suo, & ipsorum oculos & ceremonias Deum attaminent, feriæ enim Deorum operæ creditæ sunt. Ex quibus perspicimus non a vero alienum videri debere, & leges & instituta quædam Numæ Pompilii ex divini fontis præceptis & Ebræorum legibus desumpta fuisse, unde illa harmonia



nia & consonantia, quam eorum cum divinis præceptis animadvertimus, originem ducit.

*Superbus Demarati Corinthii filius.*] Errat jurisconsultus quod *Tarquinium Superbum Demarati Corinthii* filium nuncupat: quippe Demarati filius non *Superbus* fuit, sed *Tarquinius Priscus*. Gothofredus ad hunc locum annotat Prisco etiam nomen Superbi tributum fuisse, ideoque *Pomponium* demonstrationis vel distinctionis causa Demarati patris adjecisse nomen, quando de Tarquinio Prisco sermonem esset habiturus. Testes citat *Livium, Victorem, Plinium*: apud Livium vel Victorem id me legisse non memini, vel Plinium id testari nullibi invenire potui: quippe quæ apud Plinium de Tarquinio Superbo occurrunt, ultimo Regi, qui jure Superbus appellatus est, applicantur. Quidam aliam invenerunt rationem, ad Pomponii errorem tegendum; scilicet *Tarquinium Superbum* non quidem fuisse Demarati Corinthii filium, verum a Tarquinio Prisco genitum, nepotem fuisse Demarati, & consequenter sub verbo *fili* satis posse comprehendi juxta *l. 84. ff. de verb. sig.* ubi inquit *ſctus Filiorum appellatione omnes liberos intelligi*; ergo & nepotes: quippe liberorum appellatione nepotes & pronepotes cæterique, qui ex his descendunt continentur. *l. 220. ff. eod.* Pomponius qui *Jctus* fuit, eadem vel scribendi vel loquendi ratione usus est, ideoque facile excusandus.

Verum notandum, quod filiorum appellatione omnes liberi continentur & consequenter nepotes & pronepotes, id ex interpretatione contigit, non ex proprietate sermonis: unde qui filiis tutorem dedit nepotibus dedisse non videtur, quia aliter filii, aliter nepotes appellantur *l. 6. ff. de testam. tut.* Cum autem in recensendis Historiis maxime verborum proprietas attendatur, alioquin semper essemus incerti, quid proderet Historia: verosimilius est Pomponium in concinnanda juris Historia idem observare voluisse: præter-

quam quod illa extensio in jure tantum quibusdam in casibus obtinet legibus expressis, ideoque ad consequentias trahi non debet. Filium enim definimus, qui ex viro & uxore ejus nascitur *l. 6. ff. de his qui sui vel alie. jur. sunt.* Non mirum videri debet Pomponium hic errasse, cum sæpissime facti in iis, quæ ad Historiam pertinent, fallant. Ita Ulpianus crasse erravit, dum a Domitia Neronis filiâ Paridem Pantomimum decem, quæ ei dederat pro libertate repetiisse, ex Neratii sententia scripsit. *l. 3. §. 5. ff. de condict. caus. dat.* Quoniam constat, Domitiam amitam Neronis filiam fuisse, ut annotavit Gothofredus, & testatur Tacitus *an-  
nal. lib. 3. cap. 19.* *Hæc Iturius & Calvisius a Timeto Domitia Neronis amita liberto aperiunt.* Iisdem erroribus obnoxius fuit ipse Cicero, ut constat ex Gellio *lib. 15. cap. 6.* *Cum Ajacem pro Hectore acceperit.* Fuit igitur Damaratus Tarquinii Prisci pater, ex nobilissimâ Bacchidarum ortus familiâ, negotiator dives, ob seditiones domo profugus, Cypseli dominationem fugiens, in Hetruriam commigravit. *Liv. lib. 1. cap. 34. Plin. nat. hist. lib. 33. cap. 3. & lib. 25. cap. 12. Cic. 5. Tusc. quest.* comparatis opibus luculentis, a Tarquinien- sibus populis benigne receptus fuit, duxitque uxorem ex illustri & generosa apud Hetruscos familia, ex quâ duos progenuit filios, Lucumonem atque Aruntem: Aruns prius quam pater moritur, nec diu manet superstes filio pater, cui Lucumo superfuit omnium bonorum hæres, *Liv. lib. 1. cap. 39.* Hic uxorem duxit Tanaquil summo loco natam, & quæ haud facile iis in quibus nata erat humiliora sineret ea quæ innupisset: itaque cum animadverteret maritum velut exulem advenâ ortum sperni ab Etruscis, ferre indignitatem non potuit: cumque ad aures ejus pervenisset fama, Romæ virtutis magis quam nativitatis rationem haberi, ibique Tatium Sabinum, Numam Pompilium, Ancum Martium omnes peregrino loco ortos ad regiæ dignitatis fastigi-  
um



um fuisse evectos, oblita ingeniti erga patriam amoris, dummodo virum honoribus auctum videret, consilium migrandi a Tarquiniis cepit: sublatis itaque rebus Romam commigrarunt & jus civitatis naëti pro Lucumone Lucii, & ab oppido Tarquiniorum Tarquinii nomen assumpsit, Prisci autem cognomen non tulit, nisi postquam L. Tarquinius Superbus florere cepisset, Sig. *in notis ad Liv.* aliquamdiu Romæ moratus, propter opes, ingenii dexteritatem, & liberaliter dextræque obeundo officia, ut inquit Liv. *lib. 1. cap. 34.* in Anci Regis amicitiam insinuatus est, voluitque Rex publicis pariter ac privatis consiliis eum interesse, imo per omnia expertus, a rege moribundo testamento liberis tutor institutus est. Quorum commodis proprias rationes anteponeus, brevi effecit, ut ingenti consensu Populus Romanus eum regnare jufferit, suæque virtute effecerit, nunquam pœnituisse Romanos, quod de finitimis potius quam de suis regem creavissent. Egredia ejus facinora, & speciosa virtutis documenta hic enarrare nimis longum foret, de iis vid. Liv. *lib. 1. cap. 34.* Dionys. Halicar. Flor. *lib. 1. cap. 5.*

---

§. 3. *Exactis deinde regibus, lege Tribunicia omnes leges hæ exoleverunt: iterumque cepit populus Romanus incerto magis jure & consuetudine ali, quam per latam legem; idque propè viginti annis passus est.*

**E***Exactis regibus*] id est, exclusis, ejectis, expulsis, quasi extra actis. Sic apud Virgil. 2. *Aeneid.* 34.  
- - - quos improba ventris.

*Exegit cecos rabies.*

& Cic. Philipp. 78. *Mimam illam suam, suas res sibi habere*

*bere jussit, ex XII. Tabb. causam addidit, exegit. Sic apud Terent. in eadem significatione occurrit in prolog. Andr.*

*Favete adesse a quo animo, & rem cognoscite,*

*Ut pernoscatis, ut quid spei sit reliquum.*

*Post has quas faciet, de integro comedias:*

*Spestanda an exigenda sint vobis prius.*

*Exigenda, id est, excludenda, quia displicent. Sic etiam Hercyr. prolog.*

*Novas qui exactas feci ut inveterascerent.*

*Et mox subjungit.*

*Partim sum earum exactus, partim vix steti.*

*Cic lib. 1. de orat. Quid in Numa Pompilio, quid in Servio Tullio, quid in ceteris regibus? quorum multa sunt eximia, ad constituendam Rempub. Quid exactis regibus? tametsi ipsam ejectionem, mente non linguâ perfectam L. Bruti esse cernimus.*

*Lege Tribunicia. ] Quænam hæc lex Tribunicia fuerit non adeo manifestum est: putat Cujacius intelligi legem, qua primum Tribunicia potestas constituta est, sed a vero aberrat; quippe Tribuni septimo decimo demum anno post ejectos reges creati sunt: & Pomponius intelligit legem, qua populus imperium regi abrogare exulemque esse juberet Lucium Tarquinium cum conjuge ac liberis.*

*Goveanus variar. lect. lib. 1. cap. 21. putat legem fuisse Terentillam a C. Terentilla Arsa Tribuno plebis promulgatam, de quinqueviris creandis, legibusque de imperio consulari scribendis. Verum & hanc opinionem amplecti nequeo, propter eandem rationem, quam statim allegavi: quippe 47 annis post libertatem adeptam hæc lex lata fuit, anno scilicet ab U.C. 291 T. Lucretio Tri-  
cipitino, & Veturio Gemino cons. Liv. lib. 3. cap. 9.*

*Si meam sententiam dicere liceat, puto duplici modo legem Tribuniciam explicari posse. Vel lex Tribunitia vocatur illa, qua populus per præconem ad L. Brutum Tribunum celerem vocatus, jussit regi Tarquinio cum*



cum conjuge ac liberis exilium indici: vel dicitur lex Tribunicia, qua populus post reges jam exactos interrogante L. Bruto Tribuno Celerum, *ne unquam Romæ alius Rex regnaret*. Hanc potius quam alteram a Pomponio intelligi puto, quoniam hac lege latâ, recte deum reges exacti dici possunt.

*Omnes hæ leges exoleverunt* ] id est, paulatim leges a regibus latæ in defuetudinem abiêre, mutatâ enim reipub. formâ, ut novæ condantur leges necesse est, quæ præsentî statui accommodantur. Verosimile attamen est populum ejecta dominatione regiâ, statim illas abrogasse leges, quæ a *Tarquinio Superbo* latæ fuerant, tanquam injustæ & perperam promulgatæ, & tyrannicam redolentes dominationem: quippe nullus dubito, quin, quemadmodum populo bellum indicendi, fædus ferendi, ita quoque leges ferendi, ceteraque jura ademerit. Hinc inquit Liv. lib. 1. cap. 49. *Regum primus traditum a prioribus morem, de omnibus Senatum consulendi solvit. Domesticis consiliis Rempub. administravit, bellum, pacem, fœdera, societates, per se ipsum cum quibus voluit, injussu populi & Senatus fecit, diremitque*. Ideoque leges illas tanquam vim suam non habentes, quoniam populi consensu, & senatus auctoritate destitutæ erant, abrogatas statim fuisse opinor. Ut & eas, quæ ad Regium imperium pertinebant. Nam quædam leges, licet a regibus promulgatæ, Reipub. tamen utiles, non modo sublata, verum & restitutæ fuere ut ex Dionys. constat. Quæ legum revocatio seu restitutio, debet considerati tanquam nova promulgatio a populo facta, ideoque licet ratione originis regiæ appellari possint, tamen omnem vim a populi consensu auctore senatu ut cæteræ leges in duodecim Tabb. translatae habent, & idem sortitæ nomen, atque merito dicit Pomponius omnes leges regias tribunicia lege exolevisse, & incerto jure populum Rom. uti cepisse; nam licet quædam leges regiæ non sublatae fuere, ut dicere inepimus,

mus, attamen legis vim non habuêre, antequam a populo approbatæ & receptæ sunt.

*Incerto juro.* ] Incertum jus vocatur, quod non scriptum, nec definitum est, verum ex arbitrio legislatoris pendet, & ab eo pro re nata & tempore, pro ut ipsi æquum videtur, constituitur.

*Prope viginti annis.* ] Errat hic iterum *Jetus* in calculo, nam quomodocunque computes, errorem invenies; sive ab exactis regibus usque ad consulatum *Lucretii* & *Veturii*, quo de quinqueviris creandis actum est, computationem incipias, numerabis 46 annos: Si ad tempus legationis spectes, quo tres legati ad leges a Græcis civitatibus petendas missi sunt, 55 annos computabis: si tempus promulgationis respicias 59 invenies; itaque quomodocunque rationes ineas, longe numerum vicenarium calculus excedet: Sed excusemus jurisconsultum, quem hominem fuisse novimus, cujus labilis sæpissime est memoria, ideoque multis erroribus obnoxia.

§. 4. *Postea ne diutius hoc fieret: placuit publica auctoritate decem constitui viros, per quos peterentur leges à Græcis civitatibus, & civitas fundaretur legibus: quas in tabulas eboreas perscriptas pro Rostris composuerunt. Ut possent leges apertius percipi datumque est iis jus eo anno in civitate summum: uti leges & corrigerent, si opus esset, & interpretarentur, neque provocatio ab iis, sicut à reliquis magistratibus, fieret.*



fieret. Qui ipse animadverterunt aliquid deesse istis primis legibus: ideoque sequenti anno alias duas ad easdem tabulas adiecerunt & ita ex accidentia appellatae sunt leges duodecim tabularum: quarum ferendarum auctorem fuisse decemviris Hermodorum quendam Ephesium, exulantem in Italia, quidam retulerunt.

**P**ublica auctoritate ] universi populi consensu, penes quem summum jus residebat; non exclusa tamen auctoritate senatus. Auctoritas erat in senatu, sicuti penes populum potestas & majestas: propterea populus sciscere & jubere dicebatur; Senatus vero censere & auctor esse. Quod constat ex Liv. lib. 1. cap. 17. Decreverunt enim, ut, cum populus regem jussisset, id sic ratum esset, si patres auctores fierent. Hodieque observatur in legibus magistratibusque rogandis idem jus, vi adempta. Ultima hæc Livii verba cum hac distinctione intelligenda sunt, scil. quod patres hoc nostro seculo, si ordine res geratur, quidem auctores fiunt, ita tamen ut si aliud jubeat populus, quam Senatui visum est, non possunt irritum reddere quod actum est, quemadmodum olim. Gronov. ad illum locum. A primo enim urbis ortu, & post exactos reges de nulla repopulus judicavit, aut suffragia tulit, nisi ex consulto senatus: prius enim jubebat populus, deinde confirmabat Senatus. Quod Livius affirmare videtur in Numa lib. 1. ubi inquit, Quirites regem create, ita patribus visum est: Patres deinde, si dignum, qui secundus a Romulo numeretur, creari-tis, auctores fient, & lib. 6. Omnium comitiorum eo anno patres auctores facti sunt. Et Alex. ab Alexand. Dier. genial. lib. 4. cap. 11. Leges quoque a populo latae, haud aliter

*aliter rata fuerunt, quam si patrum consensu approbarentur.* Verum hoc jus diu Senatus tenere non potuit. Nam de iis, quæ plebs sciverat, non Senatus, ut prius judicabat, sed depravato usu, de his quæ senatus cognoverat, populus iudex erat. *Quod patres apud maiores nostros tenere non potuerunt, ut essent reprehensores comitiorum.* Cic. pro Planc. Et Dionys. Halicar. lib. 2. ita inquit, *ferebat autem suffragia, non universus populus, sed per curias, & quicquid visum fuit pluribus curiis, id ad Senatum referebatur.* *Qui mos nostra ætate mutatus est: non enim senatus plebiscita, sed plebs Senatusconsulta suo assensu comprobat.* Factum hoc lege Mania a Monio Tribuno plebis lata, qua cavebatur ut ante initum suffragium patres auctores essent ejus rei, quam populus iussurus erat: ita fiebat ut quicquid populus iussisset, ex auctoritate patrum actum videretur: cum ante post lata suffragia patrum auctoritas requireretur. Qua lege antiqua patrum auctoritas enervata fuit, & inutilis reddita.

*Decem constitui viros.* ] Cujus rei causam attulit C. Terentius Arsa, de quo supra mentionem fecimus, qui anno ante undecimo L. Lucretio, & T. Virginio, cum consulum imperium nimium civitatisque grave contenderet, legem promulgavit de quinqueviris, qui leges consulari imperio scriberent, creandis: cui rogationi cum consules & patricii acriter repugnarent, vix post longas gravissimasque inter patricios & plebem contentiones, Romilio, Veturioque cos. in plebem militiam detrectantem impotentius se gerentibus, tandem eo ventum est, ipso Romilio auctore, ut communis quædam iniretur legum ferendarum ratio: placuit itaque ex Senatusconsulto, ut tres crearentur legati, qui à Græcis civitatibus jura peterent. Legati creati fuere Sp. Posthumius, A. Manlius, & P. Sulpitius Camerinus. Dissentit Pomponius a Livio, Dionysio aliisque fide dignis scriptoribus, dum scribit decem constitutos fuisse viros,



viros, ad leges petendas, cum tres, ut jam diximus duntaxat fuerint missi. Clarus Sylvius in suis commentariis ad *ll. xii. tab.* putat tres illos legatos ex decemviris fuisse, qua ratione aliquo modo defendi posset Pomponius; scilicet, Pomponium illos tres legatos dixisse decemviros, quia repræsentabant decemviratum & ita partem posuisse pro toto: Verum ista conciliatio admitti nequit, quoniam ex Livio luce meridiana clarius constat, quod postquam legati rediissent demum decemviros creari placuerit. Inter quos *Sp. Posthumius*, & *A. Manlius* quoque numerantur. Profecti sunt legati *Sp. Tarpejo*, & *A. Aterio* *coff.* seque Athenas contulerunt, quæ tum erat bonis moribus & institutis florentissima Atheniensium civitas, & sapientia virtuteque præstantem habebat gubernatorem *Periclem*, pauloque ante duces habuerat, belli ac pacis artibus adeo insignes, ut nominis fama non tantum mare, sed & terras impleverat, *Themistoclem*, *Aristidem*, *Cimonem*. Neque magis opportunè Athenas venire potuissent, quippe si serius venissent, non vidissent illum civitatis & reipub. florem, cum interjecto aliquo tempore, bello Peloponesiaco tam miserè lacerata & attrita fuerit, ut nunquam pristinum decus recuperare potuerit. Dionysius tradidit missos quoque legatos ad eas Græcorum civitates, quæ in Italiâ erant, in ea scilicet parte, quæ olim magna Græcia dicta est: nam & ea habebat civitates bonis moribus & institutis florentissimas. Nulla tamen earum bonis disciplinis & æquis legibus ditior erat Athenis, quare hanc potissimum elegerunt, unde jura peterent. Vigebant adhuc *Solonis* sapientissimi legislatoris *tabulæ*, quibus vel æquiores, vel honestiores excogitari nullæ poterant. Ita ut tunc temporis Atheniensis illa civitas esset quasi bonarum artium & disciplinarum officina, quæ universam Græciam erudiret: cujus mores cæteræ civitates imitarentur, & quæ nata videretur ad leges aliis populis dandas *Tucydid. lib. 2.*

Hinc

Hinc Cic. *pro Flacco*. *Adiunt Athenienses unde humanitas, doctrinaque, religio, fruges, jura, leges ortæ, atque in omnes terras distributæ putantur.* Post trium annorum decursum, *Manenio & Sestio* *coff.* legati cum legibus revertuntur: Instant Tribuni ut legum scribendarum fieret initium. Res refertur ad Senatum, Patres in utramque partem inclinantes, varias dixere sententias: quidam suis moribus, alii scripto ac certo jure rempub. tractandam esse opinabantur. Vicit tandem *Appii Claudii* sententia, qui consul in eum annum delignatus erat, & senatusconsultum factum est, ut reliquis magistratibus abrogatis, *decemviri* crearentur cum imperio consulari & regio sine provocatione, qui ex patriis moribus, legibusque etiam regiis, & peregrinis optimas seligentes nova jura conderent, quæ ubi Senatus populusque probasset, in perpetuum populum Romanum obligarent. Notandum autem omnes antiquas leges hisce legibus non fuisse abrogatas, sed quædam cum iis manserunt *Liv. lib. 6.* *Imprimis fœdera & leges* (*erant enim eæ duodecim tabulæ, & quædam regie leges.*) Sic *leges sacratas*, & legem *Iciliam* non sustulerunt *Liv. ibidem*, sed quædam leges regię in *xii. tabb.* redactæ sunt, & rescriptæ, ita ut restituantur: nec immerito quis eas vocaverit leges *xii. tabb.* quoniam iis sunt quasi restitutæ & reparatæ, nec abs re est etiam regias appellari, ratione originis *Clarus Sylvius in suis comment. ad leg. xii. tabb.* Hi decemviri decimo die singuli jus promptum & veluti ex oraculo incorruptum populo dicebant, dabantque. Interea universi legibus condendis operam dabant: donec tandem ingenti hominum exspectatione propositis decem tabulis, populum ad concionem advocarunt: & quod bonum, faustum, felixque reipub. ipsis liberisque eorum esset, ire & leges legere propositas jusserunt. Se quantum decem hominum ingeniis provideri potuerit, omnibus summis infimisque jura æquasse. Plus pollere multorum hominum



num ingenia consiliaque. Versarent in animis secum unamquamque rem, agitarent deinde sermonibus, atque in medium quid in quaque re plus minusve esset conferrent. Has leges habiturum populum Romanum, quas consensus omnium non jussisse magis quam tulisse videri posset. Quum ad rumores hominum de uno quoque legum capite edito, satis correctæ viderentur, centuriatis comitiis decem tabularum leges perlatae sunt.

*In tabulas Eboreas.*] Non Eboreas, sed æneas cum Livio & Dionysio fuisse censeo. Liv. testatur prius quam urbem egrederentur (scil. Consules ad bellum profecturi) *leges decemvirales*, quibus tab. duodecim est nomen, in æs incisas in publico proposuisse. Dionysius in bases æneas vel æreas columnas incisas scribit. Et apud Diodor. Sicul. legimus, *jura populi Romani sic absoluta*, XII. tabulis æneis inciderunt, easque pro curiis rostris adfixere. Hanc consuetudinem incidendi leges in æs affirmat quoque Plin. lib. 34. cap. 9. ubi inquit, *usus æris perpetuitatem monumentorum jam pridem translatus est, tabulis æreis in quibus publicæ constitutiones inciduntur*. Et Suetonius in *Cæsare*, *Romani veteres, suas leges ex jure decemvirali promulgatas, atque in æs incisas, in ærarium condebant*. Hinc canit Ovid. 1. *Metam.*

- - - - *Nec verba minacia fixo*

*Ære legebantur,*

Per quæ verba intelligit leges, quæ æreis tabulis inscriptæ, & loco conspicuo adfixæ, publicæ legendæ proponebantur. Unde *leges figere*, & *refigere*, pro *leges ferre* & *abrogare*

- - - - *fixit leges pretio, atque refixit.*

Virgil. *Æneid. lib. 6.* Et Cic. *Philipp. 3.* *Falsas leges C. Cæsaris nomine, & falsa decreta in æs incidenda, & in Capitolio figenda curavit.* Et idem, *acta Antonii rescindisti; leges refixisti per vim.* Sic etiam in l. 8. ff. ad L. *Ful.*

*Ful. pecul. Qui tabulam æream, leges, formamque agrorum, aut quid aliud continentem refixerit, vel quid inde mutaverit, lege peculatus tenetur.* Vetus mos incidentarum in æs constitutionum & legum, usque ad posteriorum Cæsarum tempora duravit, ut videre est in l. 2. *Cod. de frument. urb. Constant.* ubi Imperatores *Theodosius & Valentianus* jubent tabulis æneis incidi legem suam de frumento urbis *Constantinopolitaneæ*. Et in *Codice Theodosiano, lib. 11. tit. 27.* extat lex *Constantini*, qua voluit, ut *tabulis æreis, vel Cerussatis aut Lintheis mappis scripta per omnes civitates Italiæ proponatur lex, &c.*

*Pro rostris composuerunt.*] Postquam tabulæ jam compositæ & in æs incisæ erant, pro rostris proposuerunt illustri loco in foro ante *Curiam Hostiliam*, in quo loco erat extructum suggestum ex rostris navium, quas Romani ab *Antiatibus* cepissent *Liv. lib. 8. cap. 15.* *Naves Antiatium partim in navalia Romæ subductæ, partim incensæ, rostrisque earum suggestum in foro extructum, adornari placuit: Rostraque id templum appellatum.* Et *Plin. lib. 16. cap. 4.* *Ante Rostra navium tribunali præfixa fori decus erant, velut populo Romano ipsi corona imposita.* *Cic. pro lege Manil.* *In eum ipsum locum ascendere, quem majoris exuviis nauticis, & classium ornatum reliquissent.* In eo loco & leges ferri, & conciones ad populum haberi, & magistratus sedere, & clarorum virorum imagines, qui reipub. navassent operam, pro immortali gloria coli solebant. *Cic. pro Rabir.* *Si lex ferretur, convolaretis ad Rostra.* Et *Plinius.* *Concionaturi Rostra ascendeant.* Et *Cic. in Philipp.* testatur. *Q. Octavii clari & magni viri, qui prius in familiam, que postea viris fortissimis floruit, consulatum attulit, statuam videmus in rostris.* Hasce tabulas pro rostris incolumi sculptura propositas, sua adhuc ætate perdurasse scribit *Diodorus Siculus, lib. 12.* qui Augusti vixit temporibus. Imo *Cyprianus* plusquam ducentis post eum annis, referen-



te Balduino in *lib. de leg. xii. tabb.* suo tempore nondum expunctas fuisse testatur, in *lib. 2. epist. 2. ad Donatum*, cum ita scribit. *Incise sint licet leges xii. tabulis, & publico are prefixo jura perscripta sint, inter leges ipsas delinquitur, inter jura peccatur: innocentia nec illic ubi defenditur, reservatur.*

*Jus eo anno in civitate summum.*] Summum jus vel summam habere potestatem in civitate ille dicitur, cujus actus alterius juri vel potestati non subsunt, ita ut alterius voluntatis humanæ arbitrio irriti possent reddi. Grot. *de jur. bel. & pac. lib. 1. cap. 3.* qualis fuit potestas decemvirorum, utpote qui dissolutis omnibus magistratibus, & ad populum provocandi jure, illustrissima summæ potestatis nota, sublato, absolute, nullum superiorem agnoscentes, rempub. tractabant. Hinc leges corrigendi & interpretandi jus apud eos, tanquam summa potestate ornatos, residebat. *Jus enim* (inquit Pomponius) *eo anno in civitate summum eis datum est: ut leges corrigerent si opus esset, & interpretarentur.* Quemadmodum condere & ferre leges, ita eas interpretari & corrigere, summi imperantis est. *Si enim in presenti condere leges soli imperatori concessum est: & leges interpretari, solo dignum imperio esse oportet:* inquit Justinianus in *leg. ult. Cod. de leg.*

*Neque provocatio ab eis.*] Merito inquit Pomponius summum decemviris jus in civitate fuisse datum, quia ab eis sicut a reliquis magistratibus provocatio nulla concedebatur. *Placet* inquit Liv. *lib. 3. cap. 32. creari decemviros sine provocatione.* Imo quidam ampliores habuisse potestatem, atque olim ipsi Reges, licet eximio pollebant imperio volunt. Quippe ab ipsis provocandi ad populum jus fuisse docere nos voluisse videtur Liv. in judicio Horatiano *lib. 1.* & Dionys. Halicarnasseus *lib. 3.* Quæ provocatio meo judicio non debet considerari tanquam jus populo quæsitum, verum tanquam spontanea & ex libera regis voluntate profecta concessio.

Quippe

Quippe constat summam potestatem, ut superius diximus liberumque nullisque legibus circumscriptum imperium habuisse Romanos reges, atque in eorum manu, ut Pomponius loquitur, omnia fuisse. Hinc Dionysius *lib. 2.* sermonem habens de Romuli legibus atque institutis, testatur eum legum & juris custodiam judiciaque criminalia penes se & sequentes reges retinuisse. Dissentiunt a se invicem hic scriptores. Tradit Liv. *lib. 1.* Horatium ad regem Tullum Hostilium raptum in jus fuisse, verum Regem, ne ipse tam tristis ingratiue ad vulgus iudicii, ac secundum iudicium supplicii auctor esset, concilio populi advocato, *dum viros, qui Horatio perduellionem iudicarent, fecisse.* Dionysius Halicarnasensis testatur Regem Tullum Hostilium cognitionem criminis suscepisse, verum cum neque condemnare vellet civem, qui optime de repub. meritus erat, neque nocentem absolvere, eam cognitionem ad populum remisisset. Valerius sibi non constat *lib. 6. cap. 2.* refert enim Horatium cum sororem suam virginem Curatii sponsi mortem profusus quam illa ætas debebat flentem vidisset, gladio, quo patriæ rem bene gesserat interemisse, *hoc nomine reum ad populum actum fuisse*, nullam de rege mentionem faciens. Cum *lib. 8. cap. 1. n. 1.* tradit M. Horatium interfecta sororis crimine a Tullo rege damnatum, *ad populum provocato iudicio absolutum fuisse.* Quibus ex verbis perspicimus cognitionem sive criminale Horatianum iudicium quidem pertinuisse ad regem, verum à rege ad populum provocandi jus reo fuisse, idque scripserat Tullius in libris de repub. referente Seneca *epist. 108.* Ciceronis libros de Republica, inquit, *cum prehendit philologus, provocationem ad populum etiam a regibus fuisse notat.* Et M. Fabius apud Liv. *lib. 8. cap. 33.* ad dictatorem orationem habens. *Quandoquidem* (inquit) *apud te nec auctoritas senatus, nec ætas mea, cui orbitatem paras, nec virtus nobilitasque magistri equitum a te ipso nominati valet: nec preces, quæ sæpe hostes mitigavêre,*  
*quæ*



que deorum iras placant : tribunos plebis appello , & provo-  
co ad populum , eumque tibi fugienti exercitus tui , fugienti  
senatus judicium , judicem fero , qui certe unus plusquam tua  
dictatura potest polletque ; videro cessurusne provocationi sis ,  
cui rex Romanus Tullus Hostilius cessit. Videamus quo pacto  
hæc omnia conciliari possunt. Quippe , ut superius ex  
Dionysio retulimus , constat , penes reges summum fuisse  
imperium potestatemque adnadvertendi in homines  
facinorosos , rerumque criminalium cognitionem & ju-  
dicium habuisse ; idque a se ipsis , nullo interveniente  
populi consensu vel suffragio : nam ut Pomponius testa-  
tur *l. 2. ff. de orig. jur. §. 19. initio urbis omnem reges po-  
testatem habuere*. Et Liv. lib. 2. tradit Tarquinium Super-  
bum cognitionem rerum criminalium per se solum ac sine con-  
silio exercuisse , perque eam causam occidere , in exilium agere ,  
bonis mulctare potuisse. Itaque quum omnis populus in  
principes potestatem , quæ merum imperium , & judicia  
criminalia amplectitur , ut videre est in *l. 3. ff. de juris-  
dict.* contulerit quorsum ad populum provocatio ? Ve-  
rum si diligenter examinemus , quæ supra allegati scripto-  
res de rege ad populum provocatione tradunt , facile ex  
illis colligimus , Horatianæ cædis cognitionem ad regem  
Tullum quidem pertinuisse , ut & ad reges sequentes ju-  
dicia criminalia spectarunt , verum ne tam tristis ingra-  
tique judicii invidiam ad populum subiret , vel auctor  
esset subvertendi judicii si absolvisset , Tullo Regi op-  
timum factu visum eam cognitionem ad populum re-  
ferre. Tradit Livius concilio populi advocato duum-  
viros creasse regem Tullum Hostilium , qui Horatio  
secundum legem perduellionem judicarent. Quod idem  
est ac si ipse cognitionem susceperit , quippe quod ad se  
pertinebat , duumviris demandavit , qui sua vice funge-  
rentur , quod quis enim per alium facit per se fecisse  
videtur. Dionysius nullam quidem de concilio a Tullo  
Rege convocato , neque de duumviris , quibus cognitio-  
nem de Horatiana cæde demandavit , sive de provocatio-

ne mentionem facit, verum regem ipsum primo suscepisse cognitionem, & tandem post longam hæsitacionem ipsi visum factu optimum eam ad populum referre propter rationem jam dictam. Ideoque Regem criminales jurisdictionem sive merum imperium habuisse privative ut ita dicam a se ipso, quamobrem post admissum facinus statim raptum Horatium ad regem fuisse affirmat Liv. in eo cum Dionysio consentit. Verum minus accurate formam procedendi a rege Tullo Hostilio adhibitam describit, quam cum omnibus suis circumstantiis tradere nobis voluit Livius. Atque parum interest an per viam provocandi a duumviris, vel directè a rege ad populum per provocationem causæ cognitio delata fuerit: Dummodo probemus populum de Horatiana cæde judicium non habuisse, nisi interveniente consensu regis, & quod Dionysius minus dicit hoc petendum & supplendum ex Livio; non inter se pugnant magis & minus. Et eo sensu intelligenda, quæ tradit Valerius *cap. 1. lib. 8. M. Horatium interfectæ sororis crimine a Tullo rege damnatum*. Nulla mentione duumvirorum facta, quamvis *cap. 2. lib. 6.* nullum de rege habens sermonem, dicit *hoc nomine apud populum reum actum Horatium*. Scil. permittente & volente Tullo Hostilio, cujus consensus & permissionis rationem jam supra ex Dionys. & Liv. perspeximus. Itaque spontè & voluntario cessit Tullus Hostilius provocationi. Quippe Horatio regem auctorem fuisse, ut ad populum provocaret, constat ex iis, quæ a Liv. & Dionys.arrantur, *Accesserat lictor, injiciebatque laqueum. Tum Horatius, auctore Tullo clemente legis interprete, Provoco inquit.* Liv. citato loco. Itaque quod semel contigit in judicio Horatiano, principe volente, ex eo non deducere possumus jus aliquod populo quæsitum, quo ipsi cognitionem rerum criminalium per provocationes competere affirmare quis vellet; consensus enim ultra illum casum singularem extendi nequit, nisi accedat ipsius principis benigna interpretatio. Ex quibus concludimus pro-



provocandi ad populum sub regibus nisi speciali consensu principis jus non fuisse, cujus exemplum nulum, nisi illud Horatii apud autores tempore regum occurrit, quod me legisse memini. Sed possint nobis obijci illa, quæ M. Fabius dictatorem alloquens proferit, cum inquit *Videro cessurusne provocationi sis? Cui Rex Romanus Tullus Hostilius cessit.* Ubi Regem Romanum comparat dictatori, quem ex Livio patet cessisse provocationi. Sponte autem an necessario id factum dubitari posset. Notandum olim a dictatore non magis atque a rege non consentiente provocari licitum fuisse. Liv. lib. 2. quod & Festus affirmat cum inquit. *Optima lege cum dicebatur, in magistro populi faciendo, qui vulgo dictator appellatur, quam plenissimum posset jus significabatur, ut fuit M. Valerii, M. Fabii Volusinae gentis, qui primus magister a populo creatus est. Postquam vero provocatio ab eo magistratu ad populum data est, quæ antea non erat, desitum est dici, eum optima lege esse, utpote imminuto jure priorum magistratuum.* Ex quibus verbis respondebimus olim ante legem Valeriam de provocatione, a dictatore provocari non licuisse, post latam autem legem illam Valerii generalem, *ne quis ullum magistratum sine provocatione crearet. Qui creasset eum jus fasque esset occidi, neve ea cedes noxæ haberetur.* Liv. lib. 3. (specialis autem lex qua cautum fuit, *ne dictatorem quis sine provocatione crearet*, nullibi quod memini reperitur) provocari licuisse, dicendum ideoque quod ante jus illud novum, cujus mentionem facit Festus, fuit voluntatis, postea fuit necessitatis. Sed quare non ab ea lege Valerii exceptum atque solutum fuisse dictatorem, ideoque sponte ut reges cessisse provocationi dicemus propter ea, quæ Titum Quintum Consulem apud Livium ita in senatu differentem legimus lib. 4. *Consules immerito increpari, qui constricti legibus de provocatione ad dissolvendum imperium latis, nequaquam tantum virium, in magistratu ad eam rem pro atrocitate vindicandam, quan-*

tum animi haberent. Opus esse non solum forti viro, sed etiam libero exolutoque legum vinculis, itaque se dictatorem L. Quintum dicturum, ibi animum parem tanti potestati esse. Dicere possumus legem Valeriam vetuisse ne quis magistratum scil. ordinarium ut consulem, sine provocatione crearet. Ita supra demonstravimus Comitii Centuriatis creatos fuisse magistratus, scil. ordinarios, ut *consules, praetores, censores*. Dictatorem vero voce magistratus respectu creationis non contineri, quia erat extraordinarius, ideoque hisce quoque comitiis non creabatur. Verosimile enim est, quia Dictator non erat magistratus ordinarius, verum in summa reipub. necessitate creabatur, quando bellis intestinis & seditionibus jactata, necesse erat illi per unum consuli, omnibus legibus majorem potestatem habens, cæteris magistratibus cessantibus speciali aliqua lege datum provocandi a dictatore jus fuisse. Idque eo magis quod illa provocandi libertatem dolet Tullius tanquam legum omnium dissolutionem, quæ adhortabatur adolescentes & cives, *ut turbulenti, ut seditiosi, ut perniciosi esse velint*. Itaque vix credere possum ab eo magistratu, qui creabatur ut seditio, bella intestina e reipub. tollerentur, provocandi licentiam, eorum incommodorum causam, ulla lege datam reis fuisse, saltem nulla specialis lex extat. Et diserte Pomponius §. 18. testatur a dictatoribus provocandi jus non fuisse indistinctè, & quidem eo tempore, quo appellatio a dictatore erat ex mente Festi. Itaque concludimus, argumento a dictatore ad regem non probari a regibus provocandi jus fuisse. Verum ab uno & altero provocari jure non potuisse putamus, donec fortioribus argumentis & rationibus victus, contrariam sententiam amplecti cogor.

*Leges duodecim tabb.] Non est mea auctoritas tanta, meo ut testimonio valde commendari, meisque nunc verbis ornari, sicut merentur, possint, inquit Balduin. in comment. ad LL.*



*LL. XII, tabb.* Hæc leges veteres appellat Cajus in principio *h. t.* Et in *l. 1. ff. de petit. hered.* *Antiquam legem* vocat Antoninus Imperator in *l. 1. Cod. de except.* *Legum fontes* appellantur a Cicerone. A Livio *lib. 3. cap. 34.* *Fons omnis publici privatique juris. Finis equi juris* a Tacito vocatur. Præclarum vero extat testimonium Crassi apud Ciceronem *1. de orat.* ubi ita inquit. *Sive quem hæc aliena studia delectant, plurima est in omni jure & in pontificum libris, & in duodecim tabulis antiquitatis effigies. Quod & verborum prisca vetustas cognoscitur & actionum genera quedam majorum consuetudinem vitamque declarant. Sive quis civilem scientiam contempletur, quam Scævola non putat oratoris esse propriam: sed cujusdam ex alio genere prudentiæ, totam hanc descriptis omnibus civitatis utilitatibus ac partibus XII. tabb. contineri videbitis. Sive quem ista præpotens & gloriosa philosophia delectat, hospice habet fontes omnium disputationum suarum, quæ jure civili & legibus continentur. Fremant omnes licet, dicam quod sentio bibliothecas me herculè omnium philosophorum unus mihi videtur XII. tabb. libellus, si quis legum fontes & capita viderit & auctoritate & pondere & utilitatis ubertate superare. Imo tantam olim existimarunt earum utilitatem, ut ipsi etiam pueri male instituti videbantur, nisi a teneris annis hæc imbibissent, atque memoriæ mandassent. Testatur Cicero adhuc puerum hisce ediscendis continuo sese applicasse, & cum jam ad provectiorem pervenisset ætatem, & multo rerum usu esset prudens, sibi eo nomine gratulatur, & dolet alios in hac re esse negligentiores. Discebamus (inquit) duodecim ut carmen necessarium, quas jam nemo discit, lib. 2. de ll. cap. 23. Ferunt Favorinum quoque philosophum solitum dixisse, sese non minus leges duodecim tabularum legisse, quam Platonis decem libros de legibus, Gell, lib. 10. cap. 1. Et merito talibus de-*

corantur laudibus, hisce enim universi juris divini humanique partes comprehensæ sunt, unde canit Ausonius

*Fus triplex, tabula quod ter sanxere quaterne,*

*Sacrum, privatum, & populi commune quod usquam est.* Unde factum est propter juris præstantiam, cum quid in lege scriptum esse diceretur, de XII. tabb. intelligatur: & legitimæ hæreditates, & legitimæ tutelæ appellarentur, quæ legibus duodecim constituerentur, & legis actiones, quæ ex iis originem habebant. Sig. lib. I. cap. 6. de antiq. jur. civ. Rom.

*Quarum ferendarum auctorem fuisse decemviris Hermodorum quendam Ephesium, in Italiâ exulantem, quidam retulerunt.*] Hujus Hermodori Ephesi neque Dionysius, neque Livius mentionem faciunt: Pomponius hanc Historiam neque affirmat, neque negat, verum refert tantum, quæ alii de hac re tradiderunt, propterea fortasse, quod huic relationi fidem habere non potuerit: quippe illarum legum aliam occasionem & compositionem paulo ante prodiderat, cujus etiam Livius & Dionysius meminerunt. Fuit autem iste Hermodorus, ut Strabo, Diogenes Laërtius, Plinius reliquere, vir singulari probitate insignis, ab Ephesiis vitiis inquinatissimis, ideoque neminem frugi vivere tolerantibus, ut inquit Alex. ab Alex. lib. 5. cap. 18. *dier. genial.* urbe exactus, quod neminem ipsorum inaequalem esse, id est, ceteris excellere vellent, ut testatur Diog. Laërt. in *Heraclito Ephesio*. Unde Cic. lib. 5. *Tusc.* Est apud *Heraclitum physicum de principe Ephesiorum Hermodoro*; universos ait Ephesios morte mulctandos, quod cum civitate expellerent Hermodorum, ita locuti sunt: *nemo de nobis unus excellat, sed si quis extiterit, alio in loco & apud alios sit.* Et apud Strab. lib. 14. pag. 42. legimus sequentia. *Viri in ea memorabiles nati sunt, antiquis temporibus Heraclytus qui Scoteinus, id est, tenebricosus fuit cognominatus ob obscuritatem sermonis: & Hermodorus, de quo sic Heraclytus.*  
Digni



*Digni sunt Ephesii, qui ad puerum usque strangulentur, quod Hermodorum virum inter ipsos frugi ejecerunt, addito, nemo nostrum frugi esto, aut alibi id esto, aut inter alios: postea autem subjungit, is Hermodorus videtur quasdam leges Romanis scripsisse.*

*§. 5. His legibus latis, cœpit ut naturaliter evenire solet, ut interpretatio desideraret prudentium auctoritate necessariam esse disputationem fori. Hæc disputatio, & hoc jus, quod sine scripto venit, compositum a prudentibus, propria parte aliqua non appellatur, ut ceteræ partes juris suis nominibus designantur, datis propriis nominibus ceteris partibus: sed communi appellatur jus civile.*

**C***œpit ut naturaliter evenire solet, &c.] Hunc locum corruptum Goveanus ita restituit lib. 1. variar. lect. cap. 4. iis legibus latis, caput ut naturaliter evenire solet, ut interpretatio desideret prudentium auctoritatem, necessaria esse disputatio fori. Sensus est, quoniam mirifica quædam leges XII tabb. implicabat obscuritas, Gell. lib. 20. cap. 1. aliqua interpretatione indigebant; cum autem in iis interpretandis non omnia una erat sententia (quippe secundum Terentianum illud, Quot homines, tot sententia, suus cuique mos.*

*Mille hominum species, & rerum discolor usus,*

*Velle suum cuique est, nec voto vivitur uno.*

*Canit Persius Satyr. 5.)*

factum est, quod naturaliter evenire solet, ex naturali rerum ipsarum necessitate, ut ea interpretatio viro- rum ingenio & doctrina præstantium auctoritatem requireret, ut quædam interpretatio seu quoddam jus certum esset, quod sequi posset; ut vero ea prudentium auctoritas adhiberetur, fori disputationem invehere necesse erat, quæ efficeret ut prudentium interventus desideraretur, qui, ut inquit, Cic. 1. *de orat. legum consuetudinisque ejus, quâ privati in civitate uterentur, & ad respondendum, & ad agendum, & ad cavendum periti essent*: ex quorum consilio & auctoritate jus redderetur. Ex illis igitur multi prudentiâ longo rerum usu comparatâ, & juris peritiâ conspicui, ad eas populo interpretandas se contulerunt, & capita inter se conferentes fori disputationem introduxerunt. Sig. lib. 1. cap. 6. *de antiq. jur. civ.* Disputationem hanc non modo inter litigatores, sed nonnunquam inter ipsos etiam prudentes fuisse credendum est, donec post multas varietates tandem apparuit quid prudentibus, & peritioribus magis probaretur. Fab. *in rational. lib. 1. cap. 2.* Hinc est, quod Hermog. *in l. fin. ff. pro legato.* inquit, *pro legato usucapit, cui recte legatum relictum est. Sed & si non jure legatum relinquatur, vel legatum ademptum est, pro legato usucapi, post magnas varietates obtinuit.* vid. etiam l. 32. ff. *de oblig. & act.* ubi eadem phrasis occurrit.

*Quod sine scripto venit.*] Sine scripto venire jus dicitur, quod non a scripto, quemadmodum jus scriptum, sumebat auctoritatem, sed a prudentum solummodo eruditione & dignitate. Imperator Justinianus jus universum in duas describit partes, *in scriptum*, & *non scriptum*, scriptum vocat legem, non scriptum consuetudinem seu mores §. 3. *inst. de jur. Nat. gent. & civ. l. 32. ff. de leg.* Verum notandum, quod etiamsi lex opponatur juri non scripto, attamen scripturam ad essentiam legis minime pertinere, sed eam ab expressa voluntate & sanctione summi imperantis dependere. Lex enim



enim est decretum summæ potestatis, quæ plerumque quidem scribitur, ut eo facilius innotescat populo, verum & lex est antequam scribitur, modo constat de voluntate ejus, qui ferendi legem jus habet. Confirmant id evidentissimè Lacedemoniorum leges, quæ licet non erant scriptæ, attamen leges vocabantur. Contra quam responsa prudentum in scripturam redigebantur, & vel litigatoribus signata dabantur, vel iudicibus ipsis scribebantur, tamen jus non scriptum vocabantur. Verum quare lex jus scriptum dicitur? scilicet, quia Romani leges scribere, & scriptas promulgare solebant, id est, in tabulis incisas publicè proponere, quemadmodum leges XI I tabb. in æs incisæ pro rostris publicè proponebantur, ut ab omnibus possent videri, & uni cuique constare quid legibus sanciebatur: Quemadmodum itaque Justinianus jus scriptum sive legem opponit consuetudini seu juri non scripto, sic Pomponius prudentum responsa opponit legibus XI I tabb. quibus illa tempestate *jus scriptum* continebatur; utpote quibus omnia requisita applicari possunt, quæ legibus seu juri scripto tribui solent. Verum posset nobis objici, a Justiniano responsa prudentum inter partes juris civilis scripti quoque numerari, ut videre est in §. 3. *inst. de jur. nat. gent. & civ.* Sed responderi mihi posse videtur, initio inspecto, jus hoc scil. prudentium responsa sine scripto venisse; verum interjecto tempore potestas respondendi de jure jurisprudentibus a Cæsaribus concessa fuit, eorum responsa pars Juris civilis esse cæperunt, præsertim cum Theodosius vim legis ipsis tribuerit *l. 1. Cod. Theod. de respon. prud.* & deinde Justinianus vicem legis obtinere voluerit, & juri scripto annumerari. *l. 1. §. 6. Cod. de veter. jur. enucl.*

*Compositum a prudentibus.*] Occurrit hic nobis quæstio examinanda: An quædam sit statuenda differentia inter *jurisperitum*, & *jurisprudentem*. Affirmat Conring. in opere de *Fin. imp. exer.* Jurisperitum re-

Etius vocari eum, quem quidem juris, quod in repub.  
 obtinet & observatur, non fugit notitia, verum ignorat  
 num illud reipub. expediat nec ne: jurisprudentem au-  
 tem illum esse, qui non tantum jus novit, sed etiam  
 quid reipub. utile est, ejusque conservationi inservit,  
 quid iterum huic nocet, providit, & proinde leges  
 præsentis reipub. statui consentaneas ferre sollicitus est.  
 Alii in contrariam adducti opinionem, omne discrimen  
 rejiciunt, moti §. 8. *inst. de jur. nat. gent. & civ.* Alii  
 iterum distinctione litem dirimere conantur, quorum  
 in numero habetur Amad. Echolt. *in comment. ad pand.*  
*lib. 1. cap. 2.* ubi distinguit inter juris publici pruden-  
 tiam, quæ jus statum reipub. ejusque gubernationem ac  
 conservationem concernens, applicatur illis negotiis &  
 actionibus, quæ directè ad reipub. statum pertinent,  
 & inter juris privati prudentiam, quâ jus negotia ci-  
 vium privata dirigens, ad istiusmodi negotia accomoda-  
 tur. Verum quid de jurisconsulto & jurisperito dicemus  
 Frantzius *in comment. ad D. lib. 1. cap. 2.* statuit; nimir:  
 quod etsi jurisconsultus quoque sit jurisperitus, propriè  
 tamen a jurisperito differre, quod olim jurisconsulti  
 vocabantur antecessores, qui jus publicè profitebantur,  
 & studiosi juris, qui & candidati, iique plerumque ad-  
 fectores erant. *l. 1. §. 1. Cod. de assess. l. 2. ff. quod quis-*  
*que jur. in alter.* vel etiam libris seu orationibus princi-  
 palibus legendis vacabant *l. unic. ff. de offic. quæst.* juris-  
 periti autem erant pragmatici, qui & formularii & le-  
 guleji vocabantur, propterea quod in formulis com-  
 ponendis occupati erant, & quasi mercenarii, Echolt.  
*cit. loc.* Verum hæc differentia mihi a quibusdam ex-  
 cogitata potius videtur, quam solidis rationibus sub-  
 nixa; neque in corpore nostro juris, neque apud ullos  
 probatæ notæ antiquorum monumentorum scriptores  
 ullum hujus differentię extat vestigium: Verum con-  
 tra promiscuè hisce denominationibus utuntur, & ean-  
 dem illis significationem tribuunt, patet illud ex hoc  
 nostro



nostro titulo, cujus explicationi incumbimus, §. 3. ubi auctores & conditores juris civilis à Pomponio jurisperiti vocantur, quos in hoc paragrapho prudentes appellat, *Constare jus non posse (inquit) nisi aliquis sit jurisperitus, per quem possit quotidie in melius produci.* Sic etiam Cic. 1. de orat. *legum consuetudinisque ejus, qua privati uterentur in civitate, & ad respondendum, & ad agendum, & ad cavendum periti essent.* Quem hic peritum vocat, alio loco iterum appellat jurisconsultum, ut 3. de orat. *De jure pradiorum sancitum est apud nos jure civili, ut in his vendendis vitia etiam dicerentur, quae nota essent venditori: nam cum XII tabb. satis cautum erat, ea praestari, quae essent lingua nuncupata; quae qui inficiatus esset, duplici poenam subiret, a jurisconsulti reticentiae poena est constituta.* Et in orat. pro Murcen. *Possent agi lege necne, pauci quondam sciebant: fastos enim vulgo non habebant; erant in magna potentia qui consulebantur, a quibus etiam dies tanquam a Chaldeis petebantur: Juventus & scriba, quidam Cn. Flavius, qui cornicum oculos confixerit, & singulis diebus ediscendos fastos populo proposuerit, & ab ipsis cautis jurisconsultis eorum sapientiam compilarit.* Et vid. l. 40. ff. de reb. Cred. *Lecta est (inquit) in auditorio Aemilii Papiniani jurisconsulti cautio, &c.* Quod jurisperitos propriè leguleios, & formularios vocari nonnulli statuunt a vero alienum est, ut patet ex Cicerone 1. de orat. ubi traditurus definitionem jurisconsulti, ita inquit. *Jurisconsultus ipse per se nihil nisi legulejus quidam cautus & acutus, praeo actionum, cantor formularum, & anceps syllabarum.* Verum notandum hic falsè Ciceronem exagitare formularem istam jurisprudentiam, cui nonnulli sese applicabant ex jurisconsultorum sive jurisperitorum turba, qui juris disciplina abutentes, linguam & doctrinam venalem habebant. Veram autem & sublimiorem jurisprudentiam laudibus ornat, & semper ejus magna fuit Ciceroni commendatio. Hinc 2. off. inquit, *Cum multa praeclara majorum,*

*rum, tum quod optimè constituti juris civilis summo semper in honore fuit cognitio atque interpretatio. Et in orat. pro Cæcinn. Nihil, ait, in civitate tam diligenter retinendum, quam jus civile; quo sublato nihil cuique exploratum esse potest, quid suum, quid alienum sit.*

Sed ad rem redeamus, quid fuit munus jurisprudentis, quam vel iudicibus, vel partibus de jure consulentibus respondere, quamobrem Imperator §. 8. *inst. de jur. nat. gent. & civ.* responsa prudentum vocat sententias, & opiniones eorum, quibus permissum erat de jure respondere, nonne idem fuit munus jurisconsulti, unde Cicero 1. *de orat. domum jurisconsultorum oraculum civitatis* vocat.

§. 6. *Deinde ex his legibus, eodem tempore ferè, actiones compositæ sunt; quibus inter se homines disceptarent, quas actiones ne populus, prout vellet, institueret, certas solemnesque esse voluerunt, & appellatur hæc pars juris legis actiones, id est legitimæ actiones. Et ita eodem ferè tempore tria hæc jura nata sunt; leges duodecim tabularum: ex his fluere cœpit jus civile: ex iisdem legis actiones compositæ sunt. Omnium tamen harum & interpretandi scientia & actiones, apud Collegium Pontificum erant; ex quibus constituebatur, quis quoquo anno præset privatis, & ferè populus annis propè centum hac consuetudine usus est.*

*Actiones*



**A**ctiones compositæ sunt.] Miror hic tam multos viros eruditos cæcutire, ut contendant omnes actiones & quoad formulæ solennitatem, & quoad originem ex jure civili esse: jure gentium olim nullas fuisse actiones, testemque citant Pomponium, qui in hoc §. affirmat, ex ll. XII tabb. descendisse, quorum in numero sunt BARTOLUS, SALICETUS, JASON, ANTONIUS FABER in *Rationalibus*, aliique magni viri. Quis adeo stupidus esse potest, ut non videat Pomponium hic loqui de forma juris Romani propria, quæ a prudentibus inventa, & excogitata est, compositis certis ac solennibus quibusdam formulis, quibus virtute legis XII tabb. quisque rem suam persequi judicio posset, quod satis confirmat verbum *componere*, quo solennitas aliqua significatur. Præterquam quod ab omni ratione, & recta legum interpretatione alienum esset, si statueremus, omnia, quæ ex ll. XII. tabb. descendunt, ex jure civili originem habere: cum satis distincte dicatur in §. 41. *inst. de rer. divis. Quamquam caveatur ex ll. XII. tabb. tamen recte dicitur jure gentium, id est, jure naturali effici.* Sic jus patriæ potestatis civium Romanorum esse dicitur §. 2. *inst. de patr. potest.* quatenus scilicet Romani singularia quædam jura sive commoda patri in liberos tribuerunt concesseruntque, originem vero ejus juri naturali adscribendam esse neminem hominem negaturum mihi persuadeo. Imo quam multa ll. XII tabb. capita, ex purissimo juris naturalis fonte hausta sunt, quæ juris civilis dicuntur, quod civitas Romana ea sibi fecit propria constituitque, qualis dispositio non rem ipsam mutat, sed alienam ei tantummodo induit formam. Quamobrem vero magis, & rectæ rationi consentaneam eorum opinionem existimo, qui actiones ex jure naturæ seu gentium dimanasse statuunt, eodemque jure provenisse, quo obligationes natæ sunt; frustra enim fuit hominum inter se invicem obligatio, nisi cuique esset facultas persequendi,

sequendi, quod obligatione sibi quis acquisiverat, quam persecutionem actionem appellari luce clarius constat. Actio enim ab imperatore Justiniano definitur §. 1. *inst. de action. Jus persequendi in judicio quod sibi debetur*. Quod ut evidentius contaret lectori, non inutile fore judicavimus, ut rem paulo altius repetamus. Superius, ubi de origine societatis vel civitatis disputavimus, diximus mortales, antequam in civilem societatem coivissent, segreges in familias divisos, vitam traduxisse, cujus familiæ caput ac princeps erat paterfamilias, qui summo imperio eoque monarchico ornatus, summæ rerum præerat, jussa dabat, leges ad familiæ seu parvæ civitatis salutem pertinentes, ferebat, quibus uxor, liberi, servi, familiæ membra morem gerere, & secundum ea actiones, & negotia dirigere ac formare obligabantur: quædam autem obligationes immediatè ex legibus naturalibus descendebant, quædam factò eorum, qui familiam constituebant, interveniente: omnes autem producebant actionem, si actio erat institutenda, coram patrefamilias ventilari debebat, tanquam supremo judice; quæ actiones quodam respectu civiles etiam vocari poterant, tanquam ex eo jure profectæ, quod familiæ gubernator (quam tanquam parvam rempub. seu civitatem, consideramus) proprium sibi fecerat. Imo consideremus homines nullius imperio subjectos, suo viventes arbitrio, ideoque tot principes, quot homines, tamen in illo statu naturali efficere nequirent, ne leges naturales sibi locum vindicarent. Ex illis autem multæ & variæ profluunt obligationes, quarum quædam vocantur mutuæ, quædam non mutuæ: non mutua vocatur obligatio, quando unus alteri quidem aliquid præstare tenetur, ita tamen, ut in illo altero, cui quid debetur, nulla sit obligatio isti respondens, & adæquipollens aliquid præstandum adstringens, cujus naturæ sunt obligationes hominum erga Deum. Obligationes vocantur mutuæ, quæ sibi invicem respondent, ita ut in eo, cui quid ex obligatione debetur, alia



fit obligatio, cujus intuitu vicissim alteri quid præstare debeat, Puffend. *de jur. nat. & gent.* Et vix aliqua extat lex naturæ, quæ non reciprocam continet obligationem, exceptis iis, quæ Deum respiciunt. Illæ autem obligationes ex legibus naturalibus descendentes unicuique tribuunt jus (quatenus leges homini tanquam animali rationali, & sociabili applicantur) persequendi quod ex istis obligationibus alter alteri ut socio, & ejusdem conditionis participi debetur, quæ persecutio revera actio est, iudex autem Conscientia. Verum, ut superius notavimus, quædam obligationes immediate ex legibus descendunt, quædam ex facto & actionibus hominum proveniunt. Quæ immediate a lege producuntur, vel ejusmodi sunt, ut, si quis adimplere declinat, quæ ab ipso secundum obligationis tenorem peto, vim adhibere mihi liceat: quale jus competit parentibus in liberos ex obligatione naturali, quâ liberi tenentur obedientiam præstare genitoribus, marito in uxorem ex obligatione, qua adstricta est ipsi exhibere debita officia: vel ejusmodi sunt conditionis, ut tametsi lex quædam jubeat, tamen obligatio ex ea proficiscens mihi tantum jus tribuit ea placidè exigendi vel persequendi, quæ obligatione continentur, cujusmodi sunt caritatis, humanitatis, aliaque id genus officia. Ita pro diversa obligationum natura, una actio alterâ magis limitata est atque circumscripta.

Obligationes, quæ ex facto hominum oriuntur, vel ex contractu, vel pacto, vel fœdere, vel alio ejusmodi negotio descendunt; atque etiam vel mutux sunt, ita ut ab utraque parte aliquid sit præstandum, vel non, hoc enim a voluntate contrahentium dependet: idem jus ex illis competit scilicet persequendi, quod mihi debetur, & quidem fortius, ut ita dicam, ad consequendum id, ad quod præstandum sese alter alteri obligavit: Ita ut si ultro vel sæpe interpellatus contractum adimplere declinaverit, vim adhibere possim, & omnibus uti mediis, quibus

quibus tergiversantem cogi posse arbitror, ad præstandum quod debet. In statu naturali quisque rerum suarum arbiter est & moderator, id est, quisque secundum propriam conscientiam sibi jus dicit, & sententiam propriis viribus exequitur; ita tamen ut in omnibus negotiis peragendis habenda sit ratio æquitatis naturalis, scil. ut juxta eam perficiantur, quæcunque aguntur, ne a recta recedatur ratione: quemadmodum enim contractus vel pactum secundum hanc regulam initum validum est, & obligationem producit; ita quoque parit actionem, id est, mihi dat jus persequendi, quod ex illo contractu seu pacto debetur: & hæc est obligatio, quæ in jure dicitur naturalis, quæ etiam si in foro civili actionem non pariat, attamen conscientiam hominis adstringit, ad præstandum vel solvendum, sive faciendum, ad quod semetipsum obligavit; nihil enim æquitati sive legi naturali convenientius est, quam stare promissis, & solvere id quod debitum est; omnis autem obligatio est debitum, ideoque obligatum adstringit ad solvendum, quod alteri debet, & obliganti jus tribuit persequendi, quod sibi debetur.

Postquam vero homines libertati naturali renunciantes, in civitatem coaluissent, & jus suum ac omnem potestatem in summum imperantem transfuissent, alia quidem ratio jus suum persequendi introducta fuit, fons tamen idem mansit, ex quo actiones derivantur, scilicet æquitas naturalis, quæ suadet pactis standum, suum cuique tribuendum esse. Sin autem de negotiis, quæ inter cives peraguntur, jam oriatur controversia, nulli jam civitatis membro amplius facultas competit jus sibi dicendi, sed ubi judicem (id est, eum, cui de civium controversiis seu litibus cognoscendi potestas data est) ad eundi copia est, ipsum adire, ejus auxilium implorare, coram eo actionem instituere, omnem quæstionem ventilare necesse est, qui ubi & unam & alteram audit partem, jus litigatoribus dicit: qui mos actiones instituendi,



statuendi, & cognoscendi de civium negotiis, jam diu  
 ante leges XII. tabb. apud omnes gentes, Assyrios,  
 Persas, Medos, Ægyptios, Græcos invaluerat, imò  
 cum ipsa civitate introductus est. Et constat apud ipsos  
 Romanos vetustissimo sæculo, initio scil. civitatis, jus  
 litigantibus dictum, adeoque & actionum usum fuisse,  
 quamvis non ea solennitate vel ea formula, qua post le-  
 ges XII. tabb. judicia excerceri cæperunt, verum regum  
 arbitrio, vid. Liv. lib. 1. & Dionys. lib. 1. & 2. Sic  
 Romulum ipsum purpurâ ornatum, & togâ insuper  
 purpureâ amictum, ac in excelsâ sede conspicuum se-  
 dentem, dedisse jura populo & judicia exercuisse, scri-  
 bit Plutarchus in Romulo. Et Dionys. lib. 10. *Quam-*  
*diu regnatum est in urbe, regum arbitrio lites dirimeban-*  
*tur, quod tunc erat pro legibus.* Et ut ait Pomponius,  
*omnia manu a regibus gubernabantur.* Hoc autem jus in-  
 certum vocabatur, quia ex regum vel summorum im-  
 perantium pendebat arbitrio, eoque jure non solum sub  
 regibus, sed iis etiam exactis sub consulibus aliquo  
 tempore populus usus est §. 2. & 3. *h. t.* donec hujus  
 juris pertæsus, populus certum jus posceret, & ita  
 post magnas inter patres & plebem contentiones, (ut  
 superius diximus) tandem res eò devenit, ut commu-  
 nis quædam legum ferendarum iniretur ratio. Ex sena-  
 tusconsulto itaque tres fuere creati legati, qui ad le-  
 ges petendas in Græciam missi, & post trium annorum  
 decursum cum legibus reversi, decem constituere viros  
 placuit, qui leges conscriberent, & populo ferrent,  
 quas leges XII. tabb. appellarunt, fontem omnis publi-  
 ci privatique juris. Jam certum quoddam jus in repub.  
 vigeat, quod scriptum vocari posset. Ex hoc jure seu  
 legibus XII. tabb. emanarunt legis actiones, non quo-  
 ad originem, ut modo enarravimus, sed quoad solennita-  
 tem & formam, quatenus jus civile ex his legibus flu-  
 ens, eas actiones antea informes perpolivit & concin-  
 navit, certis quibusdam formulis constitutis, secun-

dum quas litigatores in judiciis experirentur: Hinc Cicero pro Rosc. Comed. *Sunt jura, sunt formulae de omnibus rebus constituta, ne quis aut in genere injuria, aut in ratione actionis errare possit. Qui non secundum formulam accuratissime servasset, causâ cadebat. Ita jus civile habemus constitutum, ut causa cadat is, qui non, quemadmodum oportet, egerit.* Cic. lib. 2. de invent. Itaque quot actiones, tot formulæ. In actione in personam hæc erant concepta verba. *AJO TE MIHI DARE AUT FACERE OPORTERE.* In actione in rem, ut rei vindicatione, & quidem rei immobilis hæc erant concepta verba. *Fundus, qui est in agro, qui Sabinus vocatur, meus est: cum ego ex jure meum esse ajo. Ibi ego te ex jure manu confertum volo.* Cui alter respondebat. *Unde tu me ex jure manu confertum vocasti, inde ego te revoco.* Cic. pro Muran. Rei vero mobilis ita instituebatur vindicatio; qui rem vindicabat, manu eam exhibitam tenens, dicebat. *Hanc ego rem ex jure Quiritium meam esse ajo.* Cui reus. *At ego contra eam vendico.* vid. l. 1. §. 1. ff. de rei vind. Sig. lib. 1. cap. 10. de antiq. jur. civ. ubi fere omnes formulæ, quibus in actionibus instituendis Romani usi fuere, occurrunt. Justinianus septem actionum veterum attulit divisiones: quarum aliæ in rem sunt intentæ, aliæ in personam, aliæ in utrumque. In rem, cum egerunt cum iis, qui nullo sibi jure obligati erant, sed iis de aliqua re intulerunt litem. Ut in re corpus habente; Si Titus fundum suum esse affirmasset, Sempronius autem possessor Dominum ejus se esse dixit. Actio in personam, cum egerunt cum iis, qui sibi obligati erant, vel ex contractu vel maleficio, atque contenderunt dare sibi aut facere oportere §. 1. inst. de action. l. 25. ff. de obl. & act. Secunda divisio est, quod aliæ legitimæ dictæ sint, aliæ honorariæ. Legitimæ vocantur, quæ ex ll. xii tabb. profiscuntur, ut superius annotavimus. Honorariæ, quas prætor ex sua jurisdictione comparatas habet, tam in rem, quam in personam, qualis *Publiciana*,



*Pauliana, Serviana*, a prætorum nominibus ita appellatæ. Tertia divisio est, quod aliæ *persequendæ rei causæ*, aliæ *pœnæ*, aliæ *utriusque causæ institutæ sint*. Quarta, quod *quædam in simplum conceptæ sunt*, ut ex mutuo, locato &c. Quædam *in duplum*, ut furti nec manifesti, damni injuria dati; aliæ *in triplum*, ut rapinæ; nonnullæ in *quadruplum*, veluti furti manifesti, item de eo quod metus causa §. 21, 22, 23, 24, 25. *inst. de act.* Quinta divisio, quod quibusdam actionibus *semper solidum*, quibusdam *modo solidum*, modo minus persequamur, ut actio de peculio filii, de dote. Sexta divisio, Actiones quædam *natæ sunt ex contractibus*, & maleficiis Dominorum, & patrumfamilias: *quædam ex contractibus*, & maleficiis servorum, de primo modo dictum. Ut actio quod jussu, excercitoria, institutoria, tributoria, quæ actiones locum sibi vendicabant, si servi consensu Domini negotiati fuerant: si sine consensu negotiati fuerant, actiones de in rem verso, & de peculio proditæ erant. Septima divisio est, quod quædam actiones sint *bonæ fidei*, ut ex empto, locato, vendito; quædam *stricti juris*, ut ex stipulatu; quædam *arbitrariæ*, quæ ex judicis arbitrio pendebant, in quibus nisi arbitrio judicis, is, cum quo agitur, actori satisfacit, veluti si rem restituat, vel exhibeat, vel solvat, vel ex noxali causa servum dedat, condemnari debeat: & hæ actiones fuerunt tam in rem, quam in personam; in rem velut Publiciana, Serviana de rebus coloni, quæ etiam hypothecaria vocabatur. In personam; quod vi aut metus causa, aut dolo factum est. §. 28, 29, 30, 31. *inst. de action.* Hæ fuerunt actiones antiquæ, ex quibus, qui jus suum persequi judicio voluerunt, aliquam necessario instituerunt. Singulis controversiis singulæ erant actiones constitutæ, singulis actionibus certæ ac solennes formulæ præscriptæ, a quibus ne latum unguem, uti diximus, recedere licuit.

*Legis actiones.* ] Vocantur legis actiones certæ ac solennes agendi formulæ, compositæ ex legibus XII tabb. quibus formulis, si quis apud magistratum, vel eum, qui dicendi habebat potestatem, agere vellet, utendum erat. Legis actiones dictæ sunt, quod earum rerum, de quibus lex duodecim tabb. scripta erat, privatim agendarum formulam præscribebant. Sig. *de jud. cap. 9. lib. 1.* Ut autem legis actiones variæ, & multæ erant, sic quoque multiplex erat jurisdictio. *Lege autem agere* nihil aliud erat, quam aliquid eorum, quæ lege continerentur, apud prætorem vel apud eum, qui talem jurisdictionem haberet, in jure obire, nempe vindicare, atque in jure cedere, filium suum emancipare, alienum adoptare, servum manumittere, tutorem, bonorum possessionem, interdictum, & actionem postulare. Sig. *eod. loc.* Lege igitur agere dicebatur is, qui à magistratu, ut jus sibi de eo dicatur, petit; ubi igitur legis actio est, ibi magistratus sit oportet. Differunt itaque *actus legitimi*, de quibus in *l. 77. de reg. jur. a legis actionibus*. Illi enim extra jus, & sine prætore vel alio magistratu expediuntur; legis autem actiones nunquam nisi apud magistratum. Jus vero dicere est aliquid horum, quæ statim enumeravimus, aut dicere, aut addicere, aut dare. Quod etiam lege agere commode dici potest, quatenus illa verba referuntur ad judicem, qui ex formula, & præscripto legum, judicat, decernit, & de causa cognoscit. *Lege agi, ut opinor ego, id olim significabat, quod nunc jus a magistratu reddi, aut judicium exerceri dicimus.* Coras. *in comment. ad tit. de adopt.* Hinc Livius de Flavio, qui fastos divulgavit sermonem habens, inquit *lib. 9. cap. 46.* *Jus civile repositum in penetralibus pontificum divulgavit: fastosque circa forum in albo proposuit, ut quando lege agi posset sciretur.* Fastus autem dies vocabatur, quo jus dicere aut judicium exercere, vel tria illa verba a prætore, qui judiciis præerat, fari licitum erat, *Do, Dico, Addico.* Hinc Ovidius. *lib. 1. fast.*

*Ille*



*Ille nefastus erit, per quem tria verba silentur,*

*Fastus erit, per quem lege licebit agi.*

Sic magistratus quidam dicuntur, apud quos est legis actio, quidam apud quos ea non est *l. 4. ff. de adopt. l. 1. Cod. eod. l. 3. ff. de offic. procons.* magistratus, apud quem legis actio est, is est, qui plenam habet jurisdictionem, contentiosam & ordinariam, apud quem experiri actione adversus unumquemque potest. Budæ. *in annot. ad pand. ad tit. de adopt.* Hinc in *l. 2. ff. de offic. procons.* dicitur apud proconsulem, postquam urbem egressus est, manumitti & adoptiones fieri posse, quia voluntariam habet jurisdictionem: apud legatum proconsulis adoptari non potest, quia apud eum omnino non est legis actio, scil. antequam proconsul provinciam suam est ingressus. *l. 2. ff. eod.* Nulla apud eum est juris exercitium, idque quia nullam habet jurisdictionem, nisi mandatam à proconsule *l. 13. ff. de offic. procons.* non mandatur autem, nisi proconsul provinciam suam intraverit, nec enim prius ei competit. *l. 4. §. ult. ff. eod.* esset enim perquam absurdum, antequam ipse jurisdictionem nansciscatur, alii eam mandare; tales autem actus, quorum mentionem fecimus, peragi nequeunt, nisi apud eum, cui plena competit jurisdictio, uti constat ex *l. 1. Cod. de adopt.* Lege agere etiam dicitur lictor, cum ex officio suo agit & sententiam in damnatos exequitur, Valerius *lib. 3. Deligatis ad palum hostibus, litteras a P. C. nequicquam Capuanus salutare accepit, in sinistra manu enim sicut erant tradite reposuit, ac jussu lictore lege agere, tum demum aperuit, postquam illis obtemperari non poterat.* Eodem modo Livius *lib. 26. cap. 15. Et Fulvius id ita esse ratus, acceptas litteras neque resolutas quum in gremio reposuisset, preconi imperavit, ut lictorem lege agere juberet.* Et paulo post in capite sequenti. *Sub hac dicta, jussu proconsulis preconem ita pronunciaſſe: lictor viro forti adde virgas, & in eum primo lege age.* Lege agere Cic. alibi dicit, *facere judicatum,*

id est, exequi, implere latam sententiam. Plautus in *Mercat. act. 5. scen. 4.*

- - - Eutyc. *Imo dicamus, senibus leges censeo,  
Quas leges teneant contentique sunt priusquam abeamus.  
Annos natus sexaginta qui erit, siquem scibimus  
Sen maritum, sen hercle adeo calibem, scortarier  
Cum eo nos hic lege agemus: inscitum arbitrabimur.*

Id est, poenas legibus indictas infligemus, & legem in eum exequemur.

*Collegium Pontificum.* ] Quod a Numa fuit institutum. Ultima in sacris ordinibus a Numa institutis classis est Maximi apud Romanos sacerdotii, & cujus potestas est amplissima, hi ab uno suorum operum reficiendo scil. ponte sublicio, ipsorum lingua vocantur pontifices summa auctoritate pradii. Dionys. Halicar. lib. 2. Huic nominis derivationi etiam subscribit Varro lib. 4. de ling. lat. Pontifices ego a ponte arbitror dictos: Nam ab iis sublicius est factus primum; & saepe restitutus, quum ideo sacra & uls & cis Tiberim non mediocri ritu fiant. Verum hæc nominis derivatio non videtur vero consentanea, quia Numa Pompilio regnante nullus pons fuit, qui refici potuit: Demum, postquam ad Ancum Martium regnum devolvisset, pons primum Tiberi impositus fuit. Quod ex eodem Dionys. constat lib. 3. ubi de rebus ab Anco Martio gestis sermonem habens, ita inquit, *Sublicium quoque pontem, quem solis lignis sine ære ac ferro contineri fas est, ille imposuisse Tiberi dicitur: qui usque in hunc diem conservatur, & sacer habetur ab omnibus, cujus si qua pars laboret, Pontifices eam reficiendam curant, patria quadam in ejus instauratione peragentes sacrificia.* vid. quoque Liv. lib. 1. cap. 33. Quamobrem Pomponius Lætus de sacerdot. Rom. cap. 10. a Numa non Pontifices, sed sacerdotum principes nominatos, & indè regnante Anco Martio, quando pons sublicius factus fuit, a Ponte pontifices appellati, & ideo sacra ab iis trans Tyberim non



non mediocriter ad pontem fiunt. Verum & antea quoque pontifices dictos fuisse Livius testatur *lib. 1. cap. 20.* ubi inquit. *Pontificem deinde Numam Martium Marci filium ex patribus legit, eique sacra omnia exscripta, exsignata attribuit: quibus hostiis, quibus diebus, ad que templa sacra fierent, atque unde in eos sumptus erogaretur, cætera quoque omnia publica privataque sacra Pontificis scitis subjecit.* Nisi vellemus sacerdotum principes appellari, quod eorum erat summum, & primarium sacerdotum collegium. Potius itaque Pontifices dictos arbitramur a *posse & facere*, ut Scævola apud Varronem contendit. *Pontifex enim est, qui potest facere, id est, sacrificare. lib. 4.* facere enim sæpe sacrificare; unde canit Virgilius

*Cum faciam vitula pro frugibus ipse venito.*

id est, sacrificabo offerens vitula. Vid. Plutarch. in *Numa. pag. 65.* Horum quatuor a Numa instituti, ex patriciis lecti, quem numerum, & eligendi rationem retinuerunt usque ad annum ab V. C. 454. quo Q. Appulejo Pansa & M. Valerio Corvo coss. Q. & Cn. Ogulnius Trib. pleb. rogationem promulgarunt, ut cum quatuor Augures, quatuor Pontifices ea tempestate essent, placeretque augeri numerum sacerdotum, quatuor Pontifices, quinque Augures, de plebe omnes adlegerentur. Ita auctior Pontificum numerus est factus, qui usque ad L. Sylla Felicis dictaturam mansit: Is enim inter multa, quæ abrogavit vel addidit, Pontificum numerum auxit, ut essent 15 pontifices, & totidem Augures: Pontifices vero divisit in *maiores & minores*. Maiores vocabantur octo priores, & qui in eorum locum erant surrogari, minores reliqui dicebantur. Univerfus Pontificum cœtus collegium vocabatur. A Collegio itaque Pontificum primorum successores cooptari soliti sunt usque ad annum v. c. circiter 451; post autem legem Domitiam latam Cn. Domitio, Anobarbo Trib. pl. C. Mario. L. Aurelio Areste coss. qui pontificibus offen-

sus erat, quod alium quam se, in locum patris sui surrogassent, jus surrogandorum Sacerdotum a Collegis ad populum translatum fuit, ita ut non Collegarum cooptatione, sed tributis comitiis creabantur. Suet. in *Nerone* cap. 2. Et Vellejus Paterc. lib. 2. Quo anno Cn. Domitius Tribunus legem tulit, ut sacerdotes, quos antea Collegæ sufficiebant, populus crearet. Cum vero interjecto tempore abrogasset illam legem L. Sylla, plebi parum æquus, restituit, abrogatâ Corneliâ, Domitiam, T. Attius Labienus Trib. anno ab v. c. DCXC. M. Tullio Cicerone, & Antonio coss. teste Dione lib. 37. Abrogavit eam iterum C. Antonius consul anno DCCIX. Restituit secundo senatus, C. Vibio Pansa, & A. Hirtio coss. Cic. Philipp. 13. Postea iterum sub Augusto, abrogatâ lege Domitiâ, Collegiorum primo, deinde Romanorum principum arbitrio pontifices, & reliqui Sacerdotes cooptari cæperunt Plin. 4. epist. 8. Gratularis mihi quod acceperim auguratum, jure gratularis, primum quod gravissimi principis judicium, in minoribus etiam rebus consequi pulcrum est; deinde quod sacerdotium ipsum cum priscum, & religiosum, tum hoc quod sacrum plane, & insigne est, quod non adimitur viventi, &c. De muneribus, & dignitatibus Pontificum hæc legimus apud Dionysium lib. 2. Pontifices de omnibus causis ad sacra pertinentibus judicant, tam inter magistratus sacrificos, quam inter privatos homines: novasque leges de sacris suo arbitratu condunt: & magistratus penes quos sunt ceremonia, & sacrificia, Sacerdotesque omnes examinant: ministros quoque sacrorum in officio continent, ne quid contra solennes faciant ritus, a profano etiam, & imperito vulgo consuluntur de cultu, & genio Deorum, aliisque religionibus, quod si quem animadvertant præscripta sua contemnere, eum mulctant pro delicti multitudine: ipsi nullius potestati sunt obnoxii, nec tenentur ad reddendam rationem, vel Senatui, vel populo. Id genus Doctores sive sacri doctores, sive sacrarum legum consulti, sive sacrorum custodes recte dicendi sunt: Ego Hierophantas nostris



*stris appellari dixerim. Vide quoque Cic. pro dom. ubi inter alia ait, omnis reipub. dignitatem, omnium salutem, vitam, libertatem, aras, focos, Deos, Penates, bona, fortunas, domicilia, eorum sapientiæ, fidei potestatique commissa ac credita esse. Duravit hoc pontificum Collegium usque ad Theodosii Senioris tempora, quibus Christiana religione jam omnia obtinente, Imperatoribus antiquis superstitionibus adversantibus, uno Edicto omnium sacerdotum reditus fisco applicati fuere, teste Zosimo. Unus erat, qui omnium erat supremus, ideoque Maximus vocabatur; Cui Numa maximarum rerum, quæ ad sacra, & religionem pertinebant curam judiciumque commisit, eum vindicem esse jussit contumaciæ privatorum, & magistratuum, ut tradit Dionysius. Primus Pontifex creatus fuit Marcius, Marci filius, ut testatur Liv. lib. 1. cap. 20. Pontificem (inquit) deinde Numam Marcium, Marci filium, ex patribus legit, eique sacra omnia exscripta exsignataque attri-  
quit, quibus Hostiis, quibus diebus, ad quæ templa sacra fierent, atque unde in eos sumptus pecunia erogaretur. Cætera quoque omnia publica privataque sacra Pontificis scitis subjecit; ut essent quo consultum plebs veniret: Nequid divini juris negligendo patrios ritus, peregrinosque adsciscendo turbaretur. Nec caelestes modo ceremonias, sed justa quoque funebria, placandoque manes, ut idem Pontifex edoceret. Apud eum quoque tabula esse dicitur, in qua Solis, & Lunæ defectus, quoties luminis caligo fit, & anni, & mensium fastorumque ratio perspicitur. Fenestella cap. 8. lib. 1. Animadvertendi quoque potestatem habebat in Virgines Vestales, veluti si passæ fuissent sacrum extinguere ignem, verberibus & flagris puniebantur: quæ virginitatem prodiderat, viva ad portam, quam Collinam vocant, defodiebatur: vir cum quo concubuerat, verberibus necabatur. Fest. Pomp. in verbo *probrum*. Apud hoc Pontificum collegium erant etiam legum actiones, & interpretandi scientia, uti con-*

stat ex hoc §. id est, solennes formulæ, quibus cuique esset experiundum, de quibus supra diximus, ita ut in *eorum penetralibus*, ut ait Liv. lib. 9. *abditum esset jus civile, abdita dierum ratio, quibus lege agi poterat.* Leges condebat de sacris, quæ non erant scripta, aut moribus recepta; etiam & de religione ac jure divino confulebantur, tam a senatu, quam a reliquis civibus, nam & sacra curabant, ut Pontifices, & de jure respondebant ut jurisconsulti: inde Justinianus jurisprudentiam vocat divinarum & humanarum rerum scientiam, quia easdem partes apud Romanos sustinebant, itaque juris universi quasi custodes, interpretes, ac dispensatores erant. Creabatur Pontifex Max. a Collegio Pontificum, non collegarum coöptatione, ut in cæteris sacerdotiis, sed Tributis populi comitiis: neque etiam nisi ex patriciis, donec omnibus cum plebe communicatis honoribus, ex plebe etiam Pontifex Max. creatus est T. Corruccanus. Ad quam dignitatem deinde multi tam patricii quam plebeji provecti sunt, usque ad *Jul. Cæsarem*. Quo mortuo pontificatum per vim invasit. M. Lepidus, post ejus obitum in Augustum ista dignitas translata fuit. Cæteri deinde Imperatores Pontifices Max. se appellari passi sunt. Donec Gratianus Edicto vetuit, se Pontificem Max. appellari, quo factum est, ut hæc dignitas in Imperatoribus extincta sit, & ad Ecclesiasticos transierit.

§. 7. *Postea cum Appius Claudius proposuisset, & ad formam redegeret has actiones: Cnæus Flavius scriba ejus libertini filius subreptum librum populo tradidit, & adeo gratum fuit id munus populo, ut tribunus plebis fieret,*



fieret, & senator, & Ædilis curulis. Hic liber, qui actiones continet, appellatur jus civile Flavianum: sicut ille, jus civile Papirianum, nam nec Cnæus Flavius de suo quicquam adiecit libro. Augescente civitate, quia deerant quædam genera agendi, non post multum temporis spatium Sextus Ælius alias actiones composuit, & librum populo dedit, qui appellatur jus Ælianum.

**A**ppius Claudius.] scilicet Cæcus, orator Romanus, a quo Appia via secundum quosdam: factus hic cæcus est, cum munus sacrificandi Herculi a gente Potitiorum antiquissima ad servos translatum ivisset. Unde Livius lib. 9. cap. 29. Eodem Appio auctore Potitia gens, cujus ad aram maximam Herculis familiare sacerdotium fuit, servos publicos ministerii delegandi causa, solennia ejus sacra docuerat. Traditur inde dictu mirabile, & quod dimovendis statu suo sacris religionem facere posset, quum duodecim familie ea tempestate Potitiorum essent; puberes ad triginta, omnes intra annum cum stirpe extinctos: nec nomen tantum Potitiorum interiisse, sed censorem etiam Appium, memori Deum ira post aliquos annos luminibus captum. Antiqua & illustris fuit Romæ gens Claudia, orta ex Regillis oppido Sabinorum Dionys. Halic. lib. 11. Prius itaque peregrina, verum postea a patribus in patricios coöptata, sexto fere anno post reges exactos, Suet. in Tiberio. Liv. lib. 6. cap. 40. Duo & triginta in eo numerantur consulatus, dictaturæ quinque, censuræ septem; triumphii septem, duæ ovationes, quas adeptus est.

Cnæus Flavius scriba ejus, libertini filius, surreptum librum

*brum populo tradidit.*] A sordidis initiis ad summum honoris ac dignitatis fastigium provectus est Flavius, cujus hic mentionem facit Pomponius; quippe humili fortuna scil. patre libertino ortus, ædilitate curuli fuit ornatus, idque ut Livius scribit, *quod jus civile repositum in penetralibus pontificum evulgavit, fastosque circa forum in albo proposuit, ut quando lege agi posset, sciretur.* lib. 9. cap. 46. Quo contigit, ut tantam apud populum adeptus fuerit gratiam, ut ædilem Curulem ipsum creaverint; *jus civile per multa secula inter sacra ceremoniasque Deorum immortalium abditum, solisque Pontificiis notum, Cn. Flavius libertino patre genitus & scriba, cum ingenti nobilitatis indignatione factus ædilis curulis, vulgavit, ac fastos penè toto foro exposuit.* Valer. Max. lib. 2. cap. 1. vid. Gell. lib. 6. cap. 9. Nonnulli ex hoc Valerii & Livii loco probare conati sunt, hanc fastorum divulgationem causam neque Tribunatus, neque ædilitatis fuisse; Flavium enim ante Ædilem fuisse, quam divulgatio fieret, Valerius cit. loc. testis est. Verum contrarium testantur ea, quæ legi apud Cic. *pro Muren. & epist. 1. lib. 6. ad Attic.* Posset agi lege nec ne pauci quondam sciebant. *Fastos enim vulgo non habebant. Erant in magna potentia, qui consulebantur, a quibus etiam dies, tanquam a Chaldeis petebantur. Inventus est scriba quidam Cn. Flavius, qui cornicum oculos confixerit, & singulis diebus ediscendos fastos populo proposuerit, & ab ipsis cantis Fætis eorum sapientiam compilarit.* Et *epist. 1. lib. 6. ad Attic.* Unum *ἰσογινὸν* requiris de Cn. Flavio, Cn. Filio. Ille vero, ante decemviros non fuit, quippe qui Ædilis Curulis fuerit; qui magistratus multis annis post X. viros institutus est. Quid ergo profecit, quod protulit fastos? Occultatam putant quodam tempore istam tabulam, ut dies agendi peterentur a paucis. Nec vero pauci sunt auctores, Cn. Flanium scribam fastos protulisse, actionesque composuisse; ne me hoc (vel potius Africanum. is n. loquitur) commentum putes. vid. quoque Plin. lib. 33. nat. Epist. cap. 1.

Verum



Verum qui contrariam tumentur sententiam, ita argumentantur; primo quod ante Ædilitatem tribunus fuerit, ut constat ex Liv. lib. 9. cap. 46. ubi inquit. *Invenio in quibusdam annalibus, cum appareret Ædilibus, (de Flavio sermonem habens) fierique se pro tribu Ædilem videret, neque accipi nomen quod scriptum faceret, tabulam posuisse, & jurasse se scriptum non facturum, quem aliquanto antea desisse scriptum facere, arguit. Macer Lici-  
nius, Tribunatu ante gesto, triumviratibusque; nocturno altero, altero colonie deducendæ. Secundo, quod ante Ædilis fuerit, quam divulgatio facta est, ut constat supra ex Valerio, vel saltem quod eodem anno facta est, quo Ædilis fuit. Verum notandum quod legimus apud Plin. lib. 33. cap. 1. *Frequentior usus annulorum non ante Cn. Flavium, Annii filium deprehenditur. Hic namque publicatis diebus fastis, quos populus a paucis principum petebat, tantam gratiam plebis adeptus est, alioquin libertinopatre genitus, & ipse Appii Cæci scriba, cujus hortatu exceperat eos dies, consultando assidue sagaci ingenio, promulgaveratque, ut Ædilis curulis crearetur cum Q. Anicio Prænestino, qui paucis ante annis hostis fuisset, præteritis C. Petilio & Domitio, quorum patres consules fuerunt. Additum Flavio ut simul & Tribunus esset, quo facto, tanta Senatus exarsit indignatione, ut annulos ab eo abjectos fuisse in antiquissimis reperiatur annalibus. Itaque ut merito opinari liceat, divulgationem & tribunatus, & Ædilitatis fuisse causam, quoniam hisce honores uno eodemque tempore in eum collati fuerint. Neque obstant, quæ scribit Liv. Quippe qui non affirmat eum primo Tribunatum, deinde Ædilitatem gessisse, sed tantum refert quid in annalibus invenerit; ita ut nihil certi inde possimus concludere. Admodum quoque verosimile, populum contra mores atque ritus hanc Ædilitatem in Flavium non contulisse, nisi aliquid ab ipso perpetratum fuisset, quod tanta populi gratia dignum erat.**

*Scriba ejus.] Scriba, ut testatur Festus, nomen erat apud*

apud Romanos librarii, qui rationes publicas scribebat in tabulis. Habebant enim singuli magistratus suos scribas, qui res in magistratu gestas, in tabulas referrent, & leges actaque omnia perscriberent. Hinc dixit Cic. in Verr. *Scribarum ordinem honestum esse, quod eorum hominum fidei tabula publicæ, periculaque magistratuum committantur.* Sic igitur Cn. Flavius fuit Appii Censoris scriba, unde occasionem habuit divulgandi fastos. Leges quodammodo in manibus scribas habuisse, & magistratibus jus suggessisse ostendit Cic. de ll. lib. 3. *Ani-  
madverto (inquit) quosque in magistratibus ignoratione juris sui tantum sapere, quantum apparitores velint.* Quod de scribis intelligendum docet Plutarchus, ubi scribarum arrogantiam a M. C. minore fractam, & repressam esse tradit: cum inquit. *Cato cum questuram inisset, ministros & scribas coercuit, qui publicas tabulas legesque tractantes, cum adolescentes nacti essent, quibus magistratibus apparerent, quod ii propter inscientiam magistris egerent, potestate non cedebant, sed ipsi erant magistratus. Eos vero Cato apparitorum loco, ut erant, tractavit: cum alios fraudis, alios inscitie insimularet. Cumque illi auxilio collegarum Catonis usi resisterent, Cato primum eorum damnatum defraudata hereditate ab ærario expulit, alterum vero de ineria postulavit, qui cum gratia Casuli censoris evasisset, eo nunquam usus est Cato.* Non desunt qui hoc scribarum munus vile atque abjectum Romæ fuisse statuunt. Nam mercenarii erant, vel servi, vel libertini, ut videre est de Cn. Flavio apud Plin. lib. 33. cap. 1. & Liv. lib. 9. cap. 46. qui eum libertino patre genitum, hoc munere functum asseverant. Præterea quod Probus in Eumene, scribarum munus apud Græcos multo honorificentius quam apud Romanos fuisse tradidit: Quod non mirum, quoniam apud Græcos nemini ad hoc munus patebat aditus, nisi illi, qui præter prudentiam, & probatam fidem honestos & claros habebat natales. *Fulgebat jam in adolescentulo indoles virtutis: Itaque (Philippus Amyntæ fil.)*



*fil.) eum habuit ad manum scribæ loco; quod multo apud Grajos honorificentius est, quam apud Romanos: nam apud illos ad id officium nemo admittitur, nisi honesto loco, & fide, & industria cognita, quod necesse est, omnium consiliorum esse participem, inquit Cor. Nepos. Verum quod apud eos honoratiores scribæ fuerint, quam apud Romanos, ideo non concludere possumus vile, & abjectum fuisse Romæ scribarum munus, cum expresse Cicero affirmat honestum eorum fuisse ordinem. Verum notandum non omnes scribas ejusdem fuisse dignitatis; quippe scriba navalis omnium minimæ dignitatis erat, minoris quoque notæ erant scribæ privati. Cum vero multi essent in civ. scribæ, factum est, ut in varias transferrentur decurias, ut Quæstoriorum, Ædilitiorum, Prætoriorum: prout a Quæstoribus, Ædilibus, vel Prætoribus lecti sunt, quibus jus hoc competebat. Aliquot etiam decurias pretio fuisse emptas docet Cic. in Verr. ubi ita differit. *Ad eos me scribas revoca, si placet noli hos colligere, qui nummulis corogatis de nepotum bonis, ac de sceniorum corollariis, cum decuriam emerunt, ex primo ordine exploforum in secundum ordinem civitatis se venisse dicunt, eos scribas tecum disceptatores hujus criminis habebis, qui istos scribas esse molestè ferunt, tametsi cum in eo ordine videamus multos esse non idoneos, qui ordo industria præpositus est, & dignitati, mirabimur turpes aliquot in eo esse, quo cuivis licet pretio pervenire.* Postquam vero Respub. in principatum versa est, in majori pretio ista dignitas habitata est, cum ad Principum arcana admissi sunt, unde *Notarii Principis* apud Cassiodorum appellantur, qui iidem cum Macædonum scribis, scil. ejusdem dignitatis.*

*Et Senator.]* Ædilem curulem fuisse testatur Liv. lib. 9. cap. 46. Valer. Max. lib. 2. cap. 1. Gell. lib. 6. cap. 9. Tribunum etiam fuisse testis est Plinius lib. 33. cap. 1. Verum senatoria dignitate ornatum fuisse nulli legitur. Nullus enim dubito, quin hujus dignitatis mentionem fecissent scriptores, utpote qui honor, & gra-

gravior, & præstantior est, quam ut a Livio cæterisque veterum monumentorum scriptoribus silentio præteriri debuerit. Tribunis plebis jus fuisse habendi senatum, quanquam Senatores non essent constat ex Gell. lib. 14. cap. 8. ubi inquit, *Nam Tribunis plebis habendi senatus jus erat, quanquam senatores non essent ante Attinium plebiscitum.* Ex quibus verbis colligimus, post Attinium plebiscitum demum Tribunos plebis in Senatorium ordinem coöptatos fuisse. Verum cum *C. Attinius Labeo* Trib. pleb. hujus plebisciti autor sit, vixeritque anno ab. v. c. 623. *Q. Claudio & Ap. Pulchro. coss.* longe postquam *Cn. Flavius* Ædilis factus est, quod accidit, *P. Sulpicio Saverione, & P. Sempronio Sopho coss.* anno ab. v. c. 449. virtute hujus plebisciti senatoriam dignitatem obtinere non potuit, itaque vel errat hic iterum Pomponius noster, vel verba & *Senator* subditi-  
titia sunt.

*Ædilis Curulis.*] De hoc munere inferius suo loco disputabimus: obiter tamen hic notandum, quod hujus dignitatis in *Cn. Flavium* collationis certum est testimonium, eum apud plebem in summa existimatione fuisse, utpote qui contra mores & leges eum ad hanc dignitatem provexerat, qua indignus erat, quia scriba vel tabularius censoris Appii, vel etiam quia libertino patre ortus.

*Actiones continet.*] Id est, jus civile. Per actiones denotantur illæ formulæ certæ ac solennes a Jctis olim inventæ, quibus virtute legum xii tabb. quisque in judicio rem suam persequi posset, ab Appio Claudio deinde in formam redactæ. vid. quæ de hisce disputavimus ad §. 6.

*Jus civile Flavianum.*] Non, ut inquit Jctus, quia de suo aliquid adjecit vel addidit, verum quod surreptum librum popoulo tradiderit, ita quasi autor fuerit quod populus ejus juris, quo utebatur, copiam habuerit. Itaque in honorem Flavii Flavianum appellatum, ex quo per-



perspicimus ex dolo suo aliquem interdum præmium consequi.

*Quædam genera agendi.* ] Id est, quædam novæ agendi formulæ a Jctis noviter excogitatæ, & notis quibusdam significatæ, quæ ab omnibus intelligi non possunt : ita ut si forte evulgarentur, tantum non paterentur damnum, quantum ipsis adtulisset Flavii formularum divulgatio; verum ut semper ab iis petenda necessario esset interpretatio. *Itaque irati illis, quod sunt veriti, ne dierum ratione pervulgatâ & cognitâ, sine sua opera legē posset agi, notas quasdam composuerunt, ut omnibus in rebus ipsi interessent.* Cic. *pro Muræ.* Notarum ejusmodi usum apud Romanos antiquissimum fuisse constat; quibus etiam in scribendis epistolis usos fuisse testatur, Cic. 13. *ad Attic.* Et Suet. *in Julio Cesare cap. 36.* *Extant (inquit) epistolæ ad familiares domesticis de rebus, in quibus, si quæ occultius perferenda erant, per notas scripsit:* id est, sic structo literarum ordine, ut nullum verbum effici posset. Per notas igitur literas intelligimus, quæ singulæ vel binæ & inverso sæpissime ordine positæ, ut pro D, A, integrum aliquod verbum designabant. Hisce notis non dissimiles sunt; nostrorum Rabularum forensium quædam adulterinæ loquendi, & in causis patrocinandis agendi formulæ; quippe ut ab iis petendum sit omne auxilium, tot Barbaris vocibus prætexantur agendi sua genera, ut omnia pragmaticorum hisce contineri videantur arcana: ita ut in forum descendere quis non audeat, vel in pragmaticorum ordinem coöptari non mereatur, qui non magnam harum in cerebro collegit copiam, & in forum propellere valeat. Tales subtilitates merito vocat Cicero *Inanissimas prudentiæ, fraudis autem & stultitiæ plenissimas.* Ad hæc pertinet illa Jcti definitio, quam tradit Tullius 1. *de orat.* nimirum, *quod ipse per se nihil aliud est quam legulejus quidam cantus & acutus præco actionum, autor formularum, auceps syllabarum.*

*Fus Alianum.* ] Qui alias quasdam actiones composuit,

fuit, id est, agendi formulas excogitavit: Summus fuit enim juris peritus, teste Cic. 1. *de orat.* prudentia & juris scientia insignis hoc carmine celebratur ab Ennio,

*Egregie cordatus homo Catus Ælius sextus.*

Catus appellatus a præstanti ingenii acumine & prudentia, quippe veteres providum, cautum, & acutum hominem Catum dixere. Ita Cic. 1. *de legibus.* *Quis igitur prudentem, & ut ita dicam Catum non ex ipsius habitu, sed ex aliqua re externa judicet.* Censuram cum M. Cethego egit, in qua, in spectaculis senatum a populo fecerit, cum antea in promiscuo spectabant. *lib. 4. de cad. 4.* Cum legati Ætolorum in consulatu, prandentem in fictilibus adiissent, missa ab his vasa argentea non accepit, neque aliud habuit argenti ad supremum vitæ diem, quam duo pocula, quæ Lucius Paulus socer ei ob virtutem, devicto Perseo rege, donaverat. *Plin. lib. 33. cap. 11.*

---

§. 8. *Deinde cum esset in civitate lex duodecim tabularum, & jus civile: essent & legis actiones: evenit, ut plebs in discordiam cum patribus perveniret, & secederet, sibi que jura constitueret, quæ jura plebiscita vocantur: Mox cum revocata est plebs: quia multæ discordiæ nascebantur de his plebiscitis, pro legibus placuit & ea observari, lege Hortensia, & ita factum est, ut inter plebiscita, & legem species constituendi interessent: potestas autem eadem esset.*

*Deinde*



**D**Einde cum esset in civitate lex duodecim tabularum & jus civile, essent & legis actiones: evenit ut plebs in discordiam cum patribus perveniret, & secederet, sibi que jura constitueret, quæ plebiscita vocantur.] Errat hic iterum Pomponius, quod scribit post legem duodecim tabularum, plebem sibi jura quædam constituisse, quæ plebiscita vocantur: Cum ex Livio, Dionysio, aliisque Historicis constat, primam secessionem in sacrum montem, longe antequam leges duodecim tabularum composita sint, factam fuisse, atque ab illo tempore plebiscita originem duxerunt; quod ut clarius constet lectori, rem paulo altius repetemus. Tres legimus apud Historicos factas fuisse secessiones; quarum prima accidit anno ab V. C. 159. cum plebs ære alieno ob diuturna bella contracto, nec dissoluto, se demersam, a nobilibus creditoribus in vincula, & servitutem rapi, quæsta, auctore Sicinio Belluto, raptis signis, in sacrum montem trans Anienem amnem, tria ab urbe millia passuum, secessit. Ibi que vallo fossisque communis castris, quietos, rem nullam nisi necessariam ad victum sumendo, per aliquot dies neque laceffiti, neque laceffentes, se tenuere, non sine patrum ingenti trepidatione; qui urbem robore militum orbatam periclitari, si qua vis belli erumperet, aperte providebant. Itaque placuit tandem Senatui, ut decem legati eligerentur, inter quos etiam Menenius Agrippa, cujus tantum mentionem facit Liv. lib. 2. cap. 3. Dionysius vero decem enumerat. Hi inquam, ad plebem revocandam missi sunt. Eorum autem primus Menenius Agrippa vir summæ auctoritatis, & plebi charissimus, quod inde oriundus erat, qui facunda usus oratione, ducta ab intestina membrorum cum otioso, & quiete ventre seditione, & comparando quam intestina corporis seditio similis esset iræ plebis in patres, flexit ac lenivit hominum mentes: Ita ut tandem de concordia agi cæptum sit, concessumque in conditiones: *Ut plebi sui magistratus essent sacrosancti,*

*sancti, quibus auxilii latio adversus consules essent. Neve cui patrum eum magistratum capere liceret.* Hanc legem sacratam vocat Livius, & meritò, plebiscitum dicitur, utpote quod plebe advocata interrogante Bruto Trib. pleb. scriptum sit. Vid. Dionys. lib. 6. pag. 410. juramento ad hoc perpetuo observandum omnes adstringebantur cives, & per omnia adigebantur sacra, hac lege in perpetuum usuros se & posteros: additabatur imprecatio, ut ejus observatoribus superi & inferi essent propitii; transgressoribus vero a Diis, & demonibus accideret contrarium, tanquam gravissimo obstrictis piaculo. Itaque & ante leges duodecim tabularum plebiscita obtinuisse luce meridiana ex hisce constat clarius. Secunda secessio accidit anno ab V. C. 305. ob insolentiam decemvirorum & scelus Appii Claudii decemviri; qui puellam L. Virginii filiam libidinis causa per calumniam in servitutem vocasset, quo facto adeo plebs irritata fuit, ut armata ex castris authore L. Virginio patre, & per eandem vindicem, urbem porta Collina intraverint sub signis, & media urbe agmine in Aventinum pergerent, ibique confederint. At paulo post suadente M. Duilio, qui tribunus plebis fuerat, inde in sacrum montem transit. Liv. lib. 3. cap. 52. Dionys. lib. 11. pag. 722, & 23. deinde missi Valerius Horatiusque ad plebem, quibus videretur conditionibus, revocandam, componendasque res; qui in castra a plebe summo recepti gaudio, quærebant, quænam plebis essent postulata, potestatem tribuniciam revocationemque se repetere dixerunt: quæ ante decemviros creatos, auxilia plebis fuerant, & ne cui fraudi esset, concessisse milites aut plebem, ad repetendam per secessionem libertatem. Liv. lib. 3. cap. 53. Qui cum patribus exposuissent, factum senatus consultum est, ut decemviri se primo quoque tempore magistratu abdicarent. Q. Furius pontifex maximus tribunos plebis crearet: & ne cui fraudi esset secessio militum plebisque. Quibus senatusconsultis



tis perfectis, decemviri in concionem prodeunt, abdicantque se magistratu: Nunciatur hoc plebi; convertunt inde quo jam confederant signa, profectique Romam, armati silentio in Aventinum perveniunt, ibique creato pontifice maximo, tribunos plebis creaverunt, omnium primum *A. Virginium*, inde *L. Icilium*, & *P. Numitorium* autores secessionis: Deinde etiam *C. Quirinium*. Tribunatu inito, L. Icilius rogavit plebem, & plebs scivit, *ne cui frandi esset secessio a decemviris facta*. De consulibus creandis cum provocatione, M. Duilius rogationem pertulit, quæ omnia in pratis Flaminiis concilio plebis acta. Notandum hic, in secunda secessione in montem sacrum, nihil horum actum fuisse, neque plebem reversam in Aventinum creasse tribunos, ut Livius refert, & quædam alia pro libertate tuendâ scivisse. Ita ut ea quæ Pomponius de plebiscitis per secessionem factis memoriæ prodiit, cum hisce quoque, quæ de secunda secessione diximus, non consentiant. Nisi vellemus ita interpretari Pomponii verba; scil. quod occasione hujus discordiæ, & secundæ secessionis, plebs jura quædam sibi constituit, quæ plebiscita vocantur. Verum ex hisce verbis non concludendum est, quasi ab hac secessione plebiscitia originem duxissent: quia tum demum illa jura, quæ plebs sibi constituisset, plebiscita vocari ceperunt, inquit Pomponius. Nam ut superius diximus jam dudum ante in prima secessione in sacrum montem, plebs quædam statuit jura, ac primum tribunos creavit, eosque sacrosanctos esse jussit ac scivit, unde reliqua plebiscita profecta sunt: itaque in secunda secessione rogabant tantum restitutionem eorum, quæ ante in prima secessione scivissent; & postquam jam plebs reversa erat, restituunt & legem de sanctitate tribunorum, & de provocatione magistratuum. Ita ut etiamsi concederemus in secessione secunda, de qua Pomponius, quædam plebs scivisse, & jura sibi constituisse, non potest tamen Pomponii er-

ror excusari, qui plebiscitorum originem a secunda derivare secessione videtur. Imo, etiam si nova quædam scivissent ac statuissent jura, vocis tamen origo aliunde deducenda. Tertia secessio facta est anno ab V. C. 467. cum plebs iterum propter æs alienum, post graves & longas seditiones, ad ultimum secessit in Janiculum, unde Q. Hortensio dictatore deducta est. Liv. lib. 11. epit. Verum ne quidem in hac secessione plebiscita facta sunt, nec post controversiam de illis, lege Hortensia inductum est, ut pro legibus haberentur. Quippe post secundam secessionem L. Valerio & M. Horatio coss. plebs, quum veluti in controverso jure esset, tenerentur ne patres plebiscitis, legem centuriatis comitiis tullit, *ut quod tributim plebs jussisset, populum teneret.* Quam legem Q. Hortensius dictator postea postquam plebem ex tertia secessione reduxerat, repetiit ac renovavit; hinc plebiscita, deinde leges appellata fuere, & universum populum tenuere. Vid. quæ superius de plebiscitis diximus.

---

§. 9. *Deinde, quia difficile plebs convenire cæpit, populus, (certe) multo difficilior in tanta turba hominum! necessitas ipsa curam Reipub. ad senatum deduxit. Ita cæpit senatus se interponere, & quicquid constitisset observabatur, idque jus appellabatur Senatusconsultum.*

**D**Einde quia plebs difficile convenire cæpit. ] Tres Romæ fuere ordines, Senatorius, Equestris ac Plebejus, ut testatur Cic. in Catilin. cum inquit: *A quibus consilium petit? a senatoribus, qui se auctoritate sua spoliati,*  
orna-



*ornamentis omnibus vinctum, penè Africanis oratoribus tradiderunt? ab equestri ordine, quem trucidasti? a plebe, cui spectaculum ejusmodi tua crudelitas præbuit, ut nemo sine luctu aspicere, sine gemitu recordari posset?* Trium horum ordinum summus erat senatorius; medius equestris, infimus plebejus; ita ut plebis verbo vulgaris illa populi multitudo significaretur, in qua senatores gentesque patriciæ, aut equestris ordinis viri non erant: si quem ex amplissimo ordine esse significare vellent, senatorem; qui e medio erat equitem; ex infimo, hominem e plebe, vel plebejum dicebant.

*Populusque multo difficilior.]* Quo uno verbo, ut supra diximus, omnes cives cujusvis ordinis, tam senatores, & equites, quam plebei continentur. Plebs enim differt a populo ut species a genere: nam appellatione populi universi cives significantur, connumeratis etiam patriciis, & senatoribus; plebis autem appellatione sine patriciis, & senatoribus, cæteri cives significantur: inquit Imperator in §. 4. *inst. de jur. nat. gent. & civ.* Itaque merito inquit Pomponius, populum in unum convenire multo adhuc difficilior fuisse, quam plebem. Quamobrem non sine ratione, *cum auctus esset populus Romanus in eum modum, ut difficile esset in unum eum convocari legis sanciente causa, æquum visum est, Senatam vice populi consuli.* §. 5. *inst. eod.*

*Curam reipub. ad Senatum deduxit.]* Jam dudum ante ll. xii tabb. Senatusconsulta obtinuisse legimus, atque curam reipub. ad eum pertinuisse testantur historiæ; ita ut hæc Pomponii relatio in accurata sit, & iterum ab historica veritate aberrans: constat enim ex Suetonio in *Vespasiano cap. 8.* Vespasianum instrumentum fecisse pulcherrimum, in quo penè ab exordio urbis Senatusconsulta, & plebiscita fuerunt contenta. Scio Romulum populo permisisse potestatem leges ferendi, bellum indicendi, & magistratus creandi; verum ea non a populo peragebantur, nisi Senatus accedebat autoritas,

atque de hisce Senatus interposita fuissent decreta. Vid. Dionys. Halicar. *lib. 2. fol. 87. Ferebat*, inquit, *suffragia non universus populus, sed per curias; & quod pluribus curiis visum fuisset, id ad senatum referebatur: qui mos nostra ætate mutatus est. Non n: senatus de plebiscitis decernit: sed de senatusconsultis plebi permissum est suffragium.* Ordo autem Senatorius a Romulo habet originem, ut essent qui rempublicam administrarent, ex primoribus patrum, qui tum aderant civibus, centum huic ordini adscripsit, qui patres, vel senatores dicti, vel ab ætate, ut ait Festus: vel ab honore; quemadmodum apud Lacedemonios senes appellabantur, qui summum quemdam magistratum gerebant, ut Cic. *lib. 1. de Senect.* testatur. Livius autem inquit, patres ab honore, patriciique progenies eorum appellati *lib. 1. cap. 8.* Dionys. Halicar. in dubio hæret, quare ita fuere appellati, *verum* (inquit) *propter ætatem, an propter virtutem huic consessui nomen sit inditum, non possum certo dicere.* Verum non mihi a vero aliena videtur nominis derivatio, quam apud Ciceronem legimus, a senibus potissimum senatum majores nostros appellasse; hi enim quia consilio, ratione, & multo rerum usu excellunt, ad rempublicam tractandam eligebantur, ideoque & patres dicti, quod civitatem studio, & caritate quadam patria complexi, totam suis consiliis, suaque prudentia foverent: & hinc summum concilium senatum dicimus, & qui amplissimum gerunt magistratum, senes vocamus. Per senes autem hic non intelligimus viros decrepitos, quibus gravis est sua ætas; verum tales per eos designantur, qui jam toga prætexta relicta, ad eam pervenerunt ætatem, ut tuto iis possit committi reipub. cura. Ætatem enim, quæ in legendo senatore observatur, verosimile est eandem prope fuisse, quæ in quæstore creando requirebatur. Legimus autem capiendæ questuræ annus fuit vicesimus septimus. Sig. *lib. 2. cap. 2. de antiq. jur. civ. Cum autem maxime* (inquit) *qui*  
magi-



*magistratus ceperunt, legi in senatum consueverunt, quaestura autem primus urbanus fuerit magistratus, fit, ut ego aetatem quaestoriam eandem prope ac senatoriam fuisse existimem. Legitimum autem capiendae quaesturae annum fuisse vicesimum septimum ab aliis satis demonstratum. Oritur autem hic dubium, num praeter illos centum Romuli temporibus etiam non alii fuerint patricii. Credibile enim videtur, confecto bello Sabino, Tatiusque in societatem regni adscito, ex Tatii Sabinorumque numero aliquot in patres lectos. Quod affirmare videtur Dionysius lib. 2. fol. 111. ubi inquit. Jamque ordinatis rebus, visum est regibus, quando turbae multitudine magnopere crevisset civitas, duplicare patriciorum numerum, equali numero e novis incolis ad priores familias illustres adlecto, quos patricios vocarunt, atque ita his centum viros curiarum suffragiis electos, ad veterem senatorum numerum adscripserunt. Idem quoque confirmare videtur Livius lib. 1. cap. 17. ubi inquit, sublato Romulo, inter ordines certatum fuisse. Oriundi ab Sabinis, ne, quia post Tatii mortem ab sua parte non erat regnatum in societate aequa, possessionem imperii amitterent, sui corporis creari regem volebant. Romani veteres (scilicet centum illi a Romulo in patres lecti) regem peregrinum aspernabantur. Verum si plures, intereunte Romulo, fuerint patricii, quomodo ad interregem prodendum, decem tantum decuriarum, factae ex centum patribus, coierunt. Inquit enim Livius: Itaque rem inter se centum patres, decem decuriis factis, singulisque in singulas decurias creatis, qui summa rerum praessent, consociant, & Postea: Fremere deinde plebs; multiplicatam servitutem, centum pro uno dominos factos. Contra scribit Dionysius. Ducenti patres conscripti, ex quibus senatum rege Romulo constitutum diximus, distributi in decurias, sortes inter se jaciebant, decemque viris quos fors contigisset primos, committebant urbis imperium. Itaque nihil ad conciliationem facit cujusdam conjectura, qui putat, coeundi munus veterum Romanorum*

fuisse, qui a Romulo lecti fuerant, cætera communia cum reliquis. Nam & novitios simul cum veteribus in decurias distributos, coivisse, claris verbis testatur Dionysius. Postquam imperium ad Tarquinium Priscum descendit, adhuc centum viros spectatæ virtutis, & prudentiæ ad conciliandum fortasse sibi plebis favorem, selectos ex omni plebeorum numero, in senatorium ordinem coöptavit, atque ita e ducentis trecentos fecit Senatores: qui deinde minorum gentium sunt appellati. Liv. lib. 1. cap. 35. Tametsi Tacitus credat a Bruto familias minorum gentium inventas. Onuphrius Pavinius de civitate Romana lib. 2. putat illam distinctionem jam antea obtinuisse, bello Sabino jam confecto, Sabinisque in urbem æquo jure susceptis, atque ex illustrioribus familiis, viris centum curiarum suffragiis veteribus Senatoribus adscriptis, patres minorum, & majorum gentium appellari cæperunt. *Nam eos, inquit, tantum patricios, qui a Romulo primum lecti sunt, majorum gentium fuisse, vel sequentis lectionis patriciorum testimonio confirmari posset, qui eorum ratione habita, non nisi minorum gentium se ipsos esse profiterentur. Fuerunt, equidem & hi majorum gentium, si iis, quæ a sequentibus regibus lecti sunt, conferantur; ita ut a Romulo lecti, ita majorum gentium sunt, ut minorum esse non possint. Novissimi vero a Bruto creati, ita sint minorum, ut majorum appellationem obtinere nequeant: medii vero a regibus allekti, modo majorum, modo minorum dici possunt, majorum quidem inferiorum, minorum vero superiorum patriciorum habita ratione.* Verum nescio qua auctoritate hæc opinio utatur: nam videtur verosimilius patricios secunda lectione a Romulo veteribus adscriptos, ejusdem quoque honoris, & juris participes fuisse. Postulabat enim id regni & imperii societas, ut æqua portio utrique regiminis & honoris genti tribueretur: unde ducentos patres conscriptos in decurias distributos coivisse, & per vices imperium urbis tractasse, scribit Dionysius



nysius & uno eodemque nomine patres patriciosque eos appellat, nullius distinctionis mentionem faciens; ita & Livius sub Tarquinio Prisco hanc differentiam inventam asserit, ut superius ostendimus. Ex hac differentia Senatorum, translatione quadem ex Diis Cicero eleganter quosdam *majorum*, quosdam *minorum gentium* dixit *lib. 1. Tusc. quest.* Majorum gentium appellans eos, qui celestes habiti sunt semper, & ab antiquis *selecti* dicti sunt; quemadmodum Augustinus *lib. 17. de civit. Dei cap. 1. 2. & 3.* eos *principuos & selectos* vocat: Nobiles Deos, & alibi summatos vocat etiam Tullius *3. de nat. 1. Deor.* *Minorum gentium* Dii appellantur adscriptii quidam, & allekti in Deorum numerum, qui ex hominibus divinos honores meruerant, & consequenter non eodem honore venerandi. Postea autem regibus exactis, Junius Brutus primus consul, cædibus regiis diminutum Patrum numerum, primoribus equestris gradus lectis, ad trecentorum summam explevit, traditumque inde fertur, ut in senatum vocarentur, qui patres, quique conscripti essent, conscriptos videlicet in novum senatum appellabant lectos. *Liv. lib. 2. cap. 1.* Observandum patrum conscriptorum originem Livium Bruto tribuere, cui & consentit Plutarchus, & Tacitus. Ita enim scribit Plutarch. in Problem. *Cur senatores alios patres conscriptos, alios tantum patres? An eos qui ab initio Romulus elegerit, patres ac patricios nominabant, quasi bonis natos parentibus, reliquos deinde ex plebe electos, & adscriptos, in senatum conscriptos vocitarunt.* Onuphrius ab hac sententia discrepat, & patrum conscriptorum originem inde manasse credit, quod cum Romulus Sabinos Etruscos, & multos ad asylum confugientes, pace cum Tatio facta, æquo jure in civitatem suscepisset, ex veteribus, & illustrioribus familiis senatorum numerum auxerit ad ducentos, a qua, ut diximus secunda electione conscriptorum quoque nomen manasse autumat. Quippe si *conscriptum* idem est, inquit, quod

*adlectum*, cur hi, qui in ordinem jam institutum coöptati sunt, conscripti non sunt appellandi. Sed Livio aliisque rerum fidei dignis scriptoribus potius fidem habendam censeo, quam Onuphrii nulla scriptorum auctoritate subnixæ conjecturæ. Diserte Livius nobis earum denominationum narrat originem, eamque & alii confirmant. Interjecto vero tempore C. Gracchus Trib. pl. allectis ex equestri ordine aliis trecentis, sexcentos Senatores fecit, quam legem populus paulo post antiquavit. Postea, circa tempora Syllæ, cum is senatum exhaustum supplevisset, quantus fuerit senatorum numerus, non certo constat, tamen supra 400. fuisse puto. Auctus postea ad noningentos a Cæs. Dictatore. Imo & supra mille, & quidem indignissimi numerabantur tempore Augusti.

Cæterum Senatores triplicis fuere ordinis. Alii enim *Patricii*, alii *Conscripti*, alii *Pedarii*. Patricii hi maxime sunt, qui non solum a centum illis patribus, ante jactum foedus cum Tatio Sabinorum rege, a Romulo lectis; verum qui quoque ab istis, qui Titio Tatio in societatem regni adscito, a Romulo veteribus adscripti, geniti sunt, ut ex Dionysio constat. Conscripti, postea regum, consulum, censorum decreto in senatum allecti sunt. Pedarii dicti sunt, qui non habebant sententiæ dictionem in senatu, sed in aliorum sententiam pedibus ibant; vel ut alii volunt, quod non sella curuli vectarentur in curiam. Auctore M. Varrone Pedarii sunt Equites Romani, qui amplioribus magistratibus functi, nondum tamen a censoribus in senatum lecti, senatores quidem non erant, sed quia honoribus populi functi erant, in senatum ipsis venire permissum erat, & sententiæ jus habebant. Non tamen rogabantur, sed quas sententias principes dixerant, in eas pedibus ibant: a quo pedarii, & eorum sententia pedaria dicta est. Gell. lib. 3. cap. 18. negat pedarios senatores appellatos propterea, quod sententiam in senatu verbis non dicerent, sed in alienam senten-



sententiam pedibus irent. *Quid igitur, inquit? quum senatusconsultum per decessionem fiebat, nonne universi senatores sententiam pedibus ferebant? atque hæc etiam vocabuli istius ratio dicitur, quam Gabius Bassus in commentariis suis scriptam reliquit. Senatores enim dicit in veterum atate, qui curulem magistratum gessissent, curru solitos honoris gratia in curiam vehi, in quo curru sella esset, supra quam considerent; quæ ob eam causam curulis appellaretur: sed eò senatores, qui magistratum curulem nondum caperant, pedibus itavisse in curiam: propterea senatores nondum maioribus functos honoribus pedarios nominatos. Ad hunc locum ita Gronov. in suis notis & emendationibus. Vixerat quisquam, opinor, senatorum, qui non aliquando pedibus ivisset in sententiam. Nunquid igitur omnes pedarii; Haud quaquam. Neque enim pedarii dicti, quotquot pedibus in sententiam discederent, sed qui tantum pedibus irent, aut rarissime aliter; sive ipsi non haberent fiduciam dicendi, sive non rogarentur, ut qui essent in postremis scripti, ut Brutus accusator vocatus, non quod non alii omnes nobiles adolescentes id officium reipub. aliquando presterent, quantumvis invidiosum, sed quod hic toties. Et quotidie, & nonnunquam insontibus periculum facekeret, & Alexand. ab Alexand. dier. genial. lib. 4. cap. 11. Senatores quoque qui honoribus functi essent, quippe curules gesserant magistratus, curuli sella in senatum, & curiam vehi, & cum sceptris, si duces aut viri consulares fuissent: qui vero non gessissent, pedibus in curiam, & quod videbatur e reipub. censere, & ideo pedarios nuncupari perspectum est. Si quidem si senatusconsultum per discessionem fiebat, universi senatores pedibus sententiam ferebant, ideoque omnes pedarii possent dici senatores. Per discessionem ferebatur sententia hoc modo. Mos erat apud Romanos, quando de aliqua re fieret senatusconsultum, ut primum rogarentur primarii senatores, civitatis principes, qui sapius de una eademque diversas pronuntiabant sententias: fiebat vero S. C. in eam sententiam,*

quam

quam plures laudassent. Exemplum extat apud Cic. *epist.* 2. *ad famil.* ubi ita inquit. *Itaque cum sententia Bibuli prima pronuntiata esset, ut tres legati regem reducerent, secunda Hortensii, ut tu sine exercitu reduceres: tertia Volcatii, ut Pompejus reduceret.* Pronunciatis de rege reducendo differentibus senatorum opinionibus, in singulas discedebatur, ut quam plures probassent, cognosceretur, atque in eam fieret. *S. C.* Permittendæ dissensionis formulam invenimus apud Festum. *Qui hoc censetis hic transite, qui alia omnia in aliam partem.* Majoragius in suo de *Senatu Romano* libello cap. 2. quatuor senatorum esse genera statuit. *Patricios, Conscriptos, Allectos, & Pedarios.* Patricii ex ejus sententia sunt omnes vel majorum, vel minorum gentium, qui post L. Bruti institutionem a senatoribus patricii generis ducebant originem. Conscripti vocati sunt illi, qui consulum censorumve decretis in senatu essent scriptis notati. Quæ appellatio principium habuit ab ipso Junio Bruto, qui cum senatorum voluerit augere numerum, non solum ex patriciis, sed etiam equestri ordine, quosdam virtute ac nobilitate præstantes viros senatui adscriptis: Quam sententiam confirmare videtur Festus, cum inquit, *Allecti dicebantur, qui propter inopiam ex equestri ordine inter senatum assumpti fuisset.* Verum hoc discrimen in allectos, & conscriptos, quibusdam eruditis non arridere videtur, idque merito. Allecti enim in conscriptorum numero ponebantur, & conscripti vocabantur. Hinc Plutarchus in problem. *Cur senatores alios patres conscriptos, alios tantum patres appellabant? An eos, quos ab initio Romulus delegerit, Patres ac Patricios nominabant, quasi bonis parentibus natos, reliquos deinde ex plebe electos, & adscriptos in senatum Conscriptos vocitarunt?* Omnes scilicet post Romulum in senatum coöptatos uno eodemque nomine conscriptos appellabant. Quæri solet etiam fueritne Senatoria dignitas magistratus, & exploratum est senatum magistratum non fuisse. Hinc distinguit Dionysius



nylius dignitatem senatoriam a magistratu, cum inquit? Atque hinc quidem plebis opes creverunt: optimates autem multos patres antiquæ dignitatis amiserunt; cum & senatus, & magistratum, & sacerdotiorum partem plebejis fecissent, & alia etiam ornamenta communicassent, quæ propria patriciorum fuerant. Imo senator nullus legebatur ex ordine, nisi qui magistratum gessisset. Cui mori congruenter Cicero sanxit in legibus suis, è magistratibus senatum esse oportere. Festus eum dicit magistratum, qui in aliquâ est potestate constitutus, quique singuli auctoritatem habent, ut Consul, Prætor, Proprætor. Senator autem nullam nisi in senatu sententiæ dicendæ potestatem habet. Universi autem totum reipub. sustinebant pondus. Ita ut non inconcinne annotaverit Vent. Cæcus ad *h. t.* Senatum & paruisse magistratibus, & imperasse. Parebat, cum jussu cogeatur magistratum: Imperabat cum Senatusconsultis magistratus obtemperabant.

Quanta autem fuerit Senatus auctoritas docet nos Livius lib. 1. *Quum sensissent ea moveri patres, offendendum ultro rati quod amissuri essent, ita gratiam in-eunt, summa potestate populo permissa, ut non plus darent juris, quam retinerent. Decreverunt enim, ut cum populus regem jussisset, id sic ratum esset, si patres auctores fierent? hodieque in regibus magistratibusque rogandis usurpatur idem jus, vi adempta: priusquam populus suffragium ineat, in incertum comitiorum eventum Patres auctores fiunt. Quid sit auctorem fieri tradit Paulus in l. 3. ff. de auct. & conf. tut. Etiam si, inquit, non interrogatus tutor auctor fuerit, valet auctoritas ejus, cum se id probare dicit quod agitur, hoc est enim auctorem fieri. Quemadmodum antiqui vocabant auctores mulierum, sine quorum consensu, quæcunque egissent mulieres, rata non erant. Similiter quoque id juris patres habebant, ut tum demum rata essent, quæ populus jussisset, si patres auctores fierent. Auctoritas autem senatus, majestas populi dicebatur.*  
Cic.

Cic. Philipp. 3. *Tantus autem consensus est municipiorum coloniarumque Provinciae Galliae, ut omnes ad auctoritatem hujus ordinis, majestatemque populi Romani defendendam conspirasse videantur.* Senatorii hujus ordinis ornamenta, quibus a cæteris præsertim Equitibus distinguebantur, fuerunt *Latus clavus*, & *Calcens lunatus*. Fuit latus clavus tunica purpura prætexta, latior tunica vulgari, atque longior, discintaque, cui toga superinduebatur ut tunicæ. Cum enim Romani cives omnes indistinctè tunica uterentur, contigit, ut tunica ordines distinxerit. Et alia fuerit tunica senatorum, alia civium. Horum sine clavi, illorum clavata, id est, claves purpureos intextos habens, qui iterum vel lati vel angusti. Illi Senatum, hi Equitum Romanorum fuere. Lampridius in Alexandro. *Tum satis esse constituit, ut equites Romani a senatoribus clavi qualitate discernerentur.* Hinc quoque apud Papinium legimus lib. 5. Sylv.

*Non sanguine cretus*

*Turmali, trabeaque Remi nec paupere clavo  
Angustam sedem, & Latii penetræ senatus  
Advena pulsasti.*

*Primaque patricia clausit vestigia luna,  
Mox Tyrios ex more sinus, tunicamque potentem  
Agnovere humeri.*

Equitum autem erant turmæ, Trabea, & pauper sive angustus clavis, ideoque per Turmalem sanguinem, trabeam, & pauperem clavem, Equestrem explicat ordinem. Quare Martialis in Gelliam respicientem ordinis Equestris maritum *Epigram. 17. lib. 4.*

*Dum proavos atavosque refers, & nomina magna*

*Dum tibi noster Eques sordida conditio est:*

*Dum te posse negas, nisi lato, Gellia, clavo*

*Nubere: nupsisti, Gellia cistifero.*

Fuerunt autem clavi quasi flores seu nodi panno intexti, similes capitibus clavorum, & clavata fuit tunica, cui insuta purpuræ fragmenta, unde detrahi quoque & resui possent



possent, ut vult Manutius, & quoque Cic. *pro Sex. Rosc. Amer.* Contra vero Scaliger ad Varronem lib. 8. clavum vult fuisse plagulam, quæ ab humeris in pectus dimittatur, ut erat ἐπιπῶνις Græcorum, ut amuleta, numismata, quæ de collo suspendunt, ideoque non fuisse partem tunicæ. Quod affirmare videtur Horatius Satyr.

*Nam ut quisque infans nigris medium impedit cruris  
Pellibus, & latum dimisit pectore clavum.*

Sed notandum, Senatores, cui laticlavii jus erat, tunicam laticlaviam cingere non consuevisse: quo fiebat, ut clavi purpurei, cum zonâ non constringerentur, caderent in pectus sive dimitterentur pectore. Secus in equitibus, qui cum cingerent tunicam, angusti clavi in pectus non descendebant, sed in sinu & supra ipsam zonam conspiciebantur. Vid. Quintil. *lib. 11.* Usus autem clavorum a Tullo Hostilio Romanorum rege petendus, quem, ut inquit Plinius *lib. 9. cap. 39.* toga prætexta & latiore clavo e regibus primum usum Etruscis devictis fatis constat.

Nec solum tunicæ, sed etiam suppellex lectorum, & mensarum latis clavis prætexebantur, ut apud Mart. Epigram. *lib. 4. cap. 46.*

*Et lato variata mappa clavo.*

Unde quoque apud Petronium. *Circaque oneratas veste cervices laticlaviam immiserat mappam.* Est autem mappa, qua inter scyphos & epulas utebantur, & pro se quisque afferebat.

*Attulerat mappam nemo, dum furta timentur.*

Mart. *lib. 12. epigram. 29.*

His itaque mappis adfuti quoque fuere clavi. Nec tantum purpurei, sed & aurei clavi commemorantur ab Ulpiano l. 19. ff. *de aur. argent. mundo*: ait enim, *Argento cedere, quod ad speciem argenti junctum est, quemadmodum & clavi aurei, & purpureæ pars sunt vestimentorum.* Et ex Pomponii sententia. *Et si non sunt clavi vestimentis confusi, veste legata continentur.* Atque hinc auro clavatæ

vestes apud Vopiscum, quarum usum Tacitus Imperator interdixit.

Denique ex omnibus constat alias esse *vestes clavatas* auro ac purpuræ; alias *aureas purpureasque*, quæ totæ auro textili aut purpura constant. Aliam quoque tunicam esse palmatam, aliam laticlaviam; non omnis etiam lati clavi tunica palmata erat. Palmata siquidem, quam triumphantes accipiebant, a latitudine quidem clavorum ita dicebatur, non tamen inde omnes tunicæ laticlaviæ palmatæ fuere: postea enim a genere picturæ palmata dicta fuit, Festus. Ut enim toga picta olim purpurea, post picta fuit; sic tunica socia pictæ togæ olim latus clavus, post palmata, a genere picturæ vocata, & simul cum toga picta triumphantibus data. Sig. lib. 3. de antiq. jur. civ.

Alterum Senatoris ornamentum fuit *calceus lunatus*, qui senatorem quoque a plebe cæterisque ordinibus distinguebat. Calceorum usus per longa sæcula apud veteres non obtinuit; hinc initio reipub. Romanæ non tantum servi, sed & ipsi Senatores nudis pedibus incedebant, nisi necessitas cogeret, paulatim uti fasciis curalibus, & pedulibus; postea pedes tegendi non tantum mos invaluit, verum variis quoque calceamentorum formis fuere usi: imo adeo calceandi lûxus tandem Rempub. invasit, ut & argenteis, aureis & gemmatis pedes texerint calceis. Hinc de Cæsare Seneca, de alieno cultu, quo se ornabat, sermonem habens, inquit. *Qui excusant eum, negant id insolentie causa factum: ajunt socculum auratum, imo aureum margaritis distinctum, ostendere eum voluisse.* Et Eutropius cap. 9. *Eamque ob rem ornamenta gemmarum vestibus, calceamentisque addidit.* Calceamentorum porro genera fuere duo, *Calceus*, & *Solea*; Calceus totum pedem textit, Solea plantam tantum. Verum calceorum, & solearum varia genera: a cæteris autem differebat Senatorum Calceus, utpote cui præter cætera ornamenta lunula erat adfuta, quibus, inquit vetus Scholiast, ad *Juv. Sat. 7. Discernuntur Patricii*



*ericii a novitiis.* Quod non obscure videtur hisce versibus annuere Juvenal.

- - - & nobilis, & generosus

*Ad positam nigrae lunam subtexit alata.*

Et Martialis lib. 1. epig. 50.

*Lunata nusquam pellis, & nusquam toga,*

*Olidaeve vestes murice.*

id est, non aderant nobiles sive patricii Romani: & epig. 29. lib. 2. ubi de quodam servo literato ad equestrem dignitatem evecto.

*Non extrema sedet lunata lingula planta,*

*Coccina non lesum cingit aluta pedem,*

Pro extrema, alii legunt externa; quidam hesternum, id est, nova, ut notet hunc servum hominem novum, & hodie primum nobilitatum: novi enim homines sunt, qui primi e familia ad honores perveniunt. Sic hesternus Quirites Persius Sat. 3. vocat servos recens libertate donatos, pridie manumissos, & cives Romanos factos. Lingula enim illa, quæ in pede sedet, extrema a Martiali vocari nequit, quia hesternus ille eques heri atque hodie ad hanc evectus dignitatem, in quem invehitur Poëta, calceos patrios gestabat, quatuor corrigias sive ligulas habentes; quamobrem infima ligula, quæ pedem tangit, extrema dici nequit, cum contra in calceis plebejis extrema erat, illi enim non habebant alias ligulas, quæ inter se implexæ usque ad furas ascendebant. Rub. de calceo Senat. hæc ligamenta enim ad furas portensa fuisse docet Virg. Ecloga 7.

*Puniceo stabit furas evincta cothurno.*

Lunula autem hæc apponebatur ei loco, ubi extremitates calceorum inter se coeunt, quæ in fronte calcei infixæ, ubi pes incipit, præter nobilitatis significationem eum quoque habebat usum, ut claudendis adstringendisque inter se calceorum ausulis esset admodum commodus. Unde Statius

*Primaque patricia clausit vestigia luna.*

Fuit autem initio reipub. lunula una tantum calceo ad-

posita, eaque vel ferrea, vel ærea, vel eburnea; donec profusior luxus rempub. invasit, quando non una, sed plures, eæque pretiosiores, utpote vel argenteæ, vel aureæ, vel etiam gemmeæ calceis assuebantur. Quare autem Patres illi, qui generis nobilitate a cæteris distinguebantur, lunulas calceis adsutas gestabant, variæ adferuntur rationes: Plutarch. q. 76. diversas enumerat; vel quod signum esset habitationis supra lunam; vel ut significarent genus suum ab Evandro repetere, qui ipse a luna ortum se diceret; vel ut secundis rebus elati ac superbientes, mutationis fortunæ in alteram partem admonerentur, lunæ videlicet exemplo, quæ primum recens e caligine emergit, deinde fulgore faciem splendorem augescit illustrans: & cum splendet pulcherrima, orbe pleno, iterum exuit lumen suum, & oculos spectantium fugit; vel ut obedientiæ assuescere discerent lunam imitantes, præstantiori parere non recusantes; quod quemadmodum illa secundas in illustrando orbe partes obit, Phœbei semper radiis intentanitoris; ita ipsi quoque magistratibus obtemperarent, a quibus, & honorum, & potentiæ in se redundarent fructus. Verum magis viris doctis placet Isidori de significatione lunulæ opinio, qui putat *lunam non syderis in eis formam, sed notam centenarii numeri significasse, quod initio patricii tantum centum fuerint.* Et Zonaras, *Patricii*, inquit, *gestabant in urbe calceos urbanos forma litteræ RHO, ut a centum Senatoribus originem trahere viderentur, aut quod prima esset littera Romanorum.* His ergo ornamentis sive insignibus scil. lato clavo, & calceis lunatis ab aliis ordinibus distinguebantur, ut Equites annulo aureo, *Annuli distinxere alterum ordinem a plebe, ut semel ceperunt esse celebres, sicut tunica ab annulis senatum.*

Præterea senatoribus fuit jus spectandi in orchestra. Equitibus vero in quatuordecim ordinibus theatri. *Cumque intercedentibus annis, Patribus Equitibusque, ac plebi Romanæ confusa loca fuissent, ubi spectarent, Corni Scipione*



*Scipione & T. Sempronio* *coff. ludis Romanis per Aediles Curules discreta loca senatoria a populo fuere, ut suis cuique honos servaretur, lege cautum fuit, ut optimatibus subsellia proxima darentur. Quo tempore præcipua loca in orchestra Senatoribus data sunt, ubi in scena saltabatur, & chorus inducebatur. Podium imperatori & consulibus, proscenia & pulpita optimatibus, nonnunquam Principi. Alex. ab Alexand. dier. Genial. lib. 5. cap. 16. Quidam Orchestram Pantomimorum saltibus dicatam fuisse contendunt, atque a græco verbo ὀρχήστρα quod significat salio, locum ita vocitatum volunt. Unde apud Isidorum lib. 18. cap. 44. Orchestra (inquit) erat scena, ubi saltator agere posset aut duo inter se disputare, ibi enim Poëtæ, Comædi, & Tragædi ad certamen descendebant, iisque canentibus alii gestus edebant. Hinc vetus Scholiastes ad Juvenal. vers. 178. sat. 3. dicit orchestram esse spatium chori, & saltatorum, & ad v. 47. sat. 7. vocat orchestram spatium in Theatro, quod Pantomimo saltanti vacat. Verum eorum potius sententiæ tanquam vero magis consentaneæ subscribo, qui Orchestram locum Senatui destinatum fuisse affirmant, in quo senatores spectaturi sedebant, & sua habebant subsellia, non destitutus testimoniis fide dignis. Sic apud Juvenal. Sat. 3. v. 178.*

*Aequales habitus illic, similesque videbis*

*Orchestram & populum.*

Id est, optimates & plebem. Sic apud Sueton. in Nerone cap. 12. *Deinde in Orchestram senatumque descendit, & orationis quidem, carminisque Latini coronam, de qua honestissimus quisque contenderat, ipsorum consensu concessam sibi recepit.* Ex quo clare perspicimus populo Orchestram non patuisse. Et in Cæsare cap. 76. *Insuper prænomen imperatoris, cognomen patris patriæ, statuam inter reges, suggestum in Orchestra.* Et in Augusto cap. 35. *Servavitque etiam excusantibus insigne vestis, & spectandi in Orchestra, epulandique publicè jus.* Et clarius id pro-

bant, quæ apud Vitruvium legimus lib. 5. Architec-  
 cap. 6. *Ex his trigonis cujus latus fuerit proximum sce-  
 ne, ea regione qua percipit curvaturam circinationis, ibi fi-  
 niatur scena frons, & ab eo loco per centrum parellelos linea  
 ducatur, qua disjungat proscenii pulpitum, & Orchestra  
 regionem, ita latus factum fuerit pulpitum quam Græco-  
 rum, quod omnes artifices in scenam dent operam. In Or-  
 chestra autem senatorum sunt sedibus loca designata, & ejus  
 pulpiti altitudo, sit ne plus pedum quinque, uti qui in Orche-  
 stra sederint, spectare possint omnium agentium gestus.*

Supereft jam, cum per omnes ordinis senatorii partes  
 percurrere nobis animus est, de jure ac modo senatus  
 habendi & convocandi aliquid disputemus. Per quos  
 Senatus more majorum haberi & consuli usus obtinuit,  
 ex Gellio perspicimus, qui lib. 14. cap. 7. ex Varro-  
 ne asserit Dictatorem, Consulem, Prætorem, Tribu-  
 num plebis, Interregem, Præfectum urbis, neque alios  
 præter hos, jus habuisse facere senatusconsultum; quo-  
 tiescunque usu venisset, ut si omnes isti magistratus eo-  
 dem tempore Romæ essent, tum quo supra scripti or-  
 dine essent, qui eorum prior aliis esset, ei potissimum  
 senatus consulendi jus fuisse. Addit deinde extraordi-  
 nario jure tribunos quoque militares, qui Proconsu-  
 les fuissent, item Decemviros, quibus imperium consu-  
 lare tum esset, item Triumviros reipub. constituendæ  
 causa creatos jus consulendi senatum habuisse. Cap. ve-  
 ro 8. quæsitum esse inquit, an Præfectus urbi latina-  
 rum causa relictus senatum habere posset, quod Junius  
 negavit, propterea quod senator non erat, neque jus ha-  
 bebat sententiæ dicendæ, quum ea ætate præfectus fiat,  
 quæ non sit senatoria. *M. autem Varro, & Attejus Ca-  
 pito* contrariam amplectebantur sententiam, & ajunt  
 Præfecto urbi jus esse habendi senatus, quandoquidem  
 & tribuno plebis jus senatus habendi erat, quanquam  
 Senatores non essent ante Atinium plebiscitum.

His vero magistratibus, quibus senatusconsultum fa-  
 ciendi



ciendi jus erat, potestas etiam fuit intercedendi. *Postea*, inquit Gell. *cap. 7. lib. 14. scripsit de intercessionibus, dixitque intercedendi ne senatusconsultum fieret, jus fuisse iis solis, qui eadem potestate, qua ii, qui senatusconsultum facere vellet, majoreve essent.* Locus autem senatusconsultus faciendi per Augurem constituebatur, & templum appellabatur, etiamsi prophanus esset. Auguris enim consecratio locum aptum reddebat ad senatusconsultum habendum, post eam, licet antea prophanus, templum appellabatur, quamobrem in Curia Hostilia, & Pompeja, & postea in Julia, cum profana ea loca essent, templa fuisse per Augures constituta, ut in iis senatusconsulta more majorum justa fieri possent. Gell: *dict. loc.* tradit. Loca ista Senacula fuisse appellata docet Festus, inquiens; *Senacula Romæ tria fuisse, in quibus Senatus haberi solitus sit, memoria prodidit Nicostratus in lib. qui inscribitur de Senatu habendo. Unum ubi nunc est ædes concordie inter Capitolium & forum, in quo solebant magistratus, ut dicit, Tritinius cum senioribus deliberare. Alterum ad portam Capenam. Tertium intra ædem Bellonæ in quo exterarum nationum legatis, quos in urbem admittere volebant, Senatus dabatur.* Aliquando tamen fiebat sub Dio vel Jove frigido, propter aliquam prodigii causam, ut cum nunciabatur de bove locuto, testante Plinio *lib. 8. cap. 45.* loco tamen inaugurato, ne senatusconsulta irrita forent, ut superius diximus. De tempore vero habendi Senatus ita differit Gell. Senatusconsultum ante exortum aut post occasum solem factum ratum fuisse. Opus etiam censorium fecisse existimatos, per quos eo tempore senatusconsultum factum esset. Certum tempus autem, quo Senatus haberetur, lege Pupia definitum, a M. Pupio Pisone lata, qua constitutum est. *Ne Senatus ab XIX. Kalend. Februarii ad usque Kalendas Februarias haberetur. Ne nisi perfectis vel rejectis legationibus aliis de rebus Senatus haberetur Cic. lib. 1. epist. 4. ad famil. Februario men-*

se senatus frequens postulatis provinciarum, & legationibus audiendis dabatur. Imo lex Gabinia jubebat legatis quotidie Senatum dari Cic. *epist.* 12. ad *Q. Frat.* Comitibus diebus Appius interpretatur, non impediri se lege Pupia, quo minus habeat senatum; & quod Gabinia sanctum sit, & cogi legatis quotidie senatum dari. Tranquillus in Augusto ait cap. 35. Sanxisse Augustum ne plusquam bis in mense legitimus senatus haberetur, Kalendis & Idibus, neve Septembri Octobrive mense ullos adesse alios necesse esset quam sorte ductos, per quorum numerum decreta confici possunt. Legitimus autem vocatur, qui statis & lege Pupia designatis diebus convocatis habebatur. vid. Cic. *lib.* 1. *epist.* 4. ad *Lentulum*, *lib.* 8. *epist.* 8. ad *Ciceronem*. Si præter ordinem ob incidentia aliqua negotia senatus cogeatur, edictus vel indictus dicebatur. Excipiebantur autem semper dies comitiales, quibus senatus haberi non poterat: Ideoque nec cogi vel indici. Cic. ad *Q. Fr.* *epist.* 2. *lib.* 2. Per obtrectatores Lentuli res calumnie extracta est, consecuti sunt dies comitiales, per quos senatus haberi non poterat. Causam hujus prohibitionis ex Jul. Capitolino colligimus in Gordiano scil. ne senatores a suffragio ferendo avocarentur. Excipiebantur quoque dies festi, & ludi publici. Qui autem Senatum habiturus esset, prius hostiam immolabat, auspiciumque capere consueverat. Ita Appianus *lib.* 2. Est vero mos magistratibus Senatum ingressuris, prius uti Haruspicina. Hinc Livius *lib.* 22. Ita rebus divinis peractis de bello requepublica retulit dictator. Augustus sanxit, ut priusquam consideret quisque iure & mero supplicaret, apud aram ejus Dei, in cujus templo coiretur. Quæ ejus ætatis consuetudo fuit, cum ferio quid ageretur, idque probatur ex Ovidio, cum uxorem docet quam esset Livia ratione convenienda;

*Sed prius imposito sanctis altaribus igni*

*Thura fer ad magnos vinaque pura Deos.*

Quid autem si senatus haberetur in Curia? & ibi quæque



que fuisse aras existimat Casaubonus : quemadmodum in Julia Curia, ubi ara victoriæ. Præterea, ut superius diximus, Augures constituerunt plurimas curias templa esse. Prius autem de rebus divinis, quam humanis in Senatu referendum erat.

Notandum quoque neminem, senatu convocato, sententiam de aliqua re dixisse, nisi prius rogatum; ordinem vero in rogandis dicendisque sententiis describit Gell. lib. 4. cap. 10. Ante legem, quæ nunc de senatu habendo observabatur, ordo rogandi sententias varius fuit; alias primus rogabatur, qui a censoribus princeps in senatum lectus fuerat, alias qui designati consules essent. *Qui ordo in sententiis rogandis servari solet, eundem tenebo in viris fortibus honorandis. A Bruto igitur consule designato, more majorum capiamus exordium.* Cic. Philipp. 5. cap. 13. Interdum consules, studio aut necessitudine aliqua adducti, quem iis visum erat honoris gratia, extra ordinem sententiam primum rogabant, alium tamen quam consularem virum rogari fas non erat. Ex qua consuetudine C. Julium Cæsarem in eo consulatu, quem gessit cum M. Bibulo, quatuor solos duntaxat extraordinem rogasse testatur Gellius, M. Crassum, deinde Cn. Pompejum, postquam Cn. Pompejo filiam desponderat. Et Cicero in libro de senectute cap. 18. testatur tantum honoris senectuti fuisse tributum, quod, ut quisque ætate antecedit, ita sententiæ principatum teneat: neque solum honore antecedentibus, sed iis etiam qui cum imperio sunt, id est, quibus senatus populusque Romanus exercitum dederat, qui nisi prius imperium deposuissent, ingredi urbem legibus vetabantur. Cum autem consul alter ambove retulissent, sententias rogati Senatores dicebant, consul eas pronunciabat, ut facta discessione, voluntas senatus appareret. Verum notandum quod refert Gellius eod. loc. Senatori jus fuisse, antequam sententiam de re proposita pronunciaret, ante quicquid vellet alius rei & quoad vellet,

diceret, quo contingebat, ut perficere nolentes' quod proponebatur, vel de quo agebatur, diem dicendo eximerent, ut fecisse Catonem testatur, qui a Cajo Cæsare consule rogatus perficere nolebat rem, de quâ rogabatur, quod ea e repub. non videbatur, ejus rei gratia ducendæ longa oratione utebatur, eximebatque diem dicendo. Cum aliquis in dicenda sententia duas pluresve res complectebatur, eam si non omnibus placeret, postulabatur, ut divideret, scil. ut separatim de singulis referret. Observandum porro, suo loco quemque sententiam dixisse, primi sedebant magistratus majores Consules, Prætores, quod si censores in senatu, infra prætores locum habebant. Censura enim non magistratus erat perpetuus, sed quinto quoque anno creabatur, ad civitatem censendam sive lustrandam, unde lustrum quinquennii spatium significat; dictum autore Varro a *luendo*, id est, *solvendo*: quoniam in quinque annos olim prædia locari solebant, & quinto quoque anno tributa sive vectigalia exigebantur. Cum autem inter majores magistratus censoria dignitas numerabatur, supra minores magistratus in senatu sedisse dubitari nequit. Sequebantur deinde minores magistratus, Ædiles curules, Ædiles plebis, & Quæstores; tum qui magistratum gesserant, quisque suo ordine, Consularii, Prætorii, Ædilitii, Quæstorii: cum autem sententiam dicebant surgebant, & stantes pronunciabant opinionem.

*Ita capit senatus se interponere.* ] Id est, Senatus cæpit se iterum immittere iis rebus, quæ potestati & auctoritati, quæ sibi olim competeat, recuperandæ inserviebant. Ita enim apud Cic. in Vatinius. *Num quem putes illius tui certissimi gladiatoris similem Trib. plebis reperiri posse, qui se interponat, quo minus reus mea lege fias.* Idem ad Q. Fr. lib. 3. 20. 7. *De Ascanione tu vero ne quod voles facies, me nihil interpono, id intermisceo.* Itaque interponendo vel intermiscendo se senatus paulatim sibi pristinam auctoritatem, & potestatem vindicavit, necessitate cogente



te populus senatui favere, omnemque ad eum deferre reipub. curam necesse habebat, si sibi aut reipub. consulere vellet. Notandum itaque, hæc verba Pomponii non ita explicanda esse, quasi ante hac senatus nullam curam habuerit: quippe superius ostendit, & sub regibus, & post illorum exactionem magnam senatus fuisse auctoritatem, & potestatem. Verum postremis temporibus, plebe reluctante, multum de ea fuit detractum, & imminutum, ita ut non tantam jam haberent, quantam occasione præsentis necessitatis recuperarunt, scil. liberam de omnibus rebus, quæ ad reipub. curam pertinebant, præterquam de gravioribus, ( ut creandis magistratibus, sanciendo legibus, quarum ferendarum auctores tantum fiebant, de bello indicendo, & ineundis fœderibus, ) statuendi, & quæ statuta erant exequendi potestatem. Ita ut quicquid statuisset, decrevisset, & constituisset observaretur, & vim legis haberet, idque jus appellabatur senatusconsultum, non quod lex aliqua senatusconsultis legum vim, quemadmodum plebiscitis tribuebat lex Hortensia, verum necessitate cogente populus eandem ipsis vim tribuit, & quicquid senatus decreverat, ut legem observabat, nisi tale quid esset, quod plebis jus læderet, quo casu salvum erat Trib. plebis jus intercedendi, qua intercessione impediabant ne senatusconsultum vim & effectum sortiretur. Itaque major potestas Trib. in prohibendo, quam senatus auctoritas in constituendo vel decernendo. Hinc Gellius *lib. 14. cap. 7. Intercedendi ne senatusconsultum fieret, jus iis solis fuisse, qui eadem potestate, qua ii, qui senatusconsultum facere vellent, majoreve essent.*

*Idque jus appellabatur Senatusconsultum.*] Non ambigitur Senatum jus facere posse, ut inquit Ulpianus *l. 9. ff. de ll.* quamvis non potuerit facere legem, sed tantum legi similem constitutionem, vim legis habentem *l. unic. Cod. de Senatusconsf.* Lex enim est populi jussu generale, penes quem privativè est legis condendæ potestas, populi

populi autem appellatione, ut superius diximus, universi cives continentur, connumeratis etiam patriciis, & senatoribus. Hæc enim tria reliquerat Romulus populo commoda, magistratum creationem, legum lationem, & belli ac pacis arbitrium, ita tamen, ut patres, dum hæc expediebantur, auctores fierent. Varia autem de Senatusconsultis annotanda occurrunt, & primum quidem examinandum nobis incumbit, qua ratione fiebat. Potestas juris faciendi, quam Ulpianus in dicta lege Senatui competere affirmat, non tantum novissimis obtinuit temporibus, sed ab imperii primordio derivanda, ut potè ipso Romulo imperii conditore Senatui tributa, qui de ordinanda civitate, quam excitare in animum induxerat, sollicitus, ante omnia ad ea animum applicat, quæ ad ejus gubernationem pertinent, & ut superius diximus centum creat senatores, qui ob ætatem venerabilem Patres dicebantur, eorumque collegium sive concilium senatus dictum, cui tantum Romulum largitum fuisse potestatem apud Dionysium legimus, lib. 6. (*Scitis sane, legem nobis esse jam inde ab U C. quæ omnia in Senatus potestate facit, præter magistratum creationem, legum lationem, & belli inferendi finiendique arbitrium, horum trium potestatem esse penes suffragia populi*) ut fere reipub. omnis administratio penes senatum esset, præter ea jura, quæ populo Romulus concesserat. Quod autem a senatu decretum jussuque erat Senatusconsultum dicebatur. *Senatusconsultum, §. 5. inst. de jur. nat. & gent. est quod Senatus jubet. Nam cum auctus esset populus Romanus in eum modum, ut difficile esset in unum eum convocari legis sancienda causa, æquum visum est senatum vice populi consuli.* Verum hæc non ita debemus interpretari, quasi potestas senatusconsulta faciendi tum cœperit, cum populus ad eam multitudinem pervenerat, ut eum convocari esset difficile: quippe, ut modo diximus, Senatusconsultorum primordia vetustissima: sed & idem dicere vult Justinianus, quod Pomponius,



penius, scil. aucta populi multitudine, difficultas conveniendi ad Senatum curam reipub. deduxit permittente populo, quæ Pomponii relatio minus accurata videtur; nam apparet ex Historiis potestatem populi ad Senatum translatam astutia Cæsarum. Senatus enim potentiam augendo suæ serviebant, ut videre est. Hinc paulatim jura populi imminuebant. Cæsar dictator jus comitiorum non in totum populo ademerat, sed cum eo partitus erat, Suet. *in Jul. cap. 43*. Tiberius autem jus antiquum populo ademit, & sub ejus imperio Comitia e Campo ad senatum translata, Tacit. *1. Annal. cap. 15*. Nisi dicamus Pomponium hoc significare voluisse, quod superius diximus, nimir. Senatum non nova quædam jura sibi arrogasse, vel acquisivisse, sed tantum pristinam recuperasse potestatem auctoritatemque postremis illis mutatis Reipub. temporibus labefactatam, propter frequentes tribunorum intercessionem, & patrum cum plebe discordias, quia in tanta turba hominum difficile erat in unam eandemque convenire sententiam, propter varia hominum desideria; quot enim homines tot fere sententiæ, quas ad unam redigere consonantiam hoc opus, hic labor est; naturalis enim hominum ad dissentiendum facilitas, ut idem inquit Pomponius *l. 17. ff. de receptis arbitr.* Cum itaque plebs animadverteret illa cum senatu certamina reipub. interitum portendere, reversa in concordiam cum senatu, veterem curam, & auctoritatem, permittente propter communem salutem populo, senatus recuperavit, & quod senatus decrevit ac constituit pro lege habuit. Ut autem senatusconsultorum vetustissima probemus primordia, Dionysium citamus, qui eorum quædam nobis exhibet exempla: Quorum unum est, ut Sabine mulieres ad gentiles suos urbem obsidentes, reconciliationis causa proficiscerentur. *Factum est*, inquit, *Senatusconsultum, ut quotquot Sabine haberent prolem, his domi apud maritum relictis pueris, liceret legationem ad suos*

*populares suscipere. lib. 1. cap. 82.* Alterum fuit de interregibus creandis. Tertium cum decreverunt, ut cum populus regem iussisset, id sic ratum esset, si Patres auctores fierent. *Liv. lib. 1. cap. 17. Dionys. dict. lib.* Quartum cum plebs regem creandi potestatem a Senatu sibi delatam, senatui concessit, iussitque ut senatus decerneret, qui Romæ regnaret, pro potestate itaque sibi data, Numæ Pompilio regnum deferendum decreverunt. Quæ autem ratione senatusconsulta fiebant, de ea superius quædam disputavimus. Inquit autem Gellius Senatusconsultum fieri duobus modis, aut per discessionem si consentiretur, aut per sententias singulorum exquisitas, id est, per suffragia: Consul, vel is cui senatum habendi jus erat, convocato senatu, cum causam convocandi retulisset, rogabat sententias, eo ordine quem servare volebat qui senatum convocasset, modo e consulari esset gradu, quem primus rogabat, ut diximus. Verum notatu digum, quod tradit Suet. *in Jul. Cæs.* consuetudinem obtinuisse, ut quem ordinem in rogandis sententiis tenuisset *Kalend. Jan.* eundem toto observaret anno. Pronunciatis opinionibus, eam quam magis e republica fore putabat, primam pronuntiabat, & rogabat ut senatus judicaret hisce verbis. *Qui hoc censetis illuc, transite, qui alia omnia in hanc partem,* quibus verbis præibat ominis causa, ne diceret, qui contrariam sentiret. *Hinc ire in alia omnia, transire,* pro contrariam sententiam amplecti. Postquam igitur rogasset Consul vel qui senatum convocasset, ut discessionem facerent, ipse primus, facta discessione, alii deinde, in quam quisque partem, quam probabat, transibat. Discessione facta, numerabantur Senatores ab utraque parte stantes, ex quorum numero apparebat voluntas senatus, & quod plures approbassent, in eam fiebat senatusconsultum, præsertim si major pars sententiam a Consule pronunciatam amplectebatur. Sin minus, contingebat sæpius, ut res, de qua agebatur, omnino abjiceretur,



ceretur, vel in aliud tempus rejiceretur, quæ interjecto tempore iterum proposita, comprobabatur sæpissime. Ex quibus perspicimus ex consulis aliorumque, quibus senatus consulendi jus erat, fere arbitrio pependisse senatusconsultum. Quippe superius diximus iisdem magistratibus, quibus senatusconsulti faciendi jus erat, potestatem etiam fuisse impediendi, ne senatusconsultum fieret.

Quando autem is, qui senatum habebat, rogabat singulos senatores, quid de re proposita sentiret quisque, eorumque singulas exquireret sententias, appellabatur simpliciter senatusconsultum. Si senatusconsultum per discessionem factum dicebatur, non rogabantur neque dicebat quisque sententiam, sed tantum pedibus in eam partem ibant, quam probabant, unde pedibus ire in sententiam apud Cic. & Livium toties. *Cum Senatusconsultum per discessionem forte fieret, transeuntem eum in alteram partem, in qua pauciores erant, secutus est nemo* Suet. in Tib. cap. 31. Addit forte per discessionem, ut distingueret senatusconsultum per discessionem ab eo, quod exquisitis singulorum sententiis simpliciter Senatusconsultum, non additis verbis per discessionem, dicebatur. Hinc Cic. Philipp. 3. cap. 9. *Ac quæ sine causa videretur edixisse, ut senatus adesset, cum de repub. relaturus fuisset: allato nuntio de legione quarta, mente concidit: effugere festinans senatusconsultum de supplicatione per discessionem fecit, cum id factum esset antea nunquam.* Notandum vero nullum senatusconsultum potuisse fieri discessione non facta, in omnibus discessio erat necessaria: sed alia fiebant per discessionem non dictis neque rogatis, vel exquisitis sententiis; alia scrutatis, vel auditis singulorum sententiis: ambo per discessionem fiebant, & hac ratione facile Tiberonem cum Varrone conciliare possumus, quos a se invicem dissentire putat Gell. lib. 14. cap. 7. propterea fortasse quod vel non intellexit vel quod rejecit illam loquendi formulam ex Varrone relata, quod scilicet senatusconsultum sit, vel per dis-

cessio-

cessionem, si consentitur, aut si res dubia esset, per exquisitas singulorum sententias. *Hec enim, inquit, parum convenire cum eo, quod Atejus Capito in conjectaneis scriptum reliquit. Nam in libro ducentesimo quinquagesimo nono Tiberonem dicere ait, nullum senatusconsultum fieri posse non discessione facta, quia in omnibus senatusconsultis, etiam in iis, quæ per relationem fierent discessio erat necessaria: idque ipse Capito verum esse affirmat. Et sine dubio quoque Varro, licet non addidit per discessionem, quando de senatusconsulto per suffragia facto sermonem habet, etiam id adeo necessarium existimar, ut sine ea nullus posset fieri senatusconsultum, quamobrem non opus erat ejusdem vocis repetitione. Discessione facta, & exquisitis singulorum sententiis, Senatusconsultum scribebatur. Quum autem scriberetur, moris erat, ut ea res, de qua sententiæ rogatæ erant, summatim exponeretur. Scribebantur autem non omnium nomina, qui senatusconsultum probaverant, sed eorum potissimum, quorum nomina auctoritatem, & pondus senatusconsulto adderent, vel quorum auctoritate Senatusconsultum factum erat, qui præter cæteros ita decerni conati erant. Quæ Senatusconsulta auctoritates dicebantur, quasi senatusconsulti auctoritas in eo esset posita, si per claros viros videatur scriptum. Aliquando tamen sepe re dilata, & graviter acta, & plane perspecta, Cn. Pompeii voluntate in eam partem, ut eum decedere post Kalendas Martias placeret, senatusconsultum quod tibi mihi factum est, auctoritateque perscripta. Epist. Cæli ad Cic. 3. & Cic. de orat. ubi de L. Crasso sermonem habet, Permulta cum vehementissimo contentione animi, ingeniique virium, ab eo dictum esse constabat, sententiamque eam, quam senatus frequens secutus est ornatissimis, & gravissimis verbis, ut populo Romano satisfaceret, nunquam senatusconsultum reipublicæ, ne fidem defuisse ab eo dictum, & eundem, id in auctoritatibus præscriptis extat, scribendo admisisse. Extat in prædicta Cælii epistola integra senatusconsulti formula,*



formula, cui scribendo adfuerunt vix duodecim Senatores; cum, ut scribit Livius, *senatusconsultum fieri potuerit, si centum non minus in senatu essent*. Pædianus in Cornelianâ, *Lege Cornelia tantum fuisse*, inquit, *ne quis in senatu solveretur legibus, nisi ducenti adfuisent*. Imo postea senatores quadringentos in senatu adesse oportebat, Dio. lib. 54. Occasionis prædictæ formulæ movet quæstionem Paulus Manutius, in eleganti suo tractatu *de Senatu Romano*. Cur in illo senatusconsulto, cujus formula in dictâ Cælii epistola ad Ciceronem extat, invenimus eorum nomina, qui scribendo affuerunt, bis posita? cum moris tantum fuerit, semel ea senatusconsultis adscribi, idque in capite, vel in principio, quæ tamen in fine repetita ex Cælii epistola perspicimus. Non abs ratione erit, ut eam, quamvis satis prolixam, describamus; tum ut rei veritas magis eluceat; cum etiam ut ratio senatusconsulti faciendi, & scribendi cuique hæc legenti sit magis perspicua. Ita sese habent S. C. verba. *S. C. auctoritas. Pridie Kalend. Octob. in æde Apollinis, scribendo affuerunt*, (erat hæc solennis formula, quam præmittebant Senatusconsultis) *L. Domitius Cn. filius Ahenobarbus, Q. Cæcilius, Q. F. Metellus Pius Scipio, L. Villius, Lucii F. Pomt. Annalis, C. Septimius T. F. Quirina, Cajus Luccejus C. F. Pap. Hirrus, Scribonius, C. F. Pop. Curio, L. Attejus, L. F. An. Capito, M. Oppius, M. F. Terentina, Quod M. Marcellus Consul, V. F. verba fecit, de provinciis consularibus. D. E. R. I. C. (de ea re ita censuerunt) uti L. Paulus, Q. Marcellus Consules, cum magistratum iniissent, ex a. d. x. Kal. Mart. (Ex ante diem Kal. Mart. uti veteres fuisse locutos probat Manutius, non ante diem, ex epist. 17. lib. 3. ad Att. Nuncii nobis tristes, nec varii, venerant ex ante diem Non. Jun.) quæ in suo magistratu futura essent, de consularibus provinciis ad Senatum referrent, neve quid prius ex Kalendis Mart. neve quid conjunctim de ea re referretur a consulibus, utique ejus*

rei causa per dies comitiales senatum haberent, S. Q. C. (senatusque consultum) facerent: & cum de ea re ad senatum referretur a cos. eorum, qui in CCC. iudiciis essent, se adducere liceret. Si quid de ea re ad populum, ad plebemve lata opus esset, ut Serv. Sulpicius, M. Marcellus cos., praetores, tribunique pleb. quibus eorum videretur, ad populum plebemve ferrent, quod ii non tulissent, uti, quicumque deinceps essent ad populum plebemve ferrent. I. V. Prid. Kalend. Octob. in aede Apollinis, scrib. adfuerunt. L. Domitius, Cn. F. Ahenobarbus, Q. Caelius, Q. F. Metellus Pius Scipio, L. Villius, L. F. Pomt. Annalis, C. Septimius, T. F. Quirina, C. Scribonius, C. F. Pop. Curio, L. Attejus, L. F. An. Capito, M. Oppius, M. F. Terentina. Quod M. Marcellus Cos. V. F. D. E. R. I. C. Senatum existimare, neminem eorum, qui potestatem habent intercedendi, impediendi, moram asferre oportere, quominus de R. P. Q. P. ad senatum referri senatusque consultum fieri possit. Qui impedierit, prohibuerit, eum senatum existimare contra rempub. fecisse. Si quis huic Senatusconsulto intercesserit, senatui placere auctoritatem perscribi, & de ea re ad senatum populumque referre. Huic Senatusconsulto intercessit. C. Caelius, L. Vinicius, P. Cornelius, C. Vibius Pansa. Item Senatui placere, de militibus, qui in exercitu C. Caesaris sunt: qui eorum stipendia emerita aut causas, quibus de causis missi fieri debeant, habeant, ad hunc ordinem referri, ut eorum ratio habeatur, causeque cognoscantur. Si quis huic S. C. intercesserit, Senatui placere auctoritatem perscribi, & de ea re ad senatum populumque referri. Huic S. C. intercessit, C. Caelius, C. Pansa, tribuni pleb. Itemque Senatui placere, in Siciliam provinciam, in octo reliquis provincias, quas praetorii praetore obtinerent, eos, qui praetores fuerunt, neque in provincia cum imperio fuerunt, quos eorum ex S. C. provincias ire oporteret, eos sortito in provincias mitti placere. Si ex eo numero, quos ex S. C. in provincias ire oporteret, ad numerum non essent, qui in eas Provincias profiscerentur:



tum, uti quodque collegium primum pratorum fuisset, neque in provincias profecti essent, ita sorte in provincias proficerentur. Si ii ad numerum non essent, tunc deinceps proximi collegii, qui pratores fuissent, neque in provincias profecti essent, in sortem conficerentur, quoad is numerus effectus esset, quem ad numerum in provincias mitti oporteret. Si quis huic S. C. intercessit, auctoritas perscriberetur. Huic Senatusconsulto intercessit C. Cælius, C. Pansa tribuni plebis. Hujus senatusconsulti occasione quærit Paulus Manutius in dicto tractatu; cur in eo eorum nomina, qui scribendo affuerunt, bis ponantur? Quippe si semel, inquit, tantum in singulis senatusconsultis scribebantur, fugit me rationem, quare in hoc bis; sin quot erant capita senatusconsulti, toties adscriberentur, cur in hoc, in quo quatuor habentur capita, bis tantum, & non quatuor? Quod si quis non quatuor capita, sed quatuor Senatusconsulta esse dicat, quare igitur non quater nomina senatorum adscripta sunt? Quod singulæ partes non debeant considerari, quasi tot essent Senatusconsulta, satis indicat numerus singularis, *Senatusconsultum, quod tibi mihi factum est*; unius tantum Senatusconsulti mentionem facit Cælius. Præterea una tantum præcedit formula, quæ singulis senatusconsultis præponebatur. Scio singula capita senatusconsultum appellari in dicta epistola, sed hoc idem quasi legem pro legis capite in orat: *pro Cluentio* diceret. Si quatuor sint partes, quare non singulis partibus adscribuntur nomina? si unum tantum senatusconsultum, quare non semel tantum ponuntur? Fatetur hanc dubitationem se torquere. Ad tollendam autem hanc difficultatem putat, & ante, & post senatusconsulta senatorum nomina scripta fuisse; scilicet, si non intercedebatur, nam tum revera senatusconsultum erat. Quod si intercedebatur, non dicebatur senatusconsultum, sed auctoritas. Quamobrem merito huic senatusconsulti parti auctoritates adscriptæ sunt, quia nemo ei inter-

cesserat, ideoque revera senatusconsultum erat. Ad cæteras senatusconsulti partes nulla adposita sunt nomina sive auctoritates, propterea quod iis intercessum est; ideoque senatusconsulti vi & effectû, sive nomine caruerunt. Verum merito dubito, num verò sit consentanea hæc Manutii conjectura; propterea quod eorum nomina, qui scribendo affuerunt, nunquam post, sed semper ante senatusconsulta fuerint posita, unde præscriptæ dicuntur auctoritates, quæ præscribebantur in capite Senatusconsulti. *Primis Senatusconsulti versibus poni semper solebant nomina eorum, qui scribendo affuissent*, inquit Briffon. *de formul. lib. 2.* Unde legimus apud Cic. *de orat.* *Ut populo Romano satisfaceret, nunquam senatusconsilium Reipub. nec fidem defuisse ab eo dictum, & eundem, id quod in auctoritatibus præscriptis extat, scribendo adfuisse.* Et in *Agraria. 2.* *Collegas suos adscriptores legis agrariæ non repudiabit, a quibus ei locus primus invidiæ in præscriptione concessus est.* Sic quoque in *epist. 2. lib. 5. ad Fam.* *Fam illud S. C. quod eo die factum est, ea præscriptione est* (habuit tot clarorum, & magnorum virorum præscripta nomina) *ut, dum id extabit, officium meum in te obscurum esse non possit.* Hinc legendum in *epist. Cœlii auctoritates præscriptæ.* Cum ex hisce perspicimus moris fuisse, ut præscriberentur nomina, idque semel tantum in principio, persuadeo mihi, secundam solennem senatusconsulti formulam, ad sequentes auctoritates, perscriptas, a prima S. C. parte, quæ revera senatusconsulti nomine, utpote cui nemo intercesserat, appellatur, separatas & distinctas pertinuisse. Nuspiam quod scio legi, auctoritatibus nomina eorum, qui scribendo affuerant, apponi moris non fuisse. Nam licet decretum senatus irritum redderet intercessio, tamen inscribi solebat publicis tabulis; propterea quod testata hisce senatus voluntas, auctoritatem quandam habere videbatur. Impedito enim intercessione senatusconsulto, extare tamen senatus sententiam suam



suam voluit. Testis est Livius *lib. 4. cap. 57. Si quis intercedat S. C. auctoritate fore contentum.* Et in descripto Senatusconsulto. *Si quis huic S. C. intercesserit; senatus placere auctoritatem perscribi, & de ea re ad senatum populumque referri.* In ea itaque auctoritas a senatusconsulto differt, quod neque executioni mandari poterat, neque populum obligabat Senatus decreto obtemperare ac morem gerere, revera tamen erat Senatus decretum sive consultum legitimum, & perfectum, scil. legitimo loco, die, habitum a magistratu, cui senatum habendi jus erat, præsentibus tot senatoribus, quot adesse legibus cautum erat, sed vi obligandi, ideoque nomine senatusconsulti destitutum intercessione trib: erat: & quemadmodum publicis quoque inscribebatur tabulis, ut constaret voluisse quidem, & auctores fuisse senatum, sed intercedente tribuno non potuisse; Ita præscribebantur nomina sive auctoritates eorum, qui scribendo aderant, sive qui magna auctoritate pollentes propter singulares animi dotes potissimum suaserant, ut ejusmodi senatusconsultum fieret. Quando senatusconsultum per intercessionem tantum irritum reddebatur, alia omnia requisita aderant senatusconsulto faciendo necessaria: ideoque addebatur, ut in dicto S. C. videre est, *Huic S. C. intercessit C. Cælius, C. Pansa. tribb. plebis.* Quippe sunt & alia impedimenta, utpote si non legitimus senatorum numerus aliquid decrevisset, vel cum senatus alieno loco aut tempore, aut non legitime edictus habitus esset, senatusconsultum irritum erat, extare tamen sententiam volebat senatus, ideoque auctoritas perscribebatur: ut constaret de voluntate, & sententia eorum, qui tunc adfuissent, & sine dubio eorum quoque adscripta fuere nomina.

Verum posset aliquis objicere illud Manutii, cur huic parti potius, & non cæteris adscripta sint eorum, qui scribendo adfuerunt, nomina. Quod ideo factum conjecturari licet, quia Senatusconsultum, sive ea pars, cui

nemo intercefferat, ideoque verum senatusconsultum erat, separat a cæteris partibus, quibus intercedebant tribuni plebis, ideoque auctoritates dicebantur, & sufficebat primæ earum parti, cujus ejusdem conditionis & reliquæ erant, adscribi eorum nomina, qui vehementer concupierant, ut de iis rebus senatusconsultum fieret, & scribendo adfuerant. Quod idem in Senatusconsultis observatum fuisse opinor, ut tantum in principio auctoritates apponerentur, licet plures partes complectebantur, nam omnibus æqua conditio nullo intercedente. Hæc mea quidem sententia, licet aliis aliter opinari. Senatusconsulta scripta olim arbitrio consulum supprimebantur, vitiabanturque. Hinc postea a Coss. Valerio & Horatio institutum est, ut senatusconsulta in ædem Cereris ad ædiles plebis deferrentur. Liv. lib. 3. cap. 55. Docet autem Cicero Philipp. 5. cap. 4. postea senatusconsulta ad ærarium fuisse delata, cum inquit. *Neque solum commentariis commentitiis, chirographisque venalibus innumerabilis pecunia congesta in illam domum est, cum, quæ vendebat Antonius, ea se ex actis Cesaris agere diceret: sed etiam senatusconsulta, pecunia accepta, falsa referebat: syngraphæ obsignabantur: senatusconsulta, tanquam facta, ad ærarium deferrebantur.* Quod erat in templo Saturno dicato, cujus sub custodia erant pretiosissimæ res Romanorum. *Quasi tutissimum videretur ejus Dei numine, quo regnante, aureo illo seculo, nulla vis illata, nullum furtum factum, nihil omnino facinoris esset commissum.* Manut. de Senat. Rom. Suet. in Aug. cap. 94. *Autor est Julius Marathus, ante paucos, quam nasceretur menses, prodigium Romæ factum publice, quo denunciabatur regem pop. Rom. naturam parturire: Senatum exterritum censuisse, nequis illo anno genitus educaretur: eos qui gravidas uxores haberent, quo ad se quisque spem traheret, curasse ne senatusconsultum ad Ærarium deferretur.* Eò enim delatum non erat ultra in potestate senatus; ideoque nil ex illis absque nova ad populum rogatione



gatione mutari poterat. Nec rata senatusconsulta donec eo delata, interea auctoritas dicebatur. Quamobrem quisque curabat ne ad *Ærarium* deferretur, ubi delato, coactus esset vi senatusconsulti, partum, cui quisque augurium illud applicabat, abjicere, & semetipsum vana hac spe frustrari. Vid. Tacit. lib. 3. cap. 51. De impediendi Senatusconsulti ratione supra egimus; nisi quod addamus vetustis temporibus jus non fuisse Tribunis curiam intrare, sed ante valvas positis subselliis decreta patrum examinasse, quæ si approbassent litteram T subscripsisse, qua nota significabant, se decreta patrum habere rata: quod postea mutatum; nam tempore Ciceronis poterant curiam intrare, imo & ante, cum ex patribus, & consularibus viris tribunos pl. creavere: donec tandem lex lata est, ne tribunus plebis quis crearetur, nisi qui ante senator fuerit, ita ex senatu tantum creabantur, & curiam ingredi poterant, scil. ut senator. Quanquam & vetustis temporibus curiam vel Senatum ingressi, L. Valerio & M. Horatio coss. vi expelli non potuerint, quoniam lege cautum erat. *Ut qui tribunis plebis, Aedilibus, judicibus, decemviris nocuisset, ejus caput Fovi sacrum esset.* Cic. orat. pro Sextio hoc amplius notat, eam fuisse tribunatus sanctitatem, ut non modo contra vim & ferrum, sed & contra verba, & interfationem legibus sacris essent armati. Poterant, ut modo diximus, intercedere tribuni, poterant & omnes quoque magistratus, quibus senatum habendi jus erat; impedimento & senator erat ne senatusconsultum fieret, cum consuli dicebat, *Nūmera senatum*: quippe nihil decerni, vel constitui poterat, nisi certus senatorum adesset numerus, legibus statutus. Erant & alia impediendi rationes, quas supra enumeravimus. Numerus senatorum ad senatusconsultum faciendum necessarius, non semper idem fuit, aliquando L. fuerunt, ut videre est apud Liv. lib. 9. Lege Cornelia postea cautum, ne quis senatu solveretur, nisi ducenti adfuissent. Postea & 400. ad-

esse oportuisse, diximus sup. ex Dionys. lib. 54. Senatusconsultum aliquando largiorem & amplam, aliquando restrictam magis ac limitatam, aliquando uni, vel utrique consuli, nonnunquam pluribus tribuebat potestatem. De hoc Cic. 1. Catil. 4. *Decrevit ait quondam senatus, ut L. Opimius consul, videret nequid respub. detrimenti caperet: nox nulla intercessit, interfectus est propter quasdam seditionum suspiciones C. Gracchus, clarissimo patre natus, avis majoribus: occisus est cum liberis M. Fulvius consularis.* Utrique consuli ut apud. Salust. in Bel. Catilin. cap. 19. *Itaque quod plerumque, inquit, Senatus decrevit, darent operam coss. ne quid Respub. detrimenti caperet. Et potestas more Romano magistratui maxima permittitur, exercitum parare, bellum ingerere, coercere omnibus modis socios atque cives, domi militiaque imperium atque iudicium summum habere, aliter sine populi jussu nullius earum rerum consuli jus est.* Ubi autem grave aliquod periculum Reipub. imminerebat, ad illum extremum S. C. inquit. Cæsar lib. 1. de bel. civ. decurrebatur, quo nisi in ipso pene urbis incendio atque desperatione omnium salutis, nunquam ante descensum est. Dant operam Consules, Prætores, Tribuni pl. quique pro Consulibus sunt ad urbem, ne quid Respub. detrimenti capiat. Quæ verba amplissimam, & absolutissimam consulibus cæterisque magistratibus, qui Senatusconsulto continentur, dabant potestatem; cum & exercitus conscribendi, & bellum gerendi jus complectebatur, quod tantum populo competeat, idque privativè ut ita dicam, exclusis cæteris magistratibus. Dictatori quoque absoluta concedebatur potestas, ita ut penes eum liberrimum idque summum esset imperium, ita ut cæteris magistratibus, eo tempore quo dictatura exercebatur, nulla prorsus potestas esset circa ea, quæ Reipub. moderamen spectabant, Dictatori incumberebat cura, ne quid Respub. aliquid detrimenti caperet.



§. 10. Eodem tempore & magistratus jura reddebant : & ut scirent cives, quod jus de qua- que re quisque dicturus esset : seque præmuniret : edicta proponebant, quæ edicta prætorum jus honorarium constituerunt. Honorarium dicitur, quod ab honore prætoris venerat.

**M**agistratus jura reddebant. ] Sig. de antiq. jure civ. Rom. vocat magistratus potestates omnes eorum, qui res humanas, quæ quidem ad Rempub. spectant, publica autoritate gerunt. Festus magistratum vocat eum, qui in aliqua potestate est constitutus, ut Consul, Proconsul, Prætor, Proprætor, & alii qui civitates & provincias regunt ; nimirum, qui domi & in pace administrabant Rempub. quippe de illis, qui bellis præsent, imperia dicuntur. Quamobrem Suet. in Cæsare cap. 53. imperia & magistratus distinguit. Abstinentioniam (inquit) neque in imperiis, neque in magistratu præstitit. Notandum tamen quod magistratibus quoque imperium tribuatur, scil. mixtum & merum, ut videre est in l. 3. ff. de jurisdictione. verum hoc sensu significat imperium, majoremprehendendi, & gravio-rem coercendi potestatem, quam Consules alique majores magistratus habebant. Hinc Varro apud Gell. ita scribit. In magistratu habent alii vocationem, alii prehensionem, alii neutrum. Vocationem ut Consules, qui habent imperium, &c. Et in l. 2. ff. de in jus vocand. In jus vocari non oportet, neque Consulem, neque Præto-rem, neque Præfectum, neque Proconsulem, neque ceteros magistratus, qui imperium habent, qui coercere aliquem possunt ; nimirum graviori coercitione, quam cæteri magistratus, qui tali imperio ornati non sunt ; quales sunt magistratus minores. Aliter

*imperium* significat, exercitum habendi, & belli gerendi facultatem: Quod valde ab eo, de quo jam sermo est, differt; illud enim in urbe, hoc nisi extra urbem exercetur. Qui illud habet, nullo alio honoris nisi magistratus titulo insignitur; hoc qui adeptus est, Imperatoris quoque nomen sibi vendicat: illud civile, hoc militare est. Interjecto tempore varii in Rempub. magistratus illati sunt. Cum Respub. a regibus gubernaretur, omnia ab eorum pendebant nutu. Penes illos summum jus vitæ & necis, omneque belli imperium fuit. Penes eosdem universa residebat jurisdictio, ut testatur Dinonyf. Halicarnass. lib. 2. cap. 14. ubi inquit. *Regi quidem eximia fuerunt munia hæc, primum ut sacrificiorum, & reliquorum sacrorum penes eum esset principatus, perque eum gereretur, quicquid ad placandos Deos attinet. Deinde ut legum & consuetudinum patriarum custodiam haberet: Omnisque juris quod vel natura docuit, vel pacta & tabule sentiunt, curam ageret, ut de gravissimis delictis ipse decerneret, leviora permetteret Senatoribus, providendo interim ne in judiciis peccaretur, ut senatum cogeret, populum in concionem vocaret, & præterea summum in bello imperium.* Nonnulla plebi ex propria voluntate commisit, ita tamen ne in illis, quæ illius curæ commendaverat, absolutam haberet potestatem; nam quandoque vellet, poteret ea revocare & plebi adimere: quippe nullo pacto vel contractu intercedente ea sibi acquisiverat, verum princeps ex liberalitate sua quædam ipsis concesserat administranda. Exactis vero regibus, duo creati sunt Consules, in omnibus pari cum regibus potestate atque imperio: præterquam quod illi perpetui, hi annui; ille solus, hi duo. *Ne tanta potestas morâ vel solitudine corrumpereetur, ut inquit Flor. Maxima libertatis custodia est, si magna imperia diuturna esse non sinas, & temporis imponatur modus, quibus juris non potes.* Liv. lib. 2. cap. 1. Cum autem nimis magnum & amplum Consulum imperium plebi videretur, de eo in dies magis



gis magisque detraxerunt. Primus Valerius Publicola (a colenda plebe ita dictus) lege sanxit, *ut a magistratu ad populum cuivis provocare facultas esset*. Qua lege omne imperium consulare dissolutum scribit Liv. lib. 4. Deinde creatio tribunorum militum multum etiam de Consulum imperio, & auctoritate imminuit; creati quippe ut auxilio essent plebi adversus injurias Consulum, nequid crudelius in plebem consuleretur; & ad intercessionem faciendas. *Unicum praesidium libertatis legem hanc, qua illud sancitum fuit*, Livius vocat. Creati deinde *Ædiles*, *Ædibus sacris*, in quibus plebiscita recondebantur asservabanturque, tuendis præfecti, unde *Ædiles quasi Æditui*, dicti. Postea quoniam consules perpetuis bellorum curis occupati, censum agere amplius nequibant, duos *Censores* creavere, censores ab re appellati censui agendo præpositi, ut de numero civium, de bonis, quæ possidebat quisque, constare posset magistratui. Hisce magistratibus anno ab U. C. 387. duo novi adjecti sunt *Prætura*, & *Ædilitas Curulis*. Prætor ut jus in urbe redderet: primo unus, postea non sufficiente uno, quod multa turba peregrinorum quoque in urbem veniret, creatus iisdem auspiciis alius, qui peregrinus appellabatur, quia plerumque inter cives, & peregrinos jus dicebat, cum alter *Urbanus* diceretur. *Ædiles Curules* ludorum, urbis, & annonæ curam habebant, SUNTO ÆDILES, CURATO-RES URBIS, ANNONÆ LUDROUMQUE SOLENNIUM. Cic. 3. de leg. Hæc præmittere non inutile judicavimus, antequam de singulis magistratibus, tum Urbanis tum Provincialibus, de eorumque officio, & jurisdictione inferius suo loco disputabimus. Observandum autem Pomponium hic *magistratus* verbo significare Prætorem, cujus proprium erat munus, jura reddere petentibus; unde apud Ciceronem lib. 3. de leg. *Juris disceptator, qui privata judicet, judicari ve jubeat prator esto.*, lege vetustissima fuisse sancitum, itaque

itaque non novum hoc prætoris officium, quod a Pomponio hic ipsi tribuitur, sed & initio liberæ Reipub. obtinuit. Postquam sublato jure incerto, leges duodecim tabb. fuere compositz, ex quibus fluxisse jus civile diximus, & certum consequenter in Repub. jus vigere cœpit, quod adjuvare, supplere, interpretari, & mitigare prætoris erat officium *l. 7. §. 1. ff. de just.* mutare autem, vel tollere nequaquam poterat *l. 12. §. 4. ff. de publicia*, cum enim leges condere erat populi, ita eas tollere atque abrogare sine consensu populi nemini licebat, naturale enim, ut unumquodque eodem modo dissolvatur, quo colligatum est.

*Edicta proponebantur.* ] Scil. ut scirent cives, quod jus de quaque re quisque dicturus esset, seque præmunirent: *Quid mereri velis jam, cum magistratum inieris, & in concionem ascenderis (est enim tibi edicendum quæ sis observaturus in jure dicendo,) quid merearis igitur, ut dicas in eo magistratu omnia voluptatis causa facturum.* Cic. 2. de fin. Sunt igitur edicta nihil aliud quam leges, quas in tabella illa dealbata, prætores initio magistratus proposuerunt, in quibus admonebant cives, quomodo de singulis controversiis jus dicturi essent in suo magistratu. Quæ cum prætura evanescebant, ideoque annua erant, quare Cic. in Verr. edictum *annuam vocat legem* Hinc actio albi corrupti *l. 7. ff. de jurisdict.* Adversarium ad album producere. *l. 1. ff. de edend.* id est, deducere eum ad tabulam dealbatam sive gypsatam, in qua edicta scribebantur, & publice proponebantur, illique demonstrare quo actionis genere quis sit experturus. Erat autem gypsum, ut Plin. scribit *lib. 36. cap. 24. calci simile: plura autem ejus erant genera, nam & e lapide coquitur, ut in Syria ac Thurii, & e terra foditur, ut in Cipro & Perchæbis. Qui coquitur, lapis non dissimilis alabastrita esse debet, aut marmoso, omnium autem optimum fieri compertum est e lapide speculari, squamamque talem habente. Usus gypsi in albariis, sigillis ædificiorum, & coronis gratissimus.* Legimus



mus de *pede gypsato*, apud Ovid. 1. *amor. eleg.* 8. id est, creta illito. de *gypsatis manibus*. apud Cic. ad Trebatium. apud. Plaut. in *Pers. act.* 1.

*Qui sic albo rete aliena oppugnant bona.*

Quod respectum habere putat Brissonus ad *Album*, id est, tabulam dealbatam, in qua prætores edicta sua, quia omnibus innotescerent, actionesque & interdicta proponebant. Verum cum prætores passim ab edictis suis propositis recedere in jure dicendo consueissent, C. Cornelius Balbus tribunus plebis anno U. C. DCLXXXVI, legem tulit. *Ut prætores ex Edictis suis perpetuis jus dicerent.* Et quod semel Kalend. Januariis edixissent, id in toto præturæ suo tempore observarent. Quæ lex multum de autoritate ambitiosorum prætorum detraxit, qui pro arbitrio jus varie dicebant. Fiebat autem, ut aut integra edicta ex superioribus aliorum edictis, aut capita aliquot in sua posteriora transferrent, eaque translaticia nominata sunt. Unde Cic. in *Verr. Sed in re tam usitata satis est ostendere, omnes antea jussita dixisse, & hoc vetus edictum translaticium esse.* referente Sig. lib. de *judiciis*. Donec tandem C. Salvius Julianus, Divo Hadriano imperii Romani moderante habenas, omnia quæ unquam fuere prætorum edicta collegit, & in ordinem digessit: quod edictum prætoris, edictum urbanum, & edictum perpetuum dictum est, quo universon fere jus civile continetur. Sig. lib. 1. de *judiciis*. Hoc edictum magni nominis jurisconsulti Ulpianus, Paulus, Cajus, statim illustrare conati fuerunt suis commentariis, unde passim inscriptiones, *Ulpianus ad Edictum, Paulus ad Edictum*.

*Quæ Edicta Prætorum jus honorarium constituerunt.* ]

Honorarium dicitur, inquit Pomponius, quod ab honore prætoris venerat; non solum Urbani sed & Peregrini. Ut & aliorum magistratuum, Consulium, Ædilium Curulium edicta jus honorarium dici manifestum est in §. 12. *h. t.* Jus enim honorarium appellatur, quod

quod qui honores gerunt, id est, magistratus, auctoritatem huic juri dederunt, ut inquit Justinianus, §. 7. *Inst. de jur. nat. gent. & civ.* Honor enim nonnunquam pro magistratu ponitur, ut apud Juvenal.

*Nunc cum summus honos finito computet anno*

*Sportula quid referat.*

Nam honores sunt magistratus apud Arist. *lib. 3. polit. cap. 10.* Per excellentiam autem jus prætorium ferre tantum dicitur jus honorarium, idque quia prætor potissimum præ aliis magistratibus erat custos juris civilis. Proponebant & Ædiles Curules edictum de quibusdam causis, nimirum de rebus vendendis, ut de rerum venalium vitiis, vel si quid a venditore dictum esset vel promissum, ut id præstaretur, unde actiones quanti minoris, quæ & æstimatoria dicitur. *l. 43. §. 6. D. de edil. Edicto.* item redhibitoria. Item de animalibus feris non habendis, qua vulgo iter fit, *tit. ff. si quadr. paup. fec. dicat.* quod jus ædilitium & juris honorarii portio est.

Cavendum vero ne jus Ædilitium cum Prætorio confundamus. Juris honorarii duæ sunt partes, scil. Prætorium & Ædilitium, unum ab altero distinctum. Jus prætorium honorarium est, sicut & ædilitium, verum omne jus honorarium non est prætorium. Nam ut diximus, jus ædilitium recte dicitur honorarium, prætorium vero dici nequit. Verum posset nobis objici §. 2. *inst. de divis. stipul.* ubi inquit, Imperator, *Prætorias stipulationes sic exaudiri oportere, ut in iis etiam contineantur ædilitiæ.* Nam & hæc a jurisdictione Prætoris veniunt. Itaque videntur confundi hic jurisdictiones, cum tamen sint diversæ; ita ut ex unius jurisdictione venire non possit, quod sit alterius. Notandum in *l. 5. ff. de verb. oblig.* unde hic locus descriptus est, *prætoris vocem abesse*, ideoque expungendam censuere viri docti. *Ruffard. Baron. Cont. Cujac. Hotom.* In dict. §. quippe, ut diximus, luce clarius est, stipulationes ædilitias



litias non venire a jurisdictione Prætoris, cum veniant a jurisdictione Ædilium. Quod & Theophilus aperte significat, non posse dici venire a jurisdictione prætoris. Verum utrique commune est, quod a jurisdictione veniant magistratus, ideoque quod de prætoris tanquam principali specie stipulationum honorariarum dicitur, etiam ad ædilitias recte refertur. Nam & hæ veniunt ab officio jus dicentis, & juris honorarii perinde atque stipulationes prætoriæ portio sunt, & licet specie quidem diversæ, attamen in genere conveniunt, scilicet sub jure honorario.

§. II. *Novissime, sicut ad pauciores juris constituendi via transisse ipsis rebus dictantibus, videbatur: per partes evenit, ut necesse esset reipublicæ per unum consuli. Nam senatus non proinde omnes provincias probe gere poterat. Igitur constituto principe, datum est ei jus, ut quod constituisset, ratum esset.*

**N***ovissime sicut ad pauciores.*] Novissimis scilicet temporibus, everso jam reipublicæ statu, cum Julius Cæsar invasisset reipublicæ gubernacula, eam sub nomine dictatoris perpetui occuparet, & Augustus sequentesque Imperatores sub principis appellatione eam tractandam accepissent, ad pauciores condendi juris potestas, quæ soli competebat ex concessione Romuli populo, delata est. Nimirum ad Senatum, qui minimam quoque ad numerum totius populi partem constituebat.

*Via.*] Id est, quo modo, quibus mediis, & qua ratione,

ratione, *Habeo certam viam, & rationem, qua omnes illorum conatus investigare, & consequi possum.* Cic. 2. *Verriana.* Et 2. *offic. cap. 12.* *Præclare Socrates, hanc viam ad gloriam proximam, & quasi compendariam dicebat esse, si quis id ageret, ut, qualis haberi vellet, talis esset.* Et Plaut. in *Trinummio.* Act. 3. sc. 2.

*Pernovi equidem, Lesbonice, imperitum tuum ingenium  
Scio te sponte non tuapte errasse, sed amorem tibi  
Pectus obscurasse, atque ipse amoris teneo omnes vias.  
Sic dicendi via apud Quintil.*

*Per partes.* ] Putat Antonius Faber in  *suis Rationalibus* ad *h. t.*, aliique, *per partes* significare, *per vices, paulatim, & succedaneis mutationibus*, quomodo legimus *navim per partes resectam*, id est, paulatim, in *l. 10. §. 7. ff. quib. mod. ususfr. amittitur.* Alii explicant *per factiones principum virorum.* Nam nunc quidem, inquit Cicero, *partium contentionem esse dicunt, quarum partium alteri victi sunt, alteri sunt e mediis C. Caesaris partibus.* Et Liv. lib. 5. *Donec ab iis, qui Romana partis erant, Quintius est accitus.* Neminem enim qui in Historiis versatus est, fugere potest, quam misere fuit dilacerata, & vexata respub. optimatum factionibus, & bellis intestinis, cum C. Marius & Sylla anno U. C. 662. se partes facerent. Anno 699. Julius Cæsar & Pompejus, Cæsare interfecto. Anno 709. evenit, ut ad Triumviratum Octavii Cæsaris, M. Antonii, & M. Lepidi perveniret. Tot factionibus laborante Republica, salva esse non poterat, nisi beneficio servitutis. *Non aliud discordantis patriæ remedium erat, quam ut ab uno regeretur.* Tacit. *Neceffe erat reipub. per unum consuli.* Popularis dominatus cum senescit in Anarchiam, & omnium rerum confusionem transit; cui non aliud remedium, quam potens unius dominatio: atque in ea conditione jam erat Respub. Romana, ut impossibile esset recuperare libertatem perditam, neque salva esse poterat, nisi ad unum omnis transferebatur potestas,



potestas, omnia factionibus laborabant, quibus mederi non poterat populus, nisi beneficio servitutis, ut diximus: hinc tot millia hominum, quot Romanum amplectebatur imperium, pugnabant non ut servirent, sed cui. Quid tibi vis, exclamat M. Cato, non agitur de libertate, quæ pessumdata est? quæritur utrum Cæsar an Pompejus possideat rempub. Forstnerus in Tacit. Discordiis itaque civilibus fessa, & fatigata respub. multisque jactata periculis, variaque morborum symptomata passa, unius flagitabat dominatum. *Ea enim est imperandi conditio, ut non aliter constet, quam si uni ratio reddatur*, ut inquit Crispus Salustius ad Tiberium. *Non potest respub. bene geri multorum imperiis*, ut apud Homerum videre est *Iliad. 2.* Et Caligula apud Suet. cap. 2. *cum audiret forte reges, qui officii causa in urbem advenerant, concertantes apud se super cœnam de nobilitate generis, exclamavit, εἰς νόλεω & ἔσω, εἶς βασιλεύς. Unus Dominus sit, unus Rex.*

*Nec Regna socium ferre, nec tædæ sciunt.*

*Constituto Principe datum est ei jus, ut quod constituisset ratum esset.* ] Cæsaris constitutio non a voluntate populi, verum Tyrannide cæpit, quam causam Pomponius referre noluit, fortasse ne in odium principis sui incurreret. Postquam enim intestinis bellis & dissensionibus, misere jactata esset, & afflicta Respub, Julius Cæsar, victo in Græcia Pompejo, eoque fugiente in Ægypto obtruncato, Rempub. vi & armis occupavit, atque semetipsum non principem, ne regnandi cupidine agitated reipub. gubernacula invasisse populo videretur, verum dictatorem fecit. Cæterum a C. Cassio & M. Decimo Bruto principibus conjurationis in Cæsarem Idibus Martiis, in Pompeji Curia 23. vulneribus confosso, anno ab U.C. 710. Respub. in C. Cæsaris Octaviani, Antonii & Lepidi Triumviratum incidit, sub quo graviter concussa est: donec exuto Lepido, & interfecto Antonio, posito

Triumviri nomine, rerum solus potiretur Augustus; & sub nomine principis imperium accepisset, populo id ipsi deferente, non voluntario, sed necessitate coacto: ad eas enim respub. reducta erat angustias, ut salva esse non posset, nisi ad unum translato imperio, quod quasi patrum precibus victus, & invito accepisse Octavianus simulabat; imo non voluit tractare imperium, nisi expressa patrum & populi voluntate. Hinc delapso primo potestatis decennio, imperium prorogari sibi petiit, atque hoc exacto, iterum iterumque, & deinceps usque dum supremum diem obiit: Quam regnandi, & simulandi artem paucis tradit verbis *Tacit. 1. Annal. cap. 2.* *Postquam, inquit, Bruto & Cassio cæsis, nulla jam publica arma; Pompejus apud Siciliam oppressus, exutoque Lepido, interfecto Antonio, ne Julianis quidem partibus nisi Caesar dux reliquus. Posito Triumviri nomine, consulem se ferens, & ad tuendam plebem Tribunicio jure contentum; ubi militem donis, populum annona, cunctos dulcedine otii pellexit; insurgere paulatim, munia senatus, magistratum, legum in se trahere nullo adversante; cum ferocissimi per acies aut proscriptione cecidissent: ceteri nobilium, quanto quis servitio promptior, opibus & honoribus extollerentur: novis ex rebus aucti, tuta & præsentia, quam vetera & periculosa mallent. Neque provinciæ illum rerum statum abnucebant suspecto senatus populique imperio ob certamina potentium, & avaritiam magistratum, invalido legum auxilio, quæ vi, ambitu, postremo pecunia turbabantur. Constituto igitur principe, datum est ei jus, ut quod constituiisset, ratum esset. Ita ut, quod principi placuerit, legis habuerit vigorem. l. 1. ff. de const. prin. Utpote ait Ulpianus, lege Regia, quæ de ejus imperio lata est, populus ei, & in eum omne suum imperium, & potestatem concessit. Unde sequitur quod legem condendi potestatem quoque habuerit, quippe, ut sæpius diximus, ea populo competebat; translato igitur imperio a populo in principem, concessa quoque ei fuit eadem potestas, quoniam illa Ulpiani verba*



verba ita sunt explicanda, ut populus ita transfulerit jus suum, ut nihil sibi retinuerit: nec illum imperii participem fecerit, sed solum Imperatorem esse voluerit, ut uni summum rerum competeret arbitrium, cæteris obediendi relicta gloria, ut inquit Tacitus. Verum quæ de placitis principum dicit Ulpianus, sano sensu intelligenda sunt. Quippe non vult omnia principi placita legis vigorem habere, sed ea tantum, quæ principi placuerunt, ut essent pro lege, utque reipub. cives iis teneantur. Lex enim est præceptum commune, l. 1. ff. de ll. cujus proprium est, ut omnes afficiat, & obliget Reipub. sive imperii cives. Quod si princeps particularia quædam jura statuatur, & quibusdam commoda, vel privilegia concedat, legis vigorem non habent, id est, pro jure communi & generali ad omnes Reipub. cives pertinente, non observantur; jura non in singulas personas, sed generaliter constituuntur, l. 8. ff. de ll. Optime Muretus. *Olim quod populo placuerat, lex erat. Postea in locum populi successit princeps, omnis populi potestas in eum translata est. Sunt igitur hæc analogæ, Princeps, populus, placuit principi, quod populo; quorum ut primum ad secundum, sic tertium ad quartum. Ita si Princeps habet potestatem populi, id quod principi placuit, vim habet ejus, quod populo placuit. Et deinde. Nihil plus potest Princeps, quam olim potuit populus. Quod igitur populus sciscere poterat, id si jubeat Princeps, æque lex erit, atque si olim a populo scitum esset. Quod ne si populus quidem scivisset, lex fuisset, id ne si Princeps quidem jubeat, legis vim obtinebit. Quippe cum omnem potestatem a populo habeat, non potest ampliorem exercere, quam in eum transfulerit, neque populus plus juris in eum potuit transferre, quam ipse habuit. Omnia itaque Principis jura ex populi in eum concessa potestate derivanda sunt, ita ut quod populus facere potuit, illud & Princeps possit; quod autem facere nequivit, id neque Princeps statuere potest; quanquam postea ampliorem sibi potestatem arrogarint,*

& transfilerint limites, quibus populi potestas circumscripta erat, & consequenter iisdem sese continere Principes, in cujus locum successisset, debuissent. Jubebat quidem populus, Patres autem auctores fiebant; apud populum potestas, apud hos consilium & auctoritas. Quod quidem aliquamdiu ab imperatoribus observatum: periculosum enim fuisset, & tyrannidem, a qua alieni maxime videri volebant, redolevisset, si statim recta via, non interposito senatu, omnem a suo pendere nutu voluissent. Hinc potestatem juris condendi primum ad Senatum, a senatu ad se deduci passi fuere, insurgere paulatim, munia senatus, magistratuum & legum in se trahere, cæperat Augustus. Quasi cæteros labore exsolveret; ipse omnem molestiam reipub. causa in se transferre ac suscipere vellet. *Legationes antea in Senatu audiri solebant. Hac molestia senatum liberavit Augustus. Quanquam & eas in senatu audire nonnunquam voluit, ut Senatus etiam aliquid agere videretur. Senatus de pace, de bello, de Provinciis deliberabat. Quid opus erat tam multos senes tantum laborem capere, tam mane convenire in Curiam, tam multa ibi audire, tam multa dicere, tam vesperi domi fessos, & viribus exhaustos redire. Valetudini ac quieti eorum prospexit Augustus. Murret. in lib. 1. Annal. Tacit.* Hinc penes Senatum nihil juris mansit reliquum, nisi inane honoris nomen. Eadem quidem adhuc exaudiebantur magistratuum vocabula, verum omnis vis ac potestas sublata erat. Quod ad fallendam plebem callide, & sapienter a Cæsaribus excogitatum. Quando enim rerumpub. convertuntur formæ, quia id sine mutatione legum, & consuetudinum fieri non potest, umbra quædam, & imago saltem ejus, quod adimitur relinquenda est. Jus imperii valeat, inania transmittantur, & ita paulatim & per gradus veteris reipub. evertatur forma. Omnia enim repentina periculosa. Quamobrem paulatim insurgere, & reipub. occupare cæpit Augustus. Singula senatus, & magi-



magistratuum munia in se trahendo, qua ratione revera reipub. statum quidem mutavit, verum externa reipub. facie manente eadem, plebem adeo fefellit, ut nequid in ea immutatum sentiret. Hinc Trajan. Boccalin. in 1. *Annal.* Chi dunque, novellamente divenuto signore d'uno stato, ama mutar forma di governo, impari da Tiberio, contentandosi in effetto quello, che piu pretende, mà che lasci i vocaboli d'e Magistrati, e d'e Regimenti nel loro antico termine, cioè, siano quelli, d'e quali il popolo hà maggior volonta, è miglior concetto.

§. 12. *Ita in civitate nostra, aut Jure, id est, lege constituitur: aut est proprium jus civile, quod sine scripto, in sola prudentium interpretatione consistit: aut sunt Legis actiones, quæ formam agendi continent, aut Plebiscitum quod sine auctoritate patrum est constitutum: aut est magistratuum Edictum, unde jus Honorarium nascitur: aut Senatusconsultum, quod solum senatu constituyente inducitur sine lege: aut est principalis constitutio, id est, ut quod ipse princeps constituit, pro lege servetur.*

**I***ta in civitate nostra, aut jure, id est, lege constituitur.]* Continet hic paragraphus enarrationem eorum omnium, de quibus hactenus disputavimus: per verbum *jure* sive *lege*, intelligit leges duodecim tabb. ex quibus tanquam fonte omne jus cum publicum, tum privatum fluere & originem derivare supra demonstravimus.

*Aut est proprium jus civile, quod sine scripto in sola prudentium interpretatione consistit.] Jus civile est l. 8. ff. de just. & jur. Quod ex legibus, plebiscitis, Senatusconsultis, decretis principum, auctoritate prudentum venit. Cui illa Ciceronis convenit finitio, cum dicit jus civile Romanum esse, quod ex legibus, Senatusconsultis, rebus judicatis, juris peritorum auctoritate, Edictis magistratum, more, equitate consistit. Cic. in Topic. quæ definitio plenior est, omnes quippe juris partes complectens, tam jus scriptum, quam quod sine scripto venit. Vid. quæ ad §. 5. h. t. annotavimus.*

*Plebiscitum, quod sine patrum auctoritate constitutum.] Sup. ad §. 2. h. t. diximus plebiscitum esse, quod plebs plebejo magistratu interrogante (veluti Tribuno) constituebat. Ad cujus sanctionem non erat opus auctoritate senatus sive patrum, quemadmodum in condenda lege requirebatur: quippe cum comitiis centuriatis rogante consule leges sciscere populi erat, Boët. in Top. Cic. ita senatus erat auctores fieri, antequam comitia haberi, vel rogatio procedere poterat. Cum autem plebs ter secessione a patribus facta, ad tollendas, & sedandas seditiones obtinuit, ut sibi quoque jura constituere liceret, quæ non universum populum, sed plebem obligabant: donec tandem, ut supra diximus, lege Hortensia, vel Horatia, si velis, sancitum fuit, ut plebis scitis universus populus teneretur, quam sanctionem deinde lege Pisoniana, & Hortensia renovatam, & comprobata apud Liv. & Dionys. videre est, ita ut deinde non minus quam leges valere cæperint, ut inquit Imperator. Unde & Lex Falcidia, quam tulit P. Falcidius trib. pl. Cn. Domitio Calvino, & C. Asinio Pollio. coss., & lex Voconia lata a Q. Voconio Saxa trib. pl. Et lex Aquilia, cujus auctor Aquilius Trib. pleb. (de quo vid. Doctissimi, & Florentissimi Jurisconsulti, & Antecessoris D. GERARDI NOONT, librum singularem ad legem Aquiliam, singularis doctrinæ & eruditionis notis refer-*

tum,



tum) & similes, quanquam plebiscita fuerint, leges tamen dicebantur. Hinc Festus plebiscitum Papirianum vocat legem Papirii Trib. pl.

*Aut est Principalis constitutio, id est, ut quod ipse constituit, pro lege servetur.* ] Id est, a principis auctoritate & potestate profecta constitutio, principale dicitur quod principem spectat, ut apud Suet. in Calig. cap. 39. *Modo poenitentiam simulans, quod principalium rerum,* (id est, ad Principem pertinentium) *privatis copiam faceret.* Plin. Paneg. 50. *Tanta benignitas principis, tanta securitas temporum est, ut ille nos principalibus rebus existimet dignos.* Inde in jure nostro *Principales constitutiones.* l. 33. ff. *si cert. pet.* Libri principales l. un. ff. *de offic. quæst.* & alia id genus. Hæc itaque constitutiones pro lege servabantur, legis vim habebant, quod enim principi placuit, legis habet vigorem, postquam summa rerum a populo ad principem delata fuit. Quamobrem recte dicimus voluntatem, & arbitrium Principis pro lege esse, modo constat principi placuisse, ut pro lege habeatur; repræsentat enim & vicem gerit populi, in cujus successit jus & locum, itaque quod olim potuit populus, id princeps potest, & quod princeps vult, id populum velle existimari debet.

## F I N I S.

---

Si quæ errata irreperint, candido & equo lectori corrigenda relinquimus.





G. VANDER MUELEN  
IN  
HISTORIAM  
P O M P O N I I  
D E  
ORIGINE JURIS,  
*Et omnium Magistratum & suc-  
cessionem prudentium, Exer-  
citationes.*  
P A R S II.



TRAJECTI ad RHENUM,

---

Ex Officina FRANCISCI HALMA, Academiæ  
Typographi, clō lōc xciii.

W. VANDER KULDE

17

# HISTORIAM

TOMPTON

17

# ORIGINE JURIS

Et antiquum Magisterium  
et antiquum Magisterium  
et antiquum Magisterium  
et antiquum Magisterium

PART II




LIBRARY OF THE UNIVERSITY OF

THE UNIVERSITY OF CHICAGO  
CHICAGO, ILL.



# PRÆFATIO.

 Uemadmodum nulla civitas rectè gubernari queat, vel diu subsistere, sine justitiæ administratione; ita nulla justitia potest excerceri sine magistratum ope et auxilio, & consequenter utroque societas civilis indiget. Fruendę namque justitiæ causa, & bene morati reges constituti, & leges quondam promulgatę fuerunt Cic. 1. *offic.* Justitiæ enim exercitatio, est vinculum, imo fundamentum, quo innititur societas civilis, eaque sublatâ, tota corruiť ejus fabrica, & unumquodque membrum sive quisque civis quasi jure postliminii recuperat facultatem, quam in statu naturali habuit, in quo quisque sui judex est, sibi que & familię jus dicit, legesque præscribit, proprioque arbitrio jus  
\* 2 suum

P R Æ F A T I O.

suum persequitur. Cujusmodi juris persecutio seu vindicatio, quoniam propter multorum hominum malè composita desideria jus sæpe utilitate, non vero honestate vel æquitate plerique metiebantur, sæpissime cum læsione & damno alterius, five proximi instituebatur. Vel si quidem a parte actoris justitia observabatur, secundum rectæ rationis dictamen five naturæ leges jus suum persequentis, reo tamen actori quod ipsi debebat, vel ex malitia vel scelerato habendi quodam amore, qui omnia ad se rapere & sibi retinere cupit, nihil in commune afferre, declinante tribuere quod jure petebat & vindicabat, statim oriebatur status belli, & cunctis tentatis remediis, vim adhibere necesse habebat actor, quia nullus erat superior magistratus five  
ju-



## P R Æ F A T I O.

judex, qui intercedere poterat, vel sua auctoritate litem dirimendi, & suum cuique tribuendi facultatem habebat. Hinc igitur duellum sive bellum, id est status duorum per vim certantium; quare merito *meum* & *tuum* vera belli sive duelli causa & origo dicitur. Quoniam vero homo animal est, quod simulacrum sibi ipsi conciliatur, & tenerimo erga se amore afficitur, quo ad conservationem sui fertur & impellitur, & consequenter declinat, quæ nocitura sibi videntur, appetit autem vehementer, quæ conservationi sui status inservire arbitratur. Hinc coepit cogitare de mediis, quibus potissimum se in securitatem asserere, atque a tot malis & periculis, quæ in naturæ statu, in quo quisque juris sui vindex & arbiter, sibi imminebant, liberare posset. Hisce

P R Æ F A T I O.

vero incommodis mederi se non posse perspiciebat , nisi status sui mutatione , scil. jacturâ libertatis, cujus Paulus inquit in l. 176. ff. de R. j. *infinitam estimationem esse*, quamobrem eam nemo bonus nisi cum anima simul amittere cupit. Vix homo in medio positus & tanquam in bivio collocatus , sciebat quo se verteret ; ab una parte innato sui conservandi studio agitatus ; ab altera naturali libertatis amore impulsus hæsitabat merito, quid consilii caperet. Huic tamen renunciare, si illam in tuto esse vellet , non voluntatis sed necessitatis esse satis animadvertibat. Quemadmodum enim, ut Philosophi disputant, unius corruptio est alterius generatio , ita & libertatis interitus sive amissio, erat sui conservatio. Quoniam vero, ut initio diximus , homo illud cum  
cæte-



## P R Æ F A T I O.

cæteris animantibus commune habet, quod ei nullius rei studium altius a natura insitum est, quam studium se conservandi; ita & illud ceteris naturæ stimulis prævaluit. Quamobrem ut a se depellerent mortales tot incommoda & pericula, quibus in naturæ statu degentes expositi erant, in societatem coa-  
luerunt, & libertatis, quæ cuique dabat facultatem sibimet jus dicendi, & propriis viribus vindicandi, quæ sibi deberi judicabat, five ex jure quod in omnia ipsi compete-  
bat, (quod sano sensu intelligimus, scil. eatenus, quatenus nemo vel occupatione, vel diutina possessione, five alio quovis titulo sibi acquisiverat, quæ persequeretur) renunciantes, in unum vel plures hanc sibi jus suum persequendi potestatem a natura concessam, legibus

## P R Æ F A T I O.

men & naturali æquitati consentaneam, transtulerunt; qui, si aliqua inter ejusdem societatis membra, vel cives, de re quadam movebatur controversia, ejus cognitionem susciperet, utriusque jura examinaret, & secundum allegata & probata sententiam pronunciando litem dirimeret. Quam jurisdictionem tam in criminalibus quam civilibus habebat, quem societati præfecerant. Ita ut nemini amplius sibi jus dicere liceret, sed quoties judicis habebat copiam, ejus implorare auxilium, & coram eo jus allegare teneretur: Adversarium itaque in jus vocare experiundi juris causa, actionem, qua adversus eum uti vellet, instituere & edere, argumenta & probationes, quibus jus suum adstruere conabatur proferre & deducere actori incumberebat. Reus contra sese



P R Æ F A T I O.

seſe vel exceptione, vel alia quacunque ratione dilvendo & refellendo actoris argumenta defendebat, ut actionem adverſarii inanem redderet. Ita ut judex litigantium argumentis & testimoniis cognitis & perſpectis, ſecundum ea litem dirimeret. Optime itaque inquit Pomponius, quod per magiſtrum ſive judicem effectus rei accipitur, ſcil. per eum obtinemus, quæ legibus & jure ſancita ſunt. Quantum enim eſt jus in civitate eſſe, niſi ſint qui jura regere ſive reddere poſſunt, id eſt, ad uſum humanæ ſocietatis accommodare. Qui juſtitiam, quæ & *expletrix* & *attriburix* a Grotio, a Juſtiniano *commutativa* & *distributiva* vocatur, adminiſtrant, vel in criminalibus vel civilibus cauſis, ſua ſceleribus ſupplicia decernendo, &  
ſuum

P P Æ F A T I O.

suum in quibusvis negotiis cuique tribuendo. Qua ratione satisfit intentioni, qua impulsī mortales civitatem seu societatem civilem excitarunt. Et magistratus officium suum exequendo satisfacit obligationi, qua tenetur justitiam administrando societatis tranquillitatem & concordiam, a qua singulorum civium salus pendet, conservare ac tueri. Quippe, ut initio diximus, judiciorum & jurisdictioni siue exercendi ratione, quam eo ipso, quo in societatem conspirarunt mortales, introducere voluere, sublata, pristinum jus redit, & naturalem quisque sibi jus dicendi recuperat facultatem, uberrimam rixarum & litium, quæ sæpe, nisi cum læsione alterius litigantium finiuntur segetem: quæque Reipub. magnum detrimentum adferunt, imo



## P R Æ F A T I O.

imo interitum & everfionem ejus  
fæpiffime portendunt. Optime ita-  
que legibus fancitum, ne quis fibi  
jus dicere, ubi judicis adeundi co-  
pia eft, liceat: Quare Paulus in *l. 176.*  
*ff. de R. J.* *Non eft singulis conceden-*  
*dum, quod per magistratus publice*  
*possit fieri, ne fit occasio majoris tu-*  
*tumultus faciendi.* Atque judici im-  
cumbit providere, ne ad rixam &  
arma procedant, quos fua jurisdic-  
tione potest componere *arg. l. 13.*  
*§. 3. ff. de usufr.* Nam ficut ex difcor-  
diis rixæ, ita ex rixis arma, ex armis  
tumultus, ex tumultu feditiones, ex  
feditionibus bella intestina, ex bellis  
cædes, incendia, interneciones, de-  
nique quid aliud, nisi casus & interi-  
tus reipub. Quoniam itaque est in-  
ter magistratum & jus five leges  
ejusmodi relatio, ut unum altero,  
societas autem civilis utroque indi-  
geat,

P R Æ F A T I O.

geat, optime Pomponius postquam de origine juris tanquam causa prima, quæ magistratum sive judicii creationi occasionem præbuit, quædam delibavit, ad magistratum nomina & originem, eorumque jurisdictionem, potestatemque, quam quisque jure magistratus, vel alio quovis titulo habuit, exercuitque, sive in ipsa urbe Roma, vel in Provinciis, explicandam atque describendam descendit: frustra enim justitiæ administrationi magistratus præficerentur, si nullum jus extaret, nullæ essent sancitæ vel promulgatæ leges, quarum executio eorum curæ demandari posset; & quas exequendo jus dicerent & justitiam administrarent inter cives, suum cuique tribuendo, justitiæ unicus scopus & finis.

G. VAN-



G. VANDER MUELEN

I N

HISTORIAM POMPONI

D E

# ORIGINE JURIS,

& omnium Magistratuum & successionem  
prudentium Exercitationes.

---

§ 13 *Post originem juris, & processum cognitum, consequens est, ut de magistratuum nominibus, & origine cognoscamus. quia, ut exposuimus, per eos, qui juri dicundo praesunt, effectus rei accipitur: quantum est enim jus in civitate esse, nisi sint, qui jura regere possint? Post hoc dein de auctorum successionem dicemus: quod constare non potest jus, nisi sit aliquis jurisperitus,*

A

per

*per quem possit quotidie in melius  
produci.*



*ost juris originem* ] tres partes hic titulus complectitur ; quarum prima agit de juris scil. civilis origine ejusque processibus , & quâ potissimum ratione ad eam , quæ hodie extat , magnitudinem creverit , de qua in priori exercitationum parte pro tenuitate nostri ingenii quædam delibavimus. Altera tractat de magistratibus. Tertiâ prudentium successio continetur , quorum ope & industriâ jus civile quotidie in melius productum ad nos pervenit.

*Ut de magistratuum nominibus & origine cognoscamus* ] Imitatur Pomponius summum Ictum Ulpianum , qui nobis juris artem traditurus , ab ipsa nominis sive vocis significatione & origine ordiendum esse statuit : Nihil magis rectæ disputandi de quâcunque re & disciplinâ rationi conveniens judicans , quam quid nominis præcedit , quid rei sciamus , antequam ad alia materiæ , de qua disputatio futura est , transeamus capita. *Furi operam daturus prius nosse oportet , unde juris nomen descendat , inquit Ulpianus in l. 1. ff. de Just. & jur.* Nominis enim sive vocis explicatio vel intellectus faciliorem nobis viam pandit ad acquirendam cognitionem ejus , de quo disputatur. *Nominis enim rectitudo illa est , ut qualis res sit ostendat. Plat. in Cratylo.* Quam obrem vetus & verissimum fuit dictum , *Ad recte docendum oportet primum scrutari nomina.* Unde idem Epictetus , *Initium doctrinæ nominum consideratio.* Quare merito jurisconsulti veram philosophiam profitentes , optimam disputandi rationem judicarunt , prius de de nomine , quam de re tractare : quare iis summus semper circa verborum proprietatem fuit labor & cura , ut docet elegans & necessarius de *verborum significatione* Titulus. Te-  
stat



statutur Gellius lib. 13. cap. 10. Noct. Attic. De Antistio Labeone, eum *latinarum vocum origines rationesque percalluisse*: eaque *præcipue scientia ad enodandos plerosq; juris laqueos usum fuisse*.

Quia, ut exposuimus per eos, qui *juridicundo præsumt*, effectus rei accipitur ] Nihil enim prodest de rebus iustis judicia dare, aut sententias eloqui, nisi sint qui executioni mandent: nam ut idem inquit Pomponius, *Parum est jus in civitate esse, nisi sint, qui jura regere, sive potius reddere possunt*.

Quæ enim legum erit utilitas, si in literis duntaxat consistant, non etiam per ipsa facta atque opera subditis utilitatem de se præbeant, inquit Imperator Novell. 161. Magistratuum igitur auxilio & ope indigemus, ut ad effectum deducatur & hominum negotiis atque actionibus applicetur quicquid legibus sancitum est. Unde Cic: 3. de offic. Videtis igitur, *magistratus hanc esse vim, ut præsit præscribatque recta & utilia & conjuncta cum legibus. Ut enim magistratibus leges, ita populo magistratus præsumt: Vere dici potest, magistratum legem esse loquentem, legem autem mutum magistratum*. Et paulo post. *Magistratibus igitur opus est, sine quorum prudentia, ac diligentia civitas esse non potest, quorum descriptione omnis Reipub. administratio continetur. Qui autem magistratus vocabulo denotantur diximus ad § 10. instit.* Festus Magistratus vocat omnes eos, qui in aliqua potestate constituti sunt. Distinguit vero Lipsius inter *dignitatem, potestatem & Magistratum*. Dignitatem appellat auctoritatem in suadendo, consulendo, decernendo, qualis *Senatorum & Judicum*; Potestatem jus legitimum regendi, jubendi que extra urbem & ejus fines, ut sunt *imperia, præsidatus. Magistratum, jus simile, sed in urbe ipsa*.

Verum cum Latini scriptores hæc nomina confundant, & tam Proconsules, Præsides provinciarum, quam Consules, Prætores, magistratus appellant: hanc distinctionem amplecti nequeo; est enim magistratus nomen universale & generale, quod ad omnes, qui res humanas, quæ quidem ad Rempub.

pub: spectant publica auctoritate gerunt, pertinet. Sig: de antiq. jure. civ. Nomen magistratus a magistro dictum. Magister autem, cui magis ceteris potestas. Magistri (inquit Festus) non solum doctores artium, sed etiam pagorum, societatum, virorum, collegiorum, equitum dicuntur; quia omnes ii magis ceteris possunt. Unde & Magistratus, qui per imperia potentiores sunt, quam privati. Varr: 4. de ling: latina. Magister equitum dicebatur, quod summa potestas hujus in equites & accensos, ut est summa populi dictatori, a quo is quoque Magister populi est appellatus. Item magistri societatum, qui societatibus præsunt, & præcipuam curam gerunt earum rerum, quæ ad societatem pertinent. l: 14. ff. de pact. Unde Paulus Jctus. in l. 57. ff. de verb: sig: Cui præcipua rerum cura incumbit, & qui magis quam ceteri, diligentiam & sollicitudinem rebus, quibus præsunt, debent, hi magistri appellantur. Quin etiam ipsi Magistratus per derivationem a magistris cognominantur. Neque absratione, quia ipsis cura incumbit nequid respub: detrimenti capiat. Quare facultas agendi, quæ magistratibus competit, vocatur magisteria potestas. l: ult. Cod. de offic. mil: jud.

§ 14. *Quod ad magistratus attinet, initio civitatis hujus constat, Reges omnem potestatem habuisse.*

**Q**Uod ad magistratus attinet, initio civitatis hujus constat, Reges omnem potestatem habuisse] In parte priori ad §. 1. h. t. tres regiminis species sive civitatum formas enumeravimus, a quibus diversis speciebus sive formis, varia civitatum nomina derivationem & originem suam habent. Aliquando unus summæ rerum præest. Nonnunquam plures, non vero omnes reipub. regimem tenent. Interdum omnibus



nibus ejus cura incumbit civibus. Unde aliud imperium dicitur *Monarchicum*; aliud *Aristocraticum*; Aliud *Democratium*. Omnium vero horum & vetustissimum & optimum ac perfectissimum scil. abstracte, ut Logici loqui amant, consideratum, nulla habita ratione subjecti, cui inhæret, quod eo sapissime abutitur, est imperium Monarchicum, quando unus fulminat Jupiter, unius adoratur purpura, unius exaudiantur jussa & imperia, ceteris obedientiæ relictâ gloriâ. Perfectissimum & consequenter optimum merito dicitur, quia est cælesti regiminis quædam imago & æmulatrix, cum & universum ab uno Deo regatur: quare etiam Antiqui statum Monarchicum ceteris prætulerunt, quod regimen Deorum uni Jovi tribuebant. Hinc Arist: *polit: Primum maximeque divinum regnum*. Et quia optimum, ideo cum ipso genere humano ortum & introductum. Quale fuit imperium paternum vetustissimo mortalium, legibus attamen naturalibus circumscriptum & limitatum a Deo concessum, & ab ipso ad posteros devolutum. Unde quisque paterfamilias in sua familia Princeps, imperio ornatus Monarchico, suo arbitrio jussa dabat eaque exequendi necessitatem imponebat ceteris familiæ membris, quorum voluntates, prout familiæ utile & consultum fore arbitrabatur, ad propositum sibi finem & scopum dirigebat, a qua concordia & voluntatum unione totius familiæ, quæ tanquam parva civitas considerari debet, pendebat conservatio ac salus; omnis enim domus regio imperio administratur. Arist: *1. polit. cap. 1*. Et hoc est quod ait Homerus. *Natis dat & conjugibus quisque leges*. Qualis animorum ad unum eundemque finem conspiratio sæpe exulat, ubi plures imperant, propter varia hominum ingenia & multorum malè composita desideria: Quot enim homines tot sententiæ. Quam ingenii humani varietatem sapissime gravissimarum discordiarum civilium in liberis, ut vocari solent, rebusp. causam & originem fuisse rerum usus abunde docuit. Quibus incommodis mederi non possumus, nisi unus constituatur

dominus, unus Rex, ut exclamat Caligula apud Suetonium *Cap. 2.* Quod cum præviderent mortales, eandem in civitate excitanda regiminis formam, quam quisque in regenda sua familia approbaverat, introduxerunt; quippe quam humanæ naturæ coætaneam, ei quoque maxime consentaneam merito arbitrabantur, & ita quasi naturæ stimulis ad illam regiminis constituendam formam ferebantur: præterquam quod & ipsa ratio rerum usu confirmata dictabat vix concordiam & tranquillitatem, a qua communis civitatis dependet salus & beatitudo, diu conservari posse, ubi penes plures residet imperii majestas. Quali in statu tot sæpe bellorum & discordiarum civilium causæ, quot homines; tot Nerones, quot capita, propter illas factiones optimatum, quibus Respub. non solum misere dilaceratur, verum sæpissime funditus evertitur. Illustre exemplum nobis est Romana Respub. quæ, exactis regibus, discordiis civilibus & bellis intestinis ac optimatum factionibus adeo jactata & vexata fuit, ut jam jam interitura penitus videretur, & necesse habuerit, si salva esse vellet, & tot malis, quæ ruinam ipsi portendebant, mederi, in unum iterum imperium conferre, & eandem, quam imperii conditor Romulus Reipub. initio imposuerat, regiminis formam revocare. *Non potest Respub. geri multorum imperiis, est apud Salust. Multorum imperium haud bona res apud Homerum. & Cic. I. offic. cap. 12. Mihi quidem non apud Medos, ut ait Herodotus, sed etiam apud majores nostros, justitia fruenda causa videntur olim bene morati reges constituti. Nam cum premeretur inops multitudo ab iis, qui majores opes habebant, ad unum aliquem confugiebant, virtute præstantem, qui cum prohiberet injuria tenuiores, æquitate constituenda, summos cum infimis pari jure retinebat. Cui illud Aristot: convenit III. polit: Hanc ob causam Regum potestati se olim tradebant, quia rarum erat invenire viros multos virtute præstantes. Vide quæ annotavimus ad § II. h. t.*

Constat itaque initio civitatis, inquit Pomponius, Re-  
ges



*ges omnem potestatem habuisse. Quod non solum in civitate Romana, sed ubique per omnes terrarum plagas apud omnes gentes obtinuit. Principio rerum gentium nationumque imperium penes reges fuit: quos ad fastigium hujus majestatis, non ambitio popularis, sed spectata inter bonos moderatio provehebat. Populus nullis legibus tenebatur: arbitria principum pro legibus erant. Justin: lib. 1. cap. 1. Hinc annotavit Cujacius Homerum nuspiam uti legum nomine, quod nullis tum legibus uterentur Græciæ populi. Omnes antiquæ gentes Regibus quondam paruerunt inquit Cic. 3. de ll. Primum in Regum imperio erant civitates & nunc etiam gentes. Arist: 1. polit cap. 1. Pomponius autem sermonem tantum habet de civitate Romana, quam, ut testatur Tacitus, a principio Reges habuerunt, & ita quod antiquissimum in terris nomen imperii est, idem in urbe primum fuit, & regnatum est Romæ â condita urbe ad liberatam annos ducentos quadraginta. Liv. lib. 1. in fin. cujus imperii conditor Romulus genitus Marte & Rhea Sylvia, ut Florus inquit, Hist. Rom: lib. 1. cap. 1.*

*Serviam appellat Ælianus variar. Hist: lib. 7. cap. 16.*

*Æliam vocat Ovid. lib. 2. Fast.*

*Ælia Vestalis Cælestia semina partu*

*Ediderat, patruo regna tenente suo.*

*Et lib. 3.*

*— — — ut huic urbi semina digna dares*

*Ælia Vestalis (quid enim vetat inde moveri?)*

*Sacra lavaturas mane petebat aquas.*

& alibi

*Romulus Iliades Iliadesque Remus.*

*Sic quoque apud Virgil. 6. Æneid.*

*— — — Donec Regina sacerdos.*

*Marte gravis geminam partu dabit Ilia*

*Prolem.*

*Et 6. Æneid.*

*Quin & avo comitem sese Mayortius addet*

Romulus, Asaraci quem sanguinis Ilia mater

Educat :

Eodem quoque nomine appellatur ab Horat. lib. 6. Od. 2.

Ilia dum se nimium quarenti jactat

Ultorem.

Et Stat. Sylv. 2. lib. 1. vers. 243.

— — — Sic victa sopore doloſo

Martia fluminea poſuit latus Ilia Ripa :

Et Claud. in conſ: Probini & Olivry, vers. 224.

Palla graves humeros velat, quam neverat uxor

Ilia, percurrrens vipreas ſub gurgite telas.

Vulgati Codices legunt illi pro Ilia; ſed male.

Hinc quoque vetus Scholiaſtes Juvenalis ad Sat. 9. v. 53.

— — — & ſtrata poſitus, longaue Cathedra

Munera femineis tractas ſecreta Calendas.

Calendis Martiis, quibus Junonis Sacra celebrantur ab

Romanis; quia & tunc ILIA compreſſa eſt à Marte.

Idem ad Sat. 11. vers. 106. & ad Sat. 1. vers. 7.

Nota magis nulli domus eſt ſua quam mihi lucus

Martis,

Lucum Martis dicit, (inquit Schol:) qui Romæ eſt in Appia, in quo ſolebant recitare Poetæ. Aut illum, qui apud Colchos, in quo fuit pellis aurea: aut in quo ILIA peperit.

Et apud Plin. Neglexerat Ilia Mater Romulum, ſed Acca nutritrix curabat.

Salmaſius in ſuis exercitationibus in Solin: cap. 1. opinatur apud autores probatæ notæ nuſpian nomen Rheæ Sylviæ occurrere, verum ſuſpicatur eandem fuiſſe Servi-  
liam, hoc eſt *Ξερελίαν* in *εὐλοπνακίς* Cyziceni templi, quod matri Attali, & Eumenis erat dicatum.

*Omnes*



*Omnem Potestatem* ] hoc est omne imperium , omnis Jurisdictio & cognitio penes Romulum ejusque successores fuit , nullus ipsi par neque secundus ; omnis enim potestas *impatiens consortis* erit , ut inquit ille. Omnia erant Romuli , si non dominio , saltem imperio Ant: Fab. *in ration. ad h.t.* Idque suo jure , tanquam in urbem à se conditam sibi vindicare poterat. Quanquam , ut legimus apud Dionysium *lib. 2.* non omnia supremæ majestatis jura ipse executus fuerit , sed quædam populo concesserit , ut *legum lationem , magistratuum creationem , & pacis ac belli arbitrium.* Ea tamen conditione ut Patres auctores fierent. Quæ voluntaria concessio nihil de summo , quo fuit ornatus imperio , detraxit , verum actualement , ut ita dicam , eorum exercitationem in populum transtulit , qui tanquam minister & vice fungens summi imperantis , illa omnia executus fuit. Nam ad senatum nihil pertinebat , nisi a rege relatum ; Neque ad populum nisi rogatione ejusdem : quod autem quis per alium facit , per se fecisse videri debet. Quemadmodum enim , qui mandavit jurisditionem alii non eo minus jurisditionem retinere , & ipse cognoscere intelligitur , quoniam is qui mandatam suscepit nihil proprium habet , sed aliena vice fungitur , non sua. *l. 1. §. 1. ff. de officio ejus : l. 16. ff. de Jurisd.* Ita populus quoad ea , quæ sibi demandata & concessa sunt , non jure suo , sed beneficio summi imperantis , cujus vice fungitur , habet & exequitur , summum vero imperium ipse sibi retinet , & eorum , quæ demandavit , revocandi potestatem.

Per *Potestatem* itaque Pomponius non tantum intelligit administrationem civilem , sed omnem quoque Jurisditionem & cognitionem , quæ diversis interjecto tempore in re-pub. competiit magistratibus. Qualem potestatem Cæsares sibi quoque arrogasse testatur Suet. *in Nerone cap. 15.* *Cognoscendi morem eum tenuit , ut continuis actionibus omissis , sigillatim quæque per vices ageret. Quoties autem ad consultandum secederet , neque in commune quicquam , neque pro-*

*palam deliberabat ; sed conscriptas ab unoquoque sententias tacitus ac secreto legens , quid ipsi libuisset , perinde atque pluribus idem videretur , pronuntiabat.*

*Potestatis verbo ( inquit Ictus ) l. 215. ff. de verb. sig: plura significantur , in persona Magistratum imperium , in persona liberorum patria potestas : in persona servi Dominium. Hinc Magistratus potestas appellatur. l. 26. ff. de pig. & Hypoth. l. 17. §. 19. ff. de aedit. edict. scil. ratione meri vel mixti imperii vel etiam simplicis Jurisdictionis. Nec enim quisquam Magistratus est aut esse potest sine aliqua potestate , id est sine imperio vel Jurisdictione.*

*Omnibus Magistratibus , non tamen duumviris , secundum jus potestatis suæ concessum est Jurisdictionem suam defendere penali judicio. l. unic. ff. si quis jus dic. non obtempe. Et l. 13. ff. de Injur. §. 6. Quæ jure potestatis à Magistratu fiunt , ad injuriarum actionem non pertinent.*

*Notavit ad hunc tit. Cujacius , quod licet nullus posset esse Magistratus sine Jurisdictione , attamen non omnes , qui Jurisdictionem habent , Magistratus esse : Principes & Imperatores , à quibus tanquam fonte & origine omnis derivatur Jurdictio , celliores esse magistratibus eoque nomine non venire. Quamobrem Tiberius apud Tacit. 3. Annal. Non Ædilis , aut Prætoris , aut Consulis partes sustineo , majus & excelsius aliquid à Principe postulatur. Qua ratione ( inquit ) juris & Pontificii Interpretes , Pontificatum scribunt non esse dignitatem , sed culmen dignitatum. Jure Canonico quoque vocatur potestas secularis Judex secularis seu magistratus. cap. novimus de verb. sig. in Decret. Et qui potestati resistit , ordinationi Dei resistit. c. qui resistit. II. q. 3.*



§. 15. *Iisdem temporibus & Tribu-  
num Celerum fuisse constat. Is  
autem erat, qui equitibus præerat,  
& veluti secundum locum à Regi-  
bus obtinebat, quo in numero fuit  
Junius Brutus, qui auctor fuit  
regis ejiciendi.*

**T**ribunum Celerum fuisse constat ] Celeres quinam  
fuerint & unde dicti docet nos Dionys. lib. 1. cap.  
64. Senatu deinde ex centum Senioribus constituto, vi-  
dens sibi & juvenum aliqua manu opus futurum, cujus mini-  
sterio & ad corporis tutelam, & ad necessaria munia peragenda  
uteretur, CCC. viros robustissimos, ex nobilissimis familiis delectos,  
circa se habuit, commendatos curiarum suffragiis, quemad-  
modum Senatores antea, denos per singulas curias. His in  
universum fuit nomen sicut & nunc, Celeres, ut plerique  
tradunt, à celeritate ministerii: (Promptos enim & citatos in  
exsequendis negotiis, Celeres Romani vocant) ut vero Va-  
lerius Antias auctor est, à duce suo, cui nomen id fuerit. Hinc  
Metellum Celeris cognomen adeptum fuisse observavimus,  
quod paucis diebus a patris obitu funebres ludos & gladiato-  
ria munera celeritate admirabili exhibuerit. Vel à Celere  
Remi interfectore, qui primus iis ordinibus à Romulo præ-  
fectus est, fuisse dictos alii opinantur.

Celeres antiqui dixerunt, quos nunc equites dicimus, à Ce-  
lere interfectore Remi, qui initio à Romulo iis prepositus fuit,  
qui primitus electi fuerunt ex singulis curiis deni, ideoque om-  
nino trecenti fuerunt, apud Festum. Ex hisce constat non  
semper huic ordini Celerum nomen fuisse, verum postea  
regio

regio imperio sublato, equites dictos fuisse, idque non incongrue: quippe ut ex Dionysio constat, quia ubi campus ad equestre certamen accommodus, equo insidentes prælum committebant. Hinc celer pro Equite, Græcis χέλως, unde Celeres & Celetes iidem. Ita dicti quia non bigis aut quadrigis in certamine utebantur, sed uni equo insidebant. Quare apud Homerum celes equus dicitur, qui solus agitur quasi monampix. Unde *Celetizontes* Juvenes dicebantur, qui frequenti equorum singularium certamine delectarentur. *Hagia*, Minerva, Pyrrusque Rex laudatur, & *Celetizontes* pueri. apud Plin. lib. 34. cap. 8. Et cap. 7. *Equestres* utique statuae Romanam celebrationem habent, orio sine dubio à Græcis exemplo. Sed illi *Celetas* tantum dicabant in sacris victores. Postea vero & qui bigis vel quadrigis vicissent.

Hinc Gellius lib. 10. cap. 25. inter genera navium celoces vocat, quas Græci Celetes vocant, in quibus singuli singulos tantum tractant remos. Celox per Translationem à Celete equo dicitur, cui vir infidet unus ut docet Suidas. Cuius mentem ita explicat Scheff. de milit. Naval. lib. 2. cap. 1. Ut quemadmodum Celetes, vel ut Latini nominabant, singulares equites ex equis tantum singulis pugnabant, quemadmodum in prælio tantum singulis utebantur, ita celoces dicebantur ea naves, in quibus singuli singulos tantum tractabant remos. Patet hoc ex Amphippis equitibus, qui celetibus opponuntur. Sicut enim ex Amphippis, qui duobus simul utuntur equis, dicta sunt *Ampheres*, in quibus quisque duos remos agit; sic ex celetibus dicta sunt celoces, in quibus singuli singulos tantum tractant remos. Valerius Probus in notis, TRIB. CEL. Tribuni Celerum vel celetium. Nec procul hinc Romam &c. Itaque celeres & celetes eisdem facit. Servius ad 8. *Æneid.* Romulus (inquit) cum turbam civium non haberet, asylum condidit, ad quem locum si quis confugisset, eum exinde non liceret auferri, hic cum videret multitudinem sine virorum conubiis posse deperire, à vicinis civitatibus matrimonia postulavit,



vit, sed ab eis contemptus, *Celestes* se Neptuno equestri Deo qui & confusus dicitur, edicturum proposuit, ad quos *Celestes* cum de vicinis civitatibus maxima multitudo cum omnibus foeminis convenisset, &c. Perperam *Celeres* pro *Celestes* ibi reponunt Viri docti, inquit Salmasius in suis Notis in *Ælium Lampridium*.

Atque inde *Celer* pro *veloci*, nihil enim equo vel equite velocius. Postea dicti sunt *flexutes* à *flectendis* equis in gyrum. Deinde *Trossuli* cum oppidum in *Thuscis* citra *Volscinios* passuum 9. M. sine ullo peditum adjumento cepissent: *Plinius* enim lib. 33. cap. 2. ita inquit. *Equitum nomen saepe variatum est in iis quoque qui ad equitatum trahabantur. Celeres sub Romulo regibusque appellati sunt: Deinde flexumines: postea trossuli, cum oppidum in Thuscis citra Volscinios passuum 1x. M. sine ullo peditum adjumento cepissent ejus vocabuli: idque duravit ultra C. Gracchum. Junius certe, qui ab amicitia ejus Gracchanus appellatus est, scriptum reliquit his verbis: Quod ad equestrem ordinem attinet, antea trossulos vocabant, nunc equites vocant: Ideo quia non intelligunt trossulos nomen quid valeat, multos pudet eo nomine appellari: & causam quæ supra indicata est exponit, invitosque etiamnum tamen trossulos vocari. Et apud Festum Trossuli equites dicti, quod oppidum Thuscorum Trossulum sine opera peditum ceperint. Emendat autem Salmasius Plinium. Et pro *Flexumines* legendum putat *Flexutes*. *Flexutes* à *flectendis* equis dicti. *Virgil.* *Flectere ludus equos*, à *flexus* autem *flexos* *flexitis* & ἀγχαίνω's *flexutis*; ut ab *arcus*, *arces*, *arcutis*. *Servius*; equites apud veteres *flexutes* dicebantur, sicut ait *Varro* rerum *Humanarum*. Hæc Salmasius. Quod autem multos eo nomine appellari puduisse scribit *Plinius* causa fuit, quia cum olim vox *Trossulus*, equitem bellis & laboribus assuetum significabat, interjecto tempore vitii paulatim indies magis magisque in *Rempub.* immigratibus, hominem delicatum, mollem, obesum & succulentum, quem natura ventri obedientiam finxisse videtur*

detur significabat. Unde vetus Gloss. putat *Trosulum* dictum quasi *torosulum*, à *torosa* scilicet carne & *arvina*. Nonius Marcellus, *Trosuli* dicti sunt *torosuli* quasi habitiores à *torosa* scilicet pinguedine. Hieronym: in *Jovianum*. Unius tantum Philosophi exemplum posui, *formosuli* nostri, & *trosuli*: & vix summis pedibus adumbrantes vestigia, imitentur saltem gentilium paritatem. Et apud Varronem. Nunc emunt *trosuli* Nardo nitidi vulgo attico talento equum. In eadem significatione apud Senecam Epist. 4. c. 87. O quam vellem Catoni nunc occurrere aliquem ex his *trossulis* in via divitibus, *Cursores* & *Numidos*, & multum ante se pulveris agentem. Hic sine dubio cultior comatiorque quam M. Cato videretur. Et Epist. 86. Quid ergo? Idem faciam, quod *trossuli* & *juvenes*. Unde Persius Sat. 1.

— — — Unde istud dedecus: in quo

*Trossulus* exultat tibi per *subsellia* levis?

Per *Trossulum* levem denotat, auditorem voluptatibus indulgentem, opimum, corpulentum, succosum, quem magis pigmenta flosculi, lenocinia orationis, quam res, quam argumenta commoveant, levem, mollem, nihil habentem severi Judicii.

Qui huic ordini præerat Tribunus appellabatur, & secundum à rege locum obtinebat, ut magister equitum à dictatore. Dictus Tribunus à tribus quibus præerat Centuriis. Distinxerat enim Romulus trecentos illos juvenes, quos *Celeres* appellavit, in tres centurias, quibus singulis suos præfecit duces, qui centuriones dicebantur. Qui vero his omnibus, nec non & centurionibus præerat, præfectus sive tribunus *Celerum* vocabatur. Ejus autem curæ regis persona demandata, cui semper aderat, ad cujus tutelam & corporis custodiam 300 robustissimos ex nobilissimis familiis delectos juvenes circa se habuit, quorum in rebus urgentibus & summa necessitate utebatur ministeriis, qui ad exequenda regis jussa alacres & prompti, regumque stipatores erant. Huic quoque Numa quædam Sacra pera-



peragenda tribuisse scribit Dionys. lib. 6. cap. 92. *Primam sacrorum munerum institutionem tradidit triginta curionibus. Secundam iis, quos Romani flamines vocant. Tertiam Tribunis Celerum, quos dixi & pedestres & equestres militare, regisque corpus stipare. Nam & hi solemnia quadam peragebant sacra.* Plura de Tribunorum Celerum jure vel potestate nuspiam invenimus.

*Quo in numero fuit Junius Brutus* ] Brutorum familia Romæ illustris fuit. Pater huic fuit M. Junius Brutus, ab uno Æneæ sociorum oriundus, inter nobilissimos Romanorum ob virtutem habitus. Dionys. lib. 4. cap. 195.

*Brutus dictus fuit propter simulatam stupiditatem & stoliditatem; cum enim Tarquinius Patrem ob divitias, simulque Fratrem natu majorem, ne scelus ulcisceretur, è medio sustulerat, timens ne quid crudelius in eum Tarquinius consuleret, stultum se simulavit, qua fallacia, opes nihili faciens, Regis Tyrannidem evasit. De quo Ita Ovid. lib. 2. fast.*

*Brutus erat stulti sapiens imitator, ut esset*

*Tutus ab insidiis, dire Superbe, tuis.*

*Brutum enim dicitur, quod stupidum stolidumque est, & sine sensu quasi obruptum. Quamobrem Cic. fortunam brutam id est insentatam appellavit. Et bruta animalia ratione carentia dicuntur. Unde Cyprianus ad Demetrianum scribens ait: Nullum affectus lumen caco offert, sermonem surdo, sapientiam Bruto, cum nec sentire Brutus possit, nec cacus lumen admittere, nec surdus audire. Quæ simulata stupiditas unicum ei fuit tutamen contra sævitiam tyranni debacchantis in multos cives optimos, ut inquit Dionys. dict. loc. Refert idem, cum insolitum pestilentiae genus sub Tarquinii imperio grassabatur, quod non modo puerorum & virginum magnam tollebat multitudinem, sed etiam prægnantibus infestissimum, matres una cum ipso foetu passim per vias sternebat, Regem Aruntem & Titum, Delphos ad maximè inclytum in terris oraculum misisse,*

mississe, ut morbi causam & remedium ex oraculo cognosceret, iisque Junium Brutum comitem addidisse.

Qui cum ad oraculum pervenissent acceptoque cujus causa missi erant responso, donariis Deum honorassent, multum riserunt Brutum, quod aureum baculum inclusum corneo cavato donum Apollini tulisset. Privatum deinde rogaverunt Deum, *ad quem eorum regnum Romanum esset venturum.* Ex infimo specu vocem redditam ferunt: *Imperium summum Romæ habebit, qui vestrum primus, ô Juvenes! osculum matri tulerit.* Adolescentes non percipientes sensum oraculi, pacti sunt inter se ut simul matrem oscularentur, communibus auspiciis regnum administraturi. Vel ut Livius refert, ipsi inter se uter prior cum Romam redisset, matri osculum daret, sorti permittunt. Verum Brutus alio ratus spectare Pythicam vocem, velut si prolapsus cecidisset, terram osculo contigit: Scil. quod ea communis mater omnium mortalium esset.

Unde canit Ovid. *lib. 2. fast.*

*Ille jacens pronus matri dedit oscula terra,  
Creditus offenso procubuisse pede.*

Putat autem Coccejus in suis comment. ad h.t. propter hanc fatuitatis simulationem, improbable esse, eum Tribunum Celerum fuisse, tantumque imperii & potestatis obtinuisse; quanquam Livius & hic Pomponius contrarium testantur. Multo verisimilior, inquit, est relatio Dionysii, quod *Princeps fuerit sacrificorum.* Quod nuspiam apud Dionysium invenire potui. Quippe ubi Brutum Valerio de comitiis, quis ea habiturus esset, cum nemo ipsorum esset in Magistratu, querenti, respondentem inducit, semetipsum quoque Tribunum Celerum vocat. Nulla fit principis sacrificorum mentio: Ego (inquit) Valeri. *Sum enim Tribunus Celerum, licetque mihi per leges quandocunque in comitium vocare populum. Hunc enim honorem, maximum alioqui, Tarquinius mihi*



*mibi dedit cen fatuo, ut qui nec potestatem ejus sim animadversurus, nec, si vel maxime intelligam, ea usus. Unde Coccejus illa habet fugit me, itaque dubito num ipse ex Dionysio descripsit, quæ de Bruto refert. Vid. Liv. lib. 1. in fin.*

*Qui auctor fuit regis ejiciendi ] Atque ita totius populi in libertatem vindicandi. Quid potuit amplius, si L. Brutus esset, qui civitatem dominatu regio liberavit. Cic. in Orat. pro Planc. & in 1. Philipp. L. Brutus regio dominatu Rempub. liberavit, & ad similem virtutem, & simile factum in prope quingentesimum annum propagavit. Hic est enim ille Brutus omnium sermone celebratus, qui legum & libertatis summus auctor & vindex, cum furere se simulasset, latentem animum nimium diu reconditum, suo tempore detexit, magnificaque oratione, non vecordis & dementis, avunculo imperium abrogavit, populusque Romanus auspiciū imperiumque sequuti suum, ex gravi servitio, & dominatu regio se in libertatem vindicavit. Alex. ab Alexand. dier. Genial. lib. 5. cap. 28.*

*Hinc Tacit. 1. Annal. Urbem Romam à Principio Reges habuere. Libertatem & consulatum L. Brutus instituit. Non restituit igitur. Fuit enim prima illa Romani populi libertas, cum ab initio urbis condita reges urbem ipsam habuerint, nunquam proinde urbs libertatem inquit Faber in suis rational. ad h. t.*

---

*§. 16. Exactis deinde regibus, Consules constituti sunt duo: penes quos summum jus uti esset, lege rogatum est. Dicti sunt ab eo, quod plurimum Reipublicæ consulerent, qui tamen ne per omnia regiam potestatem*

B testa-

*testatem sibi vindicarent, lege lata factum est, ut ab eis provocatio esset, néve possent in caput civis Romani animadvertere injussu populi, solum relictum est illis ut coërcere possent, & in vincula publica duci juberent.*

**C**onsules constituti sunt duo ] Liber jam populus Romanus, alia regiminis forma Reipub. imposita, seque invicem cives jurejurando adegerunt, Neminem Roma passuros regnare. Regiæ itaque potestati, quæ ducentos quadraginta quatuor annos duraverat, consulare successit imperium, quod à regio nisi nomine tenus differebat : Ita ut potius nomen, quam imperium immutatum videretur. Duo igitur creati sunt Consules in omnibus par cum regibus potestate, præterquam quod hi perpetui, illi annui, hic solus, illi duo ; ne potestas solitudine vel mora corrumpere, ut inquit Florus lib. 1. cap. 9. Quare Liv. lib. 2. cap. 1. Libertatis autem originem inde magis, quia annum imperium consulare factum est, quam quod diminutum quicquam sit ex regia potestate, numeres. Omnia jura, omnia insignia, primi consules tenuère. Et quidem ut æquum & reipub. utile videbatur illud in Brutum Collatinumque libertatis suæ vindices & auctores populus Romanus initio transfudit : quod sibi quodammodo pro tot tantisque in rempub. meritis, jure suo vindicare potuissent. Consules dicti secundum Varronem, quod consulere Senatum ac populum deberent. Quinctilianus dubitari posse dicit, utrum à *consulendo*, an à *judicando* consules dicantur. Quippe hoc consulere veteres dixere. Unde remansit illud, *Rogat bene*



benè consulas, hoc est judices. Lipsi. de Magistr. Rom. Unde Cic. 3. de leg. testatur ex legibus duodecim tabularum, eodem Prætores, Judices, & Coss. dici à præeundo, judicando, & consulendo. Regio imperio duo sunt, iique præeundo, judicando, & consulendo, prætores, judices, & consules appellantur; militia summum jus habento; nemini parento; illis salus populi suprema lex esto. A consilio simpliciter derivat nomen Dionysius lib. 3. cap. 199. Hos Magistratus placuit ipsorum lingua nominari Consules: quod vocabulum si Gracè interpretari velimus, significat συβέλλας sive πρεσβυτάς. Nam consilia Romani vocant, quas nostrates συβέλλας. Ὑπατων tamen procedente tempore à Gracis dicti sunt, à potestatis præcellentia, quoniam omnibus præsunt, & summum locum obtinent. Nam quod præcellens & summum est, præsci Graci Ὑπατων vocabant. Pomponius Consules ab eo dictos putat, quod plurimum Reipub. consulerent. Quæ nominis derivatio à consulum officio non aliena. Iphis enim incumberebat providere, ne quid reipub. detrimenti caperet. Et ut vel inquit Florus l. 1. c. 9. Consules appellavit pro regibus ut consulare se civibus suis debere meminissent. Optimè enim Cic. 1. offic. Omnino qui reipub. præfuturi sunt, duo Platonis præcepta teneant; Unum ut ad utilitatem civium sic tueantur, ut quæcunque agunt, ad eam referant, obliti commodorum suorum. Alterum, ut totum reipub. corpus curent, ne dum partem aliquam tueantur, reliquas deserant. Ut enim tutela sic procuratio reipub., ad utilitatem eorum qui commissi sunt, non ad eorum, quibus commissæ est, gerenda est. Imperium (enim ut ait Ammianus) cura salutis aliena est. Quare Imperator Hadrianus & in concione & in Senatu sæpe dixit. Ita se Rempub. gesturum ut sciret populi rem esse, non propriam. Apud Spartianum cap. 8. Ut enim tutor in rem pupilli constituitur, ut ejus rationibus serviat; ita principes & magistratus populi salutis & utilitati consulere debent, & publica commoda privatis antepone. Singulare erga Rempub. & cives amoris & studii exemplum, illud L. Bruti facinus, quod Flo-

rus prodidit. *Quum favori civium, etiam domus sua clade & paricidio velificatus est. Quippe quum studere revocandis in urbem regibus liberos suos comperisset, protraxit in forum & concione media virgis cecidit, & securi percussit: ut planè publicus parens in locum liberorum adoptasse sibi populum videretur.* Triplici olim nomine, ut patet ex Cic. sup. allegato hunc Magistratum appellarunt Prætorem, Judicem, Consulem, à consulendo, præeundo, judicando. Quippe olim prætores dicti, qui nunc consules. Unde apud Fest. *Prætoria porta in castris dicitur, qua exercitus in prælium educitur: quia initio prætores erant, qui nunc consules: & ii bella administrabant, quorum tabernaculum quoque dicebatur prætorium.* Prætores, quia præibant populo, Consules, quod consulerent Senatui, Prætor dictus (inquit) Varro, qui præiret jure & exercitu: Unde imperator Justinian, in Novel. 25. *Est hoc nomen (scil. prætoris) quasi jure patrio Romani imperii proprium, & ante ipsos etiam Coss. in ampla Romanorum repub. usui habitum.*

Hinc nomen Prætoris in XII. tab. pro consule causas cognoscente de addicto debitore: *Inter eos dies trinis nundinis, ad Prætorium in Comitium producito, quantaque pecunia judicatus erit, prædicato.* Ad prætorem id est consulem, quippe ea tempestate nondum Prætor erat creatus. Primum creatus fuit Prætor Anno ab V. C. 389. post latas XII. Tab. 72. ut apud Liv. videre est. Quanquam idem auctor sup. lib. 3. cap. 55. tradiderit Horatia lege consules & prætores iisdem auspiciis fuisse creatos, ita ut sibi constare non videatur Livius. Sed responderi potest, Livii mentem esse, quod illud nomen, quo antea Consules significabantur, postea transierit ad novum illum Magistratum, qui eo tempore creatus est. Sic quoque Impubem II. XII. tab. Prætoris, id est consulis arbitrato verberari, noxamve duplionemve decerni vetabatur. Plin. lib. 18. cap. 3. Prætores enim, ut confirmat Sonaras Tom. 2. pag. 28. ad decemviros usque Prætores fuisse appellatos: Post vero abro-



abrogatum decemviratum, Consules vocari incepisse. Unde Livius lib. 3. cap. 55. *Fuere qui interpretarentur, eadem hac Horatia lege Consulibus quoque & Pratoribus, quia iisdem auspiciis, quibus Consules crearentur, cautum esse, Judicem enim Consulem appellari. Quæ refellitur interpretatio, quod his temporibus nondum consulem Judicem, sed prætorem appellari mos fuerit.*

*Penes quos summum jus esset, lege rogatum est.* ] Superius diximus imperio regio consules fuisse creatos. Unde Cic. 3. de ll. *Regio imperio duo sunt.* Fastigium dignitatum vocat Cassiodorus. Græci *ὑπατοι*, ut ex Dionysio descripsimus, appellabant: in omnibus rebus pari cum regibus potestate erant ornati; omnia jura, omnia insignia, quæ Reges olim habuerant, consules tenuere Liv. lib. 2. cap. 1. Nimirum lictores cum fascibus, purpuream prætextam, sellam curulem Regiam: Id tantum cautum, ut alter consul, penes quem erat imperium, Fasces XII securibus alligatos, alter virgarum Fasces cum lictoribus haberet, idque per vices singulis mensibus, donec annum eorum imperium expleretur. Ne si ambo Fasces haberent duplicatus terror videretur. Unde Suet. in Cæsare cap. 20. *Antiquum etiam retulit morem, ut quo mense Fasces non haberet, accensus ante eum iret, lictores ponè sequerentur.* Fasces fasciculi erant, ut inquit Budæus, virgarum, inter quos virga securis obligata erat, ita ut ferrum in summo fasce extaret. Liv. lib. 3. cap. 36. *Fascibus secures illigatas præferebant.* Ex betula autem virgæ fiebant. Quodque fascibus, quos præferebant lictores, betullas virgas maximè commodas duxere. Itaque ex illarum virgis, tum propter candorem, tum propter tenuitatem publicos Fasces, qui magistratibus præirent, effecere. Alex. ab Alexand. *Dier. Genial. lib. 1. cap. 28. & inde Plin. lib. 16. cap. 18. Gaudet frigidis sorbus, & magis etiam betulla. Gallica hæc arbor mirabili candore atque tenuitate, terribilis Magistratum virgis.*

Cur autem virgæ colligatæ adnexis securibus feruntur , docet nos Rhodiginus *lect. antiq. lib. 23. cap. 21.* scil. ut Magistratus præmonerent , lente ad irrogandam pœnam pergendum : Vel ut inquit Budeus *sup. alleg. ut mora tantisper Magistratum ira fiat , dum virgæ dissolvantur : id quod sæpe penitentia occasionem magistratibus attulit.* Enimvero quoniam facinorosi partim sunt emendabiles , partim perditissimi : ut virgæ admonendis illis , sic secures his tollendis de medio instituta sunt. Accensus , de quo fit mentio *sup. cit. loc. ex Suet.* est minister magistratuum , qui accirent , & erat supra lictores , ab acciando id est vocando ita dicti , qui vel Quirites ad concionem , vel jus postulantes ad Prætorem acciret : Varro *de lingua latina. Consul loquitur ad exercitum : Impero qua convenitur ad comitia centuriata. Quare hic accenso , illic præconi dicit , hæc est causa ; in aliquot rebus item ut Præco Accensus acciebat , a quo Accensus quoque dictus.* Idem jussu Prætoris clamabat esse tertiam meridiem , & horam nonam. Accensum solitum ciere , Bæotia ostendit. Ubi primum accensus clamarit meridiem. In actionibus Prætor accensum solitus erat jubere , ubi ei videbatur horam esse tertiam , inclamare horam esse tertiam itemque meridiem , & horam nonam.

Præterquam quod ejus quoque erat officium , ut molestis interpellatoribus silentium imponeret. Sig. *de jur antiq. Civ. lib. 2. cap. 15.* aliter accensus nomen est ordinis & promotionis in militia , ut nunc dicitur Princeps vel Commentariensis , aut Cornicularius & dabatur à Tribuno militum centurioni adjutor. Accensi quoque dicuntur , apud Fest. *lib. 1.* qui in locum demortuorum militum sufficiebantur , ita dicti quod ad censum adjiciebantur. Veget. *de re milit. lib. 2. cap. 19.* Ad obsequia tamen judicum vel tribunorum , nec non etiam Principalium deputabantur milites , qui vocantur accensi , hoc est postea additi , quam fuisset legio completa , quos nunc supernumerarios vocant. Postea etiam optiones dicti , quia referentibus centurionibus adoptati in cohortes



cohortes subibant, ut semper plenæ essent legiones. Vid. Budæum in suis *Annotat.*, in *Pandect.* Hæc de Accensis. Liçtores initio nascentis Reipub. Romanæ regum ministri fuère. Livius de Romulo sermonem habens, *vocataque ad consilium multitudine, quæ coalescere in populi unius corpus nulla re, præterquam legibus poterat, jura dedit, quæ ita sancta generi hominum agresti fore ratus, si se ipse venerabilem insignibus imperii fecisset, cum cætero habitu augustiorem, tum maxime liçtoribus XII. sumptis fecit.* Exactis vero regibus iis fuere usi Consules, Prætores, Interreges, Dictatores, & si qui alii Magistratus non potestatem solum habuerunt, sed etiam imperium. Viatoribus ii, quorum potestas potius, quam imperium extitit. Sig. de *antiq. Jur. Civ. lib. 2. cap. 15.* Horum erat munus fasces cum securibus ligatos Magistratibus præferentes, præire, turbas summovere, *Repente strepitus ante curiam liçtorum summoventium auditur* apud Livium. Jussi autem fasces & secures, quas portabant, solvebant & expediebant, atque primo fontes virgis cædebant, mox securi feriebant. Valgius Rufus apud Bell. *lib. 12. cap. 3.* liçtorem aliquando dictum putat, quod cum Magistratus P. R. virgis quempiam verberari jussissent, crura ejus ac manus ligari vincirique à viatore solita sint. Isque, qui ex collegio viatorum officium ligandi habet, liçtor sit appellatus: utiturque ad eam rem testimonio M. Tullii, quæ dicta est pro Rabirio. *Liçtor* (inquit) *colliga manus.* Quam opinionem & ipse Cellius probat. Verum Tiro Tullius inquit. M. Ciceronis libertus liçtorem vel à limo vel à licio dictum scripsit, licio enim transverso, quod limum appellatur, qui Magistratibus, inquit, præministrabant cincti erant. Et ita quoque Plutarch. in *Romulo. Præcedebant alii qui baculis turbam summovebant loris succincti, ut ilico vincerent eos quos ille juberet, unde liçtores dicti: & virgæ, quas gestabant, fasces.* Potuit fortasse vox Liçtores, interposita nunc litera C. dici, quum olim liiores dicerentur, quasi

ἀνταρχοί, *id est ministri publici.* Francisc. Polet. *Hist. for. Rom. lib. 5. cap. 13.* Lictorem interpretatur quasi legis actorem. Annotavimus ad §. 6. *h. t.* ad verba *Legis actiones, lege agere* dici lictorem, cum ex officio suo agit & sententiam in damnatos exequitur. Vide ibidem allegata scriptorum testimonia. Hi è plebe Romana fuerunt, ut ex Festo constat, apud quem quis ex plebe quæritur, quatuor & viginti lictores apparere consueverunt, & eos ipsos plebis homines.

Post bellum vero Punicum, qui Magistratibus in Provincia apparerent, Bruttii fuere, unde Bruttiani dicti inquit Gell. *lib. 10. cap. 3.* quifuere servi lorarii, hoc est qui accincti loris verbera & plagas imponebant. Cum enim hi primum ad Annibalem descivissent, idque Romani egerime tulissent, fugato Annibale, secundum senatus sententiam, Bruttios ignominiae causa nec milites scribebant, nec pro sociis habebant, sed Magistratibus in provincias euntibus parere, & praeministrare servorum vicem jusserunt. Itaque ii sequebantur Magistratus tanquam in scenicis fabulis, qui dicebantur lorarii. Et quos erant jussi, vinciebant aut verberabant, qui autem ex Brutiiis erant, appellati sunt Brutiani. Hæc Gellius dict. loc. Purpurea etiam usi fuere consules prætexta, & sella curuli, unde Liv. *lib. 7. in pr.* Cum de industria omnia, ne quid per plebeium Consulum ageretur, proferrentur, silentium omnium rerum, ac justitio simile otium fuit: nisi quod non patientibus tacitum tribunis, quod pro consule uno plebeio tres patricios magistratus curulibus sellis prætextatos tanquam consules sedentes, nobilitas sibi sumpsisset; prætorem quidem etiam jura reddentem, & collegam consulibus, atque iisdem auspiciis creatum. Et apud Suet. in Claudio *cap. 23.* De majore negotio in Curia medius inter consulum sellas tribunitio subsellio sedebat. Cic. in Pison. Tu etiam mentionem facies consulatus tui? aut te fuisse Romæ consulem dicere audebis? quid? tu in litteris, in toga & prætexta esse consulatum putas? quæ



*ornamenta etiam in Sex. Clodio te consule esse voluisti.*

Et Silius Italicus originem Curulis ac fascium repetens ita canit

*Maoniaque decus quondam Vetulonia gentis,  
Bis senos hac prima dedit precedere fasces,  
Et junxit totidem tacito terrore secures,  
Hac altos eboris decoravit honore curules,  
Et Princeps Tyrio vestem pratexuit ostro  
Hac eadem pugnas accendere protulit ara.*

Præter hæc insignia sceptrum eburneum consuli attribuit Dionysius lib. 3. cap. 146. ubi inquit. Attamen Tarquinius quoque inter cetera insignia regia allatas etiam secures XII, quemadmodum & nunc Romani sceptræ & diademata donomittunt regibus, quando eis confirmant potestatem regiam; quibus utuntur etiamsi ab illis non accipiant. Hos honores non statim admisit Tarquinius, si plerisque scriptoribus Romanis credimus, sed cum ad S. P. Q. R. retulisset juberentne ut ista sumeret, volentibus & consentientibus omnibus, tum demum illis usus est, totoque deinceps vita tempore amictus toga picta purpurea, gestabat coronam auream, & cum sceptro eburneo, sella item sedebat eburnea, duodecim licitoribus, cum securibus & virgis jura reddenti adstantibus, & per vias eum præcedentibus. Idem ornatus mansit ejus successoribus, & post pulsos reges annuis consulibus, excepta corona togaque picta. Ita in Valerianis exemplis apud Vopiscum: Nam te hoc die consulem designo scripturus ad Senatum, ut tibi Scipionem deputet, deputet etiam fasces. Hac enim imperator non solet dare; sed a Senatu quando fit consul accipere. Meminit Liv. M. Papirium, Gallo barbam suam, ut tum promissa erat, permulcenti, scipione eburneo in caput incusso, iram movisse. lib. 5. cap. 41. Valer. Max. lib. 4. cap. 4, De Attilio sermonem habens, nec fuit iis rubori eburneo sceptro deposito, agrestem stivam aratri repetere. Ad cujusmodi genus insigniorum alludens Claudianus ita canit lib. 2. de bello Childonico.

*Proh labor ! in Bochhi regnum sudavit uterque  
Scipio. Romano vicisti sanguine Mauri.*

*Ille diu miles populus , qui præsuit orbi ,*

*Qui trabeas , & sceptrum dabat , quem semper in armis  
Horribilem gentes , placidum sensere subacta.*

Per trabeas & sceptrum consulatum intellige. Salmasius in notis ad Trebell. Poll. de Tetrico juniore. Sceptrum etiam consules gerebant. Vetus Epigramma.

*Consulibus sceptrum , mensis decus , arma tablistis.*

Duces etiam olim cum sceptris curiam ingrediebantur , Servius , *Apud majores omnes duces cum sceptris ingrediebantur curiam , postea ceperunt tantum ex consulibus sceptrum gestare , & signum erat eos consulares esse.*

Habebat autem sceptrum in summo aquilam , cujus meminit Prudentius.

*Cum consulatum initis , ut verna solent.*

*Pudet fateri farre , pullos pascitis ,*

*Aquila ex eburna sumit arrogantiam*

*Gestator ejus , ac superbit bellua*

*Inflatus esse , cui figura est alitis.*

Et Juvenal. Satyr. 10. vers. 43.

*Da nunc & volucrem , scepro qua surgit eburno.*

Notat autem Salmasius veteres consules scipionem tantum gestasse triumphi die aut aliis festis diebus ; at recentiores isti consules quotidie sceptrum gestabant & cum scipione curiam ingrediebantur , unde Dionysius lib. 4. cap. 199. *Præterea tam multis regis insigniis , si qua sunt invidiosa & molesta populo , partim minuenda , partim planè tollenda judico ; sceptrum ista dico , & coronas aureas , & purpureas auro intertextas trabeas ; nisi statis festis & in pompis triumphalibus assumantur honoris deorum gratia.* Quemadmodum quo ad alia consulum insignia posterior ætas sub principibus & imperatoribus quædam immutavit , quædam adjecit. Notandum quod initio hæc dignitas non nisi in patricios conferebatur , verum postea assiduis Tribunitiis se-

ditio-



ditionibus victi Patres alterum ex plebè consulem creandum concessere. Ac primus de plebè consul L. Sextius creatus est. Liv. lib. 6. in fin. & lib. 7. in Principio Creabantur comitiis centuriatis in Campo Martio ab interrege nonnunquam & dictatore. Comititia consularia novis consulibus creandis, non modo per consules haberi, sed per interregem; nonnunquam absentibus consulibus, alterum consulem cujus erat sors ut comitiis praesset, ex Provincia evocari, aut si morbo vel necessitate impediti, commodo reipub. avocari non possent, dictatorem dici, qui comitiis praesset, saepe rescriptum est. Alexand. ab Alex. Dier. Genial. lib. 3. cap. 3. Et passim Liv. lib. 3. cap. 8. lib. 4. lib. 7. lib. 8. lib. 10. cap. 12. Eo anno, nec traditur causa, interregnum initum. Inter reges fuere Ap. Claudius, dein P. Sulpicius. is comitia consularia habuit, creavit. M. Fulvium & L. Cornelium Scipionem. coff. Ineundi autem consulatus tempus non semper fuit idem. Aliquando idibus Martiis, nonnunquam Calend. Quintilibus. Interdum Calend. Sextilibus. Et Idibus Decembris Magistratum inierunt. Postea videtur institutum ut Calendis Januariis consules inirent, ut perspicimus ex Vell: lib. 2. cap. 12. ubi inquit, At Cajus Marius, Lucium Syllam, jam tunc, ut praeventibus fati, copulatum sibi quaestorem habuit, & per eum missum ad regem Bochim Jugurtha rege, abhinc annos ferme centum triginta octo, potitus est: Designatusque iterum consul, in urbem reversus, secundi consulatus initio Calendis Januariis eum in triumpho duxit.

In consulibus creandis observatur quoque ætas, quæ certis annis finita erat. Unde Ovid. 5. Fast.

— — — finitaque certis  
Legibus est ætas unde petatur honos.

Ea rogatio inquit Liv: l. 4. c. 43. primum lata est L. Julio Trib. pleb. quot annos nati quemque Magistratum peterent, caperentque. Inde cognomen familiae inditum, ut Annales appellat.

pellarentur. Appellatur hæc lex quoque annaria auctore Festo. Unde Lamprid. in Commodo *cap. 2. Post hæc venia legis annarie impetrata cos. est factus.* Ante hanc legem frequenter etiam juvenibus, quorum singulares animi doctes virtutesque enitebant, concedente Populo Romano aditus ad consulatum patebat. Quod Cic. *Philip. 5. affirmat. Quid est enim P. C. cur eum non quam primum amplissimos honores capere cupiamus. C. Cæsar* ineunte ætate docuit, ab excellenti, eximiaque virtute progressum ætatis expectari non oportere. Itaque majores nostri, veteres illi, admodum antiqui leges annales non habebant, quas multis post annis attulit ambitio, ut gradus essent petitionis inter aequales. Ita sæpe magna indoles virtutis, priusquam reipub. prodesse potuisset, extincta fuit. At vero apud antiquos, Rulli, Decii, Corvini, multique alii à recentiore autem memoria, superior Africanus, T. Flaminius, admodum adolescentes consules facti, tantas res gesserunt, ut populi Romani imperium auxerint, nomen ornarint. Quæ autem fuerit ætas legitima docet nos Cic. *Philipp. V. cum inquit; Quid Macedo Alexander, cum ab ineunte ætate res maximas gerere cepisset, nonne tertio & tricesimo anno mortem obiit? quæ est ætas nostris legibus decem annis minor, quam consularis.* Ex quibus verbis perspicimus annum consularem fuisse 43. Notandum hic non perpetuo obtinuisse quod Livius tradit *l. 2. c. 7.* scil. nemini ad consulatum aditum patuisse, nisi qui quæsturam, Ædilitatem, Præturamve gessisset, & ita per gradus ad consulatum, quod in Repub. summum erat honoris fastigium, evehebantur. Inquit enim Liv: quod cum M. Fulvius, & M. Curius tribuni plebis impedirent T. Quintium Flaminius ex quæstura consulatum petere. *Jam Ædilitatem, præturamque fastidiri: nec per honorum gradus documentum sui dantes nobiles homines tendere ad consulatum, sed transcendendo media, summa imis continuare. Rex ex campestri certamine in senatum venit, patres censuerunt, qui honorem, quem sibi capere per leges liceret, peteret, in eo populo creandi*



creandi quem velit, potestatem fieri, æquum esse. Et Appian, Alexand. de bel. civil. lib. 1. de Sylla sermonem habens inquit; Ad hac leges alius antiquabat, alius ferebat; edixitque nequis praturam ante quaesturam gereret, neve consulum ante praturam, neve eundem Magistratum susciperet iterum, nisi post decimum annum. Hinc jurisconsultus in l. 11. ff. de muner. & honor. Ut gradatim honores deferantur, edicto, & ut à minoribus ad majores perveniat, Epistola Divi Pii ad Titianum exprimitur. Et l. 14. §. 5. ff. eod. Gerendorum honorum non promiscua facultas est, sed ordo certus huic rei adhibitus est: nam neque prius majorem Magistratum quisquam, nisi minorem susceperit, gerere potest, neque ab omni ætate, neque continuare quisque honores potest. Verum, ut diximus, hoc perpetuo non obtinuit. Quippe & P. Servilius Quinti filium Galbam, qui nullum antea honorem gesserat, Cajus Claudius Cento comitiorum causa dictator dictus, consulem creavit. Sic quoque Pompejus Magnus, qui nec præturam nec quaesturam gesserat, consul factus est, ut ex Appiano constat l. 1. de bel. civ. Tribuit Jurisconsultus consulibus jus summum regiamque potestatem, cujus partes nobis descripsit Polybius lib. 6. cap. 10. Cum inquit. Consules quamdiu in urbe sunt, priusquam legiones educant, omnia quæ publicè sunt, in potestate habent, omnes reliqui Magistratus præter Tribunos, consulibus parent. Hi legationes in Senatum inducunt. Idem quoties deliberari aliqua de re usus postulat, referendi jus habent: estque in eorum manibus Senatusconsulta conficiendi totum negotium. Præterea publicæ omnes actiones, quæ per populum fieri debent, ad curam horum pertinent. Item advocare conciones, rogationes ferre, è suffragiis majoris partis populi legem aut plebiscitum condere. Insuper belli adornandi, gerendi, & omnia quæ ad expeditionem pertinent administrandi potestatem propemodum absolutam Coss. habent. Nam & auxiliaribus sociorum copiis imperare quod visum fuerit, & tribunos militum constituere, & conscribere exercitum, & dilectus

agere

agere Cos. licet. Accedit istis quod jus animadvertendi habent in quem voluerint cunque ex omnibus qui belli ipsis parent. Possunt etiam iidem de publicis pecuniis quantum libuerit insumere: comitante Quaestore, & promptè quicquid fuerit iustus, exsequente. Ut merito quis dicat hanc partem intuens, Remp. Rom. planè ab unius imperio pendere & regiam esse. Verum hanc regiam potestatem sive summum jus, ut vocat Pomponius, non ipsis integrum mansit, & postea restrictum atque limitatum fuit.

Qui tamen ne omnia regiam potestatem sibi vindicarent, lege lata factum est, ut ab eis provocatio esset. ] Hac lege, quæ statim à Regifugio lata est à Valerio Poplicola, cautum fuit, ut si quis Magistratus civem Romanum necare, verberare, multare vellet, privatus eum ad populi iudicium vocare posset. Unde Valer. Max. lib. 4. c. 1. de Poplicola sermonem habens, inquit, Legem etiam comitiis centuriatis tulit, ne quis Magistratus civem Romanum adversus provocationem verberare aut necare vellet. Vide Liv: l. 2. c. 8. Ante hanc legem igitur non licebat à consulibus, non magis atque olim à regibus & postea à decemviris ad populum provocare. Quippe cum penes eos jus summum & planè regium residebat, illud omnis provocationis licentiæ denegabat. Postea ab eadem familia sæpius hæc lex renovata est. Anno trecentesimo quarto à Lucio Valerio repetita, quum paulo ante à decemviris fuisset abrogata. Quippe & his jus summum in civitate datum erat.

Deinde anno quadringentesimo quinquagesimo tertio iterum ab eadem familia perlatam legimus apud Livium l. 10. c. 9. Eodem anno (inquit) M. Valerius Cos. de provocatione legem tulit diligentius sanctam, tertio ea tum post reges exactos lata est. Semper à familia eadem. Causam renovanda sæpius haud aliam fuisse reor, quam quod plus paucorum opes, quam libertas plebis poterant. Porcia tamen lex sola pro tergo civium lata videretur. Quod gravi pœna, si quis verberasset, necassetve civem Romanum sanxit. Valeria



ria lex, cum eum qui provocasset, virgis cedi, securique necari vetuit, si quis adversus ea fecisset, nihil ultra, quam improbe factum adjecit. Id (qui tum pudor hominum erat) visum, credo, vinculum satis validum. Nunc vix servo ita minetur quisquam.

Notandum vero hanc provocationem tantum fuisse intra urbem, & extra ad mille passuum, quam nunc Baleucam vocamus Liv. l. 3. c. 20. Igitur Tribuni, ut impedienda rei nulla spes erat, de proferendo exercitu agere eo magis, quod & augures iussos adesse ad Regillum lacum fama exierat: locumque inaugurari, ubi auspicato cum populo agi posset: ut quicquid Romæ vi tribunicia rogatum esset, id comitiis ibi abrogaretur. Omnes id iussuros quod consules vellent, neque enim provocationem esse longius ab urbe mille passuum, & Tribunos si eo veniant, in alia turba Quiritium subiectos fore consulari imperio. Terreabant hac: sed ille maximus terror animos agitabat, quod sapius Quinctius dictabat, se consulum comitia non habiturum. Non ita civitatem agram esse, ut consuetis remediis fisci posset. Dictatore opus esse Reipub. ut qui se moverit ad sollicitandum statum civitatis, sentiat sine provocatione dictaturam esse.

Fiebat tamen interdum ne provocationi locus esset; primo quando extra primum lapidem, id est extra Baleucam exercitus educeretur, consul provocationi cedere non obligatus erat. Unde loc. cit. Neque enim provocationem esse longius ab urbe mille passuum, & Tribunos si eo veniant in alia turba Quiritium subiectos fore consulari imperio.

Deinde quando summo S. C. muniti erant. Videant Consules ne quid Resp. detrimenti capiat. Hoc enim S. C. rerum summa coff. tribuebatur, tumque in seditiosos, & perduelles, nulla habita ratione legum de provocatione, quibus exsolvebantur animadvertabant. Rarissimum vero id contingebat, & quidem nisi in summa reip: necessitate, quando ingens metus & periculi discrimen Reipub. imminebat. Hinc apud Salust: in Bel: Catilin: Itaque, quod  
plerum-

plerumque in atroci negotio solet, senatus decrevit, darent operam consules, ne quid Respub. detrimenti caperet. Ea potestas per Senatum, more Romano, magistratui maxima permittitur, exercitum parare, bellum gerere, coercere omnibus modis socios atque cives, domi militiaque imperium, atque iudicium summum habere. Aliter sine populi jussu, nulli earum rerum consuli jus est. Unde quoque Cic. in 1 orat. in Catil. Decrevit quondam senatus, ut L. Opimius cos. videret, ne quid Respub. detrimenti caperet: nox nulla intercessit: mox interfectus est propter quasdam seditionum suspensiones C. Gracchus, clarissimo patre natus, avis, majoribus, occisus est cum liberis M. Fulvius consularis. Idem pro Milone. Quanquam quis hoc credat, Cn. Pompejum juris publici, more majorum rei denique publica peritissimum, cum Senatus ei commiserit, ut videret ne quid Resp. detrimenti caperet (quo uno versiculo satis armati semper consules fuerunt, etiam nullis armis datis) hunc exercitu, hunc delectu dato, Iudicium expectaturum fuisse, in ejus consiliis vindicandis, qui vel iudicia ipsa tolleret? Et in 5. Philip. Qua propter ne multa nobis quoidie decernenda sint, consulibus totam tempub. committendam censeo, iisque permittendum, ut rempub. defendant, provideantque ne quid respub. detrimenti capiat.

Hoc itaque Senatusconsulto non armati consules, jure Magistratus, quo ornati erant, in caput civis Romani animadvertere non potuere quacumque ratione, vel poena capitali vel deportatione vel libertatem adimendo, nam & hoc animadvertere est in caput civis Romani, Eximere caput de civitate. l. penult. ff. de extraord. cognit. Propterea quod servitus morti assimilatur l. 59. ff. de cond. & demonstr. l. 32. §. 6. ff. de donat. inter vir: & uxor. Unde Ulpianus in l. 209. ff. de R. J. Servitutem mortalitati ferè comparamus. Denique nec aliud quicquam facere, quo civis Romani existimationem læderet ac minueret, pari enim passu ambulant vita ac fama, nec bono civi vita carior quam



quam facta esse debet, unde nemo eam nisi cum anima simul amittere cupit. In servos autem consules, non obstante lege Valeria jure suo potuisse gravius consulere dicendum videtur, quia tantum civibus hac lege prospectum, nec habet quoque servus caput in civitate l. 3. ff. de cap. diminutis.

*Solum relictum est iis ut coercere possent, ut in vincula publica duci juberent*] Quod & confirmat Ulpianus l. 2. ff. de in jus voc. Eum, inquit, in jus vocari non oportet, neque consulem, neque praefectum, neque Praetorem, neque Proconsulem, neque ceteros Magistratus qui imperium habent, qui coercere aliquem possunt, & jubere in carcerem duci: Per coercere hic intelligit Jurisconsultus modicam coercitionem, quæ Jurisdictioni ita cohæret, ut ab ea divelli nequeat; quippe quæ sine ea nulla esset, & vana ac ridicula; quare cui competit Jurisdictio, ei quoque modica non denegatur coërcitio, ita ut cui mandata est jurisdictio, jus leviter coërcendi quoque habeat. Excipit igitur Jurisconsultus omnem graviolem coercitionem, quæ potius meri est imperii quam jurisdictionis, cujus varia sunt genera, pro ut varia sunt facinora, quibus irrogatur. Quædam enim gladio, quædam ignis interdictione, quædam metalli pœna, quædam deportatione coercentur. Omnis igitur gravior coërcitio ad consulem non pertinebat, propterea quod erat meri imperii; Ait enim Venulejus l. 11. ff. de officio Procons. Si quid erit quod majorem animadversionem exigat: rejicere legatus apud Proconsulem debet: neque enim animadvertendi, coërcendi, vel atrociter verberandi jus habet. Cui convenit quod ait Ulpianus in l. 6. ff. eod. Nec enim potest quis gladii potestatem sibi datam, vel cujus alterius coërcitionis ad alium transferre. Ita ut gravis & atrox quæcunque coërcitio revera posset dici merum imperium, & ideo consuli non competere. Quæ autem huic opponitur levior & mitior est, atque consul ad publicam emendandam disciplinam ea sæpius uti necesse habet, ut in publica vincula reum tergiversantem duci jubere, pignora capere, multam irrogare, verbera adhibere.

De hac loquitur Paul. 5. *Sententia tit. 16. ad L. Jul. de vi publica & privata.* Hac lege (inquit) excipiuntur, qui artem ludicram faciunt: Judicati etiam & confessi, qui ideo in carcerem duci jubentur, quod jusdicenti non obtemperaverunt, qui contra disciplinam publicam fecerint. Et l. 11. ff. de offic. Procons. ubi dicitur legatum jus atrociter verberandi non habere, ergò leviter verberandi non fuit consuli denegatum. Unde Cic. in 3. de ll. Magistratus (inquit) nec obedientem & noxium civem, multa, vinculis, verberibusque coërceto. Sic in l. 1. §. 3. ff. de ventre inspic: ubi vocat Ulpianus remedia prætoria cogi in jus venire, & si venit respondere, pignoraque ejus capienda, & distrahenda, si contemnat: vel multis coërcenda. Quæ poenæ sunt modicæ coërcitionis id est mixti imperii, ideoque magistratui jurisdictionem habenti competunt; quia ut initio diximus, Jurisdictio sine mixto imperio & consequenter modica coërcitione nulla est. Mandata Jurisdictione privato, etiam imperium, quod non est merum, videtur mandari, quia Jurisdictio sine modica coërcitione nulla est, inquit Paulus in l. ult. §. 1. ff. de offic. ejus cui mand. Sed observandum si consuli Senatus permitteret, ut caveret, ne quid Respub. detrimenti caperet, tunc summum ipsi & merum dabatur imperium, ita ut de nece civium decernendi, illosque omnibus modis coërcendi haberet potestatem; verum id citra legem sive S. C. id est suo jure vel jure Magistratus non habuit, ideoque nec mandare id alii potuit, quare mandata Jurisdictione id ipsum cum Jurisdictione non transferebatur.



§. 17. *Post deinde cum census jam majori tempore agendus esset, & consules non sufficerent, huic quoque officio censores constituti sunt.*

**C**ensus] Census à censendo dictus, censere est putare, existimare, judicare, notare, æstimare. Hinc census definiri potest, quod est æstimatio rerum & bonorum facta, secundum quam tributa pendebantur, unde censum agere est recensere hominum facultates. Hinc Cic. in Verr. 4. *In censu habendo potestas omnis æstimationis habenda, summaque faciunda censori permittitur.* Ita autem agebatur census, ut quisque civis nomen, genus, ætatem de se, uxore, liberisque & servis dare tenebatur? Deinde pecunias & prædia sua profitebantur, quæ ita in censum juxta formam censualem referebantur, ut posset constare nomen fundi cujusque, & in qua civitate, & quo pago sit, & quos duos vicinos proximos habeat: & id arvum quod in decem annos proximos satum erit, quot jugerum sit: vinea quot vites habeat: oliva quot jugerum, & quot arbores habeat. Pratum quod intra decem annos proximos sectum erit, quot jugerum; Pascua quot jugerum esse videantur: item Sylva cædua: omnia ipse qui desert, æstimet l. 4. ff. de cens. addito juramento legitimo, se vere illa & bona fide æstimasse. Dionys. Halicar. l. 4. cap. 165. Ita ut ei, qui censum neglexisset, pœna esset proposita, ut bonis in fiscum redactis, virgis cæsus, sub hasta veniret. Dionys. eod. Suet. in Caligula cap. 38. Quamobrem Zonaras tradit, qui se, aut bona, cum census agebatur, professi non erant, eorum facultates à censoribus, ipsi à consulibus vendebantur.

Annotavit Illustris Salmasius de *modo usurarum*. Censum tantum in urbe Romana agi, in provinciis autem professionibus magis uti solitum fuisse: quanquam revera non differant nisi nomine tenus. Hinc Cic. absolutè *profiteri, edere censum* & profiteri quantum quis habet in bonis in Orat: pro *Archeiâ* dixit. Sic in l. 4. ff. de cens. Is vero, qui agrum in alia civitate habet, in ea civitate profiteri debet, in qua ager est. Sic quoque §. 4. Aliquando etiam census non ipsum negotium, verum tabulas sive libros & formam censualem in quibus civium professiones describebantur, denotat l. 4. ff. de censibus. Est autem inquit Theophilus census tabula seu charta, in qua Romani scribebant suas facultates, ut belli tempore pro modo patrimonii sui unusquisque conferret. Sic etiam nonnunquam census universum cuiusque patrimonium, omnes facultates & fortunas significat. Hinc apud Horat. l. 2. Od. 15.

*Privatus illis census erat brevis,  
Commune magnum.*

Id est propriæ facultates & copię erant exiguæ. In eadem significatione occurrit apud Plin. in *proxim.* l. 14. *Posteris* (ait) *laxitas mundi & rerum amplitudo damno fuit, postquam Senator censu legi ceptus, iudex fieri censu, Magistratum ducemque nil magis exornare, quam census.* Sic apud Suet. in *Tiberio* cap. 49. *Sat constat, Cn. Lentulum augurem cui census maximus fuerit, metu & angore ad fastidium vitæ ab eo actum, & ut ne quo nisi ipso herede moreretur.* Id est cui maximum fuit patrimonium, utpote qui ut Seneca testatur l. 2. cap. 27. de *benef.* quater millies fectertium suum vidit, id est, ut vult Lipsius, centies centena millia, sive decem milliones Philippicorum nostra æstimatione. Ita census Senatorius, census equester, erat Senatoris vel equestre patrimonium, quod quisque habere debuit, qui in ordinem Senatorium vel equestrem legi vellet.

Censum



Censum autem, ut constat ex Dionysio, Livio, instituit Servius Tullius. *Censum inquit l. 1. cap. 42. instituit rem saluberrimam tanto futuro imperio: ex quo belli pacisque munia non viritum, ut ante, sed pro habitu pecuniarum fierent.* Sic quoque Flor. l. 1. cap. 6. Ab hoc (inquit) de Servio sermonem habens, *populus Romanus relatus in censum, digestus in classes, curiis atque collegiis distributus: summaque regie solertia ita est ordinata respub. ut omnia patrimonii, dignitatis, atatis, artium, officiorumque discrimina in tabulas referrentur; ac si maxima civitas minima domus diligentia contineretur.* Hoc autem jus primo regum, deinde consulum, & dictatorum; postea proprio ad id Magistratu creato, censorum fuit. Valer. Max. l. 3. cap. 4. Regi Tullio quater condere lustrum contigisse, id est quater egisse censum. Quintum P. Valerius & T. Lucretius cons. anno post reges exactos secundo; sextum decennio post T. Largius egit, Vid. Dionys. l. 5.

Et consules non sufficerent, huic quoque officio censores constituti sunt ] Unde Zonaras. *Censores vero anno sequente designati sunt L. Papyrius, & L. Sempronius; Eorum creandi causa fuit, quod cons. ob multitudinem omnia negotia exequi non poterant.* Vide Fenestell. de Magist. Rom. cap. 17. Pompon. Latum de Magist. Rom. M. Geganio Macerino iterum, T. Quintio Capitolino quintum cons. Ortum autem, inquit, Liv. l. 4. cap. 8. *initium rei est, quod in populo per multos annos incenso, neque differri census poterat, neque consules, cum tot populorum bella imminerent, opera erat id negotium agere. Mentio illata ab Senatu est rem operosam, ac minime consularem suo proprio Magistratu egere: cui scribarum ministerium, custodiaque & tabularum cura, cui arbitrium formula censendi subjiceretur. Censui igitur agendo populi suffragiis præfecti sunt L. Papyrius, & L. Sempronius Anno V. C. 310. Censores abs re appellati sunt Liv. dict. loc. vel ut tradit Festus, quod rem suam quisque tanti aestimare solitus sit, quanti illi censuerint.*

Unde Varro l. 4. *Censor* (inquit) *est ad cujus censitionem id est arbitrium censeretur populus.* Javolenus in l. III. ff. de V. S. à censendo censores dictos putat, quod his jus fuerit & constituendi & precipiendi. *Censere est constituere & precipere: unde etiam dicere solemus, censeo hoc facias, & semet aliquid censuisse.* Inde censoris nomen videtur esse tractum.

Initio censorum potestas non adeò magni momenti erat, ideoque primores civitatis sæpissime eam spreverunt. Utpote quæ consistebat tantum in populo censendo lustroque faciendo. Verùm interjecto tempore tanto incremento eorum potestas aucta est, ut maximarum minimarumque penes eos resideret arbitrium. Ideoque merito inter majores Magistratus numerabatur. Unde Livius. l. 4. cap. 8. *Idem hic annus censuræ initium fuit, rei a parva origine ortæ. Quæ deinde tanto incremento aucta est, ut morum disciplinaque Romana penes eos regimen, Senatus equitumque centuriæ decoris dedecorisque discrimen sub ditione ejus Magistratus, publicorum jus, privatorumque locorum, & vectigalia populi Romani sub nutu atque arbitrio essent.* Plutarchus in vita T. Q. Flaminii, summum magistratum & reipub. gerendæ quasi culmen vocat. Et de Catone (inquit) *decem annis post consulatum petivit Cato censuram.* Fastigium quoddam est hic Magistratus honorum omnium, & quodammodo omnium in repub. actionum consummatio; Præfulgetque cum ingenti alia auctoritate, tum morum & vitæ judicio. Neque enim vel matrimonium vel sobolis procreationem, vel quotidianum victum, vel convivium solum & liberum indagine, quæ cujusque libido & institutum sit arbitrabantur præmittendum. Quod autem longe ex his acutius, quam ex publicis & civilibus actionibus mores hominum perspicere putarent, custodem & moderatorem, correctoremque, nequis ad voluptates deflecteret, aut excederet patria & vetera instituta, designabant unum ex nobilitate, alterum ex plebe. Potestas erat iis equum adimendi, Senatu movendi eum qui vitam agebat turpem vel libidinosam. Quare Catonis petitionem fere



nobilissimi quique & principes Senatus premebant. Hinc quoque Asconius Pædianus in divinationem Ciceronis. *Regendis moribus* ( inquit ) *civitatis censores quinto quoque anno creari solebant.* Hi prorsus cives sic notabant, ut qui senator esset, ejiceretur senatu, qui eques Romanus equum perderet. Qui plebejus in *Ceritum* tabulas referretur, & *ararius* fieret, & per hoc non esset in albo centuriæ suæ, sed ab hoc esset civis, tantum, ne pro capite suo tributi nomine arareret. Idem impleto quinquennio urbem lustrabant, & Soli taurilia sacrificia, de sue, ove, tauro faciebant. Eorum notam plerumque successores solvebant. Legimus enim apud Livium l. 39. c. 42. Censores Marcum Porcium & Lucium Valerium metu mixta expectatione Senatum legisse. Septem movisse Senatu, ex quibus unum insignem & nobilitate, & honoribus. L. Quintium Flaminium consularem virum. Patrum memoria ( inquit ) institutum fertur, ut Censores motis è senatu adscriberent notas. Catonis & alia quidem acerba orationes extant in eos, quos aut senatorio loco movit, aut quibus equos ademit. Longe gravissima in L. Quintium Oratio est, qua si, accusator ante notam, non censor post notam usus esset, retinere Quintium in Senatu ne frater quidem T. Quintius, si tum censor esset, potuisset.

Notandum hic in transitu, eos, qui a censoribus notati fuere, perpetuo non fuisse infames, ut constare potest ex Valer. Max. l. 2. cap. 9. ubi tradit C. Getam, a L. Metello & Qu. Domitio censoribus Senatu motum, postea censorum factum fuisse. Item M. Valerium Messallam censoria nota perstrictum censoria postmodum potestate imperasse. Quemadmodum nec Mamercus Æmilio obfuit nota censoria, quin postea Dictator crearetur. *Ceritum* verò tabulæ cujus meminit Asconius loc. cit. appellatæ, in quas censores referri jubebant, quos notæ causa suffragiis privabant. Unde Cerites apud Gell. l. 16. c. 13. dicuntur municipes qui suffragii jure carebant, concessumque illis, ut

Romanæ civitatis honores quidem caperent, sed negotiis tamen atque oneribus vacarent pro sacris Bello Gallico receptis custoditisque. Hinc apud Erasmum Chiliad. prima. *Certe cara digni*: id est, Ingenti ignominia. Cujus tradunt originem fuisse. Quod Romani Ceritibus bello subactis eam dixere conditionem ne suffragii jus haberent, ne leges ullas ederent aut haberent, eamque ignominiam in adagium abjisse. Hinc apud Horat. *Epist. lib. 1. Epist. 5.*

*Quid deceat, quid non obliti: Cerite cera digni.*

Cære sive Cærete nobilissimum olim Etruriæ oppidum fuit: cujus incolæ Cærites, aut à Cærete Cæretani. Servius in *Æneid.* ad hunc versum

*Est ingens gelidum lucus prope Caritis amnem.*

de urbis hujus appellatione ita differit. Est Agylla Tusciæ civitas a conditore Agella appellata, cui ex inscitia Romana inditum est aliud nomen. Nam quum Romani euntes per Thusciam interrogarent Agyllinos, quæ diceretur civitas, illi utpote Græci quid audirent ignorantes, & optimum ducentes, si prius eos salutarent, dixerunt *χαῖρε*, quam salutationem Romani nomen civitatis esse arbitrati sunt, & detracta aspiratione, eam Cære nominaverunt, ut refert Hyginus de urbibus Italicis. Ex hac civitate prodiiſſe innumeros circulares, præſtigiatores, quos Græci vacant *ἀγίετας*, *περοδοδῆτας*, Itali Chæretanos, Galli corrupto vocabulo, *Charlatans*, *bateleurs*, annotavit Chabotius ad *Horat. cit. loc.* Vid. *Liv. lib. 7. cap. 20.* Pertinebant & multa alia ad censorum munus, ut de juramento cognoscere, in perjuros animadvertere, epularum sumptus cohibere, principem senatus constituere, addere tribus, tueri urbes, templa, vias, pontes, aquarum ductus, & alia quædam ædificia publica: vectigalium quoque portoriique curam habuere, leges etiam condendi & abrogandi, certisque de causis cognoscendi, ut de ma-

trimo.



rimonialibus apud eos fuit arbitrium : Quæ omnia censoriæ potestatis jura paucis verbis complectitur Cic. 3. de ll. ubi omnes partes ita enumerat. *Censores populi avitates, soboles, familias pecuniasque censento : urbis templa, vias, & aquas, ararium, vectigalia tuento : populique partes in tribus distribuunt : exin pecunias, avitates, ordines partiunt : Equitum, peditumve prolem describunt : calibesse prohibent : mores populi regunt : probrum in Senatu ne relinquunt : bini sunt : Magistratum quinquennio habent : reliqui Magistratus annui sunt, eaque potestas semper esto.* Quod de juramento cognovêre testis est Cic. 3. off. Conviviorum cohibuisse sumptus testatur Valerius l. 2. cap. 9. ubi tradit M. Antonium. & L. Flacculum Censores Duronium senatu movisse, quod legem de coërcendis conviviorum sumptibus latam tribunus plebis abrogaverat. Sic quoque Cornelium Rufinum, duobus consulatibus & dictatura speciosissime functum, Senatu amoverunt censores, quod decem pondo vasa argentea comparasset & convivio apposuisset. Et apud Plin. lib. 14. cap. 14. P. Licinius Crassus, & L. Julius Cæsar censores anno urbis conditæ. 675. edixerunt, ne quis vinum Græcum Ammineumque octonis æris singula quadrantaliam venderet ; Tanta vero vino Græco gratia erat, ut singula potiones in convictu darentur. Quod etiam principem Senatus constituerunt videre est apud Gell. l. 4. c. 10. ubi de ordine in sententiis rogandis sermonem habens inquit, primum rogatum fuisse in Senatu, qui à censoribus princeps in Senatum lectus erat. Plutarch. in vita Scipionis Africani ait, Censores legisse Scipionem Africanum, Senatus Principem : quod genus honoris iis tum viris consuevit deferri, qui gloriam & authoritatem maximis in remp. meritis, præstantissimisque rebus gerendis essent consecuti. Idem iterum est continuatus, tertiumque lectus princeps à T. Q. Flaminio & M. Cl. Marcello censoribus, Liv. l. 40. cap. 51. Ædes quoque sacras, vias, aquæ ductus, & loca publica facienda locare, aut aquarum fluxus dare & in-

hibere poterant. Eodem anno ades Salutis à C. Junio Bulco censore locata est. Liv. l. 9. c. 43. Et l. 41. c. 27. Censores vias sternendas filice in urbe, glarea extra urbem substernendas, marginandasque primi omnium locaverunt, &c. ubi & de aquæductu, & cura locorum publicorum, tum & vectigalium portoriique & l. 4. c. 8. ubi tradit publicorum jus, privatorum locorum, & vectigalia populi Romani sub censorum nutu & arbitrio esse. Et l. 40. c. 51. Portoria (inquit) loquitur de M. Æmilio Lepido & Fulvio, quoque & vectigalia iidem multa instituerunt. Complura sacella publica, quæ occupata à privatis; publicaue sacra ut essent paterentque populo, curarunt. In lege censoria portus Sicilia ita scriptum erat: Servos quos domo quis ducet suo usu pro his portorium ne dato. l. 203. ff. de V. S. De populi in tribus distributione in priori parte egimus, populumque Romanum in tres tribus divisum annotavimus, in Tatienses à Tatio Sabinorum rege, Ramnenses a Romulo: & Luceres, à quo hi denominati, an à Lucumone vel ab alio non certò constat. Verùm aucto populo Romano alias facere partes oportuit, itaque descriptus est in quatuor urbanas & 31 rusticas tribus. Cœlibes esse prohibento. Camillus & Posthumius censores inquit Valerius l. 2. c. 9. æra pæne nomine eos qui ad senectutem cœlibes pervernerant, in ærarium deferre jusserunt. Cum in hunc modum increparentur: Natura vobis quemadmodum nascendi, ita gignendi legem scribit; parentesque vos alendo nepotum nutriendorum debito (si quis est pudor) alligaverunt. Accedit his, quod etiam fortuna longam præstandi hujusce muneris vacationem estis affecuti: cum interim consumpti sint anni vestri, & mariti & patris nomine vacui. Ite igitur & nodosam exsolvite stipem, utilem posteritati numerosa. Hinc Metellus Numidicus in oratione, quam in censura dixit ad populum, cum eum ad matrimonia capeffenda adhortaretur. Si sine uxore possemus Quirites esse, omnes ea molestia careremus. Sed quoniam natura ita tradidit, ut nec  
cum



cum illis satis commode, nec sine illis ullo modo vivi possit, salutis perpetuæ potius, quam brevi voluptati consulendum. Gell. l. 1. c. 6. Morum coercionem penes eos fuisse jam supra docuimus ex Livio l. 4. c. 8. Et constat id ipsum, ut & cætera censoriæ dignitatis munera ex Trebell. Pollion. in *Valerianis*; Ubi Decius recitans Senatusconsultum, quo censor dicebatur. *Felicem te* (inquit) *Valeriane*, *Senatus sententia*, imo animis atque pectoribus: totius orbis suscipe censuram, quam tibi detulit Romana Resp. quam solus mereris, judicaturus de moribus nostris. Tu æstimabis qui in Curia manere debeant, tu Equestrem ordinem in antiquum statum rediges, tu censibus modum pones, tu vectigalia firmabis, divides statum, Respublicas recensebis: tibi legum scribendarum auctoritas dabitur, tibi de ordinibus militum judicandum est: tu arma respicies: tu de nostro Palatio, tu de iudiciis, tu de Præfectis eminentissimis judicabis. Excepto denique de Præfecto urbis Romæ, exceptis coss. ordinariis, & sacrorum rege & maxima Virginum vestalium, (sitamen incorrupta permanebit,) de omnibus sententias feres. Hæc de potestate Censoria delibasse sufficiant. In creandis vero censoribus observatum, ut ad hoc munus obeundum nisi duo viri eligerentur, unde apud Ciceronem in 3. de leg: *Bini sunt* virtute & morum integritate insignes; num vero consulares, id non certò constat, neque pro vero affirmari potest. Quanquam ex Livio id ipsum probari posse videatur. l. 27. c. 11. ubi inquit, *Creati Censores ambo*, qui nondum consules fuerant, M. Cornelius Cethegus, P. Sempronius Tuditanus. Ex quibus verbis colligi posse putant, præter consuetudinem eos Censores ante gestum consulatum creatos. Verum comperiemus in evolvendis veteribus monumentis, non adeo sollicitè id fuisse observatum, an consulatum, præturam, vel dictaturam gessisset, qui ad censoriam dignitatem provehebatur, modo ex Patribus esset, in quem illud munus conferebatur. Quippe legimus apud Liv. *cod. lib. cap. 6.* Crassum Licinium, nec consulatu nec prætura fun-

functum, ex ædilitate gradum ad censuram fecisse. Quod autem ex patribus creati, itaque patritiis Magistratibus annumerata hæc quoque fuerit censoria dignitas constat ex Liv. l. 4. c. 8. & cap. 23. Imo & aliquando nefas fuisse Censores præterquam ex patribus creari, Fenestella de Magistr. Rom. cap. 17. Verùm (ut idem inquit) id quoque, ut cætera, immutatum est, atque indifferenter fieri ceptum. Et postea cum plebe quoque hunc honorem communicarunt Patres. Atque censor de plebe primus Martius Rutilius creatus fuit, qui quoque primus de plebe dictator dictus fuerat. Liv. l. 7. c. 22. l. 10. cap. ult. Illud quoque notandum quod ex duobus censoribus, altero mortuo, in defuncti locum alium subrogari non licebat. Quod C. Julio censore mortuo, in ejus locum M. Cornelius suffectus, ea res postea religioni fuit: quia eo lustro Roma à Gallis capta, ne deinde unquam in demortui locum censor sufficeretur cautum. Liv. l. 7. c. 31. & l. 6. c. 27. Creati censes, C. Sulpicius Camerinus, Sp. Posthumius Regillensis. Captaque jam res morte Posthumi, quia collegam suffici censori religio erat, interpellata est. Igitur cum Sulpicius abdicasset se Magistratu, censes alii vitio creati non gesserunt Magistratum. Sic etiam l. 9. c. 34. in oratione Sempronii (ubi inquit) An collegam subrogabis? quem ne in demortui quidem locum subrogari fas est. Urbs eo lustro capta est, quo demortuo collega C. Julio censore L. Papirius Cursor, ne abiret Magistratu, M. Corneliū Maluginensem collegam subrogavit, & quanto molestior illius cupiditas fuit, quam tua Appi? nec solus, nec ultra finitum lege tempus L. Papirius censuram gessit, tamen neminem invenit, qui se postea auctorem sequeretur, omnes deinceps censes post mortem collega se Magistratu abdicarunt. Itaque censore defuncto non solum alium in locum mortui subrogare religio fuit, verum etiam collegam Magistratu abire oportebat. Quamquam Appius contra mores & instituta solus censuram gerere collega se Magistratu abdicante, non dubitavit. Ut  
videre



videre est apud Livium *loc. cit.* Ceterum creabantur quinto quoque anno *Magistratum quinquennium habento.* Cum ceteri Magistratus annui essent, sola censura quinquennio durabat, nimirum quia lustris duntaxat singulis cenferi populum vetus institutum fuit: quare illud spacium lustrum dicebatur, Auctore Festo à *luendo* hoc est solvendo, quod quinto quoque anno vectigalia & ultro tributa per censores persolvebantur. Varro *l. 5. de ling. lat.* Plinius Junior. Nam priore lustro, quanquam post magnos remissiones reliqua creverunt.

Lustrum à Latinis vocatur quod Olympias apud Græcos dicitur, id est quinquennium, quum quadriennio exacto, quintus annus jam procurrit. Quare sæpe Lustrum pro absoluto quadriennio ponitur.

*Sæpe coronatis iteres quinquennia lustris.*

Papin. Stat. Sylv. lib. 4. cap. 2.

Unde quoque Cujacius, in *commentaris ad lib. XI. Cod. de lustralis auri collatione.* *Lustrale aurum χρυσόρυγρον* dicebatur. Cujus oneris Zosimus magnum Constantinum auctorem facit. Id Evagrius & Zonaras describunt eleganter. Et quarto quoque anno pendi solitum narrant, id est, singulo lustro. Postea tamen ne morâ potestas censoria, quæ multum accreverat, nimis gravis esset, tempus illud quinquennale imminutum est lege Æmilia, à Mamercio Æmilio dictatore lata, & ex quinquennali annua & semestris facta. Liv. *l. 9. c. 33.* Appius Claudius censor circumactis decem & octo mensibus, quod Æmilia lege finitum censura spatium temporis erat, cum C. Plautius collega ejus Magistratu se abdicasset, nulla vi compelli ut abdicaret, potuit. Vide quoque Valer. Max. *l. 4. cap. 1.* Qui mos postea obtinuit, & creati quidem singulis quinquenniis, at non in quinque annos. Insignia eadem habebant atque consules præter lictores. Mansit integra hæc censuræ potestatis vis ad P. Clodii Tribunatum, utpote qui plebiscito sanxit, ne quem censores notarent, nisi antea

tea legitime accusatus, & utriusque censoris iudicio damnatus foret, in tantum, ut Metello censori, quod minus iuste pœnam irrogasset, aqua & igne interdictum fuerit. Alexand. ab Alex: *Dier. genial. l. 3. c. 13.* neve in legendo Senatu quemquam præterirent. Verum eam Clodii legem sustulit Metellus Scipio: eamque potestatem iterum integram ut olim in repub. viguisset, reddidit reipub. Quæ sub principibus iterum fuit imminuta, imo cum in eo Magistratu magna vis & maxima dignitas esset, eandem, *cuncta legum & Magistratum munia in se trahentes*, ut inquit Tacitus, ad se traduxerunt Principes & Cæsares. Nomen vero declinarunt, cum non *Censores*, sed *morum Præfectos* se appellarent. Quanquam non omnes ab hoc nomine abstinuisse historiæ testantur. Julius Cæsar oblatam sibi censuram non sprexit, verum sub nomine *Præfecti morum* accepit. Suet. in Jul. Cæsare *cap. 76.* *Non enim honores modo nimios recepit, ut continuum consulatum, perpetuam dictaturam, præfecturamque morum &c.* Rem habuit, titulum specie modestiæ recusavit. A vero aberrat Dio quod scribit, eum censoris appellatione abstinuisse, quod id parum honorificum existimaretur. Quippe superius demonstravimus ex Plutarcho, censuram fuisse summam dignitatem, & honorum culmen. Vespasianum & Titum *Censoris* nomen cum reliquis titulis usurpasse, docet nos vir summa doctrina & eruditione sæculi nostri florentissimus EZECHIEL SPHANHEMIUS, in *Elegantissimis suis dissertationibus de præstantia & usu numismatum antiquorum, dissert. 8.* Ita ut in nummis Clandium Vitellium curuli insidentem & ante eum transvectionem equitis, cum inscr. *CENSOR.* videamus. Non opus ut omnia hic describamus quæ vir summus ibi disputat, quoniam majori cum fructu hæc peti possint ex ipso fonte.



*§. 18. Populo deinde aucto , cum crebra orirentur bella , & quadam acriora à finitimis inferrentur , interdum re exigente , placuit majoris potestatis magistratum constitui , itaque dictatores proditi sunt ; à quibus nec provocandi jus fuit : & quibus etiam capitis animadversio data est. Hunc magistratum , quoniam summam potestatem habebat , non erat fas ultra sextum mensem retinere.*

**P**opulo deinde aucto ] exiguam admodum manum secum adduxerat Romulus , qui Romanam condidère gentem , 3000 scil. peditum , equitum 300 , qui numerus eo crevit , ut decedens reliquerit peditum 46000 , equitum non multo pauciores mille. Anno 256 primus dictator T. Laertius censum egit. Censa sunt puberum capita 150700. quod ingens hæc populi multitudo indies magis magisque augebatur potissima quoque causa fuit , novi hujus Magistratus creatio , cujus auxilio & ope seditiosa plebs intra obsequii limites coerceretur , & domestica illa vis à repub. averteretur.

Notandum verum Pomponium in recensendis magistratibus , qui variis temporibus creati fuere , non observasse illam seriem quam apud autores fide dignos invenimus:

Quippe

Quippe constat Dictatores, Tribunos plebis, Ædiles aliosque qui sequuntur Magistratus, ante censores creatos fuisse, quoniam anno urbis conditæ 311 primum creari ceperunt Censores. Verum facile hic error condonandus Jurisconsulto, qui non videtur adeo sollicitus fuisse de tempore, quo quisque Magistratus creatus fuit, modo de ipsis constare posset Magistratibus.

*Cum crebra orirentur bella.* ] Ex æmulatione & invidia finitimorum populorum, quos neque flumina, neque montes etiam quibus separabantur à Romanis continere, aut tutari in finibus suis poterant, si non mutuo potissimum metu separarentur, quod omnium fortissimum pacis est vinculum, semper fuit & erit, Anton: Fabr. in suis *Ration. ad. h. l.* Crebra vero bella, quibus jactabatur sæpissimè Respub. occasionem quoque dedisse affirmat Pomponius creando dictatori, ad quem tanquam ad unicum refugium & tutissimum præsidium Respub. in summa necessitate & rerum discrimine confugeret. Hinc quoties externi belli vis Reipub. immimeret, cui avertendæ majori severitate & potentia quam consulari opus esset, dictator creabatur, cui summa rerum permessa, videret ne quid Respub. detrimenti caperet. Scribit Liv. l. 2. c. 18. T. Laertium dictatorem primum fuisse creatum ob belli Latini metum, quod triginta jam conjurasse populos concitante Octavio Mamilio satis constabat.

*Dictatores proditi sunt.* ] Appellatus est autem Dictator & Dictatura à dicendo, quia dicendo creabatur, ut Varro tradit lib. 4. Dicebatur enim à consule, & quidem noctis silentio. Liv. lib. 9. cap. 38. Vel quod dicto audientes ipsi omnes essent. Creato dictatore primum Roma, posteaquam præferri secures ceperunt, magnus plebem metus incessit, ut intentiores essent ad dicto parendum, neque enim ut in consulibus, qui pari potestate essent, alterius auxilium, neque provocatio erat: neque ullum usquam, nisi in cura parendi auxilium. Liv. l. 2. c. 18. Vel, ut vult



Dionys. l. 5. c. 248. à potestate imperandi & edicendi quidlibet, tum aliis æqua & iusta, quæ pro suo arbitrio usui iudicabat præscribendi. *dictum* enim apud, veteres Latinos summum imperium ac supremam potestatem significat Virgil: 6. *Æneid*.

*Hic ego namque tuas sortes arcanaque fata  
Dicta mea genti ponam.*

Hanc administrationis publicæ speciem a Græcis mutuasse, idem scribit Dionysius loco cit. Nam (inquit) qui αἰσιμνήται apud præcos Græcos vocabantur tyranni quidam erant electi. Eligebantur autem a civitatibus pro ratione temporum; non infinitum nec continuum, sed certum præfuturi temporis spatium, quando & quantisper postularet reip. utilitas. Spartianus in Adriano, docet ordinarium fuisse Lartii veteris magistratum. Per Latina oppida (inquit) dictator & edilis, & duumvir fuit. cap. 19. Dictus idem apud veteres Magister Populi Cic. 3. de fin. Rectius (inquit) appellabitur magister populi (is enim est dictator) quum Sylla, qui trium pestiferorum vitiorum luxuria, avaritia, crudelitatis magister fuit. Unde quoque lib. 2. cap. 18. refert, Dictatorem, moderatorem, magistrum consuli-bus appositum. Et Seneca Epist. 108. prope finem scribit eum, quem nos dictatorem dicimus, & in historiis ita nominari legimus, apud antiquos magistrum populi vocatum. Hodieque id extat in auguralibus libris: & testimonium est, quod qui ab illo nominatur magister equitum est. Prator etiam Maximus appellatur à Festo, quasi summus magistratus, cui maximum sive supremum competit imperium. Item populi magister dictus, quia summa ei in populum potestas. Ex quo factum, ut qui potestatem aliquam de publico haberet, utpote quæ a suprema Dictatura potestate ortum duceret, Magistratus, velut a candido candidatus, vocaretur. Fenestella de Magist. Rom. cap. 8. Huic Magistratui non absimilem fuisse apud Belgas Ruarterem, apud

Leodienſes Mamburum ſcribit *Strada de bello Belgico lib. 9.* Cauſa prima creandi, ut dicere incepimus, fuit ſeditio, & metus ab hoſte. Quo autem anno fuere creati, nec quis primus dictator creatus ſit, non ſatis conſtare inquit Liv. *lib. 2. cap. 18.* Cauſſam dicit fuiſſe belli imminentis Latini metum: Eutropius affirmat *lib. 1. cap. 12.* nono anno poſt reges exactos, cum gener Tarquinii, ad injuriam ſoceri vindicandam, ingentem collegiſſet exercitum, nova Roma dignitas eſt creata, quæ dictatura appellatur, major quam conſulatus. Dionyſ. anno undecimo creatum tradit, & Titum Lartium primum Dictatorem, Sp. Caſſium Magiſtrum equitum creatum. Quos & Liv: quoque nominat. Verum de annis non ſatis inter ſcriptores convenit. Altera cauſa hujus creandi Magiſtratus fuit ſeditio, cui primo egena plebs occaſionem præbuit, quæ ære alieno preſſa, ad bellum Latinum nomina dare recusabat. Interjecto vero tempore etiam pluribus de cauſis Dictatorem creare ceperunt: Ut clavi figendi gratia; vel comitorum, ludorum, Senatus legendi, Magiſtratus coercendi, quaſtionis exercendæ; denique quoties Reſpub. brevi & extraordinario hoc indigebat imperio. Quando civitas morbo laborabat, cum viſ peſtilentiæ, & inſanibilis perniciēs corpora afficeret, clavum figere, ejuſque figendi cauſa dictatorem dicere moris erat Liv. *lib. 7. cap. 3.* ubi inquit. Itaque Cn. Genutio, L. Æmilio Mamercō ſecundum conſulibus, cum piaculorum magisque conquiſitio animos quam corpora morbi afficerent, repetitum ex ſeniorum memoria dicitur, peſtilentiam quondam clavo ab dictatore fixo ſedatam. Ea religione adductus Senatus Dictatorem clavi figendi cauſa dici juſſit. Dictus L. Manlius Imperioſus, L. Pinarium Magiſtrum equitum dixit. Lex vetuſta eſt priſcis literis verbisque ſcripta, ut qui prætor maximus ſit; idibus Septembris clavum pangat, vid. *lib. 8. cap. 18.* figebatur clavus dextro lateri ædis Jovis optimi maximi ea ex parte, qua Minervæ templum eſt. Ferunt quoque eum clavum, quia rara per



per ea tempora litera erant , notam numeri annorum fuisse eoque Minerva templo dicatam legem. Qui numerus a Minerva inventus est. Volsiniis quoque clavos indices numeri annorum fixos in templo Nortia Etrusca dea comparere , diligens talium monumentorum auctor Cintius affirmat. Liv. lib. 7. Ait quoque Festus lib. 3. Clavus annalis appellatur, qui figebatur in parietibus sacrarum ædium per annos singulos , ut per eos numerus colligeretur annorum.

Comitiorum habendorum causa creatum quoque Dictatorem tradit idem Liv. lib. 7. cap. 24. ubi Dictatorem L. Furium Camillum creatum invenimus , ut esset qui ægris consulibus comitia haberet. Et cap. 25. Dictatorem Comitiorum causa T. Manlium Torquatum ex auctoritate Senatus dixit. Et lib. 8. cap. 23. Littera missa , ut dictatorem comitiorum causa diceret. Dixit M. Claudium Marcellum , ab eo Magister equitum dictus SP. Posthumius. Ludorum causa creatum Dictatorem idem tradit Liv. lib. 9. cap. ult. Fabium ( inquit ) etiam in Aniliamque processisse , atque inde magna prada egisse , nec discrepat , quin Dictator eo anno A. Cornelius fuerit , id ambigitur belline gerendi causa creatus sit , an ut esset qui ludis Romanis , quia L. Plautius Prætor gravi morbo implicitus erat , signum quadrigis mittendis daret. Et lib. 9. cap. 34. Quem semestri dictatura , quem interregno quinque diebus contentum fore putes ? quem clavi figendi , aut ludorum causa Dictatorem audacter crees. Senatus legendi causa M. Fabium Buteonem dictatorem creatum legimus apud Liv. lib. 23. cap. 22. qui postquam ingenti approbatione in demortuorum locum legerat in Senatum centum septuaginta septem extemplò se Magistratu abdicavit &c.

Coercendi Magistratus ] Dictator creatus fuit P. Sulpicius , ut pro jure majoris imperii Cn. Servilium Consullem , qui jussu Senatus trajecerat in Siciliam , inde in Africam transiturum in Italiam revocaret. Questionis exercendæ dictator dictus C. Mænius Liv. lib. 9. cap. 26. Capua , in-

quit quoque occulta principum conjurationes patefacta, de quibus cum ad Senatum relatum esset, haud quaquam neglecta res est. *Quæstiones decreta*: Dictatoremque quæstionibus exercendis dici placuit. C. Manius dictus. Is M. Follum magistrum equitum dixit.

*Feriarum constituendarum* quoque dictum fuisse dictatorem apud Liv. lib. 7. cap. 28. invenio.

Notandum dictatori ob enumeratas hasce causas creato non certum fuisse tempus præscriptum, quo finito dictatura se abdicare debebat, verum peracto negotio statim se Magistratu abdicabat. At si rei gerendæ causa, hoc est belli, sex mensium ejus erat imperium, ne in tanto imperio si diurnum esset, insolentior quis redderetur. Reipub. enim interest ut magna imperia diurna esse non sinas, & temporis imponatur modus, quibus juris non potest. Hinc initio reipub. Rom. consulare imperium annuum fecere, ne mora corrumperetur, & tyrannidem redoleret.

Cum vero, ut diximus, multis de causis dictator creari solitus fuerit, hæ tamen præcipuæ duæ semper habitæ sunt, pacis & foris & domi præstandæ. Quarum illa rei gerendæ dixerunt, hæc seditionis sedandæ Sig: in Scholiis ad Tit. Liv. lib. 7. Rem autem gerere est reipub. causa bellum gerere. Liv. lib. 34. Novumque Imperatorem rei gerendæ causa ex Italia venisse. Hicce de causis creatus dictator ultra sex menses munus exercere non poterat: Verum finito semestri spatio illud deponere necessitatis erat. Unde Jurisconsultus. Hunc Magistratum, quoniam summam potestatem habebat, non erat fas ultra sex menses retinere. Vid. leg. unic. ff. de offic. Præf. Prætor. Quamquam Sylla contra mores atque instituta majorum imperium in annos plures sibi prorogavit. Cujus exemplum secutus J. Cæsar perpetuæ dictaturæ munus sibi vindicavit. Appian. de bell. Civ. cap. 412. & cap. 494. tradit Cæsarem Pompejo juniore superato, ad urbem regressum, patrem patriæ appellatum, Dictatorem perpetuum, consulem in decennium creatum fuisse. Quod



Quod Zonaras affirmat Cum, inquit, *Cæsare vi-  
ctore, junior Pompeji filius fuga est elapsus. Post dies  
aliquot natu majoris caput Cæsari allatum: qui extremo hoc  
bello gesto Romam reversus, Dictator perpetuus est creatus. Quæ  
manifesta tyrannis fuit, præter Monarchiæ summam potesta-  
tem successore quoque carens.*

Creabatur vero dictator viva voce consulis, non a populo,  
ut dicere incepimus, idque noctis silentio in foro Romano,  
quippe extra agrum Romanum dictatorem dici posse  
negabant patres. Terminatur autem ager Romanus in  
Italia. Liv. lib. 7. quanquam illud in creatione C. Julii,  
quippe qui in castris creatus, non observatum Livius  
testatur. Sic etiam Camillus absens dictator dictus fuit. Liv.  
lib. 5. cap. 46. Liv. lib. 9. cap. 38. captatis auspiciis Cic.  
3. de ll. *Isque avi sinistra dicta populi magister esto.*

Auctoritas tamen patrum præcedebat, ita T. Manlius  
Torquatus comitiorum causa ex auctoritate Senatus dictus  
est. Liv. lib. 7. cap. 16. Ex Senatusconsulto L. Æmi-  
lium Mamercum eadem de causa dictatorem dixerunt. Liv.  
lib. 8. cap. 16. Nonnunquam in rebus asperis & trepidis  
a Populo creatum invenimus, qui non tamen dictator sed  
prodictator dicebatur, Dictatorem inquit Liv. lib. 22. cap. 8.  
*populus creare non poterat, quod nunquam ante eam diem fa-  
ctum erat, Prodictatorem populus creavit, Q. Fabium Maxi-  
mum, & Magistrum equitum M. Minutium Rufum.*

Interdum quoque dictatorem, quem populus jussit, ex  
Senatus tamen auctoritate, dictum legimus apud Liv. lib.  
22. cap. 5. scribit Cæsar lib. 2. de Bel: Civ. se a M. Lepido  
prætoris dictatorem creatum. Initio vero ad hoc ho-  
noris fastigium non nisi patricii & viri consulares spectatæ  
virtutis evehebantur. Unde Liv. lib. 2. cap. 18. *Consu-  
lares legere, ita lex jubebat, de dictatore creando lata.* Et  
Fenestella cap. 8. *Prius non nisi e patribus, velut pleraque  
alia, dictatorem legi fas fuit.* Verum, inquit, ut cætera  
quoque id ipsum imminutum est. Bello enim, quod populus

Romanus cum Faliscis gessit, Tarquiniensibusque, primus de plebe creatus est dictator C. Marius Rutilus, qui & ipse Magistrum Equitum etiam de plebe hominem L. Plautium dixit. Quod & affirmat Liv. lib. 7. cap. 17. Concitatur deinde omne nomen Etruscum & Tarquiniensibus Faliscisque ducibus ad Salinas perveniunt, adversus eum terrorem dictator C. Marius Rutilus primus de plebe dictus, Magistrum Equitum item de plebe C. Plautium dixit.

Nec provocandi jus fuit, & cui etiam capitalis animadversio data est. ] Dictatore creato pro illo tempore respub. ab unius pendebat nutu & arbitrio, unius tantum adorabatur purpura, unus fulminabat Jupiter, cui belli & pacis cæterarumque rerum, quæ ad Reipub. administrationem pertinebant, competebat regimen, cæteris cum Magistratibus, tum civibus obsequii relicta gloria. Ejus itaque summum fuit imperium regiaque potestas, quare ab eo provocari non licuit; quippe cum nullum habebat superiorem, supremus erat Judex, penes quem universa residebat Jurisdictio, vitæ necisque arbitrium. Quod satis ostendunt lictores, fasces, secures, cæteraque regum insignia, quæ vim & potestatem imperii illius significabant. Legimus enim apud Liv. lib. 8. cap. 22. L. Papyrium Cursorem Dictatorem, Fabium Rutilium Magistrum equitum, quod adversus edictum ejus, quamvis prospere pugnaverat, jussisse spoliari Magistrum equitum, ac virgas & secures expediri: nec contentioni aut precibus militum concessit animadversionem, verum eum profugientem Romam persecutus est: nec ibi quidem remisso prius supplicii metu quam ad genua ejus, & Fabius Pater & ipse adolescens procumbebant, & iram dictatoris deprecabantur. Præcedebant Dictatori Lictores 24. si Dioni adhibenda fides, hinc totidem fasces, totidemque secures illi quoque attribuendi. Quod affirmat Plutarch. in Fabio Maximo. At Fabius ipse, ait, ilico imperii sui populo vim speciemque ostenderet, quo magis obsequentibus uteretur, & dicto



dicto audientibus civibus, processit cum 24. fascibus. Et apud Juvenal: Sat. 8.

— Posthac virga deducere multa.

Fumosos equitum cum dictatore Magistros.

id ipsum testatur Dionys. lib. 10. cap. 479. ubi inquit. *Præfectus urbis Fabius misit qui ad imperium Quintium adducerent.* Is fortè tum quoque tractabat opus quoddam rusticum: & conspecta accedentium turba, suspicatus eam ad se venire, sumpta veste paulo decentiore, processit eis obviam; cumque appropinquaſſet, oblati sunt ei equi decoris ornati phaleris, assistere jussis 24 lictoribus cum virgis & securibus: oblata item vestes purpureæ, & reliqua insignia, quibus olim regum imperium exornabatur. Ibi videns se creatum dictatorem, adeo non delectatus est hoc honore, ut etiam indignabundus dixerit; *Peribit ergo & anni hujus fructus propter meas occupationes, & malè esuriemus omnes.* Unde quoque Appian. Alex. de Bel. Civ. ubi de Syllæ dictaturâ. Ipse vero jam plane regnans dictator consulibus præerat: nam & secures ei ut dictatori præferebantur viginti quatuor. Polybius lib. 3. Hist. Rom. Inter dictatorem & consulem hanc differentiam annotavit, quod Consulum utrumque duodenæ secures sequantur; hunc viginti quatuor. Summum itaque sive merum habuit imperium, id est jus gladii potestatemque animadvertendi in homines facinorosos, jus vitæ scil. & necis, quod capitalem animadversionem vocat Pomponius. Seneca de Nerone loquens, inquit, *nulli unquam citius gladium commissum fuisse*, id est, jus vitæ & necis. Sic securis jus imperii non solum summi illius & universi, ut cum dicimus provinciam aliquam fascibus & securibus subjectam, sed etiam meri imperii, quod in facinorum coercitione consistit, significat. Et quamvis lex Porcia pro tergo civium videretur lata, quæ gravem pœnam, si quis verberasset, necassetve civem Romanum, sanxit; Dictatori tamen impedimento esse nequibat, quo minus pro potestate sibi concessa

cessa civem Romanum & in vincula conjicere, & capite multare, in exilium agere, bonis interdicere, aliaque summæ potestatis jura exercere poterat siæ Senatus populique consilio. Salus enim univerforum civium, jus de tergo vitæque, leges, aræ, foci, dii penates, omnes fortunæ ejus tutelæ ac potestati credebantur. Penes illum pacis bellique residebat arbitrium. Nullum cuique refugium vel auxilium nisi in obedientia & obsequio, utpote cujus imperium & edictum semper pro numine observatum Liv. l. 8. cap. 34. ita ut nullus esset in Repub. Magistratus cujus implorare auxilium adversum dictatoris potestatem quis posset, cum & consules & prætores, ædiles cæterique Magistratus, exceptis Tribunis plebis, quasi civiliter erant mortui, & dormire videbantur. Unde Dionys. lib. 5. *Decrevisse (ait) Senatum, consulari potestate in præsens sublata, alium Magistratum creare belli pacisque, & omnium rerum potentem; & infra. Calium dicto collega dictatore, illico magistratu se abdicasse. Et iterum, sæpe civitatem legitimis Magistratibus dissolutis, omnia unius potestati permittere necesse habuisse.* Dictatore itaque creato omnes Magistratus cessarunt, scilicet quatenus ex nutu dictatoris pendebant, cum nihil eorum ex equi quæ ipsi jure Magistratus competeabant, sine permisso & consensu dictatoris, poterant, præter tribunos plebis, ut jam diximus, & penes eum omnis Jurisdictio, omneque imperium cum civile tum etiam militare erat; Verum notandum quæ refert Sig. lib. 3. de antiq. Jur. Provinc. *Dictatorem quacunque de causa creatum, ubi dictatores dicti sunt & inierunt Magistratum, dictaturæ jus quodcunque legibus contineretur accepisse, præter imperium militare; eo vero nunquam affectos, nisi post legem Curiatam.* Neque enim cum legimus Dictatorem dictum rei gerendæ causa, intelligere debemus, ea nominatione imperium militare esse transmissum, verum causam, cur extraordinario jure opus esset, bellum fuisse, quod ei gerendum esset, ubi lege curiata imperium accepisset: Nam si nominatione consulis imperium militare accepisset,



pisset, quid nova amplius de imperio lege fuisset opus, quam tamen, ut supra dixi, latam invenimus. Hinc cum Magistratus imperator legebatur, populus curiatim vocatus sic rogabatur; *Vultis, jubetisne, ut hic consul, aut prator, aut dictator, imperium in hac aut illa provincia habeat.* Unde apud Liv. lib. 9. 37. Papyrius dictator ad exercitum proficiscens sibi legem curiatam de imperio tulit. Papirius (inquit) C. Junium Bubulcum magistrum equitum dixit, atque ei legem curiatam de imperio ferenti, triste omnes diem diffidit, & Post. Dictator postero die auspiciis repetitis pertulit legem, & profectus cum legionibus &c. Vid. lib. 5. cap. 46. Et Cic. contra Rullum, Consuli si legem Curiatam non habet, attingere rem militarem non licet. Et in Epist. ad Lentulum 9. lib. 1. Appius in sermonibus antea dictitabat, postea dixit etiam in Senatu palam, sese, si licitum esset, legem curiatam ferre. Sortiturum esse cum collega Provinciam: si curiata lex non esset, se paraturum cum collega, tibiue successurum: legemque curiatam consuli ferre opus esse, necesse non esse: se, quoniam ex Senatus consulto Provinciam habebat, lege Cornelia imperium habiturum, quo ad urbem introisset. Observandum hic non omnino necessarium fuisse ut lege curiata imperium deferretur, quoniam id ipsum ex peculiari Senatusconsulto aliquis habere poterat. Cum itaque summum haberet dictator imperium, tum civile tum etiam militare, cæteris solutis Magistratibus, nulla ab eo concessa fuit provocatio, quippe ut dicere incepimus in prima nostrarum exercitationum parte, quoniam dictator in summa necessitate creabatur, quando bellis intestinis atque seditionibus dilacerabatur respub., ita ut necesse esset illi per unum consulem, omnibus legibus majorem potestatem habentem, huic malo provideri non poterat, nisi provocandi jure sublato, plebi, nullum usquam nisi in cura parendi erat auxilium. Unde Quintius apud Liv. lib. 3. cap. 20. dictitabat dictatore opus esse Reipub., ut qui se moverit ad sollicitandum

*statum civitatis sentiat sine provocatione dictaturam esse.* Dionysius legem Valerii, quam de provocatione tulerat, causam quoque creandi dictatoris fuisse tradit. *lib. 5.* Hinc M. Fabio ad populum provocante à Papyrii Dictatoris iudicio, populus sibi cognitionem criminis non vindicavit, nec Dictator illam admisisset, quia de jure suæ potestatis nihil diminuturum se velle obtestabatur. Atque optare, se, inquit, ne potestas tribunitia inviolata ipsa violet intercessionem sua Romanum imperium, ne populus Romanus in se potissimum dictatorem & jus dictaturæ extinguat. Itaque provocationem declinaverunt ipsi tribuni, & orare dictatorem insistant, ut *veniam errori humano, veniam adolescentiæ C. Fabii daret: satis eum poenarum dedisse.* Liv. l. 8. Quod si provocationi locus fuisset, nullus dubito quin facile ei cessisset Papirius, neque populus permisisset se eo jure privari. Vid. quæ annotavimus ad §. 4. *h. tit.* Illud quoque summæ Majestatis erat testimonium, quod consul cum liclatoribus dictatori occurrere non poterat. Hinc in Fabio Max. dictatore Plutarchus; *Quum autem alter consul ad ipsum progrediretur, misso apparitore dimittere jussit eum lictores, & insignibus depositis imperii, privati more sibi occurrere.* Quanquam vero summum erat Dictatoris imperium regiaque potestas, ipsi tamen equo vehi minime jus erat, nisi populi suffragio, ut constaret fortasse, licet magna esset dictatoris potentia, infinitam tamen non esse, sed aliquo fine adhuc circumscriptam, eumque aliquando populo indigere. Itaque quando equitare vellet, necesse habebat populum rogare ut equum sibi ascendere liceret, exque permissu populi equo vehi poterat. Unde apud Liv. l. 23. *cap. 14.* *Nam nec consul ulli rei, quæ per eum agenda essent, deerat, & dictator M. Junius rebus divinis perfectis, latoque, ut solet, ad populum, ut equum ascendere liceret &c.* Vid. Plutarch: in Fabio Max.



*§. 19. Et his dictatoribus magistri equitum injungebantur sic, quomodo regibus tribuni celerum quod officium ferè tale erat, quale hodie praefectorum pratorio: Magistratus tamen habebantur legitimi*

**E**T his dictatoribus Magistri equitum injungebantur] Injungebantur id est inquit Coccejus de Orig. Jur. ad h. o. adjungebantur, vel jungebantur ut vult Veltman. ad h. t. sed dubito an bene: quippe quoniam ipse dicebat dictator magistrum equitum, eumque sibi adjungebat, non admittit verborum sensus illam interpretationem: rectius Anton. Fab. in suis Ration. ad h. t. Intelligit per verbum *Injungebantur*, necessitatem dictatori impositam, qua tenebatur sibi magistrum equitum eligere. Itaque creato dictatore, is statim dicebat magistrum equitum. Dictatorem sine magistro creari fas non erat, ut colligimus ex Liv. lib. 23. cap. 23. Quippe cum Terentius consul ex S. C. dictatorem M. Fabium Buteonem, Senatus legendi causa sex menses creasset, ipse Buteo cum lictoribus in Rostra ascendit, neque duos dictatores tempore uno, quod nunquam antea factum esset, probare se dixit: neque dictatorem se sine magistro equitum. Unde Dionys. lib. 5. cap. 249. de T. Largio dictatore sermonem habens, inquit; Ergo mox ut magistratum iniiit equitum magistrum creavit Sp. Cassium, qui mos usque ad nostram aetatem servatur à Romanis; nec ullus hucusque dictator imperium absque magistro equitum gessit. Magister equitum, inquit Varro, dicitur quod summa ejus potestas in equites & ec-

& accensos; ut est summa in populum dictatoris. Et sicut olim tribuni celerum regibus aderant, & legatus consuli, & prætori quæstor auxilio & adjumento erant, sic dictatori magister equitum, & Imperatori præfectus prætorio, ut si quando abessent, aut graviori morbo implicitos contingeret, vices eorum gerere & munia obire possent: ac quædam inter eos societas & conjunctio imperii, ut virtutis, ignaviæ cujusque testes forent. Alex. ab Alex. lib. 4. cap. 23. Præerat igitur magister equitum equitibus, quemadmodum dictator legionibus; Subjectus autem erat Dictatoris imperio, & sine ejus jussu vel imperio nihil moliri vel exequi poterat. Unde apud Liv. legimus C. Fabium & M. Minucium qui contra edictum Dictatoris pugnaverant, in capitis discrimen venisse, & nisi precibus populi liberatus, ultimo supplicio fuisset affectus. Disciplina enim militaris flagitat, ut miles centurionis, centurio tribuni, tribunus legati, legatus Coss., magister equitum dictatoris pareat imperio. Liv. lib. 8. cap. 34. Verum contigit aliquando, ut magister equitum dictatori æquatus fuerit, Liv. lib. 22. cap. 29. ubi Minutium Fabio æquatum imperio legimus, quamvis id statim revocatum; quippe ipse *Magister deposito equalis imperii jugo, magistrum equitum, sicut par erat, dictatura subjecit: imprudentisque vulgi errorem grata mentis significatione correxit.* Valer. Max. lib. 5. cap. 2.

*Quod officium fere tale erat, quale hodie præfectorum prætorio.* ] Hinc Arcadius Charisius in l. unic. ff. de off. præfecti. Prætor. Ad vicem magistri equitum Præfectos Prætorio antiquitus institutos esse, à quibusdam scriptoribus traditum est. Nam cum apud veteres dictatoribus ad tempus summa potestas crederetur, & magistrum equitum sibi eligerent, qui ad sociati participales curæ (ad militiæ gratia) secundam post eos potestatem gerebant, regimentis reipub. ad Imperatores perpetuos translatis, ad similitudinem magistrorum equitum præfecti prætorio à principibus electi



Et sunt, cui prætorii sui sive aulæ curam committerent.  
 Nisi quod data est iis plenior licentia ad discipline publicæ  
 emendationem. Quamobrem, inquit Pomponius, fere  
 Magistri equitum fuisse officium, quale hodie Præfecti  
 Prætorio. Quippe Magistrum equitum constat nisi pro  
 militia operam reipub. navasse: Præfectus vero Prætorio  
 non solum ad latus Principis cohortibus prætoriiis præerat,  
 sed criminalem & civilem Jurisdictionem, ac auditorium  
 habuit. *l. 40. ff. de reb. cred. l. unic. Cod. de senten. Præ-*  
*fect. prat.* Unde nec ab illorum sententiis appellandi. *l. d. sive*  
*provocandi*, verum supplicandi intra biennium tantum no-  
 stro numini contra cognitionales sedis Prætorianæ Præfectu-  
 ræ sententias post successionem Judicis numerandum eis tri-  
 buitur facultas. Neque adversus eorum sententias alius  
 Magistratus restituere minores non poterat, quanquam ali-  
 ter Magistratus non solum contra suam, sed & aliorum sen-  
 tentiam restituendi jus habebat. Vid. *l. 16. & 17. ff. de*  
*minor.* Simulac autem lectus erat Præfectus Prætorio, da-  
 batur ei cingulum cum gladio, & cum gladio merum  
 imperium, unde illud Trajani, cum præfectum suum  
 cingulo donaret, tantæ potestatis & dignitatis insigni, ad  
 eum dixisse fertur, *Accipito hunc ensen: & si siquidem*  
*recte ac e reipub. imperavero pro me, sin secus in me utere.*  
 Plin: Jun. in *Panegy.* Initio ad hanc dignitatem Senato-  
 res evehi veritum fuit, primus Imperator Titus, à patre  
 Præfectus Prætorio factus est. Ita enim Suet: in *Tit. c. 6.*  
*Præfecturam quoque Prætorio suscepit, nunquam ad id tem-*  
*pus, nisi ab equite administratam.* Idem tradit Capitolinus  
*de Pertinace cap. 7.* cum scribit M. Aurelium palam do-  
 luisse, quod ille, quum Senator esset, Præfectus Præto-  
 rio à se fieri non posset. Postea vero hoc institutum Ale-  
 xander Severus mutavit: qui narrante Lampridio *de Alex.*  
*Sever. cap. 21.* Præfectis Prætorio suis Senatoriam addidit  
 dignitatem, ut viri clarissimi & essent & dicerentur: quod  
 antea vel rarò fuerat vel omnino non fuerat: eo usque us-  
 si quis

si quis imperatorum successorem præfecto pratorii dare vellet; laticlaviam eidem per libertum submitteret. Alexander autem idcirco Senatores esse voluit præfectos pratorii, ne quis non Senator de Romano senatore judicaret. Scribit enim Capitolinus in Marco, illud quoque Senatoribus detulisse, ut quoties de illorum capite esset judicandum, non pateretur equites Romanos talibus interesse, causis, unde Spartian. in Adriano, cap. 8. Equites Romanos, nec sine se de Senatoribus, nec secum judicare permisit. Quum autem judicabat de Senatoribus Præfectus Prætorio, qui rarissimè factus ex ordine Senatorio, idcirco ut conservaret Senatoribus illud commodum, Senatores esse voluit Præfectos Prætorio. Hanc dignitatem postea admodum inquinavit Heliogabalus, quum saltatorem, qui histrionicam Romæ fecerat, adscivierit, ut tradit Ælius Spart. in Heliog. cap. 12.

Augustus hujus Magistratus auctor, duos ex equestri ordine Præfectos Prætorio creavit, ob eandem fortasse rationem, ob quam tradit Florus regibus exactis imperium ad consules translatum, scil: ne potestas solitudine corrumpetur, ut sibi invicem obstarent, ne quid alter novi moliretur. Quod exemplum tamen non imitatus fuit Tiberius, cui ex duplici placuit singulare imperium, quod in Ælium Sejanum contulit, cujus consilii ipsum postea pœnituit, quando eum ob nimiam potentiam suspectum coactus fuit e medio tollere. Interjecto tempore alii quoque Imperatores duos & aliquando plures fecere, tradit enim Lampridius Commodum tres creasse Præfectos Prætorio. Constantinus Imperator nimiam Præfectorum potentiam suspectam habens, pro duobus quatuor creare voluit, quibus singulis singulas assignavit regiones sive Provincias. Hinc fuit Præfectus Prætorio Orientis, qui quinque Diocœses gubernavit; alter Illyrici: tertius Italiae. Quartus Galliis, Hispaniis, & Britanniae præfuit. Eos civilia tantum jussit tractare negotia, & militibus, qui-



bus antea imperabant, Magistros militum præposuit. Vid. Pancirol. *de not. imp. Orient. cap. 5.* Unde tot. *Cod. de offic. Præf. Præt. Orient. & Illyr.* Postquam Justinianus Africam à Vandalis exemit, ei proprium dedit Præfectum; quippe antea sub præfectura Italiæ erat. Hinc tit. *de off. Præf. Præt. Afr.* De quorum potestate ita in hanc sententiam Cassiodorus scribit lib. 6. *Epist. Potestati Præfecti Prætorio nulla dignitas est æqualis: vice sacra, hoc est Imperatoris judicat: nullus ei miles fori autoritate præscribit, excepto officiali magistro militum. Curiales etiam verberat, in officio suo jus retinet singulare: & talibus tantisque noscitur jubere, quos etiam provinciarum non audirent judices in qualibet parte contemnere.*

*Magistratus tamen habebantur legitimi* ] Ita legitur in Florentino. Ventura Cæcus; & fortasse eum secutus Corasius, item Zasius legunt, *Magistratus enim habebantur.* Quam vero ob causam loco particulæ *tamen* legunt enim, fateor me divinare non potuisse. Quippe nulla erat quaestio, an Magistros Equitum Magistratibus annumerari oporteret, ideoque non opus ut hac particula uteretur Pomponius, quasi voluisset aliquid affirmare, quod à quibusdam negabatur. Placet itaque magis Florentina. Verum de sensu non conveniunt interpretes. Putat Cujacius hæc verba non ad Dictatores, qui non sunt legitimi, id est statuti & ordinarii, ut Dionys. sentit, qui Dictatoribus opponit *Πᾶς νομίμους ἀρχάς*, id est, legitimos Magistratus lib. 10. Item quia Dictatores ante Pomponius satis affirmaverat esse Magistratus, qua ratione nec ad Magistros equitum hæc verba sunt referenda, cum eos pares fecerat Trib. Celerum, & Præf. Præt. qui etiam non erant legitimi Magistratus. Itaque (inquit) his verbis Pomponius refutat opinionem eorum, qui sub dictatoribus existimabant cessasse alios Magistratus. Quæ verborum interpretatio mihi non aridet, tanquam à mente Pomponii alienissima. Sermonem enim hic habet de eo Magistratu nimir. de Equitum

tum Magistro, de quo paulo ante disputare inceperat. Quod sub dictatoribus legitimi Magistratus non cessarint, satis evincunt, quæ apud veterum monumentorum auctores passim legimus. Hinc interdum legimus consulem à dictatore increpari. Unde & apud Liv. lib. 8. cap. 22. L. Papius Dictator inquit, *Quæro de te Q. Fabi, cum summum imperium dictatoris sit, parcantque ei Coss. regia potestas, Prætores iisdem auspiciis quibus Coss. creati, æquum censeas nec ne, magistrum equitum dicto audientem esse.* Hinc etiam interdum prohibitum consuli, ne cum licitoribus ad eum accederet. Quæ, si consul alique Magistratus cessassent, id est revera munus non obissent, fieri non potuissent. Quod Polybius alique tradunt præter Tribunatum cæteros omnes Magistratus Dictatore creato, fuisse dissolutos: id sano sensu interpretamur. scil. eatenus dissoluti, quatenus nihil injussu dictatoris facere poterant, & ea quæ agebant, non jure sui Magistratus, sed jussu Dictatoris exequiebantur, quæ aliter pro potestate & dignitate, ac munere, quo ornati erant, facere potuissent. Fateor libenter nonnunquam Dictatorem fuisse sine consulibus, ut in fastis videre est. Verum hæc exceptio à regula, raro enim id accidit, ideoque prætereundum, neque ejus habenda ratio *arg. l. 6. ff. de leg.*

Opinor itaque Pomponii verba referenda ad Magistrum equitum, quem licet cum Trib. Celerum & Præfectis Prætorio composuisset, qui, utpote olim arbitrio regum & Imperatorum constituti, legitimis Magistratibus non annumerabantur, attamen Magistratum legitimum fuisse, quanquam à Dictore creatum arbitror: cum alioquin solius populi erat creare Magistratum, ideoque nec ipse dictator omnino legitimus, utpote consulis vocis dictus; legitimus vero quatenus forma creandi legitima erat, ut recte annotavit ad *h. l.* Coccejus, quo pertinet lex de creando dictatore lata, itaque lex erat vice populi, & consul Dictatorem secundum legem à Liv. lib. 2. memoratam dicens, legiti-



legitimum faciebat magistratum, quemadmodum & dictator equitum magistrum secundum eandem legem faciens, legitimis annumerabatur magistratibus; quod enim per alium quis facit, per se fecisse videtur. Et hanc Pomponii esse mentem mihi persuadeo.

*S. 20. Iisdem temporibus cum plebs à patribus secessisset, anno ferè septimo decimo post reges exactos, tribunos sibi in monte Sacro creavit, qui essent plebeji magistratus, dicti tribuni, quod olim in tres partes populus divisus erat, Et ex singulis singuli creabantur: vel quia tribuum suffragio creabantur.*

**I** *Iisdem temporibus cum plebs a Patribus secessisset.] Hujus secessionis causam præbuit creditorum vel fœneratorum in egenos & ære alieno pressos nimia crudelitas & sævitia. Notandum a condita fere urbe, vel lege vel consuetudine introductum atque constitutum, ut liberi, qui pecuniam debebant, cum solvendo non essent, trahi a creditoribus, atque ad operas in servitute præstandas cogi possent. Cum autem Romani post reges exactos, continuis vexarentur bellis, plurimi, quibus res erat angusta domi, cum propter continuas expeditiones, tum etiam*  

E

propter

propter populationes agrorum & tributa iniquo tempore imperata, æs alienum facere cogebantur, contingebat, ut domum reversi, & obarati, nihil habentes unde satisfacerent creditoribus, ab iis vincti in servitatem ducebantur, pro potestate & licentia sibi a legibus concessa, qua abusi multi in terga miserorum crudelissime sævierunt. Unde sæpius fremebat plebs, se foris pro libertate & imperio dimicantes, domi a civibus captos & oppressos esse. Hinc apud Liv. l. 2. c. 23. quidam cum omnium malorum suorum insignibus se in forum projiciens, oblitus vestis squalore, in hæc verba prorumpit. *Sabino bello (ait) se militantem, quia propter populationes agri non fructu modo caruerit, sed villa incensa fuerit, direpta omnia, pecora abacta, tributum iniquum suo tempore imperatum, æs alienum fecisse. Id cumlatum usuris, primo se agro paterno avitoque exuisse, deinde fortunis aliis, postremo velut tabem pervenisse ad corpus. Ductum se ab creditore, non in servitium sed ergastulum & carnificinam esse. Inde ostentare tergum scædum recentibus vestigiis verberum.*

Cum autem hisce miseriis vexata plebs, sæpissime de crudelitate & sævitia foeneratorum conquesta esset, & petiisset se paululum sublevari a patribus, seque non daturam nomina, nisi remissionem aliquam debitorum obtinerent, minata fuisset, animadverteretque se vanis patrum pollicationibus illudi ac decipi, qui promittebant quidem causam plebis nexorumque post bella sibi curam fore, verum promissa exequi negligebant, tandem experti se vana a patribus spe lactari, Sicinio quodam auctore ut Livius tradit, in Sacrum montem secessit, neque prius inde revocari potuit, antequam Patres ipsi obtulissent per Menenium Agrippam, virum facundum & plebi carum, concessissentque, ut plebi sui essent magistratus sacrosancti, quibus auxilio adversus consules essent; neve cui patrum eum magistratum caper liceret. Liv. l. 2. c. 33. Sic etiam Dionys. l. 6. *Cumque Menenius juberet eum dicere, quamnam esset illa securitas quam*



quam à plebe requiri existimaret : Concedite (inquit) nobis aliquot annuos ex nostro ordine creare magistratus, qui nullam aliam potestatem habeant, nisi ut plebeiis injuriam & vim patientibus succurrant, nec patiantur quemquam jure suo fraudari. Et Flor. Prima discordia ob impotentiam fœneratorum: quibus in terga quoque serviliter savientibus, in sacrum montem plebs armata secessit: agreque, nec nisi Tribunos imperasset, Meneni Agrippæ facundi & sapientis viri auctoritate revocata est. Quo factò discordia sublata est, & plebs in urbem rediit.

Anno fere septimo decimo post reges exactos.] Sexto decimo anno, postquam reges ejecti erant, seditionem populum Romanum fecisse, & Tribunos plebis sibi creavisse tradit Eutropius l. 2. c. 14. Hinc Cic. apud Asconium in fragm. Cornel. Tanta (inquit) in illis virtus fuit, ut anno sexto decimo post Reges exactos propter nimiam dominationem potentium secederent: leges sacratas ipsi sibi restituerent: duos Tribunos crearent: montem illum trans Anienem, qui hodie mons sacer nominatur, in quo armati consederant, aternæ memoria causa consecrarent &c. Gellius l. 17. c. 21. quoque tradit ducentesimo sexagesimo anno tribunos & ædiles sibi plebem creavisse, Aulo Virginio Montano & T. Vetulio Gemino coss. Vel ut alii volunt hisce consulibus secessio accidit, Sp. vero Cassio, & Postumio Cominio coss. Tribuni creati sunt, ut Liv. testatur. lib. 2. cap. 33. Quorum consulatus incidit in annum 260. ut videre est apud Phigium, Eusebium, Emmium, Sigonium in Fastis.

Tribunos sibi in monte sacro creavit.] Accursius & qui eum sequuntur male sacrum montem interpretantur] Aventinum, qui unus ex septem collibus Romæ est; cum Livius sacrum montem trans Anienem amnem tria ab urbe millia passuum describit, cui secessio nomen dedit, ut inquit Festus lib. 17. Sacer mons (inquit) appellatur, quod eum plebs, cum secessisset à patribus, creatis tribunis plebis, qui

sibi essent auxilio, discedentes, Jovi consecraverunt. Hinc sacra lex, quod in sacro monte lata est. Tribuni igitur creati duo C. Licinius, & L. Albinus. Hi autem, ut Liv. inquit l. 2. c. 32. tres sibi collegas creaverunt & in his Sicinius fuit seditionis auctor. De duobus, qui fuerint, minus convenit. Aliter vero Dionys. lib. 6. Plebs (inquit) in eas, quæ tunc erat tributa, curias annuos magistratus creavit L. Junium Brutum, C. Sicinium Bellutum, quos & antea duces habuerat; & præter hos C. & P. Licinios & Sp. Icilium Rugam. Hi quinque primi tribunitiâ potestatem acceperunt quarto die ante Idus decembres; quemadmodum sit & nostro tempore. Junium Brutum & Sicinium Bellutum nominat quoque Plut. in Coriolano. Suidas Sicinium & Brutum. Pædianus C. Sicinium. L. F. Bellutum. L. Junium, C. F. Paterculum edit. Quæ nomina a Pædiano ex Livio proferuntur: Unde Sigonius ad hunc locum, si Livium citat autorem Pædianus, quomodo dissentire potest Livius ab eo; potius itaque (inquit) existimandum corrupta fuisse hæc nomina apud Livium. Quod autem ad numerum attinet omnes fere in eo consentiunt, quinque primo anno factos, licet non omnes in monte sacro; ibi enim duo tantum creati, qui tres sibi collegas creaverunt, ita ut essent quinque singuli ex singulis classibus. Anno deinceps 297. C. Horatio & C. Minutio coss. quinque adjectis decem sunt effecti, qui numerus deinde stante repub. conservatus est. Liv. lib. 3. cap. 30. Tricesimo sexto anno à primis tribunis plebis decem creati sunt: bini ex singulis classibus, itaque cautum est ut postea crearentur. Quanquam legimus apud Livium l. 4. c. 16. L. Minutium undecimum aliquando tribunum plebis cooptatum fuisse quosdam tradidisse auctores. Verum ipse Livius vix illis autoribus fidem adhibet, cum inquit, vix esse credibile, numerum Tribunorum patres augeri passos: idque potissimum exemplum à patritio homine introductum: nec deinde id plebem concessum semel obtinuisse aut certe tentasse.



*Qui essent plebeji magistratus.] Id est solius plebis, qui plebem tu rentur contra vim & injuriam patriciorum. Plebeji, ut Manutius exponit, dicebantur, qui plebis causa & ex ipsa plebe: Patricii qui patriciorum causa, & ex patriciis familiis primum erant instituti. Veteres tamen putabant omnino non esse magistratum tribunum pleb. ad quod probandum Plutarchus inter cætera argumenta adfert, quod non anni principio ut reliqui magistratum ineant: Dies enim solennis ineundi tribunatum erat 4. Id. Decemb. ut supr. ex Dionys. retulimus. Neque purpuram quoque gestare: cum cæteri magistratus incedant purpurati. Hæc fere sunt ejus verba in Problem. Cur purpura prætextam vestem tribunus non gestat, aliis magistratibus gerentibus? An quia omnino magistratus non est? nam neque lictores habet tribunus plebis, neque pro tribunali sedens responsa dat, neque initio anni quod alii solent magistratus, ineunt, neque dictatore creato abdicat, sed omni magistratuum jure in hunc translato, ipse solus officium retinet suum: utpote non magistratum gerens, sed diversæ functionis ordinisque persona. Atque ut oratores nonnulli exceptionem negant esse judicii genus, cum contrarium ejus quod judicii est præstet: (judicio nimir. sententia fertur, exceptione infringitur & aboletur) eodem modo censent tribunatum plebis impedimentum potius magistratui, quam magistratum esse. Videtur quoque Livius satis indicare Tribunatum initio vix pro magistratu habitum fuisse, in describenda Ap. Claudii consulis contentione cum tribuno pleb. Lætorio l. 2. c. 56. ubi inquit. Occupant Tribuni templum postero die, consules nobilitasque ad impediendam legem in concione consistunt. Submo-  
 veri Lætorius jubet, præterquam qui suffragium ineant. Adolescentes nobiles stabant, nihil cedentes viatori, tum ex his prehendi quosdam Lætorius jubet. Consul Appius negare, jus esse tribuno in quemquam, nisi in plebejum: non enim populi sed plebis eum magistratum esse, nec illum ipsum submo-  
 vere pro imperio posse more majorum, qui ita dicatur: Si vo-*

*bis videtur, discedite Quirites. Facile & contemptim de jure differendo perturbare Latorium poterat. Ardens igitur ira tribunus, viatorem mittit ad consulem: consul lictorem ad Tribunum, privatum esse calamitans sine imperio, sine magistratu &c. Verum Cic. pro Quint. magistratum appellat Trib. pleb. eique etiam purpuram tribuere videtur pro Cluent.*

Quoniam itaque plebeius erat magistratus, cautum fuit, ut supra demonstravimus, ne cui patrum capere eum magistratum liceret. Unde Festus de verb. sig. *Plebejum magistratum neminem capere licet, nisi qui ex plebe est.* Et Cic. de provinciis consularibus. *Qui si plebejus omnino esse non potuit, qui tribunus plebis potuit esse? Et postea. Si patricius Tribunus plebis fuerit, contra leges sacratus est.* Nonnunquam tamen hasce leges illuserunt patres; quippe quando non omnes decem unis comitiis a populo creabantur, & lege cautum erat, ut si quos minus decem tribunos plebis fecerint, primi sibi collegas cooptarent. *Hi tum utique quos sibi collegas cooptassint, ut illi legitimi eadem lege tribuni plebei sint, ut illi quos hodie tribunos plebeios feceritis.* Liv. l. 3. c. 65. Quo contingebat nonnunquam, ut patricii clientum opera cooptarentur sæpissime. Novi tribuni plebis in cooptandis collegis Patrum voluntatem foverunt. Duos etiam patritios consularesque Sp. Tarpejum & A. Æternium cooptavêre Liv. eod. loc. Verum L. Tribonius tribunus plebis infestus patribus, quod se ab iis in cooptandis tribunis fraude captum, proditumque à collegis ajebat, rogationem tulit, *ut qui plebem Romanam tribunus plebis rogaret, is usque eo rogaret, dum decem tribunos plebis faceret, quæ lex ab auctore Trebonia dicta tuit.* Nec aliam legem intelligit Liv. l. 4. c. 16. cum ait, *Ante omnia refellit falsum imaginis titulum, paucis ante annis lege cautum, ne tribunis collegam cooptare liceat.* Cui tamen legi postea anno 352 non fuit satisfactum, ut constat ex Livio l. 5. c. 10. ubi inquit, *Inter delectum tributumque & occupatos animos majorum rerum curis, comitiis tribunorum plebis expleri ne-*  
quirit.



quirit. *Pugnatum inde in loca vacua, ut patricii cooptarentur postquam obtineri non poterat, tamen labefactanda legis Treboniæ causa effectum est, ut cooptarentur tribuni plebis C. Lacerius, & M. Acutius, haud dubie patritiorum opibus. Interjecto tempore sæpe tentatum de tribunatu cum patriciis communicando, sed frustra, nisi vel adoptione vel alia quavis ratione ad plebem se contulissent, ut P. Clodius fecit, qui patricius, ut tribunatum obtinendo se de Cicero-  
ne inimico vindicaret, a M. Fonteio se adoptari effecit. Quod idem Dolabellam fecisse tradit Dio, & Plutarchus in Antonio. Postea Tribunatus tam vehementer appetebatur, ut non patribus tantum, sed & equitibus communicatus sit, ut alicubi Dio tradit. Sic etiam Suet. in Aug. cap. 10. Et quo constantius cetera quoque exsequeretur, in locum Trib. plebis forte demortui, candidatum se ostendit, quanquam patricius, necdum Senator, Et cap. 40. Comitibus Tribunitiis, si deessent candidati, Senatores ex Equitibus Romanis creavit: ita ut potestate transacta, in utro vellet ordine, manerent. Postea vero sive Sylla sive alius, ait Appianus tribunatum a plebeiis ad Senatores transtulit: ex quo tempore nemo tribunus fieri potuit nisi Senator. Attejus Capito apud Gell. l. 14. c. ult. videtur ad Attinium plebiscitum referre hoc institutum, ait enim: Tribunis Senatum habendi jus erat, quanquam Senatores non essent ante Atinium plebiscitum. Quasi dicat Atinio plebiscito lectos è Senatu. Quanquam non certo constat de tempore hujus plebisciti. Nonnulli hanc legem a C. Atinio Labeone latam arbitrantur anno U. C. 633. Tandem ipsi Principes & Cæsares tribunitiam potestatem sibi sumere consueverant, tanquam firmissimum imperii munimentum. Ea quippe ornati inviolabiles habebantur & sacrosancti, Sacrosanctum autem Festo dicitur, quod jurejurando interposito, est institutum, si qui id violasset, ut morte pœnas penderet. Cujus generis sunt tribuni plebis.*

Primum hanc potestatem Senatusconsulto Julius Cæsar

in omnem vitam sibi oblatam accepit, ut tradit Dio l. 42. & 44. Recepisse deinde Augustum perpetuam tribunitiam potestatem tradit Suet. in *Aug. cap. 27.* eaque publice primus usus est, atque inde exortum est, ut qui post illum imperatores lege quadam tum aliis tum tribunitia potestate uterentur. Hujus summi fastigii vocabulum Augustum repperisse inquit Tacit. 3. *Annal. ne Regis aut Dictatoris nomen assumeret, hac tamen appellatione aliqua cetera imperia praemineret.* Vi enim hujus potestatis tria maxime Augustis competeabant. Jus intercedendi amplissimum: alterum ut sacrosancti essent; tertium, Senatum cogendi facultas. Verum observandum quod vir Nobilissimus & Amplissimus de *Repub. literaria* egregie meritis Ezechiel Spanhemius in *dissert. 6. & 8. de praest. & usu numis.* annotavit, scil. non confundendam Tribunitiae potestatis, & Tribunorum plebis praerogativam, quarum prior, ut ab Augusto reperta, aut juxta Dionem a Julio, omnia alia imperia praeminebat, postremi vero ut ut sacrosancti, infra consulum tamen & praetorum fastigium censebantur; Unde Tribunitiam potestatem assumebant quidem, ut praecipuum quoddam insigne majestatis, verum Tribuni plebis nomen declinabant, unde semper in nummis expressum, **T. R. P. O. T. VII. T. R. P. O. T. VIII.** *Adsumptum autem illud ab Imperatoribus nomen* (inquit Vir Amplissimus) *non vero Tribunorum plebis, ex more illorum temporum, quibus potestas Tribunitia, Censoria, Consularis, pro dignitate Tribuni plebis, Censoris, Consulis reperta. Hinc etiam discrimen haud leve hujus Tribunitiae potestatis & Tribunorum plebis observes. Primo, quod illa patritiorum, quales necesse erat creari aut fieri Caesares, hic plebejus esset magistratus. Secundo, quod prior omnia imperia praemineret, ut supra ex Tacito vidimus; hi non item, qui infra consulum & praetorum fastigium censebantur. Tertio, quod in illa etiam intra primum ab urbe milliare praesidium opis ejusdem indigi; in Tribunis plebis autem tantum intra urbis pomeria. Quamquam pergit*  
*& Tri-*



& tribunos plebis nonnullos Imperatores legamus extitisse, sed  
 privatos etiamnum neque adhuc summi fastigii heredes & con-  
 sortes; puta Hadrianum, qui auctore Spartiano, Tribunus  
 plebis factus est, Candidato & Quadrato iterum coff. Aut Se-  
 verum, qui tribunatum plebis Marco Impp. decernente promeruit.  
 Nero autem Imperator multum de Tribunicia potestate de-  
 traxit, ut videre est apud Tacit. 13. *Annal.* ubi inquit; *Simul*  
*prohibiti Tribuni, jus Prætorum & Consulum præripere, aut*  
*vocare ex Italia cum quibus lege agi posset.* Addidit L. Piso  
 designatus consul, ne quid intra domum pro potestate animad-  
 verterent: neve multam ab iis dictam Quæstores Æarii in pu-  
 blicas tabulas ante quatuor menses referrent: medio temporis  
 contradicere liceret, deque eo consules statuerent. Verum  
 imperio ad Othonem devoluto Tribuniciam potestatem  
 iterum in eum collatum tradit Tacit. & deinde Hadria-  
 num & sequentes Imperatores eam accepisse testantur Spar-  
 tianus, Lamprid. *Capitolin.* De potestate autem Tribu-  
 norum ut quædam delibemus disputandi ratio a nobis flagi-  
 tat. Sciendum itaque eam initio non adeo amplam fuisse,  
 verum interjecto tempore paulatim magis magisque auctam  
 esse, ut magni muneris loco proque regali potestate Cæsaribus  
 delata sit, ut statim diximus. Principio itaque Tribunorum  
 potestas consistebat tantum in auxilii latione, ut Livius in-  
 quit, adversus consules, & defensione plebis adversus magi-  
 stratum majorum injurias, qui insolenter in plebem in-  
 sultabant. Obviam ire potentia magistratus, nimiamque  
 ejus licentiam retundere, munus est & potestas tribuna-  
 tus plebis. *Plutarch. in Problem.*

Itaque nec iuridicundo nec postulatis civium noscendis,  
 sicut alii magistratus, præerant. Unde apud Gell. l. 13.  
 c. 12. *Trib. pl. antiquitus creati videntur, non iuridicundo,*  
*nec causis querelisque de absentibus noscendis, sed intercessio-*  
*nibus faciendis, quibus præsentibus fuissent: ut injuria, que*  
*ceram fieret, arceretur.* Idem testatur Plut. in Coriolano.  
*Habet enim magistratus ille vim in intercedendo potius quam in*  
*agendo,*

agendo & ubi reliqui dempto uno quid decreverunt omnes, is obtinet qui adversatur & intercedit. Et in vita Grachhorum. Est autem, inquit, Tribunorum plebis maxima in prohibendo potestas: uno enim prohibente, nihil alii etiamsi complures sint, efficere possunt. Coercebat itaque tribunus per intercessionem ceteros magistratus, atque etiam ipsos collegas suos. Et unius intetcessione reliquorum potestas irrita fiebat, ut jam diximus. Quæ intercessio peragi solita solenni verbo **VETO** Liv. l. 6. *Exo* inquit ne juvet vox ista **VETO**, quia nunc concinentes collegas nostros tam lati auditis. Qua intercessione etiam adversus Senatusconsulta utebantur, unde apud Tacit. annal. 16. *Ad-*rat Consilio Rusticus Arulenus flagrans juvenis, & cupidine laudis efferebat se Senatusconsulto intercessurum: nam plebis tribunus erat. Quorum tamen intercessionibus si non obtemperabatur prehensionem habebant, id est jus prehendi & in carcerem mittendi jure sacrosanctæ potestatis, etiam consulem, prætorem, censorem. Sic testatur Metellum Consulem a L. Flavio Tribuno in carcerem ductum esse. Et apud Liv. l. 9. c. 34. legimus P. Sempronium tribunum plebis Appium Censorem prehendi & in vincula duci jussisse. Tradit quoque Valer. Max. l. 9. c. 5. M. Drusum L. Philippum consulem, quia interfari concionantem ausus fuerat, obtorta gula, & quidem non per viatorem, sed per clientem suum, adeo violenter in carcerem precipitem egisse, ut multus e naribus ejus cruor profunderetur. Sic quoque L. Licinius Lucullus, & A. Posthumius Albinus consules, cum delectum severe agerent, nec quenquam gratia dimitterent, a tribunis plebis, qui pro amicis suis vacationem impetrare non poterant, in carcerem conjecti sunt. Liv. Epitom. l. 48.

Tria itaque erant Tribunorum plebis jura *auxilii latio*, *intercedendi jus*, & *jus prehensionis*. Vacationem vero non habebant. Unde Antistius Labeo Jurisconsultus apud Gell. l. 13. c. 12. per viatorem a Trib. pl. vocatus respon-



derit. Cum à muliere quadam Trib. pl. adversum eum aditi, Gellianum ad eum misissent, ut veniret, & mulier responderet, jussit eum, qui missus erat, redire, & Tribunis dicere, jus eos non habere, neque se neque alium quemquam vocandi: Cum moribus majorum Trib. pl. prahensionem habent, vocationem non haberent. Posse igitur eos venire, & prahendi se jubere, sed vocandi absentem jus non habere. Quod & M. Varro asserit, cujus verba ex Gellio hic subijciam. In magistratu (inquit) habent alii vocationem, alii prahensionem, alii neutrum. Vocationem ut Consules & ceteri, qui habent imperium. Prahensionem, ut tribuni plebis & alii qui habent viatorem. Neque vocationem, neque prahensionem ut Quæstores & ceteri, qui neque lictorem neque viatorem habent. Qui vocationem habent, iidem prahendere, tenere, abducere possunt; & hac omnia sive adsunt, quos vocant, sive acciri jusserunt. Tribuni plebis vocationem habent nullam; neque minus multi imperiti, perinde atque haberent, ea usi sunt. Nam quidam non modo privatum, sed etiam consulem in rostra vocari jusserunt. Ego triumvir vocatus à Porcio tribuno plebis, non ivi, auctoribus principibus, & vetus jus tenui. Item tribunus cum essem, vocari neminem jussi, nec vocatum à collega parere invitum. Propter hoc prehendi jus inquit Gellius jus abnoctandi ademptum fuisse Tribunis pl., quoniam ut vim fieri varent, assiduitate eorum & præsentium oculis opus erat. Præterea tribuni plebis, inquit, l. 3. cap. 2. quibus nullum diem abesse Roma licet, quum post mediam noctem profiscuntur, & post primam facem ante mediam sequentem revertuntur, nam dicuntur abfuisse unum diem; quando ante horam noctis sextam regredi parte aliqua illius in urbe Roma sunt. Horumque domus interdiu nocteque patere omnibus, tanquam asylum & tutissimum refugium, ad quod quique opem imploraturi confugere, & semetipsos recipere possent, auxilii sui jurisque expediundi gratia. Quare Plutarchus in *Problematis*. docet Tribunum se facilem &

hu-

humilem præbere, se in tribunatu non supra plebem efferre, sed intervenientibus civibus habitu amictu victusque ratione esse similem. Fastus n. Consulem, Prætorumque decet. Tribunum plebis (ut dicebat Curio) conculcandum se præbere convenit, neque majestatem in vultu præferre, aut aditus ad se difficiles facere, vel molestum multitudini, sed propter hanc aliis odiosum, popularibus autem tractabilem promptumque esse. Eam ob rem quoque id receptum fuit, ut tribunorum janua nunquam clauderentur, sed noctes diesque aperta essent tanquam portus & perfugium ope indigentibus. Quanto submissius se pro sua persona gerit, tanto magis augetur potentia tribunus. Postea vero eo potestatis venere, ut comitia consulum prætorumve, & aliorum magistratuum habere, & ne quid fieret inhiherent, Liv. l. 4. c. 25. Tribuni plebis assiduus concionibus prohibendo consularia comitia, cum res prope ad interregnum perducta esset, evicere tandem, ut tribuni militum consulari potestate crearentur. Senatum dissolvere, vel cogere, Appian. Alex. l. 2. belli civ. de Curione Trib. pl. sermonem habens, cum nihil peregisset imperfectis adhuc rebus Senatum dissolvit; Id enim Tribuno facere licebat. Et Cic. 3. de orat. scribit vocatu Drusi Trib. pl. non solum Senatum, sed & consulem Philippum in curiam venisse. Leges novas pro arbitrio & voluntate promulgare, quæ plebiscita dicta fuere, tribunitiæ fuit potestatis, quibus Hortensia lege lata omnes tenebantur Quirites. Pontificum Augurumque collegia denunciare, conciones qualescunque cedere, reliquis tribunis & quibuscunque magistratibus diem dicere, ærarii curam gerere, atque Senatus decreta vel approbare vel improbare poterant. Hinc cum L. Manlius Acidinus a Senatu impetrasset, ut ex Hispania decedens, ovans rediret, prohibitus est a M. Porcio Lecca Tribuno plebis, ut apud Liv. videre est l. 32. c. 7. Denique agros, vectigalia, pecunias publicas, magistratus, provincias, quibus vellent daret, vel auferre populi suffragio veriti non sunt.



Phig. *Annal.* l. 2. Multam irrogare, illustres cives indicta causa bonis & exilio multare, obtorto collo ad supplicium trahere: Consules ipsos aliosque magistratus, ut sup. diximus, in carcerem ducere. Diemque illis dicere, postquam magistratu abiere supr. ex Valerio allegavimus. Diximus sup. juridicundo non præfuisse, neque de litibus & jure controverso cognovisse. Postea tamen aliqua etiam Jurisdictio tributa iis videtur, ut Jurisconsultus noster tradit §. 34. ubi inquit, decem tribunos, consules duos, decem & octo prætores, sex ædiles in civitate jura reddidisse. Vid. Cic. *pro Quintio* & *ad Herenn.* l. 2. c. 13. ubi definiturus quid sit Judicatum. *Judicatum est id (inquit) de quo sententia lata est, aut decretum interpositum, ea sæpe diversa sunt, ut aliud alii judici, aut pratori aut consuli, aut tribuno plebis placitum sit; & sit ut de eadem re sæpius alius aliud decreverit, aut judicaverit.* Et docet nos Dionys. l. 6. plebem a patribus impetrasse, ut sibi quotannis duos e plebe viros designent, qui tribunis subministrant quicquid opus sit, & lites, quas tribuni eis commiserunt, judicent. E quibus perspicimus Tribunos de rebus quibusdam & litibus cognovisse ac judicasse, ideoque aliquam habuisse Jurisdictionem, verum quibus de causis cognoverint, non adeo manifestum est. *Partem majorem tribunorum plebis cum Pratore urbano tutores dedisse illis, quibus neque testamento neque lege provisum erat, constat ex § 17. inst. de Atil. tut. Lex Atilia (inquit Ulpianus tit. 11. §. 18.) jubet mulieribus, pupillisve non habentibus tutores dari a Pratore, & majori parte, Tribunorum pl., quos tutores Attilianos appellamus.* Verum posset nobis objici, quod tutoris datio non descendat ex Jurisdictione, verum vel ex Principis, vel legis vel S. C. concessione; ideoque tutoris dandi potestas non probat Jurisdictionem competere ei, qui tutorem dedit. De hac re ita scribit Ulpianus l. 6. §. 2. *Tutoris datio neque imperii neque Jurisdictionis, sed ei soli competit, cui nominatim hoc dedit, vel lex, vel Senatusconsultum, vel Princeps.*

Ita ut argumentum a tutoris datione , ad Jurisdictionem alicujus probandam desumptam non procedat. Hæc Ulpiani sententia maximas parit difficultates , & inter doctores magnam contentionem , cum alii aliter interpretantur , ita ut in diversas eatur sententias , quæ vix conciliationem admittunt. Videtur enim non satis constare , quamobrem tutoris datio neque imperii sit neque Jurisdictionis : Cum Ulpianus in *l. 1. ff. de Jurisd.* ipse testetur *Jus dicentis officium latissimum patere , nam & bonorum possessionem dare potest , vel in possessionem mittere , pupillis non habentibus tutores constituere , judices litigantibus dare.* Quanquam jus dicentis officium Jurisdictione latius sit , ita ut ea etiam complectatur , quæ ad Jurisdictionem minime pertinent ; magistratus tamen jus dicentis officium non potest ultra Jurisdictionis terminos extendi , sunt enim hæc conjugata jus dicens , jus dicere , & Jurisdictio ut inquit Gentil. *de Jurisdict. l. 1. c. 1.* Præterea inquit idem Ulp. in *l. nec mandantem pr. ff. de tut. dat. nec Præsidem mandare posse , ut aliis tutorem det. sed an mandare aliquid possit nec ne , quaritur de iis quæ sunt Jurisdictionis , vel imperii. l. 1. & possim ff. de offic. ejus cui mand.* Quomodo igitur nec Jurisdictionis nec imperii Ulp. esse dicit , tutorem dare ? Non describimus hic omnia argumenta , quibus nonnulli doctores probare conantur Ulpiani negativam sententiam , eo enim fere omnes utuntur argumento ; Scil. quia non exercetur nomine , quo quis imperium vel Jurisdictionem habet , sed ex causa tantum , quod hæc potestas a lege , Senatusconsulto , vel Principum constitutione nominatim conceditur vel non habentibus imperium aut Jurisdictionem , ut ait Longevallius *de Jurisd. omnium Jud.* Cujacius affirmat jus dandi tutores non esse Jurisdictionis , sed esse legis , legem enim hoc dare etiam privatis hominibus , puta parentibus , ut liberis suis tutores dare possint. *l. verbis legis ff. de V. S.* Verum optime & erudite huic difficultati respondit statim a nobis allegatus Alber. Gentil. in eleganti tractatu suo de  
*Juris-*



*Jurisdictione l. 1. c. 1.* Primo negat Ulpianum hæc duo inter sese opponere, n: aliquid esse Jurisdictionis & imperii, & aliquid dari specialiter lege vel S. C. vel a Principe. Verum probat quicquid specialiter vel lege vel S. C. defertur & conceditur, illud quoque commode dici posse esse imperii vel Jurisdictionis. Quippe merum imperium, quod specialiter datur lege vel S. C. vel constitutione *l. 1. in fin. ff. de offic. ejus cui mand.* jurisdictione in latiori sumpta significatione continetur, quare sub titulo *ff. de Jurisdictione* proponitur, Quin & in Codice Theodosii titulus de Jurisdictione ad criminales etiam causas pertinet: item in Codice Justiniani. Negari enim non potest mero imperio inesse criminalem Jurisdictionem. Criminalis autem Jurdictio vera Jurdictio est. Imo de capite jus dici Pomponius in hac lege §. 23. testatur. Itaque merum imperium est species Jurisdictionis, quanquam ex lege vel speciali constitutione dimanat. Ita etiam transactio non potest fieri nisi ex decreto prætoris, cui specialiter oratione Divi Hadriani ea cognitio tributa est *l. 8. ff. transact.* & tamen ea diserte in illa lege vocatur Jurdictio. Sic judicem dare litigantibus ad eos pertinet, quibus id lege, vel constitutione vel S. C. conceditur *l. 12. §. 1. ff. de Jud.* & tamen Judices dare totum Jurisdictionis est: Jurdictio enim definitur quod sit Judicis dandi licentia *l. 3. in fin. ff. de Jurisd.* Ex quibus recte infertur mentem Ulpiani non fuisse, quod ea, quæ ex speciali lege sive S. C. aut constitutione conceduntur, propterea quod ex illis derivantur, non esse Jurisdictionis. Verum voluisse Jurisconsultum eatenus tutoris dationem non esse Jurisdictionis, quatenus opponitur illis rebus, quæ magistratibus jure magistratus competent, & Jurisdictioni ita cohærent ut ab ea divelli neque separari queant. Id est quæ Magistratus simulac creatus est ac ea dignitate ornatus, vi & jure potestatis sive magistratus exercere potest. *Hæc tria* inquit Jurisconsultus statim à nobis citatus, *distinguenda sunt. Jurisdictionem a lege dari*

*dari vel deferri. Jurisdictionem specialiter & nominatim a lege dari : Jurisdictionem lege confirmari. Jurisdictionem lex & mos majorum, qui idem valet quod lex & eandem vim obtinet, dat omnibus magistratibus, & quæ jura hac ratione quis habet, jure proprio sive jure magistratus habere & exercere intelligitur. Jurisdictionem autem specialiter & nominatim certo magistratui defert, ut tutoris dationem, idque ideo, ne quilibet magistratus sibi earum causarum cognitionem usurpet. E quibus concludimus Ulpianum negare quidem tutorum dationem esse Jurisdictionis vel imperii, scil: ordinariæ Jurisdictionis, quæ jure magistratus competit, id est, quam quis habet, quia est magistratus, verum ex eo numero causarum Jurisdictionis voluit esse, quas lex vel Princeps noluit cuivis magistratui competere. Ita quoque Ulpiani dictum explicat Merillus tutoris dationem neque imperii esse neque Jurisdictionis: scil. non competere jure magistratus. Verum ex eo non sequitur ergo non est Jurisdictionis. Prætori jus competit dandi tutoris non quia Prætor, verum quod lex id ipsi concessit, attamen dando tutorem Jurisdictionem exercet, sive velis mixtum imperium, cui Jurdictio ita cohæret ut ab ea divelli nequeat. Et quod ab uno procedit, etiam alteri applicari potest, licet quædam possint dici magis esse imperii quam Jurisdictionis, quædam magis ad Jurisdictionem, quam imperium pertinere. Unde concludimus Tribunos Jurisdictionem habuisse, quia tutores dare potuerint, non jure tribunatus, verum quia hæc pars legalis Jurisdictionis sive ex lege vel constitutione Principis, aut S. C. ipsis fuerit concessa & demandata. Sane miror tam densas quorundam cerebro offusas tenebras, ut non videant vel a lege vel consuetudine sive more & constitutione Principis omnem Jurisdictionem magistratibus tribui atque concedi, ac omnem potestatem & imperium profluxisse, ideoque absurdissimum esse argumentum, quo probare conantur aliquid Jurisdictionis non esse,*  
quia



quia ex prædictis causis habet originem. Sigonii verba hic describere non abs re erit. *cap. 13. de jud.* ubi inquit. *Quin etiam tutoris postulatio ad legis actionem, datio ad Jurisdictionem pertinet.* Auctor est Ulpianus, cum inquit, *jus dicentis officium latissimum est.* Nam & pupillis non habentibus tutores constituere potest. Est autem intelligendum, si neque testamentarius, neque legitimus tutor adesset, tum datum à Prætorè fuisse, eodem teste. Hoc autem cum faciebat Prætor, tertiam partem Jurisdictionis explebat, quæ verbum DO continebat. Atque hoc idem de consulibus & tribunis plebis dicimus, quorum idem jus fuisse accepimus. Alterum argumentum quo Jurisdictionem Tribunorum adstruere volumus, desumptum est ex *Tit. 7. fragm. Ulp. §. 6.* ubi inquit; *Si maritus pro muliere se obligaverit: vel in rem ejus impenderit divortio facto, eo nomine cavere sibi solet stipulatione tribunitia.* Ex quibus Ulpiani verbis perspicimus tribunos ut & censores de causis matrimonii cognitionem habuisse, ipsis stipulationes etiam de iis competiisse, easque interponi jussisse. Quæ stipulationes ex Jurisdictione Tribunorum veniunt, quemadmodum prætoris à Prætorè: ædilitiæ ab Ædilibus. Et *Cic. in orat. pro Quintio.* Cum prætor perseveraret decernere procuratorem ejus, qui ipse non satsdaret, satsdare oportere Tribunos appellatos ait: qui tamen auxilium cujus ergo creati erant ferre non poterant, nisi prius de Prætoris injuria cognovissent. Et *Liv. l. 4. c. 53.* Manio contra vociferante, si injusti domini possessione agri publici cederent, se moram delectui non facere, decreto interposito novem tribuni sustulerunt certamen, pronuntiaveruntque ex collegii sententia, C. Valerio consuli se, damnum aliamque coercionem, adversus intercessionem collega delectus causa detrectantibus militiam inhibenti, auxilio futuros esse. Hoc decreto consul armatus cum paucis appellantis tribunum, collum torssisset, metu ceteri sacramento dixere.

Quibus ex locis satis apparere mihi persuadeo Jurisdictionem

nem Tribunos habuisse. Quod & probat jus militiæ irrogandæ, quam Tribunos habuisse multis locis ostendit, Liv. De T. Manio : *In multa temperarunt Tribuni. Cum capitibus anquisissent, duo millia æris damnato multam dixerunt.* Item, Tribuni pl. *ducentum millium æris multam* M. Posthumio dixerunt. Quæ non ex potestate vel Reipub. administratione alicui competit, verum omnino ex Jurisdictione pendet, & derivanda est. arg. l. 2. §. 1. ff. si quis in jus voc. non ierit ubi inquit Jurisconsultus. *Si quis in jus vocatus non ierit, ex causa a competenti iudice, multa pro Jurisdictione iudicis damnabitur.*

Ad quæ verba competenti Iudice Anton. Faber in suis *rationalibus*, ita commentatur. Scil. per competentem Iudicem non tantum intelligi Iudicem competentem in illa causa, sed & qui Jurisdictionem aliquam habet & iudicendæ multæ, ita ut hæc pari passu ambulent, & jus multæ dicendæ nulli competat, nisi qui aliqua competit Jurisdictio. Quanquam ex eo non sequatur, omnes magistratus qui Jurisdictionem habent, etiam habere jus multæ irrogandæ; quippe constat duumviris quanquam inter Magistratus numerantur Jurisdictionem habentes, attamen pænali iudicio eam defendere leges non permittere l. unic. ff. si quis jus dicent. non obtemp. At vero cui jus multæ dicendæ, ei etiam competit Jurisdictio. *His datur multa dicendæ jus, quibus publice iudicium est & non aliis nisi specialiter permissum.* l. 2. §. 9. ff. de jud. Hoc est qui jus dicunt & Jurisdictionem habent, multam irrogare possunt, ita ut jus multæ infligendæ supponat Jurisdictionem aliquam, ad quam defendendam iudicium pænale sive multæ irrogandæ jus Magistratui Jurisdictionem habenti datum atque concessum est. Jus autem dicebant in Basilica Porcia, a Catone pecunia publica excitata & sub Curia foro adjuncta, quam Basilicam Porciam appellavit, Plutarch. in Catone. Itaque non e tribunali iudicare ipsis permissum, sicut Prætores solent, sed è subsellis quod non summi sed mino-



minores essent Magistratus. Alexand. ab Alexand. *dier genial. l. 5. c. 3.* Verum Notandum quod si Tribuni pl. potestate sibi concessa abuterentur, & contra commoda plebis aliquid scelestè & injuriose agerent, aut exorta offensio-  
ne apud collegas minus justè quis intercessisset, sacrosanctus amplius non erat, sed poterat ei a reliquis Tribunis diem ad populum dici; jussuque populi aut Tribunorum in vincula duci, eique Tribunatus abrogari, & in exilium agi, Senatuque amoveri. Hinc legimus apud Valer. Max. *l. 6. c. 5.* Quod cum L. Cotta tribunus plebis fiducia sacrosanctæ potestatis creditoribus suis nollet satisfacere, collegium Tribu-  
norum decrevisse; si neque solveret pecuniam, neque daret cum quo sponsio fieret, appellantibus se creditoribus auxilio futurum: iniquum ratum majestatem publicam privata perfidia obtentui esse. Itaque Cottam in tribunatu quasi in aliquo Sacratio latentem tribunitia inde justitia extraxit. Sic quoque Cn. Tremelio tribuno pl. multa dicta est, quod cum M. Æmilio Lepido Pontifice maximo injuriose contenderat. Liv. *l. 47.* L. Rheginus Tribunum plebem Cæpionem in carcere conjectum liberasse tradit idem Valerius *l. 4. c. 7.* Et idem *l. 6. c. 1.* auctor est M. Claudium Marcellum Ædilis Curulis C. Scantinio Capitolino tribuno pl. diem ad populum dixisse, quod filium suum de stupro appellasset. Eoque asse-  
verante se cogi non posse ut adesset, qui Sacrosanctam pote-  
statem haberet, & ob id tribunitium auxilium implorante, to-  
tum collegium tribunorum negavit se intercedere, quo minus pudicitia questio perageretur. Et M. Octavio, qui contra publicam utilitatem legem à Tiberio Graccho collega latam, qua cautum ne ultra quinquaginta jugera civis Ro-  
manus non haberet, intercesserat, subornatus à locupletibus, Tribunitia potestas, majore parte tribuum suffra-  
gante, fuit abrogata. Plutarch. in Grachhis & Appianus lib. 1. Bell. Civ.

Dicti Tribuni quod olim in tres partes populus divisus erat, & ex singulis singuli creabantur. ] Nomen tribuni non ab eotem-

pore deducit, quando plebs sibi in monte sacro tribunos creavit: verum ab eo tempore derivat, quo Romulus populum universum in tres tribus divisit, singulisque suos præfecit duces. Nam & olim Tribuni celerum, qui sub Regibus equitibus præerant, & veluti secundum à Regibus locum obtinebant, de quibus supra diximus. Unde hæc vox manaverit, de eo variæ sunt auctorum opiniones. Varr. l. 4. de ling. lat. ex eo derivatam putat, quod terni ex tribus tribubus, *Ramnensium*, *Lucerum*, *Tatien-sium*, olim ad exercitum mittebantur. Jurisconsultus noster putat ex eo ortam, quod tunc temporis tres tantum populi partes erant, quas tribus nominabant, & ex singulis singuli creabantur, qui eis præessent, qui Tribuni vocati. Nonnulli a centuriarum equestrium numero dictos volunt tribunos, quas initio Reipub. tres fuisse constat. Alii quia tribuum suffragio creabantur. Tribunorum igitur appellatio ab illa tempestate, qua Tribuni militum creati fuere, petenda. Quia vero secessione Crustumina plebs sibi duos tribunos fecisset, ut scribit Varro, sicut ex secessione secunda ex tribunis militum sibi fecisse Tribunos plebis constat, ideo inquit Cujacius, meo quidem judicio retinuerunt tribunorum nomen, sed additum est *πρόσθημα* plebis, ut Zonaras ait *πρός Ἀρχολῶν* Tribunorum militum, ut discernerentur ab aliis Tribunis. Quippe & Tribuni Celerum, & militum, Tribuni Ærarii, Tribuni vigilarum, Scolarum, in jure occurrunt.

*Vel quia Tribuum, suffragio creabantur.*] Suffragium est consensus sive sententia quâ quis voluntatem suam in mandando alicui Magistratu declarat. Quæ declaratio fiebat, quando Populus Romanus more solenni convocatus, suffragia dabat. Quod jus dandi suffragii non omnibus & cuivis e populo compete-bat, verum quibusdam denegatum, & iis tantum concessum, cum quibus comitiorum communio fuit. Ab iis autem arcebantur scemina, majores quoque sexagenarii, qui si suffragii causa comitia frequentarent a juvenibus de-  
ponte,



ponte, per quem ceperunt comitiis suffragium ferre, de-  
jiciebantur. Sexagenarios de ponte olim dejiciebant ut Fest  
tradit. Sic Cic. *pro Roscio*. *Habeo etiam dicere, quæ con-*  
*tra morem majorum minorem annis Sexaginta de ponte in Ti-*  
*berim dejecerit.* Hinc canit Ovid. l. 5. *Fast.*

*Pars putat, ut ferrent juvenes suffragia soli,  
Pontibus infirmos præcipitasse senes.*

Quare *de pontani* senes dicti sunt. Ut enim ordine negotia  
peragerentur, Romulus initio populum divisit in tres tribus,  
& singulas tribus in decem curias partitus, unde comitia Cu-  
riata originem derivant: in quibus populus curiatim suffra-  
gia dabat. Moris enim erat in his comitiis, ut populus  
per curias distributus sententiam rogaretur, & quod plures  
curiæ jussissent id ratum esset & populi jussum diceretur.  
De quibus ad §. 2. quædam delibavimus. Deinde Ser-  
vius Tullius sextus Romanorum Rex, Populum Roma-  
num in sex classes distribuit. Quas iterum in centurias divisit.  
Ita ut totum Romanorum corpus ex 193 centuriis consta-  
ret. A quibus centuriis dicebantur Centuriata Comitia, quæ  
nihil aliud quam populi conventus, per classium in centurias  
divisi ad suffragium ferendum, in quibus suffragia per centu-  
rias colligebantur, & quod plures jussissent centuriæ id ra-  
tum habebatur. De quibus quoque quæ ad §. 2. annotavi-  
mus vide.

Deinde Tribuni plebis tributa introduxêre comitia an-  
no 262. M. Augurino, & A. Sempronio Atracino cons.  
quando Cn. Marcius Coriolanus nobilium primus damna-  
tus a plebe perduellionis est, quod de tribunorum potesta-  
te abolenda in senatu disseruisset. De cujus capite plebs  
primis tributis comitiis in suffragia vocatus, eum absentem  
exilio damnarunt. Liv. l. 2. c. 35. Postea vero anno  
281. L. Pinario Ruso, & P. Furio Fusco cons. Volero Plu-  
bilius homo plebejus & infimæ sortis, qui ordines duxerat,  
creatus Trib. pl. rogationem de Comitiis tulit ad populum.

Uti Tribuni, plebis. Ædiles. Tributis, non. Curiatis. crearentur. Comitii. Et. quicquid. tribunus. plebem. rogaret. Iisdem. scisceretur. comitiis. Ante hanc legem plebejos magistratus curiatis, patricos centuriatis comitiis creatos vero simile est. Tributa autem comitia inde dicta quia *ex regionibus & locis hoc est, per tribus suffragium ferebatur.* Apud Gell. l. 15. c. 27. tributa autem a tribubus, unde vero tribus sup. diximus. Ex Gellio igitur constat, non solum eos cives Rom. qui in ipsa urbe habitabant, & tribubus sive locis distincti essent, suffragii jus habuisse. Sed & eos qui extra urbem in Italia habitabant, atque etiam regionibus & tribubus ipsam urbem circumjacentibus distincti essent, postquam civitate cum jure suffragii donati erant, sive municipales & coloni essent.

Solitum erat hisce comitiis creari Magistratus minores, quales erant Tribuni plebis, Ædiles plebis, Adiles Curules, Quæstores, Triumviri Capitales, Triumviri Nocturni, Triumviri, Tribuni militum. De quibus Vid. Liv. l. 2. cap. 56. Gell. l. 6. cap. 9. Liv. lib. 4. & 9. 25. 23. fiebat quoque Sacerdotum in Collegia cooptatio. Sacerdotum vero non omnium. Quidam enim a collegis suis cooptabantur, quales erant, Salii, Luperci, Fratres Avernales, Sacerdotes Galli & Sodales Titii, Vestales à Pontifice Max. Rex Sacrorum, centuriatis; Flamines & Curio Maximus Curiatis creabantur comitiis. Solus Pontifex Max. ante legem Domitiam, Tributis Comitii fiebat, donec deinde etiam Pontifices, Augures, Feciales, Semptemviri epulorum & Quindecimviri sacris faciundis creati fuere. Tertia tributorum comitiorum causa fuit *legumlatio* non omnium, sed earum quas Tribuni pl. ferebant, quæque plebiscita appellabantur. Ut ad §. 2. diximus, & in eo a lege differunt, quod lex à populo ferebatur, *Senatorio magistratu interrogante veluti consule.* Plebiscitum autem plebs plebejo Magistratu interrogante veluti Trib. pl. constituebat. Itaque plebiscito non universus tenebatur po-



populus, verum plebs tantum, lex vero omnem populum, id est, Patricios & Senatores æque ac plebem obligabat. Donec lege Hortensia L. Valerio & Horatio Coss. sancitum fuit, ut quod plebs tributim jussisset populum teneret. Unde plebiscita leges quoque appellata fuere.

Quarta tributorum comitiorum causa *judiciorum exercitatio*. Scil. ejusmodi judicia, quæ mulctæ alicui indicendæ causa exercebantur. Personæ, quibus tributorum comitiorum habendorum jus erat, erant Tribuni pl. Consules, Prætores, Dictatores. Personæ, quæ suffragia tulerunt, erant omnes cives Romani, per tribus 35. distributi, non solum, ut diximus, qui Romæ, verum etiam qui extra urbem in Italia domicilium habebant. Locus, ubi habebantur, non unus erat hisce comitiis, quemadmodum aliis, ut Curiatis & centuriatis, destinatus. Verum interdum in *Campo Martio*. Aliquando in *Comitio*, nonnunquam in *Præis Flaminiis*, vel *Circo Flaminio*. De tempore idem dicendum, quod de aliis observatum, scil. non potuisse nisi diebus comitialibus haberi. Et antequam habebantur indici oportebat a Magistratu, qui ea habiturus erat trinundino antequam haberentur. Notandum vero in hisce habendis comitiis auspicia observari non solitum fuisse, ut in aliis moris fuisse ostendimus. Quod de avium inspectione, & tripudiorum animadversione intelligendum. Quippe observatio de cælo, ut in aliis, tributis quoque adhibebatur.

Populus suffragia daturus in tribus discedebat. Deinde sortitiones fiebant. Quæ variæ erant, sed quarum omnium prima, in qua tribu Latini suffragia ferebant. *Testibus datis, Tribuni populum summovertunt: Sitellaque allata est, ut sortirentur, ubi Latini suffragium ferverent.* Liv. l. 25. c. 3. Altera sortitio fiebat inter Tribus, quo ordine quæque earum suffragium latura esset. In cistas autem populus tabellas sui suffragii mittebat per pontes transiens. Unde apud Cic. *Pontes disturbat, cistas dejicit.* Multi enim pontes erant, multæque cistæ, cum

multæ essent tribus; in cujus pontis initio stabant *Diribitores*, qui populo tabellas ministrabant.

Ex multis autem locis constat, eum ipsum, qui Comitia tributa habebat, cistam deferre colligendis per tribus suffragiis, solitum fuisse, isque *Rogator* dicebatur. Nominibus Tribuum vero in cistam conjectis, quæ prima exierat, prima suffragium dabat. Quod jus primi suffragium ferendi prærogativa dicebatur. Sitellæ in sortiendi mentio est apud Plaut: in *Casina act. 2. scen. 6.* Appone hic sitellam sortis crede mihi: Et apud Cic. *Dum tabellæ diribuntur, dum sitella desertur, dum æquantur sortes, dum sortitio fit.* Et lib. 1. de nat. Deor. *Ut igitur T. Gracchum cum videor concionantem in Capitolio videre de M. Octavio deferentem sitellam.* Unde apud Turneb. *advers. l. 13. c. 13.* vetustæ legis fragmentum, *Ad sitellam sorti veniet, is in eam sitellam manum dimittito.* Iterum. *Sortem ex hac lege apertam brachioque aperto literam digitis opertam.* Colligebantur autem suffragia viritim, ita ut omnes, qui ex eadem Tribu essent, rogarentur, & quum tota tribus suffragium tulisset, numerabantur sententiæ, id est tot puncta notabantur in tabella, quot tabellæ similes reperiebantur, & in quam plures consensisse videbantur, ea tribus sententia renuntiabatur. Rosin. *antiq. l. 6. c. 20.* Et Gruch. *l. 2. c. 4.* Observandum vero initio vocibus & sententiis palam coram omni populo suffragia ferre solitum fuisse, postea lege Cassia à L. Cassio Longino lata hunc morem suffragii ferendi introductum. Verum cum animadversum hanc legem mentes hominum tegere, ac cuique libertatem dare, ut quod vellent facerent, promitterentque quod rogarent, ac libidinem occultaret, ad pristinam consuetudinem redditum. Hinc Cic. *Orat. contra Rullum. Sed tamen (ait) magnificentius & ornatus esse illo nihil potest, quod meis comitiis non tabellam indicem tantæ libertatis, sed vivam vocem præ vobis indicem vestrarum erga me voluntatum ac studiorum tulistis.* Petituri autem magistratum candida veste induti,



duti, unde candidati nuncupati, tribus circuibant, manus singulorum prensabant, & quoscunque etiam ex infima plebe homines rogabant, ut in consequendis honoribus se suis suffragiis adjuvarent. Unde Plutarch. in *Coriolano* de more petentes consulatum rogabant & prensabant cives togis in comitiis sive tunicis amicti, sive quo magis ea specie summitterent se ad petitionem, sive quo subicerent oculis, qui cicatrices habebant, perspicuas virtutis notas.

*S. 21. Itemque ut essent, qui ædibus præessent, in quibus omnia scita sua plebs deferebat: duos ex plebe constituerunt: qui etiam ædiles appellati sunt.*

**I**temque ut essent qui Ædibus præessent, in quibus omnia scita sua plebs deferebat, duos ex plebe constituerunt: qui etiam Ædiles appellati sunt.] Tres in Republica Ædiliū ordines fuisse apud Veterum monumentorum autores legimus, quorum alii *Plebei*, alii *Curules*, alii *Cereales*. Plebeja vero Ædilitas cæteris vetustior, utpote quæ cum tribunatu plebis reipub. inducta. Quanquam non simul cum tribunis in monte sacro creati sint, ut tradit Dionys. l. 6. Verum cum, inita inter patres & plebem concordia, plebs quæ in montem sacrum secesserat, in urbem rediisset, à Senatu petiit sibi permitti quotannis duos e plebe viros designent, qui tribunis subministrant quicquid opus sit: & lites, quas tribuni eis commiserant, judicent, ædiumquæ sacrarum, locorum publicorum, atque annonæ curam habeant. Hoc quoque per Senatum concessō, creaverunt quos tum mini-

stros & collegas ac iudices tribunorum appellabant, nunc vero ab officiorum una vernacula lingua *Ædiles* (id est *Sacrarum Ædium curatores*,) vocant, potestatem habentes alterius Magistratus ministram, ut antea. *Ædiles* itaque appellati, inquit Pomponius, quod *ædibus* præerant; & *Ædibus* quidem sacris, iisdemque publicis; & videtur Pomponius verbum *Ædibus* ad *Ædem* sacram *Cæreris* solummodo referre, in qua omnia sua scita plebs deferrebat, & Senatus quoque consulta asservabantur, *ab iisdem consuli-bus institutum. Ut Senatusconsulta in Ædem Cæreris ad Ædiles plebis deferrentur, quæ ante arbitrio Consulum supprimebantur, vitiabanturque.* Liv. l. 3. c. 55. Quod munus Imperante Augusto translatum ad *Quæstores*, penes quos mansit perpetuo ætate *Cæsarum* eorum custodiendorum cura, & mutata illa consuetudine, in intimo reponebantur *ærario*. Pomponio quoque adstipulatur Varro. Testatur quoque Zonaras *Annal. Tom. 2. Creatis Tribunis duos iis fuisse adjunctos adiles, quorum ministeriis ad literas uterentur. Qui cum omnia decreta, omnia plebis scita, & Senatusconsulta acciperent atque asservarent, nihil eos eorum omnium quæ agebantur latebat. Olim igitur his de causis, dicendi juris ergo creabantur. Post autem cum alia, tum rerum venalium forum eis est commissum. Unde à Græcis ἀγορεύουσιν appellantur.*

Videtur secundum Pomponii mentem initio sacrarum tantum *ædium* curam ad *Ædiles* pertinuisse, verum postea privatorum quoque *ædium* aliarumque rerum curam habuisse testantur scriptores. Cum enim urbis intererat, ne in ea domus ruinosa essent vel inordinate extractæ, quo aspectus deformaretur, privatarum quoque *ædium* curam egerunt teste Varrone l. 4. Præterea curabant, ut loca publica, Theatra, stadia, fora, porticus, Basilicæ, atque mœnia, magnificis operibus reficerentur. Tum quoque feriarum & sacrificiorum certaminumque curam Senatus *Ædilibus* commisit.



Viarum , cloacarum , aquæductuum publicorumque quasi omnium operum tutela atque cura iis commissa. Insuper mensurarum ac ponderum , rerumque in urbe venalium examen iis erat. Unde Juvenalis *Satyr. 10. vers. 102.*

*Et de mensura jus dicere , vasa minora*

*Frangere pannosus vacuis Ædilis Ulubris.*

Et Perf. *Sat. 1. vers. 130.*

— — — *Italo quod honore supinus ,*

*Fregerit Heminas Arreti Ædilis iniquas.*

*Hemina* est mensuræ genus dimidium sextarii continens. Verum quia Ædiles mensuris præerant , pro qualibet mensura hic ponitur quas iniquas frangebant. A Græcis dicuntur μέτρα νοβολὰ mutilæ mensuræ , ut πλάττει falsæ , apud Plaut. *Si quæ improbæ sunt merces , jactat omnes , adilitatem gerit.* Et in l. 13. §. 8. ff. locati. *Si quis mensuras conduxerit , easque magistratus (scil. Ædilis) frangi jussuerit , siquidem iniquæ fuerunt &c.* Plura adhuc de ædilitate , ubi ad §. 26. pervenerimus.

§. 22. Deinde cum ærarium populi auctius esse cœpisset : ut essent illi qui præessent , constituti sunt quæstores , qui pecuniæ præessent : dicti ab eo , ( quod ) inquirendæ , & conservandæ pecuniæ causa creati erant.

**D**einde cum Ærarium populi auctius esse cœpisset. ] Ærarium aliquando sumitur pro loco & repositorio ipsius

ipsius pecuniæ publicæ. Ut apud Cæs. de bell. Civ. *Quibus rebus Romam nunciatis tantus repente terror invasit, ut quum Lentulus Consul ad aperiendum ærarium venisset, ad pecuniam Pompejo ex Senatusconsulto proferendam, protinus aperto sanctiore ærario ex urbe profugeret.* Non nunquam denotat ipsam pecuniam quæ in ærario recondita asservabatur. Dictum ab ære, quod veteres ærea utebantur pecunia. Hinc Isidorus lib. 16. *Antiquissimi nondum auro argentoque invento, ære utebantur, nam prius ærea pecunia in hominum usu fuit, postea argentea, deinde aurea subsecuta, sed ab ea qua capit, nomen retinuit, unde & ærarium dictum, quia prius tantum æs in usu fuit, & ipsum solum recondebatur.* Servius Romanorum Rex primus æs signavit nota pecudum, unde pecunia appellata Plin. l. 33. c. 3. *Quanquam alii ad Saturnum primum nummorum signandorum & monetæ in formam incutiendæ usum referant, in qua ab una parte caput ejus impressum, altera navis, qua in Italiam vectus erat, apud Tertull. Apologet. advers. Gent. cap. 10. Si quæras rerum argumenta, nusquam invenio fideliora, quam apud ipsam Italiam, in qua Saturnus post multas expeditiones, postquam Attica hospitia consedit, exceptus à Jano, vel Jane ut Salii volunt, mons quem incoluerat, Saturnius dictus, civitas quam depopulaverat, Saturnia usque nunc est, tota denique Italia post Oenotriam, Saturnia cognominabatur; ab ipso primum tabula, & imagine signatus nummus & inde ærario præsidet.* Hinc Ovid. in 1. Fast.

*Multa quidem didici: sed cur navalis in ære*

*Altera signata est, altera forma biceps?*

Æs Janus primus signavit Macrob. Satur. l. 1. Hinc quoque ærarii præsidem appellavere. Æs itaque pro omni pecunia sive argento sive auro facta. Seneca de benef. l. 5. cap. 14. *Æs alienum habere dicitur & qui aureos debet, & qui Corium forma publica percussum, quale apud Lacedæmonios fuit.* Ærarium autem in æde Saturni a Valerio Publicola constructum, constitutum voluerunt.

*Aurum;*



*Aurum, vasa Numa, Saturniaque impulit Æra,  
Vestalesque urnas, & Tuscum fictile mutat.*

Æs inquit Vet. Scholiast. in *ade Saturni condebatur*, nondum argento auroque signato. Unde *ararium* nomen accepit &c. Rationem, quamobrem potissimum ædem Saturni præ cæteris locis Romani elegerunt, tradunt, quia aureo illo sæculo, quo Saturnus vixit, Italiamque incoluit, nullum admissum furtum, aut, ut Macrobius ait, quia sub illo nihil erat privatum. Vel ut alii volunt ob reverentiam sacri loci, qui inviolabilis censebatur, ideoque tutissima credebantur, quæ in iis deponerentur. Verum illorum sententiæ subscribo, qui censuerunt, Valerium Publicolam Saturni ædem æris publici, legum, Senatusconsultorum tabularumque publicarum, & signorum militarium Sacrarium esse voluisse, quia locus erat provida naturæ manu munitissimus, omni aditu perseptus, undique præruptus, accessu difficilissimus. Plutarch. in *Problem.* Qui (inquit) Saturni templo utuntur loco ararii ibidemque contrahentium monumenta adservant? an quia obtinuit opinio, regnante Saturno avaritiam apud homines, injustitiam locum non habuisse, sed fidem & justitiam? Aut quia Deus ille fructibus atque agricultura præesse creditur. Ex ubertate autem frugum & venditione pecuniæ nascitur copia. Itaque Saturnum autorem custodemque ejus faciunt. Aut (inquit) hæc quidem vetusta sunt. Primus autem ædem Saturni ararium fecit post reges exactos Valerius Publicola, cum sentiret locum istum munitum esse, & conspicuum ab insidiis tutum.

Ærarium Romæ triplex fuisse, opinantur quidam: unum, in quo civium tributa ac sacrorum vectigalia & præda Imperatorum asservabatur, quo sumptus bellorum ordinarii sustinebantur. Alterum sanctius. Tertium fuit in quo pecunia Gallici belli causa servabatur, de quo Appianus l. 2. de bell. Civ. Post hæc (inquit) perfregit Cæsar ararium, tribuno pl. Marcello obstanti mortem minatus, inde  
siste

sisteret; pecuniasque ad id temporis intactas abstulit, quas ferunt per Gallicos tumultus depositas cum execratione publica in caput cujuscunque contrectare ausi, nisi causa Belli Gallici. Ajebat enim, religione solutam Rempub. perdomitis a se Gallis, ut nihil inde sit periculi. Dionys. & Plutarch. vero ærarium in universum ab eo expilatum tradunt. Verum illud Ærarium, quod a Cæsare expilatum scribunt, a Floro appellatur sanctum. Ærarium (inquit) quoque sanctum, quia tardius aperiebant tribuni, jussit effringi: censumque & patrimonium populi Romani ante rapuit, quam imperium. Nonnulli tantum duplex fuisse ærarium volunt: unum quod vulgare, in quo ut diximus communis reipub. census & ordinaria recondebantur tributa. Alterum Sacrum quod ad ultimam reipub. necessitatem & extremam sublevandam laborantis reipub. fortunam destinatum erat, in quo aurum vicesimarium, quod ex vicesimis redactum, reponebatur. Quod & ærarium sanctius appellatum, de quo Liv. l. 27. cap. 12, Cetera expedientibus, quæ ad bellum opus erant, consulibus, aurum vicesimarium, quod in sanctiore arario ad ultimos casus servaretur, promi placuit. Et Cic. l. 7. ad Atticum Epist. 21. Capuam Cn. Cassius Trib. pl. venit, attulit mandata ad consules, ut Romam venirent, pecuniam de Sanctiore arario auferrent, statim exirent urbe relicta. Cæsar l. 1. bel. Civ. Lentulus cos. aperto Sanctiore arario ex urbe profugit. Sed & tertium addit Manutius scil. illud quo effracto, cum per annos multos clausum fuisset, C. Cæsar pecuniam universam belli civilis initio sumpsit, in quo conditum fuit aurum, quod in usum gallici belli erogandum asservabatur. Cum autem (inquit Manutius) tria araria memorantur, distinguuntur pecunia potius, quam loca: cum in uno Saturni templo publica omnes pecunie asserventur, sed in eo templo tres fuisse cellas, in quibus thesauri publici reponerentur, licet existimare. De effracto Cæsare ærario ita canit Lucanus



— — — — tum conditus imo,  
 Eruitur templo multis intactus ab annis  
 Romani census populi, quem Punica bella,  
 Quem dederat Perses, quem victi præda Philippi,  
 Quos tibi Roma, fuga Pyrrhus trepidante reliquit,  
 Quo te Frabricius regi non vendidit auro,  
 Quicquid parcorum mores servastis avorum,  
 Quod dites Asia populi misere tributum,  
 Victoriaque dedit Minoia Creta Metello,  
 Pauperiorque fuit tum primum Casare Roma.

Quantum vero pecuniarum inde abstulerit tradit Plin. l. 33. cap. 3. ubi inquit C. Caesar primo introitu urbis in civili bello suo ex ærario protulit laterum aureorum XXVI. M. & in numerato pondo CCC. M. & fuit aliis temporibus Respub. locupletior. Præterea non recondebantur tantum in ærario, ut dicere incepimus, opes reipub.; verum & Senatusconsulta, & leges in ære incisæ & tabulæ publicæ in eo servabantur. Unde Cic. 3. in Verr. Primum mihi literas publicas, quas in sanctiore ærario conditas habebant, proferunt. Et apud Suet. in Aug. cap. 9. Auctor est Julius Marathus ante paucas quam nasceretur menses, prodigium Roma factum publice, quo denuntiabatur regem populo Romano naturam parturire: Senatum exterritum censuisse, ne quis illo anno genitus educaretur: eos qui gravidas uxores haberent, quo ad se quisque spem traheret, curasse ne Senatusconsultum ad ærarium deferretur. Idem in Jul. Cas. cap. 28. Acciderat autem, ut is legem de jure Magistratus ferens, eo capite quo à petitione honorum absentes summovebat, ne Casarem quidem exciperet per oblivionem: ac mox lege jam in as incisæ & in ærarium condita, corrigeret errorem. In ærarium enim semel relatas leges nil ex illis absque nova ad populum rogatione mutari poterat. Suet. in August. cap. 49. mentionem facit ærarii militaris, a militibus, quorum causa constitutum sic dictum, ex illo enim pecunia militibus dividenda prome-

mebatur. *Ærarium* (inquit) *militare cum vectigalibus novis instituit*. Anno V. C. 758. ut Phig. refert M. *Æmilio & L. Aruntio* *coff.* Dionys. l. 55. tradit Anno V. C. 759. M. *Æmilio*, deinde Lepido, L. *Arruntio* *coff.* quum nullus reditus excogitari posset, quem omnes probarent, omnesque eum quari indignarentur, Augustus pro se & Tiberio pecuniam in *ararium*, cui *militaris nomen* indidit, intulit. Verum (inquit) cum hac pecunia sumptuum magnitudinem minima parte attingeret, ac perenni copia esset opus, Senatoribus negotium dedit, ut pro se quisque aliquam rationem inveniret. Cum autem multæ variæque de eo propositæ fuissent sententiæ, nulla earum probata, instituit ut *vigesima pars hæreditatum ac legatorum*, exceptis iis quæ proximè genere junctis ac pauperibus morte aliorum relinquebantur, in *ararium militare* inferrentur. Verum postea anno V. C. 766. Quia *vigesimæ pensio* adeo omnibus fere molesta erat, ut videretur aliquid novi motus excitatura, misso in Senatum libello, aliorum redituum excogitandorum negotium eis dedit: multis ea re in Senatu sermonibus agitata, nonnullisque etiam sibi per literas indicatis, quum quidvis eos facilius quam *vigesimam toleraturos* intelligeret, in agros & domos pensionem transtulit, ac confestim, non ostenso quantum aut quo pendendum cuilibet modo foret, alios alio dimisit, qui privatorum ac civium facultates describerent: qua ratione effecit, ut mallent *vigesimam pendere* quam novum illud subire onus. Dionys. l. 56. Alia quoque nova huic militari *ærario* constituit *vectigalia*, quibus tanquam subsidio niteretur. Ea fuere 1<sup>o</sup>. *centesima rerum venalium*, id est centesimus quisque nummus rerum auctione venditarum. Quare appellat Suet. in Calig. cap. 16. *Centesimam auctionum*. Hinc apud Tacit. 1. *Annal.* in fin. *Centesimam rerum venalium post bella civilia institutam deprecante populo, edixit Tiberius militare ararium eo subsidio niti.* Quam postea Tiberius *ducentesimam* fecit, ut Tacit. scribit l. 2. *Regnum in provinciam redactum est,*  
fructi-



*fructibusque ejus levare posse centesima vectigal professus Cæsar, ducentessimam in posterum statuit &c.* Hanc postea remittit C. Cæsar Caligula, ut ex nummo ejus æreo videre est, in cujus una parte inscriptum. C. CÆSAR DIV. AUG. PRON. AUG. S. C. in altera, COS. QUAT. PON. M. TR. P. IIII. PP. R. CC. Hoc est *Remissa ducentesima*. Et in nummo Galbæ. R. XL. Hoc est *remissa quadragesima*, ut apud Urfinum de Numis: legimus. Apud Tacit. l. 13. *Manet tamen abolitio quadragesimæ quinquagesimæque, & quæ alia ex actionibus illicitis publicani invenerant.* Bona quoque damnatorum in ærarium militare relata fuisse testatur Zonaras, qui Agrippæ Posthumi nepotis Augusti bona in ærarium relata refert. Sic quoque legem Papiam Poppæam incitandis cœlibum pœnis & augendo ærario, quam Augustus sanxit, inservisse tradit Tacit. 3. *Annal.* M. Pappio Mutilo, & Cn. Poppæo *coff.* Quamquam & ante legem ab Augusto latam tradit Valer. l. 2. c. 9. obtinuisse, ut ii, qui ad senectutem cœlibes pervenerant, æra pœnæ nomine in ærarium detulerint.

Postquam vero imperium Romanum ad Cæsares devolutum est, Principes ærarium suum habuere, diversum atque distinctum ab ærario populi, quod & fiscus appellabatur, id est, proprium Principis ærarium. *Res enim fiscales quasi propria & privata Principis sunt: l. 2. §. 4. ff. ne quid in loc. pub.* Et Plin. ad Trajanum. *Ac fortasse (inquit) non eadem severitate fiscum, qua ærarium cohibes, imo tanto majore, quanto plus tibi licere de tuo, quam de publico credis.* Seneca de benef. lib. 7. cap. 6. *Cæsar omnia habet, fisci ejus privata tantum ac sua, & universa in imperio ejus sunt, in patrimonio propria.* Et apud Ælium Spart. in Adriano. *Damnatorum bona in fiscum privatum redigi vetuit, omni summa in ærario publico recepta.* Sermonem hic habet de fisco privato, sive privato ærario, quasi alius esset fiscus præter privatum Principis, qui scil. publicus dicitur. Privati gra-

rii etiam mentio apud Cornel. Nep. in vita Attici cap. 8. *Excogitatum est (inquit) a quibusdam, ut privatum ararium, Caesaris interfectores ab equitibus Rom. constitueretur. Id facile effici posse arbitrati sunt, si & principes illius ordinis pecunias contulissent. Et alibi Spartianus in Adriano. Quae Antonius in privatum ararium congeri noluit: quare Senatu praecipiente in Aearium publicum sunt relata. Quod Aearium populi Romani aliquando quoque fisci nomine denotatur, apud Spartian: est in Adriano. Ad colligandam (inquit) gratiam nihil praetermittens, infinitam pecuniam, quae fisco debebatur, privatis debitoribus in urbe atque Italia, in provinciis vero etiam ex reliquis ingentes summas remisit &c. Habet igitur Princeps fiscum seu aearium privatum, quod proprium ejus patrimonium, quod alio peculiari, quam dignitatis titulo sibi acquisivit, vel donatione, vel emptione, vel legato aut haereditate. Unde à Zenone in l. 2. Cod. de quadrienn: praescript: haec distinctio observata. Et l. 3. §. 10. ff. de jure fisci. Si in locis fiscalibus, vel publicis religiosis aut in monumentis thesauri reperti fuerint: Divi fratres constituerunt, ut dimidia pars ex his fisco vindicaretur, item si in Caesaris possessione repertus fuerit, dimidiam aequae partem fisco vindicari. Utriusque aearii mentio in l. unic. Cod. de Quaest. & Magist. off. Sic quoque Inst. de rer: divis. §. 38. locus Caesaris distinguitur a loco, qui ad fiscum pertinet. Potest definiri fiscus, quod sit jus majestatis circa redditus publicos, sive circa reipub. patrimonium, ad tuendam dignitatem & potentiam suam Imperantibus concessam.*

Hodie vocatur Domeynen, Gallis Domanium Corona sive Francia. Quod Grotius vocat patrimonium populi cujus fructus destinati sunt, ad sustinenda reipubl: & regiae dignitatis onera. lib. 2. cap. 6. de jure bel. & pac. quod consequenter a regibus alienari nec in totum nec pro parte potest. Cum in hoc jus majus fructuario non habet. Unde apud Thuanum lib. 63. anno 1577. ubi Rex ordinibus communicat, se, si casus ferat, ut ad arma devenire necesse esset, pecunia



nia indigere, ideoque ad collationem in tam justum bellum faciendam, se decrevisse  $\bar{c}$  aureorum annuorum, <sup>615</sup> ex patrimonio regio in perpetuum alienare: idque ut accedente ordinum auctoritate fiat, expetere. Æmarus Burdegalensis Præses ordinum nomine respondit, & nullo casu alienari a Rege patrimonium coronæ multis verbis differuit. Quippe cujus Rex tantum sit usufructuarius, proprietate penes regnum manente: quam nullo tempore alienatam, ne quidem extrema necessitate urgente. Cum Joannes Rex apud Anglos captivus esset, meminerint homines: quippe fulcrum & columnen regni illud esse, quod sacrum inviolabile & proinde inalienabile majores semper existimaverint.

Populi autem Romani ærarium a primordio Reipub: exiguum & tenue fuit, verum interjecto tempore, tot provinciis tot regionibus devictis & Romano imperio adjectis, propagatisque longe lateque imperii finibus, indies magis magisque aucta sunt populi Romani vectigalia atque tributa, & inde auctius magis caput esse ærarium.

Ut essent, qui illi præsent, constituti sunt Quæstores, qui pecunia præsent ] Origo Quæstoribus creandis antiquissima est, & pene ante omnes magistratus, inquit Ulpianus l. unic. ff. de off. Quæst. Gracchanus Junius lib. 7. de potestatibus. etiam ipsum Romulum & Numam Pompilium binos Quæstores habuisse, quos ipsi non sua voce, sed populi suffragio crearent, refert. Sed sicuti dubium est, an Romulo & Numa regnantibus Quæstor fuerit; ita Tullo Hostilio rege Quæstores fuisse certum est. Sane crebrior opinio est apud veteres, Tullum Hostilium primum in Rempub. induxisse Quæstores. Hinc apud Tacit. lib. 11. Sed Quæstores, regibus etiam tum imperantibus, instituti sunt: quod lex Curiata ostendit, ab L. Bruto reperta. Mansitque Consulibus potestas deligendi, donec eum quoque honorem populus mandaret. Contra Canulejus tribunus pl. apud Liv. l. 4. c. 4. nullos Quæstores regum fuisse tempore tradit. Quid (inquit) postea? nullane res nova institui debet? &

quod nondum est factum ( multa enim nondum sunt facta in novo populo ) ea , ne si utilia quidem sint , fieri oportet? Pontifices , Augures , Romulo regnante nulli erant : ab Numa Pompilio creati sunt : census in civitate , & descriptio centuriarum classiumque quæ non erant , a Servio Tullio est facta : Consules nunquam fuerant , regibus exactis creati sunt. Dictatoris nec imperium , nec nomen fuerat , apud patres esse cepit. Tribuni plebis , adiles , quæstores nulli erant : institutum est ut fierent. Plutarchus in Poplicola , eorum primam institutionem ad P. Valerium Poplicolam refert , inquit. Quum esset enim ad bellum collatione stipendii opus , pro facultatibus civium , quod pecuniam neque ipse tractare vellet , neque permittere amicis , nec vero ut omnino in tecta privata pecunia publica deferretur , attribuit arario templum Saturni , quo ad nostram usque ætatem utuntur , populoque concessit ut duos quæstores crearet. Idem affirmat Zonaras Tom. 2. pag. 20. ubi de Poplicola differens. Pecuniæ ( inquit ) tractationem aliis mandavit , ne consulum per eam potentia augetur , tum primum quæstoribus designatis. In principio causarum rerum capitalium cognitioni præsuere , ab inquisitione veritatis Quæstores appellati? Post etiam arario sunt præfecti , iudicii aliorum curis commissis. Phigius 2. Annal. V. C. 244. auctores conciliare volens ex iis , quæ ex Zonara descripsimus argumentatur , quod si fuerint Regum tempore iidem quos Sex. Pomponius patricidii , & Livius perduellionis duumviros appellat , a quibus ob sororem occisam , Horatium trigeminum damnatum ambo scribunt ; non male profecto Junius Gracchanus tradit Romuli & Tullii Hostilii temporibus quæstores fuisse. Ipsos quidem regibus expulsis , Consulum tempore , perduellionis , sicut anno urbis 266. ; item falsi , ut anno 294. aliorumque criminum cognitioni præfuisse. Et verosimile est quæstorum munus ab initio tempore Regum de perduellione aliisque criminibus anquisivisse , & secundum leges de illis cognovisse & judicasse ; postea vero regibus exactis , publicæ pecuniæ curam iis commissam



missam & annuatim populo a Valerio Poplicola quæstores creandi potestatem concessam, qui ærario præessent, & pecuniæ tractationem haberent. Qui abs re nomen acceperunt, id est ab inquirenda vel quærenda pecunia quæstores dicti ut inquit Pomponius. Et Varro *l. 4.* Quicquid autem sit, verissimum est Quæstores hosce pecuniarios libera Repub. creatos, cum, ut Pomponius inquit, aucto ærario, opus fuit, qui præessent. Id accidit anno U.C. 269. si Dionys. & Liv. habenda fides. Plutarch. ad annos primos jam partæ libertatis refert. Et primo quidem duo creati, teste Plutarcho. *Publius Veturius & M. Minucius* & quidem ex patriciis, donec ut inquit Tacitus *eum quoque honorem populus mandaret.* Quod accidit anno Urb. 345. quando tres ex plebe creati sunt quæstores Liv. *l. 4. c. 43. & cap. 54.* eod. Livius autem *l. 2. cap. 41.* primos quæstores *Cassonem Fabionem & L. Valerium. C. Fabio & Servio Cornelio* *coff.* nominat. Dionysius quoque alterum horum nominat *Cassonem Fabium.* Tacitus autem alterum *Æmilium Mamercum* vocat. Verum Plutarchus, ut modo allegavimus, plane diversos ab hisce quæstores nuncupat. Creati autem primum anno post Tarquinius exactos 63 scribit Tacitus, in qua computatione a Dionysio & Livio iterum recedit, sed perperam. Quippe si eum sequemur, circa annum demum urbis 308 quæstores creatos statuamus necesse est. Quod a vero plane alienum, cum apud Livium & Dionysium post annum 269. sæpius quæstorum mentio. Quare pro 63 legit Lipsius 23 ut ratio constet.

Fuêre itaque initio duo quæstores, ad quos omnis publicæ sive Urbanæ pecuniæ cura pertinebat, quique ærario, quod in æde Saturni erat, ut jam diximus, præerant. Postea duo adhuc creati, qui consulibus ad ministeria belli præsto essent, & pecuniam militarem administrarent, Vid. Liv. *l. 4.* de quibus statim: Occurrit nobis hic examinanda quæstio, an Quæstores Urbani inter magistratus

numerandi. Corasius ad h.t. negat fuisse magistratus, quia nulloungebantur imperio: qui nec prehensionem, nec vocationem, & ita nec lictores, nec viatores habebant: ideoque a privato ad Prætorem in jus vocari poterat, ut ex *M. Varr. l. 21. rer. human. scribit Gell. l. 13. c. 13.* Verum meo judicio fallit Corasius. Magistratum enim esse vel ex eo intelligimus, quod populi creabatur suffragio *l. unic. ff. de offic. Quæst.* Comitibus curiatis olim, ut apud Tacitum. Magistratum creatione populo jam initio ab ipso Romulo Romæ fundatore concessa. M: Tullius quæstorem socium Proconsulis facit in publico munere administrando. Imo in divinatione Jurisdictionem tribuit quæstori. Ubi hoc Quæstori Cæcilio viro optimo, & homini aequissimo nunciatum est, vocari ad se Agonidem jubet. Judicium dat statim, si pareret, eam se & sua Veneris esse dixisse. Judicant recuperatores id, quod necesse erat: neque erat, cuiquam dubium, quin illa dixisset. Iste in possessionem bonorum mulieris mittit. Ipsam Veneri in servitutem adjudicat. Verum aperte Gell: citato loco cum inquit; Quæsitum esse memini in plerisque Romæ stationibus jus publice docentium aut respondentium, an quæstor populi Romani ad prætorem in jus vocari posset: id autem non exotiosa questione agitabatur: Sed usus forte natæ rei ita erat, ut vocandus esset in jus quæstor. Non pauci igitur existimabant jus vocationis in eum prætori non esse: quoniam magistratus proculdubio populi Romani esset, & neque vocari, neque si venire nollet, capi aut prendi, salva ipsius magistratus majestate, posset. Et Varronis sententiam profert, qui scripsit, Hos magistratus in jus vocari posse, qui potestatem neque vocationis neque prehensionis habent. Ex quibus perspicimus magistratus Romæ fuisse, qui neque prehensionem neque vocationem habuere. Quod & alibi etiam testatur Varro *lib. 12. apud Gell. c. 12.* Cum inquit, In magistratu alii habent vocationem, alii prehensionem, alii neutrum. Vocationem; ut consules & ceteri qui habent imperium. Prehensionem; ut tribuni plebis & alii qui ha-



*habent viatorem. Neque vocationem neque prehensionem; ut quaestores & ceteri, qui neque lictorem habent neque viatorem. Merito igitur Pomponius Quaestores magistratibus annumerat. Fuit autem Quaestura primus honoris gradus, namque hinc aditum reliquis adeuntibus magistratibus auspicabatur: Siquidem primis experimentis quaesturae initiati, qui nullis ante honoribus usi erant, inculpatæ vitæ testimonio ad ædilitatem, mox præturam, & demum consulatum evehebantur. Alexand. ab Alex: cap. 2. lib. 2. Quaestura non honoris ipsius finis, sed patefactus ad consulatum ac triumphos locus novis hominibus videbatur. Liv. lib. 4. cap. 54. Unde Appian: Alex: de bel. civ. lib. 1. Sylla (inquit) neque aliquem prius Praetorem quam quaestorem esse voluit, nec consulem antequam attingero. Et l. 11. ff. de Mun. & honor. Ut gradatim honores deferantur, edicto, & ut a minoribus ad majore perveniatur, Epistola Divi Pii ad Tatianum exprimitur. Et in l. 14. §. 5. Gerendorum honorum non promiscua facultas, sed ordo certus huic rei adhibitus est; nam neque prius majorem magistratum quisquam, nisi minorem suscepit, gerere potest; neque ab omni ætate, neque continuare quisquam honores potest. Et Ulpianus l. unic. ff. de offic. Quaest. §. 3. dicit quaestoriam dignitatem ingressum esse & quasi primordium honorum gerendorum, sententiaque in Senatu dicenda.*

Urbanorum Quaestorum munus, ærarii & vectigalium populi Romani curam gerere, ut supra diximus: tum si quid pecuniarum publice vel privatim erogari, vel in ærarium condi deberet ad eorum curam pertinebat. Inde captis a Marcello Syracusis Quaestor cum præsidio ad Nasum ad accipiendam pecuniam regiam, custodiendamque missus Liv. l. 25. c. 31. Cumque exercitus scribi, & legiones in campum duci oporteret, signa militaria ex ærario depromere, atque ad consules in expeditionem ituros mittere. Hinc apud Liv. l. 3. c. 69. Hæc omnia adeo maturè perfecta acceperimus, ut signa eo ipso die a quaestoribus ex ærario prompta delataque in campum quarta diei hora, mota ex

*campo sint.* Legatos ab ultimis terrarum oris Romam venientes, pro dignitate populi Romani excipere, iisque obviam proficisci ipsorum demandabatur curæ, publicum hospitium & munera, quæ lautia dicta sunt, commeatus large & hospitaliter exhibere, & quandoque vestimenta per questorem Reipub. nomine præstabant legatis eorumque comitibus. Sic Prusiæ Bithyniæ regi Romam venienti datus, qui circumduceret eum L. Cornel. Scipio quæstor, qui & Capuam ei obviam missus fuerat: & ædes quæ ipsum comitesque ejus benigne reciperent ab eo conductæ. Liv. l. 45. cap. 44. Valer. Max. l. 5. c. 1. & l. 6. c. 6. n. 5. *Legatos ab Urbe Apollonia Romam missos, Cn. Fabius, & Cn. Apronius adiles orta contentione pulsaverant; Quod ubi compertit, continuo eos perfectiales legatos dedit, quæstoremque cum his Brundisium ire jussit, ne quam a cognatis in iunere deditorum injuriam acciperent.*

Quod autem ad commeatus & vestimenta attinet, scribit Liv. l. 42. c. 6. Legato Antiochi regis centum millium æris munus missum, & ædes liberas hospitio datas, sumptumque decretum, donec in Italia esset. Sic Legatis Masinissæ Regis in singulos dona ne minus quinum millium, comitibus eorum millibus aris: & vestimenta bina legatis, singula comitibus, Numidisque; qui ex custodia missi redderentur regi, ad hoc ædes, libera loca, lautia legatis decreta. Liv. l. 30. c. 17. Duo igitur principio quæstores Urbani vel ærarii dicebantur, quorum curæ ea, quæ jam enumeravimus, demandata erant. Postea cum de plebe promiscue etiam fieri cæperunt, duo adhuc creati, qui rem militarem comitabantur, & consulibus apud exercitum aderant, annonam, stipendia & commeatus suppeditantes. Privatam militum pecuniam apud signa depositam custodiebant, manubias ærario Pop. Rom. publicandas recipiebant & de his apud Quæstores Urbanos reddebant rationem Phig. lib. 2. Qui numerus mansit usque dum Italia tota stipendiaria facta, tum postea ad tractanda provinciarum vectigalia, in quas  
cum



cum Proconsulibus & Proprætoribus forte mittebantur, facti sunt. E quibus duo in urbe manebant, reliqui in provinciis rem curabant. Tacit. l. 11. *Mox duplicatus numerus, stipendiaria jam Italia, & accedentibus Provinciarum vectigalibus.* Quod accidit circa annum urbis CDLXXXVIII. Postea lege Syllæ ad viginti numerum aucti, ut de fontibus pænas exigent tradunt authores. Vid. Tacit. d. loco. Quem numerum C. Julium Cæsarem iterum duplicasse testatur Dio l. 43. ubi inquit. *Numerus autem magistratuum in reliquis idem qui ante observabatur, sed prætores quatuordecim, quadraginta quæstores facti sunt.* Notandum vero Quæstoribus Provincialibus ampliorem concessam potestatem, majusque datum imperium, quam cæteris. Itaque concessum ut lictores haberent, utque vestem cæteraque magistratus insignia in Provinciis ferre, ac de istius modi negotiis jus dicere possent. Unde Cic. in Verr. 3. *Ne diutius teneam, pecunia attributa numerata est: Profectus est Quæstor in Provinciam: Venit in Galliam expectatus ad exercitum consularem cum pecunia. Hi autem Quæstores, lictores, & vestem, & insignia quæstoria habebant: Quod Ciceronis significant verba. Nam simulac me Dyrrachium attigisse audivit Plancius, statim ad me lictoribus dimissis, insignibus abjectis, veste mutata profectus est. Et 1. in Verr: Sic enim a majoribus accepimus, Prætorum Quæstori suo, parentis loco esse oportere: nullam neque gratiorem, neque justiore causam necessitudinis posse reperiri, quam conjunctionem sortis, quam provinciæ, quam officii, quam publicam muneris societatem.* Scribit vero Dio dicto loco. anno V. C. 709. a Julio Cæsare ærarii procurationem a Quæstoribus ad ædiles translatam, quæ postmodo ad quæstores non rediit, verum prætoriis viris demandata: Cujus auctorem Augustum Suetonius fuisse scribit cap. 36. Auctor (inquit) & aliarum rerum fuit: in quæis, ne acta Senatus publicarentur: ne magistratus deposito honore statim in provincias mitterentur: ut proconsulibus ad muros, & ta-

bernacula, quæ publicæ locari solebant, certa pecunia consti-  
 tueretur: ut cura ærarii a quæstoribus urbanis ad prætorios Præ-  
 toresve transfret: quæ forte causa fuit, ut Augustus Præto-  
 rum numerum augeret, ita suspicatur Torrentius. Claudio vero eam quæstoribus reddit. Suet: in Claudio c. 24.  
 Collegio quæstorum pro stratura viarum gladiatorum munus in-  
 junxit; detractaque Ostiensi & Gallica provincia, curam æ-  
 rarii Saturni reddidit, quam medio tempore Prætores, aut uti-  
 que prætura functi sustinuerant. Verum quia deerat robur  
 ætatis eum primum magistratum capeissentibus, Nero Præ-  
 tura perfunctos & experientia probatos huic muneri præfe-  
 cit. Ut testatur Tacit. l. 13. Dein (ait) Princeps cu-  
 ram publicarum tabularum a Quæstoribus ad præfectos transtulit.  
 Corrupte hic Præfectura, pro Prætura perfunctos legitur, ut  
 vult Torrentius. Quod sic esse ipse Tacitus lib. 4. Histor.  
 ostendit, quo loco etiam sub Vespasiano administratum à  
 Prætoribus ærarium scribit. Secutum (inquit) est aliud  
 certamen. Prætores ærarii (nam tunc à Prætoribus tractabatur  
 ærarium) publicam paupertatem quæsti, modum impensis postu-  
 laverant. Quod ergo, inquit Torrentius, apud Gellium lib.  
 13. cap. 23. legimus curam ærarii a quæstoribus ad præfe-  
 ctum translata fuisse, id ita intelligemus, ut Præfectus ex  
 Prætoriis fuerit. Manubie (inquit) sunt, sicuti jam dixi,  
 non præda, sed pecunia per Quæstorem Pop. Rom. ex præda  
 vendita, contracta. Quod per Quæstorem autem dixi intelli-  
 gi nunc oportet Præfectum ærario significari. Nam cura æra-  
 rii a quæstoribus ad Præfectum translata est. Sub Nerone ita-  
 que videtur ex Prætoriis creatos dici Ærario præfectos: quo-  
 rum in jure nostro sæpissime mentio. Ut in l. 15. §. ult. ff.  
 de jur. fis. & l. 42. eod. l. 2. §. 4. ff. ne quid in loc. pub. &  
 passim aliis in locis. Cæterum silentio non prætereundum  
 quod præter eos, qui ad colligendam pecuniam provincias  
 fortiebantur, novum sub Imperatoribus cæpisse quæsturæ  
 genus, qui dicebantur Candidati Caesaris sive principis,  
 de quibus Ulpianus l. unic. ff. de offic. Quæst. qui proprio  
 munere



munere quæsturæ non fungebantur, verum solis libris principalibus in Senatu legendis vacabant, quique epistolas ejus in Senatu legunt. Quos voces regia lingua Cassiodores vocat, Suet. in Nerone. cap. 15. Orationes ad Senatum missas, præterito Quæstoris officio, per consulem plerumque recitabat. Sic etiam in Augusto cap. 65. Nam Caii Luinii casu non adeo fractus, de filia, absens, ac libello per quæstorem recitato notum Senatui fecit: ita quoque in Tit. cap. 6. Receptaque ad se prope omnium officiorum cura, cum patris nomine & Epistolas ipse dictaret & edicta conscriberet, orationesque in senatu recitaret etiam quæstoris vice. Tacit. l. 16. Oratio principis per Quæstorem ejus audita est. Vid. Dion. l. 54. & 55. Vellejus l. 2. c. 124. scribit se & fratrem suum aliquando candidatos Cæsaris fuisse. Spartian: in Hadriano. c. 3. Quæsturam gessit Trajano quater & Arunculejo coff. in qua cum orationem imperatoris in Senatu agrestius pronuncians risus esset, usque ad summam peritiam & facundiam Latinis operam dedit.

Oblervandum vero progressu temporis munus & potestatem Quæstorum libellis & epistolis Principum vacantium adeo crevisse & auctam fuisse ab ipsis Cæsaribus, ut legibus dictandis, respondendisque precibus, consiliisque imperatori dandis adhibiti fuerint. Unde in epistolis Symmachi Quæstor legum conditor dicitur, & condendarum sanctionum usu exercitatus, itaque omnia faciebant, quæ ad munus & dignitatem cancellariorum pertinent, ut rescripta nisi ab illis subscripta robur haberent. Nov: 114. cap. 1. quamobrem Quæstores sacri Palatii dicti, & inter illustres personas relati. l. 2. eod. de offic. Quæst. & in l. 32. cod. de appell. vocatur Vir illustris Quæstor sacri palatii: sacris Judiciis præsidens, Nov. 126. qualis fuit Tribonianus, ut constat ex inscriptione constitutionis de veter. jur. enucl. Dicebatur hic Quæstor apud Græcos *παρὰ δέξιν*, ut testatur Procopius l. 1. de bel. Pers. eratque summus post Principem magistratus: qui Principis responsa & rescripta dictabat,

bat, omniaque civilia negotia tractabat, sicuti hodie apud Gallos cancellarius. Balduin. *ad inst. Præm.* Patet Quæsturæ dignitas & munus ex Cassiodoro l. 5. *Variar. Epist.* ubi Theodoricus Rex Senatui urbis Romæ ita rescribit. *Omnes quos ad quæsturæ culmen evehimus, doctissimos existimamus, quales legum interpretes & consilii nostri decet esse participes.* Dignitas ejus nec divitiis nec solis natalibus invenitur, sed tantum eam doctrina cum conjuncta potest impetrare prudentia. Nam licet in honoribus aliis beneficia conferamus, hinc semper accipimus. Est nimirum curarum nostrarum felix portio, Januam nostræ cogitationis ingreditur pectus, quo generales curævolvuntur, agnoscit. Æstimate quid de illo debeat judicari, qui tanti particeps sit secreti. Ab ipso legum peritia postulatur, illuc vota consuunt supplicantium, & quod est omni thesauri pretiosius, penes ipsum civilitatis nostræ fama reponitur.

*Dicti ab eo, quod inquirende & conservandæ pecuniæ causa creati sunt.* Superius de nominis derivatione quædam disputavimus, & secundum Varronem a quærendo quæstores dictos statuimus. Lib. 5. *de ling. lat.* inquit *Quærere ab eo, quod quæ res ut recuperaretur datur opera: à quærendo quæstio, ab heis conquæstor.* Verum ut genus quærendi non unum, ita nec unum genus quæstorum, nam & quæstores rerum capitalium dicebantur, qui quærendarum rerum capitalium causa creabantur, de quibus statim,



§. 23. *Et quia, ut diximus, de capite civis Rom. injussu populi non erat lege permissum consulibus jus dicere, propterea quaestores constituebantur a populo, qui capitalibus rebus praeessent. Hi appellabantur quaestores parricidii: quorum etiam meminit lex XII. tab.*

**E**T quia ut diximus de capite civis Romani injussu populi non erat lege permissum consulibus jus dicere. Propterea Quaestores constituebantur a populo, qui capitalibus praeessent. ] Judicium publicum sive capitale primum ipsos reges exercuisse auctor est Dionysius, qui Romulum regem delicta maxima cognovisse, minora Senatoribus permisisse tradit. Et Liv. l. 1. c. 48. ait Tarquinium Superbum cognitiones rerum capitalium, sine consiliis per se solum exercuisse: per eam causam occidere, in exilium agere, bonis mulctare potuisse. Quæ potestas exactis regibus ad consules translata fuit, quippe ut Liv. l. 2. tradit, ex regia potestate nihil fuit diminutum. omnia jura, omnia insignia primi consules tenuêre. Verum postea, ut superius ad §. 16. annotavimus, lege Valeria Consulibus de capite civis Romani jus dicere vetitum fuit, poterat tamen permitti speciali lege vel Senatusconsulto. Hinc constituti sunt Quaestores, qui publicis judiciis sive quaestionibus capitalibus praeessent. Qui magistratus non perpetuam habebat potestatem, sed erat extraordinarius, qui quoties res posce-

sceret, cum aliquod enorme & atrox crimen animadversione & extraordinaria pœna dignum, admissum esset. Ut apud Livium ob sororem occisam perduellionis duumviri creati fuere, qui Horatium perduellionis judicarent. Ipsæ autem quæstiones, quibus præerant, extraordinariæ dicebantur, iisque extra ordinem præficiabantur quæstores, quare merito magistratus extraordinarii dicuntur.

Quoties enim ejusmodi crimen commissum erat, toties populus vel plebs rogabatur, num vellet de hoc vel illo quæri & plebiscito quæstio, cui plebs vellet, decernebatur. Quem usum & morem judicandi pluribus locis adfert Livius: unde Cossio & Medullino Coss. Anno U. C. CCCXL. *Senatusconsultum factum scribit, ut de quæstione Posthumiana cadis tribuni pl. primo quoque tempore ad plebem ferrent: plebsque præficeret quæstioni, quem vellet. A plebe consensu populi consulibus negotium datur. lib. 4. c. 51. Et l. 38. c. 54. Hoc autore existimantur Petilii & vivo Africano rem ingressi & mortuo rogationem promulgasse, fuit autem rogatio talis. Velitis, jubeatis, quaratur, quæ pecunia capta, oblata, coacta ab rege Antiocho est, quique sub ejus imperio fuerunt: quod ejus in publicum relatum non est, uti de eare Ser. Sulpicius Pr. Urbanus ad Senatum referat? Quem eam rem velit Senatus querere de iis, qui Pratores nunc sunt. Omnes tribus, uti rogasset, jusserunt. Ser. Sulpicio deinde referente, quem rogatio Petilia querere vellent, C. Terentium Culleonem patres jusserunt. Sic quoque lib. 9. c. 26. Cum omnia infida Romanis essent, Capua quoque occulta principum conjurationes factæ, de quibus cum ad Senatum relatum esset, dictatorem quæstionibus exercendis dici placuit C. Nævius dictus. Atque in hunc quidem modum usque ad annum DCIV. quæstiones publicæ exercitæ sunt. Deinde perpetuæ quæstiones esse ac proprium quæsitorem habere cœperunt. Postquam L. Piso tribunus plebis legem tulit, quæ quæstionem repetundarum perpetuam fecit, ut Cicero testatur in Bruto hisce verbis. Carbone forum tenente plura judi-*



*dicia fieri caperunt. Nam & quæstiones perpetuæ hoc adolescente constituta sunt, quæ nulla ante fuerant. L. enim Piso trib. pl. legem primus de pecuniis repetundis Censorino & Manilio coss. tulit. Qui locus nostram sententiam confirmat; quippe si tum demum quæstiones perpetuæ constitutæ sint; Ante illam igitur a Pisone latam legem magistratibus, qui quæstionibus exercendis præficiébantur, potestas perpetua sive ordinaria non fuit data. Quæstio autem dicebatur perpetua, quando Prætori in singulos annos mandabatur. Ex quibus manifestum est, antequam aliæ quæstiones perpetuæ introductæ fuere, nemini hæc potestas annua sive quæ hoc sensu perpetua dici potest, competeat, sed ut diximus, quoties res posceret, aut consules, aut dictator vel prætor Senatusconsulto aut lege quærere jubebatur. Interjecto vero tempore quæstio quoque de *peculatu*, de *majestate*, de *ambitu* perpetua facta est. Et singulis sui Prætores præfecti, atque tum si de aliquo horum criminum quærendum esset, non novo quæsitore vel quæstore, extra ordinem Senatusconsulto vel lege creato, opus erat, verum Prætor ei quæstioni præfectus adiebatur, isque, ut ante, de crimine illo cum consilio cognoscebat.*

Verum notandum quanquam publicæ fuerint constitutæ quæstiones, tamen adhuc multas extra ordinem quæstiones aut S. C. aut plebiscito, ut ante, aut consulibus, aut magistratibus, vel etiam privatis hominibus mandatas fuisse: Sive, inquit Sig. lib. 2. de jud. c. 4. quia nulla dum lex de iis constituendis erat lata, sive quod lata illa erat quidem, sed pro rei atrocitate extra ordinem quærendum esse videbatur. Nam Anno. U. C. DCXI. P. Scævola tribunus tulit ad plebem, vellentne quæri de L. Tubulo, qui Prætor, cum quæstionem inter sicarios exerceret, ob rem judicandam pecuniam ceperat. Eoque plebiscito quæstio Cn. Capioni Cos. decreta est, ut inquit Cicer. 2. de fin. cap. 17. Anno deinde DCXV. D. Brutus, & P. Scipio Cos. ex S. C. quæstionem de cæde facta in sylva Sila exercuerunt,

erunt, ut idem scribit in *Bruto*. Sic Consules Piso & Messala rogationem promulgarunt, ut iudicium constitueretur in Clodium de pollutis cerimoniis. Cic. *Epist. ad Att.* 13. Notandum vero Quæstorum officium non solum fuisse de rebus capitalibus inquirere, accusatorem & defensorum ac testes in officio suo continere; verum etiam reo de quacunque quæstione publica diem dicere, eumque causa cognita ultimo supplicio afficere. Hinc errare mihi videtur Ventura Cæcus, illis assentiendum credens, qui eandem Quæstorum parricidii fuisse auctoritatem confirmant, quæ sub principibus fisci advocatorum fuit, inquirendi scilicet, & deferendi. Cujus contrarium ex supra allegato iudicio Horatiano constat. Sic Liv. lib. 3. cap. 24. & 29. scribit M. Volscus, quod falsus haud dubio testis in Cæsonem extiterat, ab Aulo Cornelio, & C. Servilio Quæstoribus diem dictam, eumque damnatum Lanuvium exulatum abiisse. Unde Sig. lib. 2. de jud. *Ac quæstorum quidem, sive ordinarii sive extraordinarii essent, quamquam potestas ab ea lege, qua creati erant, tota manavit; tamen omnium in his rebus collocata fuit, ut in foro, atque tribunali, & in sella curuli sedentes, iudice quæstionis aliquo operam fidemque navante, gladio, ut dixi, posito iudicium exercerent, cum eis iudicibus, qui eis obvenissent, sedentibus in suis subselliis, scribis vero, accensis, præconibus, lictoribus, aliisque apparitoribus assistentibus.* Quid autem gladius denotat aliud quam merum imperium? Quid autem est merum imperium, nisi potestas animadvertendi in facinorosos homines, & de fontibus pœnam ad mortem usque exigendi facultas? Id est jus vitæ & necis, cuius juris insigne gladius; Quod & Seneca ita intellexit, quando de Nerone sic loquitur, *nulli unquam citius gladium commissum fuisse.* Quare Imperatores pugionem ad hoc ipsum jus ostentandum gestare soliti, Cor. Tacit. l. 31. *Histor. de Vitellio, solum a latere pugionem Consuli in concione reddidisse, tanquam jus vitæ*  
& necis



*& necis in cives.* Quo spectat illud Pauli Apostoli, *non sine causa magistratum gladium ferre.* Ex quibus meo judicio satis clare perspicimus & inquirendi & exequendi potestatem habuisse quæstores. Et hi constituebantur a populo, ut inquit Jurisconsultus, eum in finem ut capitalibus rebus præessent, id est ejusmodi rebus, quæ caput in summum discrimen vocant, quæ mortis vel morti simili pœna luuntur ac puniuntur. Crimem capitale definit Festus Pompejus facinus quod luitur pœna capitis. Pœna autem capitalis est, *mors vel exilium*, sic dicta, quia per id pœnarum genus caput eximitur de civitate, l. 2. ff. de pub. jud. Rei capitalis damnatum sic accipere debemus, ex qua causa damnato vel mors, vel etiam civitatis amissio, vel servitus contigit. l. 2. ff. de pœn. Et l. 103. ff. de verb. sig. Licet (inquit Modestinus) capitalis Latine loquentibus omnis causa existimationis videatur: tamen appellatio capitalis mortis, vel amissionis civitatis intelligenda est. Amissio enim civitatis morti comparatur, Jurisconsultus enim in l. 63. ff. pro socio §. ult. Intereunt autem homines (inquit) quidem maxima & media capitis diminutione, aut morte. Sic deportati mortuorum loco habentur. l. 1. §. pen. ff. de bon. posses. cont. tab.

Hi appellabantur Quæstores parricidii: quorum etiam meminit lex XII. tabb.] Quæstores (inquit Varro lib. 4. de ling. lat.) a quarendo, qui conquirerent publicas pecunias, & maleficia, quæ triumviri capitales nunc conquirunt; ab his postea qui quæstionum judicia exercent, Quæstores dicti. Quæstores vocat Cicero in Divinat. ad quam Asconius, Quæstor est prator de pecuniis repetundis quæstionem exercens, nam proprie quæstores dicuntur criminalium quæstionum. Ut Virgilius Minoem capitalium rerum apud inferos judicem dixit. Virg. lib. 6. Æneid.

Nec vero hæc sine sorte data, sine judice sedes.  
Quæstor Minos urnam movet, ille silentium.

H

Con-

*Conciliumve vocat, vitasque, & crimina discit.*  
 Et Claudianus lib. 5. vers. 477.

— — — *Quæstor in alto,*

*Conspicius folio pertentat crimina Minos.*

*Et justis dirimit fontes.*

Et Cic. pro Fontejo. *Quid mihi opus est sapiente iudice? quid æquo quæstore? quid oratore non stulto.* Parricidii autem, ut inquit Festus, pro parici ut emendat Scaliger appellantur, quia solebant creari causa rerum capitalium quaerendarum. Nam paricida non utique is qui parentem occidisset dicebatur, sed qualemcumque hominem. Id autem fuisse indicat lex Numæ Pompilii regis his composita verbis: **SI QUIS HOMINEM LIBERUM DOLO SCIENS MORTI DUIT PARICIDA ESTO.** Idem: Quæstores dicebantur, quod quaerent de rebus capitalibus, unde qui talia quaerunt, quæstores paricidii appellantur. Paricidam enim veteres dixerunt quemcumque, qui hominem aliquem occidisset, quasi patrem cæcidisset: unde nonnulli paricidæ nomen tam a *pari*, quam a *Patre* derivari posse opinantur. Notandum itaque paricidii & paricidæ duplicem esse significationem: Unam latiore, alteram angustiore. Latiore significatione apud veteres paricida dicebatur quivis reus capitalis criminis. Ut apud Cic. lib. 2. de ll. *Sacrum sacrove commendatum, qui clepsit rapsitve paricida esto.* Et in lege Romuli, *Omne homicidium, paricidium.* Plutarch. in Romulo. Illud etiam Romuli proprium, quod cum nullam paricidæ poenam definiisset, homicidium omne paricidium nuncupari voluit: Quod hoc impium & nefarium, illud autem impossibile esse duceret.

Altera significatio paricidæ specialior est, & ad eum pertinet, qui aliquem ex proximis cognatis vel agnatis mortem intulit. ut explicatur in l. 1. ff. ad legem Pompejam de Paricidiis.



§. 24. *Et cum placuisset leges quoque ferri, latum est ad populum, uti omnes magistratu se abdicarent, quo decemviri constituti anno uno cum magistratum prorogarent sibi, & cum iniuriosè tractarent, neque vellent deinceps sufficere magistratibus, ut ipsi & factio sua perpetuò rempublicam occupatam retinerent: nimia atque aspera dominatione eò rem perduxerant, ut exercitus à republica secederet. Initium fuisse secessionis dicitur Virginius quidam, qui cum animadvertisset, Appium Claudium (contra jus, quod ipse ex vetere jure in duodecim tabulas transtulerat) vindicias filie suæ à se abdixisse: & secundum eum, qui in servitutem ab eo suppositus petierat, dixisse: captumque amore virginis, omne fas ac nefas miscuisse.*

cuisse. Indignatus, quòd vetustissima juris observantia in persona filiae suae defecisset (utpote cum Brutus, qui primus Romae Consul fuit, vindicias secundum libertatem dixisset in persona Vindicis Vitelliorum servi, qui proditionis conjurationem indicio suo detexerat) Et castitatem filiae vitæ quoque ejus præferendam putaret: arrepto cultro de tabernaculo filiam interfecit: in hoc scilicet, ut morte virginis contumeliam stupri arceret ac protinus recens à cæde, madenteque adhuc filiae cruore, ad commilitones confugit, qui universi de Algido, ubi tunc belligerendi causa legiones erant, relictis ducibus pristinis, signa in Aventinum transtulerunt, omnisque plebs urbana mox eodem se contulit (populi que consensu partim in carcere necati.)

ita



*ita rursus respublica suum statum recepit.*

**E**T cum placuisset leges quoque ferri, latum est ad populum] Ne populus incerto magis jure & consuetudine aleretur quam per latam legem, placuit tandem ex Senatusconsulto, ut legati crearentur, qui à Græcis civitatibus jura & leges peterent, quibus civitas fundaretur. De quorum suscepta legatione atque decemvittatu legibus componendis constituto, & legibus ab ipsis in duodecim tabb: redactis propositis, summoque ipsis concessio sine provocatione imperio, egimus ad §. 4. & 5. *h. t.* ubi & quædam de utilitate, summaque æquitate legis XII. tab. aliasque nonnullas ejusdem legis laudationes descripsimus. Decemvirorum creatio in annum incidit trecentessimum alterum post Romam conditam, si Livio fidem habeamus, tradit enim *lib. 3. cap. 33.* Anno trecentesimo altero quam condita Roma erat, iterum mutatur forma civitatis, ab consulibus ad decemviros, quemadmodum ab regibus ad consules venerat, translato imperio. Cui & adstipulatur Eutropius *lib. 1. cap. 18.* Anno CCC & altero (inquit) ab urbe condita imperium consulare cessavit, & pro duobus consulibus decem facti sunt, qui summam potestatem haberent, decemviri nominati. Romæ enim regnatum a regibus annis ducentis quadraginta quatuor, a consulibus 58. qui anni summam superiorem efficiunt. Juxta Livium & secundum ejus computationem anno trecentesimo secundo decemviros creatos fuisse dicendum videtur. Quod & Solinus quoque affirmat *cap. 2.* incidit enim decemviratus in annum, quo App. Claudius & T. Genucius consules fuere designati, ut ex fastis colligimus, fuit autem hic annus V. C. CCCII. Dionysius *lib. 10.* dicit Olympiade 82. hoc est annis ab urbe condita trecentis expletis. Et secundum ejus computationem

anno 303 decemviros magistratum iniisse dicendum videtur; quippe anno trecentesimo exacto, consules designatos tradit P. Horatium, & Sextum Quintilium, qua ratione Olympias eadem & prædicti consules pertinuerunt ad annum urbis conditæ sequentem scil. CCCI. Post consulatum Horatii & Quintilii Coss; subiicit L. Mæne-  
nium & P. Sestium id est anno V.C. 302. Et his immediate attexit primum annum imperii X virorum, qui ex mente auctoris erit annus urbis Romæ CCCIII, in quem annum consules fuere designati Appius Claudius & Tit. Genucius & propterea in decemvirorum fuere numero, ut honor pro honore redderetur ut ait Liv. l. 3. c. 33. Quem annum Livius dissentiens a Dionysio dicit fuisse trecentesimum alterum, ut statim diximus, unum annum numero Dionysiano detrahens. Anno trecentesimo altero inquit Livius, id est secundo. Alter enim sæpissime apud latinos pro secundus. Cic. ad Att: lib. 14. Ego & Formiano exiens XVII calend. ut inde altero die in Tusculanum, scripsi hæc. Et pro Cluent; Unus & alter dies intercesserat. Idem, Philipp. Altero, tertio, denique reliquis consecutis diebus, non intermittebas quasi donum aliquod afferre Reip. idem pro Cluent: cum is unum jam & alterum diem desideraret.

Uti omnes magistratus se abdicarent] Hæc lectio Florentina est, attamen non constat mihi cur vulgata retineri non posset: ut omnes magistratus se abdicarent sc. imperio quo ornati erant vel, ut omnes magistratus abdicarent, id est, ut omnes magistratum & imperium deponerent, eoque se sponte exuerent, ne quis illo anno magistratus præter decemviros esset. Frequentius tamen apud classicos authores magistratu se abdicare. Apud Liv. Valerius curia egressus, dictatura se abdicavit. Et idem. Factum Senatusconsultum, ut decemviri primo quoque tempore magistratu se abdicarent. Decemviris itaque constitutis, omnes alii magistratus cessarunt, summum penes eos residebat imperium, & suprema majestas, itaque nullum adversus illam potestatem auxilium,



lium, sublata ad populum provocatione, & Tribunorum cessante intercessione, iisque omni penitus erepta potestate. Unde Liv. *Placet creari decemviros sine provocatione, & nequis eo anno alius esset magistratus.* Apud Dionys. lib. 10. *Sed vicit recens creatorum consulum sententia, quam dixit Ap-  
pius claudius primo loco rogatus; eligendos decemviros e senatus primoribus, eorum annum esse imperium ex eo die quo creati fuerint; & penes eos esse rerum summam, ut modo penes con-  
sules, & olim penes reges, interim cessare omnes magistratus ceteros, donec rursus juxta leges creati fuerint.* Et Paulo post. *Tribunorum vero, adilium, quaestorum, & si qui erant alii Romanis solennes magistratus, ad tempus antiquati sunt.*

*Quo decemviri constituti anno uno cum magistratum pro-  
rogarent sibi]* Placuit itaque populo, ut cæteris magistra-  
tibus cessantibus, decemviri crearentur in unum annum: cum enim nullis limitibus circumscriptam habebant potesta-  
tem, e repub. erat, ut certum definiretur tempus, quo elapso, populi erat eligere, num reipubl. vellet eandem re-  
giminis formam imponere, an ad pristinum reipubl. sta-  
tum relabi. Præterquam quod reipubl. interest, ne magna imperia diuturna esse sinat, & temporis imponatur modus, quibus juris non potest; sæpissime enim po-  
testas mora corrumpitur, & diuturnitate insolescit, ut itaque sese justos civiumque studiosos præberent decemviri, annum fecerunt hunc magistratum, me-  
mores anno exacto, magistratu exutis privatorum in-  
star ipsis iudicium subeundum esse. Primo autem anno quo constituti sunt, imperii moderamen plane expecta-  
tioni populi respondit. Ea enim æquitate & modestia jus populo dixere, & in tractanda repub.: ea usi fuere mode-  
ratione & vigilantia, ut populi plane sibi favorem & propensam erga se voluntatem conciliarent, ita ut peractis rebus, quæ potissimum in causa fuissent, quod mutata fuisset civitatis forma & a consulibus ad decemviros transla-

tum imperium, id est, conscriptis legibus, & in decem tabulas relatis atque in foro propositis, ut ab omnibus legi examinarique possint; idque juris populus Romanus haberet, quod ipsi placuisset, postquam centuriatis comitiis approbatæ & perlatae fuere, in annum alterum decemviros creandi desiderium populum cepit, idque eo potissimum, quod vulgabatur rumor duas deesse tabulas, quibus adjectis, absolvi posset velut corpus omnis Romani juris. Itaque Appio comitiorum habendorum potestatem injungunt, *ars hac erat*, ut inquit Livius *lib. 3. cap. 35. ne semet ipsum creare posset*. Quam tamen egregie illudit, quippe ipso Appio rogante, imprimis se ipsum (quod *præter tribunos plebis, & id ipsum pessimo exemplo, nemo unquam fecisset*, dicto *lib. 3. cap. eod.*) & novem alios collegarum in locum, quos per coitionem hoc honore dejecerat, nominatos a populo creari effecit. Verum, ut inquit Livius, ille finis Appio alienæ personæ ferendæ fuit, larvamque detraxit, aliamque sibi induit personam, suo jam vivere cœpit ingenio novosque collegas, priusquam inirent magistratum, in suos mores formare. Hinc priorem modestiam & comitatem abjecerunt, pro qua superbia & severitas invalueret, unde initio magistratus primum honoris diem denunciatione ingentis terroris insignem fecere. Nam cum ita priores decemviri servassent, ut unus fasces haberet, & hoc insigne regium in orbem, suam cujusque vicem per omnes iret, subito omnes cum duodecim fascibus prodire. Centum viginti lictores forum impleverant, & fascibus secures illigatas præferebant. Judicia domi constabant, pronuntiabant in foro si quis collegam appellasset; ab eo, ad quem venerat, ita discedebat, ut pœniteret non prioris decreto stetisse. Opinio etiam sine auctore exierat, non in præsentis modo temporis eos injuriam conspirasse, sed fœdus clandestinum inter ipsos jurejurando ictum, ne comitia haberent, perpetuoque decemviratu possessum semel tenerent imperium. Quod & Dionys; confirmat *lib. 10.* cum inquit, Ante omnia fœdus clandestinum inter ipsos ju-

reju-



*rejurando idum est, ne quis ex collegio ulla in re adversaretur alteri; sed quod unus eorum probasset idem & ceteri haberent ratum; totoque vitæ spatio retinerent imperium, nec ullum alium ad reip. gubernacula admitterent, ipsique pari honore, pari potestate essent. Quamobrem cum jam & processerat pars major anni, & duæ tabulæ legum prioris anni decem tabulis erant adjectæ, nec quicquam supererat, si hæ quoque leges centuriatis comitiis perlatae essent, cur eo magistratu reip. opus esset, expectabant quam mox consulibus creandis comitia edicerentur. Verum expectationi non respondit eventus. Decemviri enim ut fædere clandestino pactum erat, comitia non habuere, verum imperium sibi retinere & in tertium annum, imo in perpetuum sibi vindicare conati fuerunt. Quæ imperii invito populo prorogatio, multis discordiis causam præbuit. Cui accedebat quod etiam injuriose & crudeliter tractabant plebem Romanam, in quam tanta utebantur licentia, ut non solum bonis abstinere, verum ne conjugibus quidem, filiabusque nubilibus: In humiliores libidinosè crudeliterque consulebatur? imo ne tergo quidem abstinerebatur; virgis cædi alios, alios securi subjici, & ne gratuita crudelitas esset, bonorum donationem sequi domini supplicium voluerunt. Liv. lib. 3.*

*Nimia atque aspera dominatione eo rem perduxerant, ut exercitus a repub. secederet.] Hinc merito a M. Horatio Barbato decem Tarquinii appellati, quamobrem non finis solum idem decemviris, qui regibus, sed causa etiam eadem imperii amittendi fuit, ideoque nec eorum imperium diuturnum; moderata enim durant, verum ubi violentia accepit vires, finis sæpissime adest. Quod si æquo jure rempub. decemviri administrassent, & cives, qui eorum fidei & tutelæ semetipsos commisissent, eadem, qua imperii delati initio usi fuerant moderatione & modestia ac æquitate, tractassent, desiderium tenuisset populum iterum & iterum decemviros creandi.*

& reipub. illam regimis formam imponere, cujus dulcedinem jam antea experti fuissent. Verum ubi a prioræ æquitate & imperii moderatione descitum, & in cives ac plebem sævire & crudelius consulere cæptum, & alia super alia impie nefarieque ausi fuerunt, de mediis cogitare ceperunt, quibus se suasque fortunas in securitatem assererent, hinc exercitus a reipub: secessio. Duplex erat Romanus exercitus eductus, unus contra Sabinos, qui in agrum Romanum incursionem fecerant. Alter adversus Æquos, qui in Algido castra locaverant, & Tusculanum depopulabantur agrum. Bellum in Sabinis mandatum Q. Fabio, M. Rabulejo & Q. Poetilio, cum tribus legionibus. M. Cornelius in Algidum missus cum L. Minutio, & T. Antonio, & Cæsone Duellio, M. Sergio. Appio Claudio urbana jurisdictio ut magis violento & ad urbanos comprimendos motus, idoneo relicta est, adiutorem vero S. Oppium æquo omnium decemvirorum imperio decernunt. Nihil militiæ quam domi melius Respub. administrata est. Fusi ab Sabinis ad Eretum, & in Algido ab Æquis exercitus erant. Occasionem vero secessionis tradit jurisconsultus verbis sequentibus.

*Initium fuisse secessionis dicitur Virginius quidam.* ] Cum autem importuna decemvirorum dominatio in magnum incurrisset odium, plebique admodum exosa erat, cum propter crudelitatem atque superbiam, tum etiam propter duopotissimum nefanda eorum domi militiæque facinora, quæ populum vehementer incitaverunt, ad tollendum e reipub. decemviratum, & pristinam recuperandam libertatem, quam pessundatam videbant, nisi coadunatis viribus, & communi ope atque conspiratione, in ipsis quasi cunabulis decemvirorum tyrannidem opprimerent, quemadmodum enim corpus humanum morbo implicitum, ad pristinam sanitatem redire sæpius nequit, nisi humorum, quibus agitur, discordia atque inter se contentione malum ejiciatur. Ita sæpiissime respub. intestinis laborant malis atque morbis, quibus



quibus mederi nequimus, nisi discordi concordia, & civium inter se contentione. Quod admodum violentum & periculosum est remedium, ut pote quo in summum respub. vocatur discrimen & sæpissime in pejorem statum incidit, cum juxta illud tritum, aliquod potius est habere imperium quam nullum; ideoque ad illud non confugiendum, nisi cunctis tentatis remediis, idque cautè, & omnibus diligenter perpensis, quæ in turbulento & agitato ventorum impetu mari nobis sunt observanda, ne temere navem reipub. irati maris impetuosius fluctibus tradamus, quando nulla nobis eam aliquando per tot rerum discrimina salvam in portum reducendi est spes reliqua. Romana respub. ad eam videbatur decemvirorum dominatione redacta necessitatem, ut salva esse non posset libertas, nisi violentis adhibitis remediis. Hinc exercitus seditio, cui occasionem præbuere (ut superius dicere incepimus) duo potissimum admissa belli domique detestanda & nefanda flagitia. L. enim Siccium, virum fortissimum multis egregiis facinoribus clarum, decemviri per insidias opprimere at trucidare jusserunt, ut testatur Liv. lib. 3. cap. 43. ubi inquit. *L. Siccium in Sabinis per invidiam decemviralem tribunorum creandorum, secessionisque mentiones ad vulgus militum sermonibus occulte serentem prospeculatum ad locum castris capiendum mittunt, datur negotium militibus, quos miserant expeditionis ejus comites, ut eum opportuno adorti loco interficerent. Haud inultum interfecere. Nam circa repugnantem aliquot insidiatores cecidere, cum ipse se prævalidus pari viribus animo circumventus tutaretur.* Hoc nefas aliud in urbe excepit scelusque scelere cumularunt, a libidine Appii Claudii ortum, qui ardens amore stuprandæ virginis plebejæ L. Virginii honestum in Algido ordinem ducentis, viri exempli recti domi militiæque, filix, L. Jcilio tribunitio viro acri desponsatæ, cum eam spe ac præmio pellicere haud posse perspiceret, omniaque pudore septa animadverteret, ad crudelem superbamque

vim animum convertens, M. Claudio clienti negotium imposuit, ut virginem in servitutem assereret, neque cederet secundum libertatem postulantibus vindicias. vid. Liv. 3. cap. 43. 44. & seq.

*Qui cum animadvertisset, Appium Claudium contra jus, quod ipse ex vetere jure in duodecim tabulas transtulerat, vindicias filia sua à se abdixisse* ] Jus vetus illud commode dici potest, quod ante leges duodecim tabb. tempore Regum & postea sub consulibus viguit obtinuitque. Quare opinionem Cujacii amplecti non possum, statuentis Pomponium de jure vetere sermonem habentem, intelligere jus civile, quod sine scripto in sola prudentium interpretatione consistebat. Quæ prudentium interpretatio vix cognita ante leges XII. tabb. Quippe ut ex §. 5. & seqq. hujus tituli perspicimus, sublato decemviratu apud Romanos, cui jus erat leges interpretari, ut semper extaret certa aliqua legum sententia, successisse prudentium operam, quorum esset ratum in hoc genere judicium, plurimique viri prudentia & judicio clari in Repub. floruerunt, qui ad interpretandum jus civile animum applicuere. Quorum dignitatem & auctoritatem admodum auxit Cæsar Augustus, qui cum animadverteret responsis eorum justam deesse auctoritatem, eamque quam habebant prudentes omnibus se passim ingerentibus doctis atque indoctis, quotidie magis magisque in contemptum abire atque vilescere, edixit nequis sola suorum studiorum judicio fretus, sine impetrata a principe veniâ de jure responderet. Deinde placuit, ut ii, quibus id permetteret, publica & principali donarentur auctoritate. Ita ut certus & delectus eorum esset numerus, quibus ab Augusto ea potestas tributa fuit. Hi jus interpretabantur, eorumque responsa sic observabantur, ut jura condere dicerentur, a quibus recedere judici non liceret. Cum itaque longe post leges XII. tabb. Juris prudentium interpretationes justam nactæ fuerint auctoritatem & pro Jure observari cæperint, à ratione alienum mihi videtur,



ut diceremus Pomponium per jus vetus significare voluisse hæc prudentium, interpretationes, quæ cum ante leges XII. tabb. vix cognitæ, jus vetus dici respectu earum legum & consequenter à decemviris in tabulas referri non potuerunt. Quicquid de hoc sit, constat tempore Consulibus quinquagesimo nono anno antequam in libertatis suæ vindices Brutum Collatinumque imperium populus Romanus contulit, jus vindiciarum, quod postea Decemviri in duodecim tabulas transtulerunt, obtinuisse. Et quemadmodum ad l. 1. h. t. annotavimus leges XII. tabb. à Jurisconsulto Cajo vetustas appellari, quia sunt aliis legibus ex illis desumptis anteriores & tempore priores, quo sensu *vetustissimi mortalium* apud Tacitum dicuntur *primi mortalium*. Eadem ratione à Pomponio jus vetus dicitur, quod ante duodecim tabb. obtinuit, quatenus tempore prius est & antiquius. Quo sensu *vetustas* dicitur *ætas superior, prior, anterior*, ut ita dicam. Quodnam vero jus Appius Claudius decemvir ex vetere jure in XII. tabb. transtulit nobis examinandum incumbit, ut eo clarius posset constare, quid significat quod Pomponius tradit Appium Claudium contra jus illud vindicias filiae suæ à se abdixisse. Verum antequam ad juris veteris explicationem perveniamus, prius de nominis significatione quædam præmittenda. Quippe ut superius diximus, ad recte docendum oportet prius scrutari nomina; cum initium doctrinæ sit nominum consideratio. Quo sensu itaque vindiciæ hic & apud alios probatos auctores accipiendæ sint, indagabimus. *Vindiciæ* à *vindicando* dictæ: Non à *vindicio*, ut putavit Accursius, qui in multis vehementer erravit. Est autem vindicare jure proprietatis repetere, alteri auferre, liberare, asserere de manu & jure possessoris. Ipsa enim vindicandi vox nihil aliud, quam liberare, revocare, adsciscere, ad se trahere, Non. Marcel. in lib. de Propri: *serm. latini* unde & ipsæ vindiciæ denominationem trahunt. Quod verbum à *vim* & *dico* compositum videtur, quod in vindicando

vis quædam interveniat & adhibeatur, non quæ manu fiebat cum vi bellica & cruenta, sed civilis, quæ festucaria dicebatur, ab eo quod sumtis ex arbore furculis seu festucis, tam actor quam reus in re præsentis imaginario duello inter se concertabant, actorque rem suam esse assererebat, reus contra vindicabat. Gell. lib. 20. cap. 10. Festuca, ut Augustino placet, arboris novellæ omninoque infantis cujusque sati pullulus. Pers: Sat: V.

*Non in festuca lictor quem jactat ineptus.*

Videtur apud Romanas initio reipub. privatorum judiciorum fuisse rationem, ut qui rem suam sibi vindicare vellet, manum cum adversario confereret. Quippe ut apud Gellium legimus l. 20. c. 10. Si qua de re disceptaretur, sive ager sive quid aliud esset, solebat eam actor cum adversario simul manu præhendere, & in ea re omnibus verbis vindicare, quæ vindicatio dicebatur vindicia, id est, correptio manus in re atque loco præsentis, fiebatque apud Prætorem ex duodecim tabulis, in quibus ita scriptum est. SI. QUI. IN. JURE. MANUM. CONSERUNT. Sed postquam inquit, prætores propagatis Italiæ finibus, datis Jurisdictionibus, negotiis occupati proficisci vindiciarum dicendarum causa in longinquas res gravabantur; institutum est contra duodecim tabulas, tacito consensu, ut litigantes non in jure ad prætorem manum confererent, sed ex jure manum confertum vocarent; id est alter alterum ex jure ad conferendam manum in rem, de qua ageretur, vocaret: atque profecti simul in agrum, de quo litigabatur, terræ aliquid ex eo, uti unam glebam, in jus in urbem ad prætorem deferrent, & in ea gleba, tanquam in toto agro vindicarent. Hæc Gellius. In eadem sententia inquit Festus ex Cincio. *Vindicia olim dicebantur quæ ex fundo sumpta in jus allata erant.* Verum ne quidem hæc in fundum proficiscendi necessitas perpetuò observata fuit. Fuit tandem alia a jurisconsultis solennis quædam manus conferendæ excogitata ratio, quæ & actori & reo, nec non

Præ-



Prætori formulam agendi præscribebat. Neque Prætores vindiciarum dicendarum gratia, neque litigantes manus conferendæ, in agros proficisci, indeque glebas in jus deferre opus erat. Verum ne omnis præsci Judiciorum ordinis ratio aboleretur, visum fuit pontificibus, qui juri civili & legis actionibus præerant, aliquam protectionem imaginariam, in veræ protectionis locum surrogare, qua litigantes certam inire viam eademque redire docerent. Rævard. ad leg. XII. cap. 6. Itaque quando actor in jus vocasset adversarium, hac formula utebatur: *fundus, qui est in agro, qui Sabinus vocatur, meus est. Eum ego ex jure Quiritium meum esse ajo. Inde ibi ego te ex jure manu consertum volo: ille vero, qui erat citatus, nisi cessisset respondebat: Unde tu me ex jure manu consertum vocasti, inde ego te revoco.* Prætor interea, ne pulchrum se atque beatum putaret, atque aliquid ipse sua sponte loqueretur, ei quoque carmen compositum est, cum cæteris rebus absurdum, tum vero nullo usui. Utrisque superstitionibus præsentibus: *illam dico inite viam. Præsto aderat sapiens ille, qui inire viam doceret. Redite viam, eodem duce redibant.* Cic. pro Muræna. Unde etiam Festus. *Superstitibus testes significat, cujus rei testimonium est, quod superstitionibus præsentibus ii, inter quos controversia est, vindicias sumere jubentur.* Vindiciæ autem possessionem significant. Et lis vindiciarum est (auctore Asconio) cum litigatur de ea re apud Prætorem, cujus incertum est quis debeat esse possessor, & ideo (inquit) is qui rem tenet, satisdat pro præde litis vindiciarum adversario suo, quo illi satisfaciatur, nihil se deterius in possessione facturum, de qua jurgium est, rursus cautione præstita, sponte provocatur ab adversario certæ pecuniæ aut æstimationis, quam amittat, ni sua sit hereditas, de qua contenditur. Prædes autem dicuntur satisfactores locupletes pro re, de qua apud judicem lis est, ne interea qui tenet diffidens causæ, possessionem deteriore faciat, tecta dissipet, arbores excidat, & culta deferat. Budæus. in annot. ad D. Observavit optime Rævardus veteres olim & vindiciis, &

sacra;

sacramentis contendisse ex Cicerone in orat : pro Milon, Ubi inquit : *Eum denique cui jam nulla lex erat , nullum civile jus , nulli possessionum termini : qui non calumnia litium , non injustis vindictis , ac sacramentis alienos fundos , sed castris , exercitu , signis inferendis petebat .* sic quoque apud Arnob : *advers. gentes lib. 4. citante Rævardo : Quis quaestor , quis arbiter cervicibus tantis erit , qui inter personas hujusmodi , aut vindictas justas dare , aut Sacramenta conetur pronunciare non Justa .* Vindictis agebatur , quando de possessione certabatur , uter litigantium , pendente lite proprietatis , rei controversæ futurus esset possessor : sacramentis quando de ipsa re principaliter , id est de proprietate contendebatur . Est autem Sacramentum pecunia ab utroque litigatore deposita . Uterque enim litigantes certam aliquam pecuniam ad Sacrum deponebant . Victor pecuniam suam recipiebat : victi pecunia in ærarium deferrebatur . M. Varro de ling : latin : *Ea pecunia (inquit) quæ in Judicium venit in litibus Sacramentum a sacro dicta , Qui petebat & qui insciabatur , de aliis rebus uterque quingenos æris ad pontificem deponebant , de aliis rebus item certum alium assum numerum . Qui Judicio vicerat , suum Sacramentum à sacro auferebat , victi ad ærarium redibat .* Et Asconius . *Cum in rem aliquam agerent litigatores , & pœna Sacramenti peterent .* Unde Festus : *Sacramentum æs significat , quod pœnæ nomine penditur , sive eo quis interrogatur , sive contenditur . Id in aliis rebus quinquaginta assum est , in aliis quingentorum inter eos , qui judicio inter se contendunt .* Tribus igitur modis olim contendebatur atque res petebatur , vel vindictis , quoties incertum erat , ut inquit Asconius , uter litigantium deberet esse possessor , & eo casu satisfactio interveniebat , qui rem tenebat adversario satisfaciendi pro præde litis vindictiarum incumbere necessitas , quo satisfaciebat , nihil deterius in possessione facturum , de qua jurgium erat . Vel solis Sacramentis , nulla vindictiarum quæstione mota , contendebatur , ita

tamen



tamen ut is, penes quem rei controversæ possessio est, idoneè satisficeret. *Quotiens hereditas petitur, satisfactio jure desideratur: et si satisfactio non detur, in petitorum hereditas transfertur. Si petitor satisfacere noluerit, penes possessorem possessio remanet. In pari enim causa, potior est possessor.* Inquit Paulus Sent. lib. I. cap. II. Vel vindictis & sacramento simul contenditur, quod in hereditatis petitione sibi locum vindicat, quando non solum petitur hereditas, verum insuper ille, qui hereditatis petitione agit, contendit, pendente principali lite hereditatis possessionem penes eum esse oportere. Cum petitor in hereditatem fundi ageret, ita dicebat: *Ajo hunc fundum meum esse jure Quiritium.* Cui possessor inficiens respondebat: *Et ego meum non tuum esse ajo ex eodem jure Quiritium.* Tum petitor: *Satisda, te non deteriore possessionem facturum.* Possessor satisfaciebat. Tum petitor *spondesne quingentos, si meus hic fundus sit?* Possessor *spondeo quingentos, si tuus hic fundus sit.* Inde restipulans: *Et tu spondes ne totidem, ni tuus hic fundus sit?* Petitor, *Spondeo, ni meus hic fundus sit.*

Si quæ autem vindictiarum erat controversia, res controversas in jure presentes alterutri ex litigatoribus vindicanti Prætor tamdiu addicebat, quamdiu alter alterum iusto sacramento & sponsione non superasset, Rævard. dict. loc. Vindictas igitur dare dicebatur prætor, cum decerneret de possessione, penes quem illa pendente lite esse deberet. Dabantur autem secundum possessorem. *Commodum enim possedendi in eo est, quod etiamsi ejus res non sit, qui possidet, si modo actor non potuerit suam esse probare, remanet in suo loco possessio: propter quam causam cum obscura sint utriusque jura, contra petitorum judicari solet. §. 4. inst. de interdict. Et Paulus in l. 2. ff. uti possidetis. Iusta enim an injusta adversus ceteros possessio sit, in hoc interdicto nihil refert: qualiscunque enim possessor, hoc ipso quod possessor est, plus juris habet, quam ille qui non possidet.* Ex

hisce jam facile perspicimus sensum verborum quæ supra descripsimus, scil. justam fuisse Virginii adversus Appium querelam, quod contra jus in duodecim tab. ab ipso translatum, vindicias filix suæ a se abdixisset: & secundum eum, qui in servitutem ab eo suppositus petierat, dixisset. Existimat Hottomannus legem cujus hic mentio fit, in hanc sententiam fuisse conscriptam: **SI DE LIBERTATE AMBIGETUR: PRÆTOR SECUNDUM EUM QUI LIBERTATEM DEFENDET, CUM IS SPONSORES JUDICIO SISTI DEDERIT, VINDICIAS ADDICITO.** Per hanc legem voluere decemviri, ut si liber homo controversiam status sui ab aliquo patiatur, & in servitutem e libertate petatur, eum relinqui debere in libertate, id est ejus quasi possessionem retinere, donec status quæstio seu liberalis causa terminetur: sive quis e servitute in libertatem ab aliquo assertore vindicetur, hunc interim pro libero homine habendum esse, & dominum ejus possessionem assertori cedere debere. Et hoc est *vindicias dicere secundum libertatem, vel addicere vindicias*, id est decernere, ut interim sui status quæstionem patiens, in quasi possessione (quia libertas est res incorporalis cujus proprie non est possessio) sui ac libertatis maneat & relinquatur, datis interim idoneis fideiussoribus, qui caveri debebant de eo qui status sui controversiam patiebatur, Judicio sistendo. Unde apud Dionys. lib. 11. Numitorius avunculus filix Virginii, quam in servitutem e libertate asserere cupiebat Appius, inquit; *Quod ad litem attinet, patrem ipsum militia reversum causam pro filia dicturum esse.* Corporis vero vindicationem, quæ legibus debebatur, se sibi usurpare, qui puella sit avunculus, & paratum subire judicium. Nec se peregrinum nec novum aliquid petere, nec quod ceteris Quiritibus jus non concedat, etiamsi non omnibus hominibus; cum quis e libertate in servitutem asseritur, jus ejus esse non penes eum qui libertatem

adimit,



adimit, sed penes eum qui tuetur, usque ad litis cognitionem. Quod jus cum ab ipso Appio in duodecim tab. relatum erat, eodem jure postulabat, ut interim, dum puella status sui controversiam patiebatur, maneret penes eum in possessione libertatis. Advocati puellæ inquit Liv. lib. 3. cap. 44. Cum Virginium Reipub. causa dixissent abesse, biduo affuturum, si nunciatum ei sit, iniquum esse, absentem de liberis dimicare, postulant, ut rem integram in patris adventum differat: lege ab ipso lata vindicias det secundum libertatem, ne patiatur virginem adultam famæ prius, quam libertatis periculum adire. Vindicias postulare secundum libertatem, nihil aliud est, quam postulare ut interim libertate potiretur, quemadmodum legibus erat sancitum. Quod & nostro jure retentum atque receptum est, ut qui in possessione sit libertatis, cum ei de statu suo controversia fiat, in ea maneat, donec judicium sit expeditum. Lite ordinata in possessione libertatis is, de cujus libertate quaritur, constituitur & interim pro libero habetur. l. 14. Cod. de liberali causa. Sic quoque l. 24. ff. de eod. Ordinata liberali causa, liberi loco habetur is, qui de statu suo litigat: Vid. l. 1. Cod. qui dare tut. Quæ juris constitutio non solum obtinet quando quis ex libertate vindicatur in servitutem, verum & si ex servitute quis proclamat in libertatem. Quod allegatæ jam leges probant, quæ generaliter & indistinctè loquuntur de eo, qui de statu suo litigat, ubi autem lex non distinguit, nec nos distinguere debemus l. 8. ff. de public. in rem act. Et ait Ulpianus l. 12. ff. ex quibus caus. Major. Eum qui de statu suo litigat, tam diu in servitute esse videri, quam diu non sit ejusmodi lis capta. Et idem l. 33. ff. de procurat. §. 1. eum ait, qui de statu suo litigat, procuratorem habere posse, non solum in administratione rerum, sed etiam in actionibus, quæ ei vel adversus eum competant, ex possessione sive servitutis, sive libertatis, de statu suo litiget. Idque favore libertatis. Verum jus illud favore libertatis constitutum, Appius violare ausus fuit, idque callidè & astutè

astutè sub larva quadem justitiæ, callida & malitiosa juris interpretatione legem, quam ipse decemvir in libertatis favorem sanciverat eludendo, abdixit a patre Virginio vindicias filiæ suæ, & secundum eum, qui in servitutem petierat dixit. Historia ita sese habet, erat Virginio cuidam filia, cujus forma ad invidiam elegans Appium cæpit, eumque impuro inflammavit erga eam ardore, qui a parva scintilla in eam erupit flammam, ut libidinis suæ nefariæ explendæ gratia, divina juxtaque humana jura violare & pedibus proculcare flocci fecerit. (Amor enim omnia vincit.) Cum vero puella erat in potestate patris, quem pudicitia filiæ suæ egregium & diligentem fore custodem conjecturari poterat, & consequenter sibi vel precibus inducendi puellam, ut Veneris auspicio secum in arenam descenderet & manum consereret, vel si iis vinci nequiret, vi, quæ aliquando non ingrata puellis, eam expugnandi nullam daturum patrem occasionem providebat, (fortasse quia furtivi ejus amores satis manifesti) ad aliam excogitandam rationem, qua sibi ad puellam patefaceret aditum animum convertit. Quamobrem M. Claudio clienti negotium dat, ut virginem in servitutem asserat; dicens serva sua natam, servamque appellans: Absente vero patre, assertor ejus fuit avunculus Numitorius, seque Claudio opposuit. Ad Tribunal Appii perventum est. *In servitutem petebatur a Claudio puella; domi enim suæ natam, furto inde in domum Virginii translata, suppositam ei esse, id se indicio compertum afferre: probaturumque vel ipso Virginio judice, ad quem major pars injuriæ ejus pertinebat, interim dominum sequi ancillam æquum esse.*

Imo contrarium æquum erat & legibus consentaneum, ut interim, dum de statu puellæ litigabatur, in libertate maneret. Quamobrem assertor avunculus Numitorius Appio Claudio objicit illam legem, qua cautum, uti de cujus libertate ambigetur, prætor vindicias secundum libertatem det, easque addicat ei, qui libertatem defendit.

Quæ



Quæ lex ipsum Appium auctorem una cum cæteris decem-  
 viris habuerat. Itaque virtute hujus legis vindicias secun-  
 dum libertatem decernendas petit assertor; Appius vero  
 eludens legem vindicias abdixit. Ne autem fraudem legi  
 facere videretur, eam circumvenire conatus fuit. Ait enim,  
 nemo idoneus auctor existit, cui addicantur. Nam si sui  
 juris puella esset, & tutores adessent, iis decernerentur,  
 darentur etiam patri, si adesset atque defenderet. At ne-  
 mo pro ea, quæ in patris manu sit justus est auctor præter  
 patrem. Ita demum lex vindicias secundum libertatem  
 decernere jubet, si quis idoneus auctor existat, cui addican-  
 tur. Ceterum patre absente, dominum debere esse potio-  
 rem, ei puellam addicendam esse, dummodo fideiussores  
 det idoneos qui promittant, eum, ubi pater adfuerit, sisti  
 apud magistratum. Quod fere idem fuisset, quasi post vul-  
 neratam causam vellemus remedium quærere. Vid. Dio-  
 nys. lib. 11. Hoc significare Appii verba videntur, quæ  
 Livius describit lib. 3. cap. 45. Appius inquit *decreto præ-*  
*fatus, quam libertati faverit, eam ipsam legem declarare,*  
*quam Virginii amici postulationi suæ prætendant.* Ceterum  
 ita in ea firmum libertati fore præsidium, si nec causis nec per-  
 sonis variet. In his enim quæ asserantur in libertatem, quia  
 quivis lege agere possit id juris esse: in ea quæ in patris manu  
 sit, neminem esse alium, cui dominus possessione cedat. Pla-  
 cere itaque patrem accessi: interea juris sui jacturam as-  
 sertorem non facere quin ducat puellam, sistendamque in ad-  
 ventum ejus, qui pater dicatur, promittat. Malitiosam hanc  
 & callidam juris interpretationem ab Appio libidinis suæ  
 explendæ gratia excogitatam facile perspicimus. Lex  
 enim indistinctè & generaliter loquitur, ideoque non di-  
 stinguit inter patrem absentem vel præsentem; sed universa-  
 liter de quavis liberali causa & de omnibus qui libertatem  
 defendunt conscripta; idque favore libertatis. Quippe ut  
 est in regulis juris, omnibus rebus favorabilior & potior  
 est libertas, utpote quæ res inæstimabilis, quam nemo bonus

nisi cum anima simul amittit. l. 106. 122. ff. de R. 7. In justum itaque atque malitiosum pronunciamus Appii iudicium, omnino indignum honesto ac bono viro, qualem decet iudicem esse, impuri autem amoris furore correpto amatori conveniens, quo agitatus, omne nefas miscere ausus fuit, Nam ut ait ille.

*Miscuit omne nefas, quem nulla modestia terret.*

*Optati compos, dum studet esse sui,*

*Non decus avertit, non lex divumque potestas.*

*Egit precipitem, cæcus ad omne furor.*

Et secundum eum, qui in servitutem ab eo suppositus petierat, dixisse.] Id est, decrevit vindicias secundum servitutem, pronunciavitque puellam Virginii in servitutem abducendam. Verba decreti apud Dionysium in hunc modum concepta legimus. Ego nequid temerè fecisse viderer, expectandum duxi parumper, dum res aliquo modo componeretur. Ceterum cum nihil, ut video, illis convenit, testor ego & decerno, Marcum Claudium libertum puella esse dominum: quibus dictis, ut mancipium abducere puellam iussit, datis duodecim liētoribus, ut comitarentur, ne quam vim formidaret.

Utpote cum Brutus, qui primus Romæ consul fuerat, vindicias secundum libertatis dixisset in persona Vindicis Vitelliorum servi, qui prodicionis conjurationem iudicio suo detexerat.]

A Bruto, exactis regibus, primo Romæ consule, vetustissimam Virginius derivat juris observantiam, quam in persona filix suæ defecisse merito indignatus fuerat, quia summo jure petere poterat, ut cum ceteris civibus æquo jure sibi uti liceret. Vetustissimam dicit observationem; non quod longa temporis spatia inter Brutum & Virginium intercessissent. Ab exactis enim regibus ad decemviratum usque numerantur fere duo & sexaginta anni. Verum non alius quam ab eo, scil. Bruto, repeti poterat memoria ejus juris, quod in Repub. obtinuit; cum ante institutam libertatem nulla Reipub. vestigia: liber enim demumpopulus

Ro-



Romanus sub consulibus Bruto Collatinoque libertatis suæ vindicibus & Reipub. consequenter fundatoribus: *libertatem* ut inquit Tacit 1. *Annal. & consulatum L. Brutus instituit.* Quamobrem ab eo qui reipub. fundatores prædicantur, juris, quod in ea observatum fuit, originem derivare sive memoriam repetere merito debet, licet & antea sub regibus obtinuisse idem jus constaret: quippe iis exactis, regias quoque leges exolevisse supra annotavimus, ideoque quicquid juris ex illis desumpti postea in Repub. viguit, tanquam cum ea introductum & a populo receptum est. Jus autem, cujus originem a Reipub. initio repetit, fuit illud vindiciarum secundum libertatem jus, quod Brutus in persona Vindicis Vitelliorum servi dixerat. Verum perperam illud ipsum a Pomponio hic allegari tanquam exemplum, ad refutandam iniquitatem sententiæ, in causa filiæ Virginii ab Appio latæ, Corasius, Muretus, aliique qui notis suis hanc Pomponii juris historiam illustrare conati fuerint, opinantur: propterea quod de statu Vindicii nulla liserat, cum omnibus constaret eum esse servum, & consequenter hæc similitudo vehementer claudicat. Budæus attamen in annotationibus suis ad Pandectas Jurisconsulti errorem quodammodo excusare voluit, quando ex Plutarcho probare nititur Brutum quodammodo vindicias secundum libertatem dixisse, ex eo, quod Vindicem bene de repub. meritum, interea, dum Vitellii causa majestatis dicerentur, in manum ac potestatem infensissimorum ob accusationem hostium, excarnificandum tradi non sivit, quod Collatinus collega permiserat. Rem hoc modo gestam apud Plutarchum legimus in *Publicola.* At *mollities Collatini & cunctatio animum dedit Aquiliis, ut diem postularent ad se purgandum, utque Vindicis servus suus* (qui conjurationem Aquiliorum, vel ut Livius tradit Vitelliorum detexerat) *ipsis restitueretur, nec detineretur ab accusatoribus.* Quæ concedere cum intenderet Collatinus, jamque concionem dimitteret, non dubitavit Valerius hominem

retinere, turba, qua cinctus erat, immixtum, neque populum dimissis proditoribus: postremo corporibus eorum manus injicere, Brutumque appellare, ac rem indignam esse vociferari, si filiorum necandorum necessitate collega imposita, condonandos Collatinus mulieribus patriæ proditores & hostes existimaret. Ibi excandescente consule, & ut Vindiciū abducerent jubente, hinc lictores repulsa turba eum prehendunt, si qui obsistunt, hos pulsant: illinc necessarii Valerii defendunt eum ab injuria, populusque Brutum inclamat. Qui reversus factō silentio, ait de filiis satis fuisse suum judiciū, de ceteris cives, qui libertatem haberent, in suffragiū mittere. Quatenus vero impediit ne servus dominis traderetur, Brutus, pendente judicio majestatis, ne quid domini infensissimi in eum crudelius consulerent, eatenus in libertatem vindicatus a Bruto videtur. Verum inquirendum, num illud jure fieri potuit, & a Pomponio allegari tanquam exemplum & factum, illo juri conveniens, quod ab Appio Claudio & ceteris decemviris ejus collegis in duodecim tabb. translatum est. Si rem diligenter examine-  
mus, facile perspicimus, jure Aquilios live Vitellios pendente judicio postulasse, ut sibi tanquam justis & legitimis dominis traderetur servus: non potest enim proprietas alicujus rei ad alium transferri sine factō & consensu ejus, ad quem ea pertinet; neque alicui potest jus sibi quæsitum auferri sine justa causa, ne quidem a principe vel magistratu; itaque recte vindicabatur servus a Vitelliis titulo domini & proprietatis. Quo dominio privari non poterant, neque pretextu criminis, neque juris live legis, quæ in favorem de statu suo ligantis lata est, ex vetere jure desumptæ, licet crimine læsæ majestatis accusati essent; quippe pendente judicio & nondum lata sententia, eos tanquam fontes & læsæ majestatis reos punire ab omni ratione, jure, & æquitate alienum esset. Beneficio autem legis live ea tempestate observati juris, possessione servi destitui non poterant, cum  
nulla



nulla de statu suo erat controversia, ideoque secundum libertatem dari vindicias non debuissent; nemo enim negabat eum esse servum, ne quidem ipse servus, & quanquam ob detectam a se conjurationem bene esset meritis de Repub. (quamobrem postea libertate donatus fuit) attamen in potestate erat dominorum, a qua jure liberari non poterat, quamdiu adhuc ab ore judicis pendebat sententia, qui vel absolvere vel condemnare posset reos, itaque antequam damnati fuerant, merito postulabant, ut dominia & possessiones rerum suarum sibi retinere liceret, donec de perpetrato & admissio crimine pronunciatum esset; juxta ea quæ tradit Paulus in l. 15. ff. *Qui & a quibus manu miss. lib. non sunt. Quæsitum est an is qui majestatis criminis reus factus sit, manumittere possit, quoniam ante damnationem dominus est?* Et Imperator Antoninus Calpurnio Critoni rescripsit, ex eo tempore, quo quis propter facinorum suorum cognitionem jam de pœna sua certus esse poterat, multo prius conscientia delictorum, quam damnatione jus datae libertatis amisisse. Ubi & Gloss. dominium rerum suarum nemo amittit sola accusatione criminis majestatis, sed sententia sola & damnatione. Verum quanquam hæc ita sint, attamen videtur excusandus imo laudandus Romanæ libertatis vindex & autor egregius L. Brutus, quod æquitatem rigori & stricto juri prætulit, & illud sequutus est, quod & ipse legislator sancivisset, si fortasse de eo cogitasset. Æquitas enim, ut inquit Aristoteles, nihil aliud est quam *supplementum ejus quod lex prætermisit*. Neque leges neque Senatusconsulta ita scribi possunt, ut omnes casus, qui quandoque inciderint comprehendant: l. 10. ff. *de leg.* Sed cum in aliqua causa sententia eorum manifesta est, is qui Jurisdictioni præest, ad similia procedere, atque jus dicere debet l. 12. ff. *vid. l. 13. ff. eod.* Itaque non iniquum videri debet, quod libertatis favore, quæ debebatur servo, eodem legis sive juris, de quo jam sæpius mentionem fecimus, beneficio gaudebat, ideoque vindicabatur a domi-

nis, quippe qui in præmium servatæ per indicium patriæ, semetipsum vindicare in libertatem posse videbatur, tanquam jure sibi competentem, ideoque ab ipso momento, quo conjurationem nefariam detexit, juris fictione quasi liber habitus, & postea a dominis in servitutem vindicatus, a Bruto in libertatem assertus est, quam assertionem vindicias secundum libertatem non abs ratione a Pomponius dicit, salvo meliori judicio. Par pari referre recta ratio & ipsa suadet æquitas, itaque qui reip. conservarat libertatem, in civium numerum adoptatur, & cum iis ejusdem libertatis fit particeps. *Premium indici, pecunia ex arario, libertas & civitas data. Ille primum dicitur vindicta liberatus, quidam vindicta quoque nomen tractum ab illo putant: Vindicatio ipsi nomen fuisse, post illum observatum, ut qui ita liberati essent, in civitatem accepti viderentur.* Liv. l. 2. c. 5. Vid. Plut. in Publicola. Ubi de conjuratione Vitelliorum sive Aquiliorum. & Liv. eod.

*Castitatem filia vita quoque ejus præferendam putaret.* ] Si castitas sive pudicitia non præferenda vitæ, saltem ei æqualis est & cum illa pari passu ambulat, ideoque omnibus proinde bonis præciosior longe & præstantior habenda, quare vim pudicitia illatam iisdem licet repellere mediis, quibus vitam nostram in mortis discrimen adductam tueri possumus, scil. cum cæde & internecione illius, qui eam nobis eripere meditatur, atque id ipsum & divina & humana permittunt jura. Quanquam prima fronte id videatur negandum, quo ad pudicitiam, quia vera pudicitia non consistit in conceptu physico, verum in constanti voluntate & proposito corpus intactum & illibatum ab omnibus illicitis voluptatibus & stimulis servandi. Quippe juxta Augustinum pudicitia moraliter considerata bonum animi est, quod nulla vi extrinseca, si animus bene sit communitus, eripi possit. Vid. Aug. lib. 1. cap. 18. de civ. Dei. ubi plura de hac integritate animi disputat. Quamobrem læsio illa, quæ infertur castitati, etsi atrox sit respectu



Et inferentis, & ratione ordinis divini, attamen non videtur proportionata extemporaneæ interfectioni adversarii. Ex quibus posset concludi, arma non illico privata auctoritate in necem violatoris arripienda, sed coram iudice vis illatæ reparatio petenda.

Verum placet mihi magis Grotii opinio, qui *lib. 2. cap. 17. de J. B. & P.* qui extra omnem ponit controversiam, quin pro pudicitia defensione stuprum inferre conantem occidere liceat, cum non tantum communis æstimatio, sed & lex divina pudicitiam vitæ adæquet. Imo nostra lege municipali statutum est, ut eadem poenâ puniantur qui aliquem stupravit, qua puniendus, qui occisione aliquem occidit. Si quis virginem vel viduam, vel sanctimonialem, vel aliam mulierem honestam vi stupraverit, gladio punietur. Quam puniendi potestatem lex sive naturalis sive civilis, in quemvis transfert, quando in eo est statu constitutus, ut sui sit iudex, scil. quando ab aliquo aggressus ad eam sit reductus necessitatem, ut adeundi iudicem erepta sibi occasione, ideoque quasi in primævo statu naturalis constitutus, propriis viribus sui suscipere defensionem & vim vi repellere atque etiam cum cæde aggressoris, si aliter salvus esse nequeat, sit coactus. Unde Paul. *lib. 5. ff. sentent. ad L. Cornel. de Sicar.* Qui latronem eadem sibi inferentem, vel alium quem libet stuprum inferentem occiderit, puniri non placuit. Alius enim vitam, alius pudorem publico facinore defendit. Et Marcianus in *l. 1. §. 4. ff. ad L. Cornel. de sicar.* Item divus Hadrianus rescripsit eum, qui stuprum sibi vel suis per vim inferentem occidit, dimittendum. Hinc quoque idem Augustinus *de liber. arbitr. lib. 1. tom. 1.* Lex ait dat potestatem, vel viatori ut latronem, ne ab eo ipso occidatur, vel cuiquam viro aut fœminæ, ut violenter in se irruentem stupratorem, ante illatum stuprum, si possit interimat. Multo enim est melius, eum qui alienæ vitæ insidiatur, quam eum qui suam tuetur, occidi: Et multo est immanius invitum hominem stuprum perpeti, quam eum a quo vis illa inferitur, ab eo,

*eo, cui inferre conatur, interimi. Quemadmodum igitur ob vitam ita & ob pudicitiam aliquem occidi posse & divina & humana, imo & nostra municipalia permittunt jura statutaque. Accedente insuper ejusdem sexus imbellia, quæ omnibus modis munienda adversus improborum hominum malitiam. Idque eo magis, quia pudicitia & castitate semel amissa, nulla ratione recuperari queat, omni autem jure confirmatum ob damnum quavis via irreparabile aliquem interfici posse. Audenter loquar (inquit Hieronym. in epist. 22. ad Eustachium) cum omnia possit Deus, suscitare virginem non potest post ruinam: valet quidem liberare de pœna, sed non vult coronare corruptam.*

Unde Imperator Justinianus in *l. unic. Cod. de rapt. Virg.* rescribit, virginum, vel quarum libet viduarum honestarum raptores non solum ad injuriam hominum, sed etiam ad ipsius omnipotentis Dei irreverentiam crimen committere: maxime cum virginitas vel castitas corrupta restitui non possit. Quare ejus defensio adeo favorabilis est, ut non solum qui suæ pudicitiae tutelæ causa quempiam occidit, immunis a pœna sit, sed ei qui suorum, quorum in numero sunt conjux, liberi, cognati, affines, imo vicini, & quidni extranei, defensionem suscipit, pœna legis Corneliæ videtur remittenda; Quippe natura (inquit Florentinus in *l. 2. ff. de J. & J. inter homines cognationem quandam instituit*, cujus vi & ad opitulandum oppressis accurrimus, & irascimur opprimenti.

Quod officium si quis præstare omittit, communem violat cognationem, & legem charitatis offendit. Imo si non repellat a socio injuriam cum possit, tam est in vitio, quam ille qui facit, juxta Ambrosium. Hinc apud Cic. *1. off. Duo sunt Injustitiæ genera, unum eorum qui inferunt, alterum eorum qui ab iis, quibus infertur, si possint, non propulsant injuriam.* Hoc enim præscribit natura, ut homo homini quicumque sit, ob eam ipsam causam tantum, quod is homo sit, consultum velit. Idem *3. offic.* tenemur enim



enim eodem amore quo nosmetipfos quoque socium amplecti. Hinc Solonem dicere solitum legimus, *beatam illam esse Remp: in qua quis injuriam alterius suam existimat.* Apud Hæbreos, ut tradit Seldenus *lib. 4. cap. 3.* qui alicujus sponsam vi comprimere vellet, non poterat tantum cum cæde repelli ab ea, cum qua concumbere volebat, sed & ab alio quovis ex Israëlitis, qui universi tenebantur, si quæ erat oppressa, eam liberare & eripere e manu & potestate persequentis.

*Arrepto cultro de taberna lanionis filiam interfecit: in hoc scilicet, ut morte virginis contumeliam stupri arceret.*] Ex iis quæ statim disputavimus, perspicimus injuriam & vim alicui illatam non tantum ad ejus proximos sanguine sibi junctos, verum & ad extraneos tanquam communis cognationis & naturæ vinculo sibi devinctos pertinere, & consequenter opem ferre petenti & succurrere auxilium imploranti tanquam naturæ debitum homines sibi invicem præstare non solum adstringi, sed eodem jure a se invicem hæc officia exigere atque petere. Nam ut omnia inter se membra consentiunt, quia singula servari totius interest: ita singulos juvare debemus, quia ad cætum geniti sumus; salva autem societas nisi amore & custodia partium nequit, Matheus *ad lib. 48. ff. sit. 5. de sicariis. cap. 2.* *Si justus es non solum non nocebis, sed etiam nocentes prohibebis,* inquit Seneca, & Cic. *Tusc. 1.* *Quæ est (ait) hominum generis natura melior, quam eorum, qui se natos ad homines servandos arbitrantur.* Verum omnia hæc argumenta, quibus castitatem & pudicitiam, quia, si non vitæ præstantior, saltem ei æqualis est & consequenter etiam cum cæde invasoris defendi posse, pro ingenii tenuitate probare conati fuerimus, attamen ad excusandum Virginii perpetratum & admissum parricidii crimen nihil ponderis habent. Probant quidem defensionem cum cæde adversarii licitam, eamque cuique oppresso ejusque proximis, imo etiam extraneis concedunt tribuuntque, idque quando nulla pericu-

li,

li, quod alicui imminet, declinandi superest occasio; verum Virginii quasi furore & rabie agitati admissum parricidium neutiquam possunt justitiæ velo obtegere. Non defensor filiae sed agresor erat, non depellebat vim, sed inferebat, non quidem pudicitiae, sed vitae. Pater erat, ideoque ad omnem vim & injuriam a corpore, a capite & vita filiae suae propulsandam & sanguine & humanitatis vinculo tenebatur: hoc enim in brutis animalibus cernimus, quod non solum se, sed & eos, qui ab illis geniti sunt salvos velint, & ab hisce omnem vim, quantum possunt, depellant. Defendere filiam itaque ad paternum pertinebat officium, non opprimere. Scio equidem jus vitae & necis in liberos habuisse parentes, verum qui in liberos jus illud exercebat, cum nulla justa vitae adimendae causa subesset, divini & humana juris violator parricidii crimen admittebat. Possit huic responderi Virginium non occidendi, verum depellendi a filia vim animum habuisse, quæ salva esse non poterat, nisi e medio sublata: quippe adversus M. Claudium, quem actorem subjecisset Appius, nullam, nisi coram iudice Appio, defensionem leges suppeditabant: vindicabat enim filiam, quia serva sua natam, itaque justam apud se servientem servitutem, quæ suum persequendi facultas nemini juri denegari debet. Nullum etiam adversus vim Appii ei auxilium, nam legitimus erat Judex; summum enim & supremum in eum ejusque collegas erat collatum Imperium populi voluntate, itaque & consentiente ipso Virginio, qui & civis Romanus erat: penes eos & juris & reipub. administratio residebat, cæteris magistratibus cessantibus, itaque non poterat declinare forum, sed coram Appio, tanquam unico & supremo tribunali de statu filiae litem ventilare necesse habebat, qui licet injustam pronunciaret sententiam, tamen jus diceret; Quippe prætor quoque jus reddere dicitur, etiam cum inique decernit, *l. 11. ff. de Inst. & jure.* decreto tamen prætoris obtemperandum, atque quamdiu judicem adeundi copia est, nemini sibi jus dicere licet.



licet. Quodnam itaque remedium Virginio reliquum, quo filia pudicitia adversus Appii insidias defendi posset? nulum, nisi judicis imploratio. Fateor justum Virginii dolorem atrocitatem facinoris quodam modo excusare, verum crimen non tollit, nec Virginium culpa vacuum efficit. Quippe justissimus ille dolor non ex aliquo a filia admissio flagitio vel scelere, verum ex tertii sive extranei alicujus scil. Appii impuro ardentis erga filiam amore, ejusque castitati insidias struentis, procedebat facinore. Postquam cuncta tentasset remedia, quæ ad conservandam filia castitatem adhibere jura & leges civitatis in qua debebat, ipsi tribuebant, boni patris & civis juxta impleverat officium, quæ si optatum non habuissent successum, temporum id iniquitati tribuendum, necessitati enim cedere & temporibus inservire semper sapientis habitum est, ut inquit Cicero. Quomodo sterilitatem aut nimios imbres & cetera natura mala, ita vitia dominantium tolerare debemus. Tacit. lib. 4. Hist. cap. 74.

Ac protinus recens a cade, madenteque adhuc filia eruore, ad commilitones confugit. } Quibus ordine cuncta, ut gesta sunt exposuit. Liv. l. 3. c. 50. Supinas deinde tendens manus commilitones appellans orabat, ne, quod scelus Ap. Claudii esset sibi attribuerent: ne se ut parricidam liberum accusarentur. Sibi vitam filia sua cariorem fuisse, si liberè ac pudicè vivere licitum fuisset: cum velut servam ad stuprum rapi videret, morte amitti melius ratum, quam contumelia liberos: misericordia in speciem crudelitatis lapsum, nec se superstitem filia futurum fuisse, nisi spem ulciscendæ mortis ejus in auxilio commilitonum habuisset: illis etiam filias, sorores, conjugesque esse, nec cum filia sua libidinem Appii Claudii extinctam esse. Sed quo impunitior sit, eo effrenatiorem fore: aliena calamitate documentum datum illis cavendæ similis injuriæ: quod ad se attineat, uxorem sibi fato ereptam: filiam, quia non ultra pudica victura fuerit, misera sed honesta morte occubuisse, non esse jam Appii libidini locum in domo sua: ab alia violentia ejus eodem se animo suum corpus vindicaturum, quo

quo vindicaverit filia : ceteri sibi ac liberis suis consulerent. Liv. lib. 3. cap. 50.

*Qui universi de Algido relictis ducibus pristinis , signa in Aventinum transtulerunt. ]* Neque ut scribit Liv. lib. 3. cap. 51. in Sabinis quievit, (nam ut sup. annotavimus, habebant Romani ea tempestate duos exercitus, unum in Algido, alterum in Sabinis, sed ibi quoque auctore Icilio, cui desponsata fuerat puella, Numitorioque ejus avunculo, secessio ab decemviris facta est, qui Porta Collina urbem intravere sub signis, mediaque urbe agmine in Aventinum pergunt, ibique conjuncti alteri exercitui XX tribunis militum negotium dederunt, ut ex suo numero duos crearent, qui summæ rerum præessent. Creati M. Oppius & Sex. Manilius. Mox autem relicto Aventino in sacrum montem transiêre, quæ secessio accidit anno post reges exactos circiter 61. V.C. CCCV. Paulo autem post placata est plebs iis conditionibus, ut tribunis plebis ipsis restitutis, abdicatisque decemviris, iterum consules crearentur.

*Populique consensu partim in carcere necati ]* Longe aliter a Livio hæc traduntur. Scil. Appium sibi mortem invenisse. Oppium vero in vincula ductum ante judicii diem ibi vitæ finem fecisse. Bona eorum publicavêre tribuni. Quidam hæc verba, non a Pomponio, sed ab interprete quodam ex veterum historiis, quia huic loco consentanea, quamvis non integrè, propter interpellatam fortasse operam, fuisse adjecta putant, quæ postea in contextum irrepserunt, Eberlin. *ad h. t.* Quod integrè non fuerint adscripta, cum ex dictione *partim*, quæ satis probat quædam adhuc desiderari, tum ex iis quæ ex Livio describere incepimus, & quæ sequuntur ad historiam pertinentibus, constat. Cum inquit : *Collegæ eorum exilii causa solum verterunt, bona publicata sunt. Et M. Claudius assertor Virginie, die dicta damnatus, ipso remittente Virginio ultimam pœnam dimissus Tibur exulatum abiit.* Notandum carcerem in quem Appius conjectus erat, ipse domicilium Romanæ plebis vocare solitus erat. Et



Et ipse cum ædificaverat in eo loco, ubi nunc S. Nicolai templum est, itaque in foveam incidit tandem, quam ipse fecerat, & sic superbix crudelitatisque etsi seras non leves tamen dedisse pœnas perspicimus.

*Suum statum recepit*] Exactis decemviris, pristinam regiminis formam reipub. imposuere. Et summæ rerum iterum consules præesse voluere, quo modo respub. veterem statum recepit. Hoc enim magistratu, sive hac regiminis forma fundata erat respub. quâ sublatâ tota ejus corruebat fabrica.

*S. 25. Deinde cum post aliquot annos, quam duodecim tabula lata sunt, & plebs contenderet cum patribus, & vellet ex suo quoque corpore consules creare, & patres recusarent, factum est, ut tribuni militum crearentur, partim ex plebe, partim ex patribus consulari potestate: hique constituti sunt vario numero: interdum viginti fuerunt, interdum plures, nonnunquam pauciores.*

**D**einde cum post aliquos annos, quam 12. tabb. lata sunt, & plebs contenderet cum patribus. Et vellet ex suo quoque corpore consules creare, & patres recusa-

sarent ] In duodecim tabulis scriptum erat , ne patriciis cum plebeis connubium esset , ut ex Livio & Dionysio constat : idque ut Manutius opinatur , eo consilio à decemviris factum fuisse videtur , ne per nuptias reconciliati patres , iisdem animis contra decemviros , quibus eripere imperii fasces volebat plebs , pro libertate consentirent. At contra Zasius idcirco a decemviris , qui omnes patricii erant , constitutum putat , quia more majorum nemo plebejus auspicia habebat , ea enim solis patriciis Romulo concesserat. Et propterea futurum erat , si connubia non dirimerentur , ut prole incerta auspicia turbarentur. Liv. lib. 4. cap. 6. M. vero Genucio , & P. Curiatio coss. C. Canulejus de connubio patrum & plebis aliam rogationem promulgavit ; qua contaminari sanguinem suum patres , confundique jura gentium rebantur. Sed nondum quievêre Tribuni , qui nati videbantur , ut quieti pacique publicæ semper officerent , & non secus ac perniciosi nautis venti novis fluctibus novisque tempestatibus populum exagitarent , ut inquit Vent. Cæcus *ad h. t.* Itaque primo ait Liv. lib. 4. mentio sensim a tribunis illata , ut alterum ex plebe consulem liceret creare , eo processit deinde , ut rogationem novam tribuni promulgarent , *ut populo potestas esset , seu de plebe , seu de patribus vellet , consules faciendi.* Id autem patres ferendum minime putabant ; quippe hac ratione non vulgari modo cum infimis , sed prorsus auferri a primoribus & ad plebem summum imperium deferri videbant.

*Factum est ut Tribuni militum crearentur , partim ex plebe , partim ex patribus consulari potestate ]* Observandum tribunorum militum duo esse genera. Quidam eorum dicebantur *Rufuli* , propterea quod Rutilius Rufus consul de illorum imperio primus tulisset. Hinc Asconius Pædianus in præm. I. in Verrem evationis , *Tribunorum militarium* ( inquit ) duo genera. Primum eorum qui *Rufuli* dicuntur. Hi in exercitu creari solent. Alii sunt comitiati , qui Roma in comitiis designantur. Et Festus Pompejus lib. 16. ita scribit ,



bit, Rufuli appellabantur Tribuni militum a consule facti, non a populo: de quorum jure, quod Rutilius Rufus legem tulerit, Rufuli ac post Rutuli sunt appellati. Horum meminere quoque Impp. in l. 11. l. 13. Cod. de re milit. Hi enim castris & legionibus præerant, imperium in milites habebant, exercituique & summæ rerum præficiuntur. Atque a primis originibus terni ex singulis tribubus Ramnensium, Titiensium & Lucerum creati fuere. Tribuni militum (inquit) Varro, quod terni tribus tribubus Ramnensium, Lucerum, Tatiensium olim ad exercitum mittebantur. Postea vero lege militari cautum, ut singulis quatuor legionibus seni ac deni tribuni præessent.

Unde Liv. lib. 9. cap. 30. *Et duo imperia eo anno dari capta per populum, utraque pertinentia ad rem militarem: unum, ut tribuni militum deni in quatuor legiones a populo crearentur, quæ antea perquam paucis suffragio populi relictis locis, dictatorum & consulum ferme fuerant beneficia.* Verum interjecto tempore militibus munus datum fuit, ut militari suffragio & prærogativa crearentur. Deinde lege sancitum fuit, ut populi suffragio & tribunorum rogatione fierent. Unde alii Rufuli, de quibus jam diximus: alii *Comitiati*, qui Romæ comitiis designabantur Ascon. in Verr. Et hi dicebantur Tribuni consulari potestate. Quorum quoque duo genera Liv. memorat. Quidam enim bellorum causa creabantur, quia duo consules obire tot simul bella nequibant, qui tribuni militum dicti, quod militibus pro consulibus imperarent. Quare & imperio & insignibus consularibus usi. Quidam creabantur propter legem promulgatam a Tribunis de consulibus ex plebe creandis. De quibus hic Pomponius sermonem habet. Cum autem inter patres & plebem magnis contentionibus consulem alterum e suo corpori fieri postulantem, cum summa pertinacia certaretur, ita ut res ad ultimam spectaret seditionem secessionemque plebis eruptura, gravissimè sese patribus tribunis opposentibus, & contra Tribunis de suo fervore nihil remitte-

bus, tandem res eo deducta est, ut tribunos militum consulari potestate promiscuè ex patribus ac plebe creari sinerent, de consulibus creandis nihil mutaretur. Eoque contenti tribuni, contenta quoque plebs fuit. Maluerunt vero patres communicare plebi consularem potestatem, quam consulum nomen, ut Zonaras inquit. Eorum autem imperio finito S. C. rursus plebem rogare statutum fuit, consules ne an tribunos mallerent; quique magis placuissent, fierent. Comitibus igitur tribunis consulari potestate creandis indicuntur. Creati autem fuere tres duntaxat patricii *A. Sempronius Atratinus*, *L. Atilius*, *T. Cæcilius*, atque hi anno trecentesimo decimo, vel ut in aliis quibusdam codicibus legitur anno CCCXI. postquam urbs Roma condita erat, hunc primum magistratum ineunt: quorum in magistratu concordia domi, pax etiam foris fuit, *Liv. l. 4. cap. 6.* Eutropius anno CCC LXV. V. C. pro duobus consulibus factos tribunos militares consulari potestate scribit. Verum erroris eum convincit *Livius & Fasti.* Agell. ad annum fere conditæ urbis trecentessimum quadragesimum septimum tribunos militares consulari imperio Romæ creatos tradit. Capitolini lapides trecentesimo nono, Et *Suidas* in voce *Χιλιάρχοι* trecentesimo quinto primos tribunos militum magistratum accepisse volunt. *Dionysius* imperium cepisse proconsulare anno tertio quartæ & octogesi-mæ Olympiadis, Archonte Athenis *Diphilo* summum obtinente imperio, tradit *lib. II.* Verum ut apud *Livium* legimus, non profirmato stetit magistratus ejus jus, quia tertio mense, quam inierunt, augurum decreto, perinde ac vitio creati, honore abiêre, quod *C. Curvatus*, qui comitiis eorum præfuerat, parum rectè tabernaculum cepisset. *Dionys.* vero *cit. loc.* tantum tres & septuaginta dies ait gessisse magistratum, & more vetere sese ultro magistratu abdicasse, cum signa quædam divinitus oblata vetuissent illos rempub. gerere. Cum autem magistratum deposuissent, Senatus cojit & interreges creavit. Magna



autem contentio iterum & patres & plebem aliquamdiu tenuit: interrex enim & senatus consulum comitia, tribuni plebis & plebs tribunorum militum, ut habeantur, tendunt. Vicere tandem patres. Fiunt iterum e patriciis consules, & *L. Papirium Mugillanum*, *L. Sempronium Atratinum*, fratrem ejus, qui cum collegis tribunatum deposuerat, *L. Quintius Barbatus* interrex consules creat. Tum postea iterum Tribuni, iterumque consules summæ rerum præficiuntur. Notandum quamvis S. C. cautum ut partim ex plebe partim ex patriciis crearentur Tribuni, attamen aliquamdiu soli patricii creati fuere, & quidem XLIII. annis neminem ex plebe tribunum militum creatum fuisse testatur Liv. l. 6. cap. 37. Primus e plebe creatus fuit Tribunus militum P. Licinius Calvus, si Livio fidem habeamus. Anno V. C. CCCLIII. Sex eo anno fuere creati, quorum Diodorus tres tantum nominat, qui eo anno tribunatum iniere, P. Mælius, Sp. Mænius, L. Furius, & alii tres. Liv. l. 5. cap. 12. ita inquit, *Inter has iras plebis in patres, cum tribuni plebis nunc illud tempus esse dicerent stabilienda libertatis, & ab Sergiis Virginiisque ad plebejos viros fortes ac strenuos transferendi summi honoris: non tamen ultro processum est, quam ut unus ex plebe usurpandi juris causa, P. Licinius Calvus tribunus militum consulari potestate crearetur. Ceteri patricii creati: P. Mænius & L. Titinius, P. Mælius, L. Furius Medullinus, L. Publilius Volsceus.* Sigonius autem in fastis ad annum 353. tradit omnes hos, quos Livius nominat, plebejos fuisse præter Furium, ex plebejis eorum magistratibus se observasse. Et Phigius quoque ait se mirari Livium hæc scribere: Constat enim (inquit) ex plebeis horum magistratibus, omnes præter solum Furium plebejos, non patricios fuisse; nisi imaginemur duplices earum gentium familias, quasdam plebejas, & quasdam patricias fuisse. Præter hos tamen ne exemplum quidem aliud, quod sciam, vel ipse Livius, vel alius suggerit, quo patriciatus istarum familiarum probari posset. Anno sequen-

ti inquit Liv. *eod. loc.* dulcedo invasit tribunorum militum plebejos creandi, unus M. Veturius ex patriciis candidatis locum tenuit. Plebejos alios tribunos militum consulari potestate omnes fere centuriæ dixêre. Proximis comitiis iterum omnes tribunos patricios omnes creaverunt. *cap. 14. eod.* Anno sequenti iterum patricii creati. Tum iterum omnes plebei. Anno 375 secundum Phygii computationem, æquatus patriciorum plebejorumque numerus ut auctor est Livius. Donec id genus magistratus finem adeptus est, quod post annum 77. quam in Rempub. introductus esset, contigit, cujus causam tradit Liv. *lib. 6. cap. 34.* Habebant autem Tribuni consulari potestate creati eadem insignia, eandemque auctoritatem & potestatem, quam olim consules, quippe & sella Curuli & consulari prætexta utebantur, lictores præterea & fasces habebant; proinde ut nihil ipsis nisi consulum nomen deesset.

*Hique constituti sunt vario numero : Interdum n. viginti fuerunt, interdum plures, nonnunquam pauciores.] Vario numero fuisse tribunos certissimum est. Initio enim hujus magistratus quamvis sex creari permissum erat, S. C. tres tantum creati sunt, ut supra admonuimus. Postea plures, quaterni, aliquando seni. Quinimo cum Veientes Romanos gravi bello premerent, ad numerum octo tribuni creati ut Livius tradit. Comititia utriusque populi longe diversa ratione facta sunt: octo (quod nunquam antea) creati. Nonquam vero 20. ut hic locus indicat. Quare Ventura Cæcus ad h. t. Verum de Tribunorum, qui proconsularem tenuerunt imaginem augetur quæstio: Nam illud sane constat vario creatos esse numero, octonos tamen cum maxime apud Livium, ceterosque legimus fuisse creatos, nec satis constat unde Pomponius viginti militares Trib. pro consulibus caperit renunciatos. Non temere tantus numerus adjectus Reipub. foret, neque quibus potissimum causis tot Tribunis eguerit Respub. satis liquet, & res sane tanta imprudenter ab scriptoribus ne-*



*glecta prætermiffaque foret : Quare fibi perfuadit non fine ratione vel liberarium erraffe, vel Pomponium Tribunos militares, qui apud Aventinum a duobus exercitibus sunt creati, Proconfularium accepiffe loco, vel authorem aliquem habuiffe Jurisconsultum, qui defideratur a nobis. Nec tamen (inquit) perfuadere mihi poffum, Livium tam negligentem fuiiffe, ut qui octo Trib. militum pro confulibus creatos fcribit, non fcripturum fuiiffe viginti, fi modo creati fuiiffent. Hæc ille. Putat Budæus errorem effe liberariorum, quem ita irrepliffie exiftimat : Cum enim feni (inquit) hoc modo fcriptum liberarii reperiffent VI. cum NI. Syllaba fupra p. fta, ita ut V. & I, fex facerent, & NI fupra pofitum effet : exiftimarunt vicem legendum effe, literas numerales pro Syllaba accipientes. Quod admodum verofimile videtur. Balduinus ad h. t. tradit, apud Livium viginti aliquando creatos fe inveniffe, quod nufquam memini me legiffe, nifi militari fuffragio, qui caftiris & legionibus præerant, imperium in milites habentes, itaque non annumerandi iis, qui populi juffu & comitiis confulari creabantur poteflate.*

*§. 26. Deinde cum placuiffet creari etiam ex plebe confules : cœperunt ex utroque corpore conftitui. Tunc ut aliquo pluris patres haberent, placuit duos ex numero patrum conftitui, ita facti funt ædiles curules.*

**D** *Einde cum placuiffet creari etiam ex plebe confules.] Supra ad §. 16. h. t. annotavimus propter bella in-*

testina & civiles discordias inter patres & plebem, vehementer & assidue flagitantem ut sibi alterum ex plebe consulem creare permetteretur, tandem Tribuni pl. id a patribus obtinuerunt, anno ab V. C. secundum Sigonium & Phigium 387. primusque de plebe L. Sextius consul creatus. *Vix dum persunctum eum bello, atrocior domi seditio excepit: & per ingentia certamina dictator senatusque victus, ut rogationes tribunicia acciperentur: & comitia consulum adversa nobilitate habita, quibus L. Sextius de plebe primus coff. factus.* Liv. lib. 6. in fin.

Hinc perperam Plinius Junior tradit C. Licinium Stolonem primum e plebe consulem factum fuisse. Livius enim anno altero ab V. C. 389. T. Sulpicium Peticum, & C. Licinium Stolonem coff. factos scribit. lib. 7. cap. 2. Is idem est, qui antea toties tribunus plebis cum L. Sextio, consulatum plebejum extorsit a patriciis. Valer. l. 8. cap. 6. Quanquam interjecto tempore iterum patricii consulatum sibi vindicavere. Ut apud Liv. l. 7. c. 17. 18. *Quadringentesimo (inquit) anno, quam urbs Roma condita erat, quinto tricesimo quam a Gallis recuperata, ablato post undecimum annum a plebe consulatu, patricii consules ambo ex interregno magistratum iniere, C. Sulpicius Peticus tertium, M. Valerius Publicola. Et infra, Creati consules ambo patricii M. Fabius Ambustus tertium, T. Quintius. Et cap. 19. Consulatus uterque apud Patricios manet. Consules creati C. Sulpicius Peticus quartum, M. Valerius Publicola iterum. Postea tamen quoniam tribuni negarent passuros comitia haberi, ni secundum legem Liciniam haberentur, concordiae causa iterum legem Liciniam patres observarunt, comitiis consularibus L. Cornelium Scipionem interregem jusserunt. Hinc P. Valerio Publicolae datus e plebe collega C. Marcus Rutilius. Imo aliquando uterque consul plebejus, & tandem eo audaciae processere tribuni, ut tulisse ad populum se apud quosdam invenisse scribat Livius lib. 7. cap. 92. utique liceret consules ambos plebejos creare.*



*Tunc ut aliquo pluris patres haberent.*] Id est, ne patres in omnibus plebi cedere viderentur, ut aliquod sibi reservarent in acquirendis & conferendis honoribus præ ceteris commodum & privilegium, pro concessio plebi altero consulatu.

*Placuit duos ex numero patrum constitui: ita facti sunt Ædiles Curules.*] Ad §. 2. h. t. quædam de ædilitate disputavimus, quæ ad subjectam materiam pertinere judicavimus. Incidimus hic quidem in ejusdem nominis dignitatem, sed alium tamen magistratum, novis honoribus & insignibus auctum, a patriciis inventum, sibi que vindicatum quasi jure proprio, ad quem plebeis hominibus nullus patebat aditus. Putat Corasius veritatem Historiæ hic depravare Pomponium, cum prætor fuerit ob eam, quam exprimit causam, creatus: ut patres scilicet aliquo pluris haberent, non etiam Ædiles Curules, quos constitutos scribit Liv. lib. 6. in fin. ut ludi maximi fierent; ita se habent Livii verba. Et ne is quidem finis certaminum fuit, quia patricii se auctores futuros negabant, prope secessionem plebis res terribilesque alias minas civilium certaminum venit: cum tamen per dictatorem conditionibus sedatæ discordiæ sunt, concessumque ab nobilitate plebi de consule plebejo: a plebe nobilitati de prætore uno, qui jus in urbe diceret ex patribus creando. Ita ab diutina ira, tandem in concordiam redactis ordinibus, quum dignam eam rem senatus censeret esse, meritoque id, si quando umquam alias, Deum immortalium causa libenter facturos fore, ut ludi maximi fierent, & dies unus ad triduum adjiceretur; recusantibus id munus ædilibus plebis, conclamatum a patriciis est juvenibus, se id honoris deum immortalium causa libenter acturos, ut ædiles fierent. Quibus quum ab universis gratiæ factæ essent, factum Senatusconsultum, ut duo viros ædiles ex patribus dictator populum rogaret: patres auctores omnibus ejus anni comitiis fierent.

Verum miror Corasium nullam eorum habuisse rationem quæ sequuntur in principio lib. 7. ubi inquit. Annus

hic erat insignis novi hominis consulatu, insignis duobus novis magistratibus, pratura & curuli adilitate; hos sibi patricii quaesivere honores pro concesso altero plebi consulatu. Et deinde, Cum de industria omnia, nequid per per plebejum consulem ageretur, proferrentur: silentium omnium rerum, ac justitio simile otium fuit: nisi quod non patientibus tacitum tribunis, quod pro consule uno plebejo tres patricios magistratus curulibus sellis prætexatos sibi nobilitas sumpisset &c. Fuere autem primum creati Ædiles Curules anno CCCLXXXVII. primique ex patribus hoc munere ornati Cn. Quinctius Capitolinus, & P. Cornelius Scipio uti tradit Liv. lib. 7. princ. L. Sextio & L. Æmilio Mamerio coss. Curules vocati, ut tradit Festus, quod curru vehebantur. Alii a Curia deducunt, Lipsius de magist. Rom. a Curibus veteri oppido Sabinorum dicti putat curules. Et videtur pro hac derivatione militare Syllabæ ratio. Verum ut annotat Budæus, Curules a curru prima brevi scribendum, ut disertus a dissero, offella ab offa, &c. Ab Etruscis quippe imperii magistratuumque insignia Romanos accepisse tradit Florus lib. 1. cap. 5. ubi inquit. Neque pace Tarquinius quam bello promptior. Duodecim namque Tusciæ populos frequentibus armis subegit. Inde Fasces, Trabeæ, Curules, Annuli, Phaleræ, Paludamenta, Prætextæ. Et Macrobi. lib. 1. Saturn. cap. 6. Tullus Hostilius Hosti filius rex Romanorum tertius, debellatis Etruscis sellam curulem, lictoresque & togam pictam atque prætextam, quæ insignia magistratuum Etruscorum erant, primus ut Romæ haberentur, instituit. Recta itaque & vero magis consentanea mihi videtur illa derivatio, quam primo loco descripsimus, a Curru scil. Currulis & abjecta secundum Budæi mentem altera litera R. Curulis. Nam ut apud Gellium l. 3. c. 18. Solebant Senatores in veterum etate qui curulem gessissent magistratum, curru solitos honoris gratia in curiam vehi: in quo curru sella esset, supra quam considerent; quæ ob eam causam curulis appellaretur. Et Isidorus lib. 20. cap. 11. Consules & Prætores



res apud veteres propter itineris longinquitatem curru in forum provehebantur. Sellæ autem quæ post eos vehebantur, quibus sedentes dicere jura solebant, a curru curules sellæ sunt nominatæ. Hinc apud Suet. August. cap. 22. legimus Augustum bis ovantem urbem ingressum fuisse, atque tres curules triumphos egisse. Triumphos Curules vocat ad differentiam ejus, quod paulo ante dixerat, bis ovans ingressus est; quippe ovationes triumphi erant minores, in hoc a curulibus id est majoribus triumphis præter cætera discrepantes, quod ovantes equo insidentes, vel ut Sabinus Massurius apud Gell. l. 5. c. 6. dicit, pedibus, sequentibus eos non militibus sed universo senatu, urbem ingrederentur; triumphantes autem curru invehebantur. Vid. Symmach. epist. 21. 22. Et Servius ad XI. Æneid.

*Et sellam regni, trabeamque insignia nostri.*

annotat sellam curulem a curru dictam, quod ea tantum utebantur, qui triumphali curru inveci essent. Verum errare tamen hic videtur Servius, quod statuit ea tantum usi, qui triumphali curru inveci fuissent. Quippe & Prætores & Ædiles & Consules apud Festum per curules magistratus designantur, qui curuli sella utebantur. Verum Curules Triumphos a curru, quo urbem triumphantes invehebantur recte dictos autumat. Constabat autem sella, ut describit Casaubonus apud Suet. August. cap. 43. quatuor lignis pluribusve incurvis, in modum fere literæ S. productæ & minus curvatæ ab utraque parte. Hæc funibus ita compacta erat, ut aperiri claudique posset, in aperta sedebatur super loris & linteis. Unde Martialis. lib. 2. epist. 57.

*Quem grex togatus sequitur, & capillatus,*

*Recensque sella, linteisque lorisque:*

figura & forma ejus conspicitur in antiquis denariis; Fuit ea præterea gradibus eboreque & signis ornata sculptaque. Hinc Ovid.

*Conspicuum signis cum premet altus ebur.*

*Signa*

*Signa quoque in sella nossem formata curuli,*

*Et totum Numide sculptile dentis ebur.*

Quo quis autem dignitate & honore illustrior, eo sublimius confidebat. Quare post sellam imperatoriam excellentiores cæteris consulum sellæ. Unde per gradus ascendendum erat in sellam Curulem. Hinc Lucan: lib. v.

*Lentulus e celsa sublimis sede profatur.*

Et Tacit. 4. Annal. Consulesque sede vulgari per speciem mæstitiæ sedentes, honoris locique admonuit; id est sedebant in sedibus Prætorum aut Tribunorum, quæ humiles erant, consulum vero ut diximus altæ & sublimes. Papin. Stat. l. 3. Sylv. 3. vers. 116.

— — — — *Fasces summamque Curulem,  
Frater, & Ausonios enses, mandataque fidus  
Signa tulit,*

Per summam, consularem curulem intelligit addifferentiam cæterarum. Et apud Juven. Satyr. 10. vers. 91,

*Atque illi summas donare curules.*

id est, consules facere. Fuerunt itaque sellæ curules initio regum: Deinde majorum magistratuum, ut Consulum, Prætorum, Ædilium: scil. qui ex patribus creati erant, & propterea Ædiles dicti: Unde sella curulis, curule ebur, sæpissime pro consulari dignitate, imo & prætura atque ædilitate positum legimus, ut Juven. cit. loc. Hinc Horat. l. 1. epist. 6. vers. 53.

*Cuilibet hic fasces dabit: eripiet curule*

*Cui volet, importunus ebur:*

ubi interpretes per *curule ebur*, intelligunt ædilitatem majorem, quamvis non solum de illa, verum & de aliis magistratibus majoribus, qui sella curuli in forum & curiam vehebantur. Ceteri vero Magistratus, ut Tribuni, Triumviri, Quæstores, & hujusmodi minora exercentes judicia non in sellis curulibus nec tribunalibus, sed in subselliis sedebant, Ut inquit. Ascon. Pedian. in divinat. in Verr,



Verum etsi hunc honorem initio patres sibi tantum vindicabant, sequenti tamen anno, non patientibus tribunis quod pro uno consule plebejo, tres patricios magistratus curulibus sellis prætextatos sedentes, nobilitas sibi sumpsisset: primo, ut alternis annis ex plebe fierent, concordiae causa concessum, scribit Cic. pro Cn. Planco. L. Cassium dixisse primum quendam Juventium, omni & virtute & humanitate ornatum adolescentem primum de plebe Ædilem Curulem factum esse, postea promiscuum fuit, donec ea dignitas ad libertini generis homines delata est: quod accidit, cum Cn. Flavius Appii scriba, de quo ad §. 7. *h. t.* quædam disputavimus, libertino patre natus, cum Quintio Anitio Prænestino, propter divulgatum ab eo jus civile, quod olim in penetralibus Pontificum reconditum asservabatur, a populo ad hujus honoris fastigium evehctus est. Vid. a nobis *supr. annotata. ad dict. §. 1.* Ad eorum autem munus & officium multa pertinebant procuranda. Quæ potissimum Cicero in 7. in Verr. describit. Cum inquit. *Nunc sum designatus edilis: habeo rationem quid a populo Romano acceperim: mihi ludos sanctissimos, maxima cum cerimonia, Cereveri, Libero, Liberaque faciendos: mihi Floram matrem populo plebique Rom. ludorum celebritate placandam: mihi ludos antiquissimos, qui primi Romani sunt nominati, maxima cum dignitate ac religione Jovi, Junoni, Minervæque esse faciendos: mihi sacrarum procurationem: mihi totam urbem tuendam esse commissam, ob earum rerum laborem & sollicitudinem fructus illos datos, antiquiorem in senatu sententiae dicendæ locum, togam prætextam, sellam curulem, jus, imagines ad memoriam posteritatemque prodendam. Ex quibus perspicimus quanta ædilibus incumbabant onera, quique etiam Ciceronis tempore eorum fuere honores. Unde quoque, Sunt. adiles. curatores. urbis. annonæ, ludorumque solennium. Olleisque. ad. honoris. amplioris. gradum. is. primus. adscensus. esto. Ejus quippe magistratus munificentia ple-*  
rum

rum aditum aperiebat ad præturam & consulatum. Primum enim opera publica inspiciebant ac tuebantur, & templa Deorum, cloacarum, aquæ ductuum, & omnium denique publicorum privatorumque operum curam habebant, providentes, ut ea integra, munda, & incorrupta conservarentur. *l. unic. ff. de via public.* ut templa, theatra, stadia, fora, porticus, & basilicæ atque mænia magnificis operibus reficerentur & ornarentur. Seneca *Epistolarum* 86. *lib. ad Lucilium.* Balneorum sui temporis luxuriam notans, ostendit olim pauca fuisse balnea, nec cultu exornata. Verum suo tempore ad ædiles nobilissimos pertinuisse, ut intrarent loca quæ populum receptabant, exigèrent munditias, & utilem ac salubrem temperaturam. Unde apud Plutarch. *quest. nat.* Ignis ex oleo (inquit) inimicus est balneis, & tabulata ac fornices subditus labefactat. Ideo periti Ædiles non permittunt balnearum redemptoribus lignis oleaginis uti, sicut nec lolium conjicere in ignem aut herbas, horum vapor gravedines capitis ac vertigines concinnat. Et in eadem *Epist. Senec.* Dii boni inquit, quam juvabat illa balnea intrare, quæ scires Catonem tibi Ædilem aut Fabium Maximum manu sua temperasse. Annonæ curam quoque habuisse eodem loco scribit Cicero. Annonæ vero appellatione non solum res frumentaria verum & vinum oleum ceteraque rerum alimonia continetur. Hinc Liv. *lib. 10. cap. 11.* Caritas etiam annona sollicitam civitatem habuit: ventumque ad inopiæ ultimum foret, ut scripsere, quibus adilem fuisse eo anno Fabium Maximum placet, ne ejus viri cura, qualis in bellicis rebus multis tempestatibus fuerat, talis domi tum in annona dispensatione, preparando ac convehendo frumento fuisset. Et Apulejus *l. 1.* Ædilem gerimus & annonam curamus. Tertio ludos solennes curabant; vocantur ludi solennes qui statis temporibus fiebant, ut Florales, Circenses, Megalenses, Romani, qui publicè recepti erant: Privati autem ludi, funebres sive votivi ad eorum munus non pertinebant. Lips. *de Magist. Rom.* Quum & magnificentissima



tissima munera & ludos apparatusissimos, ad conciliandum sibi populi benevolentiam & voluntatem per Ædiles vel Curules plebejos, nunc Romanos nunc plebejos, nonnunquam scenicos, publicis vel privatis impensis aut ex mulctatitia pecunia curatos & instauratos legimus. Alexand. ab Alexand. *decr. genial. lib. 4. cap. 4.* Ædiliti quoque fuit muneris, providere nequid occulti vitii, latentisque morbus esset in rebus, quæ vendebantur. Deque iis rebus jus dicebant. Plaut. in Rudente. actus. 2. Sen. 3.

*Ita solet Neptunus, quamvis fastidiosus Ædilis est*

*Si qua improba sunt merces, jactat omnes.*

De mensuris etiam cognoscebant ut supr. annotavimus. D. Hieronym. Ab Ædilibus, quos *ἀγορεύς* Græci appellant, vendentium coërcebatur rabies. Itaque regebant omnia quæ ad venalium forum pertinebant. Unde Gell. *lib. 4. cap. 2.* In Edicto Ædilium Curulium, qua parte de principiis vendundis cautum est, scriptum sic fuit. **TITULUS. SERVORUM. SINGULORUM. UTEI. SCRIPTUS. SIT. COERATO. ITA. UTEI. INTELLEGI. RECTE. POSSIT. QUID. MORBI. VITII. VE. QUOI. Q. SIT. QUIS. FUGITIVUS. ERRO. VE. FIT. NOXA. VE. SOLUTUS. NON. SIT.** Publica curare, spectavit quoque ad Ædiles, funera publica eaque per præconem edicere, populum ad exequias evocare, atque id genus alia. Ovid. *lib. 6. Fast. 64.*

*Adde quod Ædilis, pompa qui funeris irent,*

*Artifices solos jusserrat esse decem.*

Et Cicero in fin. Philipp. 9. de supremis honoribus Servio Sulpicio in legatione de functo statuendis a Senatu decretum. Placere ait, Eum quam amplissime supremo die suo efferrî: Et statim: Senatum censere atque e re publica existimare Ædiles curules edictum quod de funeribus habeant, Servii Sulpicii Q. F. Lemonia, Ruffi, funeri mittere, utique locum sepulchro in campo Esquilino C. Pansa consul, seu in quo loco  
vide-

videbitur, pedes triginta quoque versus designet, quo Servius Sulpicius inferatur. Verum & matrimoniorum, scortationum, & meretricium coërcitionem quandam & regimen habebant, hinc matronas quandoque probri accusabant, *Ædiles alibi ait Livius plebei aliquot matronas probri accusarunt: quasdam ex iis damnatas in exilium egerunt.*

Itaque habuere *Ædiles Curules* coërcitionem & jurisdictionem aliquam, non minorem vero quam *Ædiles plebis*. Hinc de quibusdam causis edicta proposuere, quæ juris honorarii portionem faciunt, unde frequens mentio *ædilitii edicti* ex quo venditionum controversiæ & actiones redhibitoriæ judicantur, & *Tit. 21. ff. de Ædilitio edicto & Redhibitione & quanti minoris.* Et *Plaut. captiv. 10.*

*Euge, edictiones ædilitias hic quidem habet.*

multam non parenti irrogare, vel etiam flagellis in eos animadvertere *ædiles* potuisse constat ex *l. 12. de decurion:* ubi inquit *Ictus Callistratus.* Eos qui utensilia negotiantur & vendunt, licet ab *ædilibus* caduntur, non oportet quasi viles personas negligi: Denique non sunt prohibiti ejusmodi homines *Decurionatum* vel aliquem honorem in sua patria petere: nec enim infames sunt, sed ne quidem arcentur honoribus, qui ab *ædilibus* flagellis cæsi sunt, quanquam jure suo ita *ædiles* officio isto fungantur: &c. vid. quæ ad *§. 19.* disputavimus. Erat autem, ut inquit *Cicero*, hic magistratus adscensus & ad honores ampliores gradus, ut præturam, consulatum, censuram, quanquam non semper per illos gradus ad cæteros majores magistratus pervenire necesse fuit. Quippe de *P. Licinio Crasso* legimus apud *Livium*, eum ex *Ædilitate* ad censuram provectum fuisse. Sic quoque *T. Quintius Flaminius* ex quæstura consulatum petivit, ut videre est ex notatis ad *§. 16.* Imo hujus magistratus ea fuit dignitas, ut viri consulares eam non fuerint aspernati. Unde apud *Livium* legimus *Q. Fabium Maximum* consulatui sibi non petenti oblato *ædilitatem Curulem* prætulisse *lib. 10. cap. 9.* *Cic. lib. 2. offic.* Intelligo in nostra civitate inveterasse jam a bonis



bonis temporibus, ut splendor adilitatis ab optimis viris postuletur. Itaque & P. Crassus cum cognomine dives, tum copiis, functus est adilitio maximo munere. Et paulo post, L. Crassus cum omnium hominum moderatissimo Q. Mucio, magnificentissima adilitate functus est: Deinde C. Claudius, App. F. multi post, Luculli, Hortensius, Silanus. omnes autem P. Lentulus, me consule vicit superiores. Fuit consul Crassus anno DCXXII. cujus ædilitate primum elephantos pugnasse tradit Plin: lib. 9. cap. 5. l. 34. c. 7. & lib. 25. cap. 11. Et M. Agrippa post primum consulatum, etiam si, quibus vellet ab Augusto honoribus ornaretur, ad ædilitatem adspiravit, eamque obtinuit. Phig. lib. 4. anno V. C. CCCXXVII. Quare apud Plin. lib. 36. cap. 25. A. M. Agrippa in adilitate post consulatum &c. Quemadmodum certis finita legibus est ætas unde honos petatur, ita ad ædilitatem nemini aditus erat, nisi certum annorum numerum attigisset. Sic quæsturæ definitum annum XXV. tradit Lipsius de magist. multis rationibus motus: De Ædilitate inquit quanquam firmi admodum aut fixi nihil reperi: tamen adtribuam fidenter Tribunatui sive Ædilitati an. 27. aut 28. Certe quidem annum XXX. includam, quod is Pratura fuit, ut dicam. Atque hoc de utraque Ædilitate sento: etsi in Curuli valde a nobis dissentiant viri docti. An. n. ei XXXVI ei definiunt quod miremur. Cur. n. probabile, tantum otiosi intervalli fuisse inter Quæsturam & Ædilitatem. Multos autem hac lege annali solutos fuisse passim apud scriptores legimus: sic ante definitum ædilitati annum Ædilis factus est P. Cornelius Scipio, cui post Africanus fuit cognomen. Huic enim inquit Liv. petenti adilitatem cum obfisterent tribuni plebis, negantes rationem habendam esse, quod nondum ad petendum legitima ætas esset? Si me inquit, omnes Quirites adilem facere volunt, satis annorum habeo.

§. 27. *Cumque consules avocarentur bellis finitimis : neque esset , qui in civitate jus reddere posset : factum est , ut prætor quoque crearetur , qui urbanus appellatus est , quod in urbe jus redderet.*

**C**umque consules avocarentur bellis finitimis : neque esset qui in civitate jus reddere posset , factum est ut Prætor quoque crearetur. ] Ex veteribus monumentis constat , consules olim non solum bello præfuisse foris , sed & iuridicundo domi : Unde & iudices appellantur. Cic. l. 3. de leg. Regio imperio duo sunt : iique præeundo , iudicando , consulendo , PRÆTORES , JUDICES , CONSULES , appellator. &c. vid. §. 16. h. t. Verum postea cum finitimis bellis avocarentur consules , ita ut iuridicundo vacare nequirent , peculiaris magistratus huic rei institutus est , qui in urbe jus diceret , cuique ab eo tempore illud nominis proprium esse cæpit. Prætor autem dictus , ut supr. ad §. 16. annotavimus , a præeundo , quasi Prætor. Varr. lib. 4. de ling. lat. Prætor dictus , qui præiret jure & exercitu &c. Quare consules olim prætores ad dict. §. 16. nominatos diximus , quia exercitui præibant. Et Non. Marcell. Consules prætores dictos , quod præirent populo , ait auctoritate Varronis lib. 2. Creatus vero est anno V. C. 388. Cujus instituendi causam duplicem fuisse tradit Lipsius ; utilitatem scil. & emulationem. Cum enim consules bellis finitimis gerendis occupati iuridicundo in urbe vacare non possent , e repub. erat magistratum creari , qui jus redderet in urbe , & ju-



& justitiæ administrandæ præesset, non deberent enim inter arma silere leges : quid enim aliud est respub. a quâ exulat justitia, quam omnium nequitiarum, scelerum, & improbissimorum hominum in mutuam perniciem advolantium officina, non hospes ab hospite tutus est, non socer a genero, ubi poena metusque absunt, nec supplex turba judicis ora sui timet, qui sua sceleribus supplicia & virtutibus premia decernit, & quod justum & æquum est pronunciat inter contententes. Altera cæusa fuit *emulatio*, ut ex Livio perspicimus *lib. 7.* Patricii enim novum hunc honorem & magistratum pro concessio plebi altero consulatu sibi vindicarant. Vix enim æquo animo ferre poterant, quod plebs sibi in omnibus muneribus fungendis æqualis erat, nulla sibi aliqua peculiari dignitate reservata. Verum & hic honos deinde plebi etiam communicatus est, anno urbis 417. cum Q. Publius Philo, ut Liv. tradit, primus e plebe prætor creatus est. Maxima autem erat præturæ dignitas, atque inter majores numeratus magistratus, summoque honore & auctoritate pollebat, in quem illa conferebatur. Quippe & imperio cum in urbe, tum in provinciis consulatui proxima; iisdem enim, quibus consules, creabantur Prætores auspiciis, quamobrem consulum collegæ appellati fuere, ut perspicimus ex verbis Messalæ apud Gell. *l. 13. c. 15.* Patriciorum inquit *auspicia in duas sunt divisa potestates. Maxima sunt consulum, pratorum, censorum, neque tamen eorum omnium inter se eadem, aut ejusdem potestatis: ideo quod collegæ non sunt censores consulum aut pratorum; pratores consulum sunt. ideoque neque consules aut pratores censoribus, neque censores consulibus aut pratoribus turbant aut retinent auspicia. at censores inter se, rursus pratores consulesque inter se & vitiant & obtinent. Prator & si collega consulis est, neque prætorem, neque consulem jure rogare potest, ut quidem nos a superibus accepimus, aut ante hæc tempora servatum est: & ut in commentario tertio decimo C. Tuditani patet, quia imperium minus prator, majus habet consul: &*

a minore imperio majus aut major collega rogari jure non potest. Pratores nos his temporibus pratore creante veterum auctoritatem sumus seculi: neque iis comitiis in auspicio fuimus. Creabantur itaque, quia major magistratus, comitiis centuriatis. Regia quoque insignia, consularesque ferme apparatus, sella curulis, lictores vero non amplius sex, (alii duo tantum habuisse tradunt, trabea, cæteraque id genus ornamenta prætori tradita sunt. Attamen vetus lex apud Censorinum duos tantum lictores tribuit prætori urbano, cujus verba ita sese habent: *Prætor urbanus qui nunc est, quique post hac erit, duos lictores apud se habeto.* Et apud Plaut: in *Epid. act. 1. scen. 1. TH. At unum a prætura tua, Epidice, abest. EP. quid nam. TH Scies, lictores duo, duo viminei fasces virgarum.* Sed id hac mente capiendum inquit Lipsius, ut ad minimum duo semper in tribunali ejus adsint & adpareant, non plures. Sed vide tamen quæ Cic. tradit *orat. de L. Agraria*: ubi inquit. *Cum ceteris in coloniis duumviri appellentur, hi se pratores appellari volebant, quibus primus annus hanc cupiditatem attulisset, nonque arbitramini paucis annis fuisse consulem nomen appetituros? Deinde anteibant lictores, non cum bacillis, sed ut hic pratoribus anteeunt, cum fascibus duobus.* Unde alii sex lictores tribuunt Prætoribus Provincialibus, vel quibus imperium dabatur extraordinem Prætoribus, quapropter Appianus, Plutarchus, & Polybius, lib. 3. hanc præturam, ἐξοπλὴς κυναρχῶν, quasi sex securium magistratum appellant. Cicero de Verre Siciliae prætor: *Sex lictores circumstant valentissimi, & ad pulsandos, verberandosque homines exercitatissimi.* Verum statuit Passeratius prisco seculo duo tantum fuisse prætori, post vero sex dati.

*Qui urbanus appellatus est, quod in urbe jus redderet*] Urbanum appellavere Romani prætorem, quem creavere primum, ad differentiam alterius qui postea creatus est & peregrinus dictus, quod jus inter peregrinos dicebat, ita occasione collegæ, qui ei addebatur, urbanus dici cœpit, ad-

que



que ad ejus pertinebat curam inter cives jus reddere, principemque locum inter prætores, quorum numerus interjecto tempore augebatur, obtinebat. Unde *Prætor urbanus* major, *peregrinus* minor appellatus fuit. Imo ratione aliorum prætorum & imprimis peregrini proprio cognomento honoratum eum dici ab Ovidio *lib. 1. fastor.* vult Lipsius

*Verbaque honoratus libera prætor habet.*

Unde quoque jus, quod ab eo ejusque edictis fluere cæpit, jus honorarium dicitur. Hotomanus tres differentias inter præturam urbanam & peregrinam fuisse tradit. *Prima est* quod soli cives Romani agere apud urbanum potuerint, peregrini non item; *Altera* quod apud urbanum lege ageretur, apud peregrinum nequaquam; *Tertia*, quod *Prætor Urbanus* edictum in albo proponeret, quibus de rebus jus eo anno dicturus esset: cum alterum nusquam legatur proposuisse, sed, ut idem vult, ex *Urbano edicto* jus dicebat. Unde juris honorarii appellatione intelligitur illud, quod ab urbani prætoris auctoritate provenit, qui & honorarius dicitur, tanquam & honore & dignitate altero major & superior. Imo ex urbani Prætoris edictis formabant edicta sua translatitia Prætores alii.

Munera autem Prætorum urbanorum tria præcipue fuere: *Ludi, Sacra, Jurisdictio.* Ludis præfuisse sæpissime, eosque ad populi captandam voluntatem varios edidisse ignorare nequit, qui non plane in historicis hospes. Vid. *Liv. lib. 26. cap. 23.* ubi Prætor de Ludis Appollinaribus celebrandis ad senatum referente, decretum est, ut in perpetuum voverentur. A cæteris quidem Prætoribus largitiones, spectacula, & gladiatores: a te vero majorum tuorum debitum, eversionem tyrannidis repetunt, inquit Crassius ad Brutum, prætura urbana defungentem. Huc spectat quoque *l. 5. §. 10. ff. commodati vel cont.* ubi inquit Ictus. *Interdum plane dolum solum in re commodata, qui rogavit, præstabit, ut puta si quis ita convenit: vel si sua duntaxat causa commodavit, sponsa forte*

sua, vel uxori, quo honestius culta ad se deduceretur, vel siquis ludos edens Prator scenicis commodavit, vel ipsi Pratori quis ultero commodavit. Et apud Juvenal. Satyr. 8. vers. 194.

Nec dubitant Celsi Pratoris vendere ludis.

Et Satyr. 10.

Quid, si vidisset Pratorem curribus altis  
Exstantem, & medio sublimem in pulvere Circi  
In tunica Jovis.

Et Satyr. 14. vers. 256.

Monstro voluptatem egregiam, cui nulla theatra,  
Nulla aquare queas Pratoris pulpita lauti.

Hinc quoque Martial. Epigram. 29. l. 12.

Cretatam Prator cum vellet mittere mappam.

Pratori Mappam surripit Hermogenes.

Erat autem Mappa signum quod mittendis quadrigis dabatur in ludis Circensibus. Quare apud Suet. in Nerone c. 22. Mox & ipse aurigare, atque etiam spectari sapius voluit: positoque in hortis inter servitia, & sordidam plebem rudimento, universorum se oculis in Circo maximo præbuit, aliquo liberto mittente mappam, unde magistratus solent. Sic Juvenal. Satyr. XI. Megalesiaca spectacula mappa, pro ipsis megalensibus dixit. Bonæ Deæ sacrum plerumque curabant, quod domi ab uxore fiebat; quippe Sacra Bonæ maribus non adeunda Deæ. Tibull. 1. eleg. 6. unde apud Plutarch. in Cæsare. Est apud Romanos dea, quam bonam dicunt, sicut Græci muliebrem. Hanc Phryges sibi asserentes peculiarem, Mida regis autumant matrem esse, Romani nympham Dryada Fauno nuptam, Græci liberi patris eam matrem, quam nefandum est nominare. Unde Pampinis tentoria festum diem agitant mulieres contegunt, ac sacer draco ex fabula ad pedes Deæ jacet. Eo virum fas non est accedere: neque dum sacra aguntur, in domo, ubi aguntur, esse. Sole femina multa Orphicis germana memorantur in solenni peragere. Ubi festus dies instat, celebratur in ædibus consulis vel pratoris, ipse



autem domo omnesque viri cedunt. Uxor sola domum parat, peragiturque fere nocte perlusum pervigilio commissum, inter magnum concentum. Et idem in M. Cicerone. Nam ipsius domum tenebant mulieres quæ arcanis sacris bonæ deæ, quam Græci appella Gynæciam, operabantur. Hæc sacra quotannis in ædibus consulis uxor ejus aut mater virginibus Vestalibus præsentibus obit. Præcipuum vero prætoris erat munus jurisdictio, in ea consistebat maxima ejus auctoritas potestasque; apud eum enim omnis publici privatiq[ue] juris residebat potestas, ita ut ipsi novum jus condendi veterique derogandi esset facultas, unde Liv. Penes quem (de Prætoris sermonem habens) magistratum omnis publici privatiq[ue] juris potestas, ut & novus jus constituere, & vetera abrogare facultas esset. Solebat vero initio præturæ Prætor urbanus edictum sive juris formulam ex legibus Romanis aliorumq[ue] superiorum Prætorum edictis, sibi constituere, & in albo proponere: secundum quod durante prætura jus dicere vellet de causis, quæ ad suam jurisdictionem pertinebant. Et erat revera hoc edictum nihil aliud quam legum & juris vera ex equo & bono interpretatio formulis certis descripta, publicata a prætore urbano. Phig. annal. lib. 4. Solebant aliquando Prætores jus civile vel adjuvare, vel supplere, vel corrigere, ubi publica id suadere utilitas videbatur l. 7. ff. de just. & jur. idque proponendo edicta sua, & quod hisce edictis constitutum erat, jus Prætorium dicebatur. Sic scriptis heredibus bonorum possessionem secundum tabulas decernendo juvabat jus civile: interdum corripiebat & emendabat: ut cum liberis emancipatis ab intestato, & alienis postumis institutis, contra duritiem veteris legis bonorum possessionem dedit. §. emancipati. de hered. quæ ab intesta: §. 1. de bonor. poss. non nunquam supplebat, cum utilem dabat actionem, quando nulla erat jure civili actio prodita, & tamen æquum erat actionem dari. Ita enim Pomponius in l. 11. ff. de præscript. verbis. Quia actionum non plenus numerus esset,

ideo plerumque actiones in factum desiderantur. Sed & eas actiones, quæ legibus proditæ sunt, si lex justæ ac necessaria sit, supplet Prætor in eo, quod legi deest: Quod fecit in lege Aquilia reddendo in actiones in factum accommodatas legi Aquiliæ: idque utilitas ejus legis exigit. Creatus igitur fuit Prætor, ut in urbe inter cives jus redderet, & quidem de rebus civilibus; nam in facinorosos gravius consulendi vel animadvertendi ipsi facultas non fuit. Cum merum imperium non habuerit, saltem primis reipub. temporibus; merum autem imperium definitur. quod sit potestas animadvertendi in facinorosos l. 3. ff. de jurisd. De nullo enim judicabat crimine. Quare nec quæstitor dicebatur: tantum in civilibus controversiis ad eum delatis jus dicebat, hoc est judices & judicia dabat. Forster: de jurisd. Rom. vel ipse judicabat, & duabus hisce in rebus tota prætorialis jurisdictio posita fuit. Unde Cicero in legibus: Juris disceptator, qui privata judicet, judicari vult jubeat, prætor esto, juris civilis custos esto. Quare jus dicentis verbo prætorem significamus l. 1. ff. de jurisd. Sic apud Plaut. in Epid. act. 1. scen. 1. Tespio Epidico jus se dicturum minanti respondit.

*Jam tu autem nobis praturam geris.*

Cum vero judicavit ipse, tum decrevisse aut decretum interposuisse; cum judicare jussit, tum judicem, judicium vè, aut actionem dedisse dictus est. Quando autem decrevit, tum aut dixit, aut addixit, aut dedit: cum judicare jussit, tantum dedit; Unde tota jurisdictio tribus hisce verbis contenta fuit, Do, Dico, Addico. Signon. de jud. l. 1. Verum augendæ & tuendæ auctoritati & dignitati suæ, ipsi prætores non solebant judicare de privatorum causis, verum judices privatis dabant: quibus juris & æquitatis formulam præscribebant, quam sequerentur, in hunc fere modum. L. Octavius judex esto: si paret fundum Capenatem, quo de agitur ex jure P. Servilii esse: neque is fundus Q. Catulo petitori restituatur. Contra, si paret non Servilii: sed Q. Catuli ex jure esse: eum Servilius Catulo dare, resti-



*restituereve damnas esto.* Cic. 4. *in Verr.* Imo tandem in consuetudinem abiit, ut ipsi prætores non nisi extra ordinem judicarent, quando id favor aut causæ necessitas, æquitasve flagitare videbatur. Extra ordinem ergo dicebat jus prætor, quoties non data actione ipse in jure decernebat, jubebat, cognoscebat. Hinc jus dicere & judicare a se invicem distinguuntur. *Tit. Cod. nequis in sua caus. jud. vel jus dic.* Attamen cum & judicem dabat jus dicebat, quippe judicis dandi licentia est jurisdictionis *l. 3. ff. de jurisdict.* Possit nobis objici quod in datione judicis nulla causæ cognitio vertatur, adeoque non posse dici esse jurisdictionis. Verum notandum, ut supra diximus, Prætorem solitum fuisse causæ cognitione prævia formulam præscribere, secundum quam judicem pronuntiare necesse habebat. Quando itaque prætor ipse favore causarum vel personarum jus dicebat, extraordinaria illa cognitio dicebatur; propterea quod id fieret contra consuetudinem & solennem judiciorum ordinem. Unde quæ per iudices datos fiebant juris ordinarii, quæ vero per prætorem extra ordinarii dicebantur, id genus sunt, *interdicta, jussus de cavendo prætoris stipulatione, restitutio minorum ex causa atatis l. 13. §. 1. ff. de minor. Præjudicia.* Omnesque aliæ cognitiones prætoris. Quas causas vel suæ ipsi sibi reservarunt Prætores cognitioni; vel lex, vel Senatusconsultum, vel principis constitutio ipsis eas injunxit, ita ut ipse de variis rebus cognoscere necesse haberet Pretor nec alio mandari poterat: ejusmodi quoque erat jurisdictio de fideicommissis, quam voluit Tiberius in urbe tantum delegari magistratibus, & per provincias potestatibus. *Suet. in Claudio cap. 23.* scil. ut ipsi magistratus eorum cognitionem susciperent, eamque alio mandare nequirent: quam obrem in *l. 178. §. 2. in fin.* Ulpianus, inquit *persecutionis verbo extra ordinarias persecutiones contineri, ut puta fidei commissorum & si quæ aliæ sunt, quæ non habent juris ordinarii executionem.* Scil. quorum cognitio iudici pedaneo vel delegato a prætore vel consule mandari nequit;

Et iterum Tit. 25. *inst. Fidei comissa non per formulam petuntur, ut legata, sed cognitio est Romæ quidem consulum, aut Prætoris, qui fideicommissarius vocatur: in Provinciis vero Præsidum provinciarum.* Per formulam id est per actionem, dato iudicio, sive iudice pedaneo, eique præscripta formula. Duobus itaque modis prætorem inter duos litigantes iudicare solitum ex hisce, quæ disputavimus, perscipimus. Vel dato iudice, qui jus secundum præscriptam formulam a pretore dicebat inter eos, qui litigabant de illis rebus, qui ordinarii erant juris; vel sine iudice & sine formula ipse decernebat & suum interponebat decretum, idque in causis jam a nobis relatis, quæ non erant juris ordinarii: ideoque illud ordinaria via & more consueto, hoc autem extra ordinem fieri dicebatur. Hinc etiam illa differentia inter jus & iudicium, ita ut quædam dicantur in iure, quædam in iudicio fieri. Quod ita intelligendum, ut in iure agatur coram magistratu, sive pro tribunali jus dicente, sive de plano id est sella posita, ex loco æquo seu inferiore, Sutholt *de jurisd.* nunquam coram iudice; in iudicio agatur coram iudice, nunquam coram magistratu. Quando autem ordinaria via litigabatur coram iudice dato, obtinuit olim, ut antequam daretur iudex vel iudicium constitueretur, necesse erat, ut prius constaret de iure agendi, scil. an actio competere, & si competere, quomodo. De hoc utroque ut posset constare, apud prætorem sive magistratum causa agebatur summam, qui examinatis & auditis litigantium intentionibus atque depulsionibus, actionem secundum eam quæ audiverat vel denegabat vel dabat, pro ut hoc vel illud fieret, ita iudicium constituebat vel iudicem dabat, qui in iudicio de facto cognosceret, præscripta illa juris formula, secundum quam sententiam ferret aut id omne denegaret. Vultejus *de iud. lib. 1. cap. 3.* Ex quibus perscipimus, nec in iure semper agere moris fuisse, antequam agebatur in iudicio; ita ut (inquit Vultejus) *illud prius, hoc posterius, non tamen ut se invicem sequerentur*



neceſſario , cum interdum actum juris non ſequeretur judicium , utpote a prætorẽ denegatum , cujus in jure de eo cognitio erat omnis , utrum poſtulantĩ actio danda , ac proinde judicium conſtituendum eſſet , an vero deneganda. Vel etiam non ſequebatur judicium , id eſt non dabatur judex , quoties ipſe prætor ( ut diximus ) decretum interponebat , & ita in jure controverſia prætoris decreto dirimebatur. Vid. Sig. *de judiciis*. Non abs re fore puto , ſi paulo altius hic repetam , quæ in ſolenni & conſueta litigandi & diſceptandi ratione , cum ante tum poſt litem conteſtatam obtinuerunt , ut clarius nobis judiciorum & eorum , quæ antequam judicium vel judicem prætor dabat obſervabantur , conſtaret ratio. Sciendum itaque ſi quis aliquem convenire , vel alia quacunque ratione actionem intendere animum induxerat , prius tentabat vel per amicos vel aliqua quacunque ratione privatos inter parietes , quid poſſet proficere , antequam jure experiebatur. Unde Livius. *Cum res peragi intra parietes nequiſſet , ventum in jus eſt*. Ubi vero coram diſceptatore domeſtico intra parietes convenire nequibant , tum die poſtulationum petitor eum unde petebatur , in jus vocabat. Sig. *lib. 1. cap. 18*. Eſt autem in jus vocare , juris experiundi cauſa vocare : *l. 1. ff. de in jus vocand.* ſcil. apud eum , qui jurisdi- ctioni præeſt. Quæ citatio eſt judicii principium , eum in finem facta , ut quis jus ſuum per judicem conſequatur , quod ſine judicii ſtrepitu ab adverſario impetrari nequit. Hæc autem in jus vocatio aliter jure veteri fiebat , aliter jure novo : Poterat olim actor non impetrata Prætoris venia auctoritate propria reum in jus vocare , eumque ſi ſponte non vellet ſequi , adhibita vi & manu injecta , obtorto collo trahere. Quare in legibus XII. tabb. **SI IN JUS VOCET, ATQUE EAT, NI IT, ANTESTA- TOR. IGITUR IN CAPITO, SI CAL- VITUR PEDEMVE STRUIT, MA- NUM ENDO JACITO**. Quæ legis verba expo- ſuit Brifſon. *de formul. lib. 5.* ubi ita inquit ; Quod ſi

vocati in jus protinus illum non sequerentur, sed frustrarentur pedibusve struerent, testimonium iis qui præsto aderant, denunciabatur his verbis, *licet antestari?* Quæ hoc significant, licetne vobis testibus ad hanc rem uti. Illi ubi *licet* respondissent annuissentve, aurem, in qua memoriæ sedem veteres locabant, porrigebant, quâ molliter tactâ & apprehensâ, monebantur rei gestæ memores esse, quo facto manu injecta, adversarius ni satisdaret in jus rapi, obtortoque collo ad prætoris tribunal trahi poterat. Ejusmodi testem leges Bajoarium, ut & alii scriptores ævi posteriores *testem per aurem tractum* vocant. Hinc quoque *aurem alicui pervellere*, est aliquid alteri in memoriam revocare. *Est in aure imâ memoriæ locus, quem tangentes antestamur.* Plin. lib. 11. cap. 45. Huc pertinet quoque illud Horatius. *Satyr. 9.*

— — — *Casu venit obvius illi*  
*Adversarius, & quo tu turpissime magnâ*  
*Exclamat voce & licet antestari; Ego vero*  
*Oppono auriculam, rapit in jus clamor utrinque*  
*Undique concursus.* — — —

Qui enim non recusabat esse testem, solebat opponere auriculam, & hanc sibi contingere permittebat.

Hinc Plaut. in *Persa act. 4. scen. ult.* S A: *Age ambulo in jus leno.* D O, *quid me in jus vocas?* S A. *Illi apud Præto-rem dicam. Sed ego in jus voco.* D O. *Nonne antestaris?* S A, *tuâ ne ego causa carnufero;* Eam tamen legem quam statim ex legibus XII. tabb. descripsimus, ita temperarunt decemviri, ut neque sequi cogatur reus, neque duci possit qui morbo fontico implicatus erat. Unde leg. XII. tabb. sancitum. **SI JUDEX ARBITERVE, VEL ACTOR, VEL REUS. SI ALTEUTER EX LITIGATORIBUS, MORBO FONTICO IMPEDIATUR, JUDICII DIES DIFFISUS ESTO.** Morbus fonticus ille dicitur, qui cujusque rei peragendæ impedimento est, quo quis im-



impeditur, ut rebus suis superesse nequeat, nam levis morbus vel imbecillitas non excusat, attamen voluerunt leges ut si in jus vocatus leviori alicui morbo, vel senectuti, *qua ipsa* (ut ait Terentius) *morbis est*, sit implicitus, ei jumentum vel vehiculum demus, quo commodum suo in jus venire posset. At morbo fontico vel graviore laborante; (Suadet enim humanitas, & æquitas, ne afflicto addetur afflictio) vel iudice, vel actore aut reo, diem diffindere sive differre deberi legibus cautum. Quare Julianus in l. 75. ff. de jud. in fin. Si autem morbo impeditus, aut Reipub. causa advocatus, adesse non potuit reus, puto vel actionem iudicati eo casu in eum denegandam, vel exsequi prætorem ita iudicatum non debere. Vid. l. 15. & 16. ff. de recep. qui arb. Et in l. 53. §. 2. ff. de re jud. Pœnam contumacis non patitur, quem adversa valetudo, vel majoris causæ occupatio defendit. Prætores autem deinde alteram exceptionem adjecerunt: ut qui satis dederit in jus vocatus, non ducatur. Legibus enim XII. tabb. ita constitutum erat, ut in jus vocatus necesse haberet protinus sine mora vocantem sequi: quam sequendi necessitatem nulla ratione declinare poterat, nisi satis dando vel cavendo iudicio sisti, adeo ut neutro præstito, vocanti, ut supra annotavimus, vocatum obtorto collo in jus trahendi potestas esset. Quo pertinet tit. ff. in jus vocati ut eant vel satis aut cautum dent.

Postremo a prudentibus additum, ut in hoc quoque genere parceretur ei, qui domi esset suæ. Unde Gajus l. 1. ad leg. XII. tabb. l. 18. ff. de in jus voc. Plerique putaverunt nullum de domo sua in jus vocari licere: quia domus tutissimum cuique refugium, atque receptaculum sit: eumque qui inde in jus vocaret vim inferre videri. Quippe, ut inquit Paulus Ictus in l. 19. ff. eod. Satis pœna subire eum si non defendatur & latitet, certum est: quod mittitur adversarius in possessionem bonorum ejus. Sed si aditum ad se prestat, vel ex publico conspiciatur, recte in jus vocari. Et l. 21. ff. eod. Idem Ictus. Sed et si is, qui domi est, interdum in  
jus

*jus vocari potest, tamen de domo sua nemo extrahi debet.* Attamen ne sic quidem domi se continens vocatus, judicium reddebat inanium ac inutile, verum non latitans, Edictis evocabatur. Idque ad ædes latitantis ponebatur cum solenni vicinorum testatione. Si autem primæ evocationi non optemperaret, alteram decernebat prætor, & mittebatur adversarius in possessionem bonorum ejus: quæ tandem vendebantur propter contumaciam latitantis. Si tertia evocatione sui defensionem suscepisset. Itaque in Edicto prætorio erat: Qui fraudationis causa latitaverit, si boni viri arbitrato non defendetur, ejus bona possideri vendique jubebo: de quorum venditionis sollennitatibus quæ in bonis auctioni subjiciendis observabantur Vid. Sig. lib. 1. de jud. Quando autem non latitabat in jus vocatus, sed secum agendi facultatem actori faciebat, postulationum die in jus sequebatur adversarium: & actor impetrata loquendi licentia actionem ei edebat, qua adversus eum uti volebat Sig. dict. loc. Itaque olim antequam in jus ventum erat, reo actionem edere actorem cogi non solebat. Quamvis contrarium statuatur Vultejus lib. 2. cap. 2. de jud. ubi multa adfert argumenta quibus motus contrariam opinionem fuit amplexus. Ad nostram confirmandam sententiam faciunt quæ apud Plaut: in *Persa* legimus

*Age ambula in jus leno. D. quid me in jus vocas.*

*S. A. Illic dicam apud prætorem? sed ego in jus voco.*

Licet aliquando copiam actionis describendæ priusquam veniret in jus actor facere posset, ut proinde reus deliberandi esset facultas, utrum cedere an contendere vellet, & si contendendum putaret, veniret paratus, cognita actione qua conveniretur. l. 1. ff. de Edendo. Verum id non erat necessitatis sed voluntatis. Edita actione, quâ usurus erat, actor eam a prætore postulabat, id est petebat ut sibi liceret in adversarium intendere. Sig. dict. loc. Est autem *Postulare, desiderium suum in jure apud eum qui jurisdictioni præest, exponere, vel alterius desiderio contradicere.* Illud actoris



actoris est, hoc rei. In jure, est coram Prætorē vel tribunali, non iudice pedaneo, qui tribunali caret. Actione edita adversario, eaque a prætorē post postulationem impetrata, tum actor certa verborum concepta formula vadabatur reum, id est vades, sive sponsores petebat, fore, ut certo die, qui plerumque perendinus erat, se in jure sisteret. Sig. lib. 1. de jud. Vas autem, teste Varrone, fuit, qui pro altero vadimonium promisit, id est qui alterum adfuturum spondet. Definitur enim vadimonium sponsio ad certum diem sistendi se in iudicio, vel per se, vel per procuratorem; qui autem tale vadimonium promittebat, si dejubebat suo periculo alterum venturum ad diem citatum. Cic. pro Quinctio. *Vadari vis, promittit.* Vadari autem nihil aliud est, quam die dicta vades exigere; cautio sive sponsio itaque ipsa dicebatur vadimonium, quasi promissio de vadendo interposita, ex quo is qui vadebatur, dicebatur promittere vadimonium; is cui promittebatur scil. actori, dicebatur vadimonium accipere, & fideiussores intervenientes dicebantur vades. Reus veniens & se condicto die sistens dicebatur obire vadimonium, non veniens dicebatur vadimonium deserere, quomodo promissio sistendi iudicii causa facta deferi dicitur. Solebat enim prætor tertio die, qui cognitionibus erat dicatus, & comperendinus appellabatur, actiones editas & postulas ex ordine recitare, atque actores reosque per accensum jubebat citari, aut iudicia actionibus eorum cognoscendis dare. Si vero litigatores die constituto ad vadimonium non accurrissent, item amittebant. Præcipue vero reus, si vadimonium deseruisset, quod promiserat, perdebat litem; quia prætor postulante actore, ex Edicto bona ejus possideri jubebat, & si 30 dies essent possessa neque ille se defendisset vendi jubebat. Sig. dict. loc. Ut apud Cic. in causa Quintiana ubi Sextus Nævius missus est in possessionem bonorum Quintii, propter Quintii contumaciam deserti vadimonii. *Ad vadimonium non veneratis, qui cum tibi affinitas, societas, omnes denique cau-*  
sa

*sa & necessitudines veteres intercedebant. Illico ne ad Præto-rem ire convenit? Continuonè verum fuit postulare, ut ex edicto bona possidere liceret.*

Si uterque occurrissent, tum festitisse dicebantur, sua-  
que promissione dati fidejussores exsolvebantur. Atque  
tum prior reus ita agebat. *Ubi tu es qui me vadatus es, qui  
me citasti? ecce ego me tibi sisto, tu contra & te mihi siste.*  
procedente autem actore, rogabat, *Quid ais?* Responde-  
bat actor. *Ajo vel fundum, quem possides meum esse. Vel  
ajo te mihi facere vel dare oportere.* Prout natura actionis  
postulabat, quam intendere volebat, respondebat. Sig.  
lib. I. de jud. Quemadmodum varias actiones intendebat  
actor, ita diversæ quoque concipiebantur formulæ:  
Concepta vero actionis intentione, actor judicium  
sive judicem a prætore postulabat. Verum notandum, quod  
judicis nomen sit generale, adeo ut & arbitrum & recupe-  
ratores sua significatione amplectetur. Quippe pro actio-  
nis natura alterum horum postulabat actor. Erat vero in  
arbitrio prætoris aut dare aut non dare. Hinc toties in ju-  
re *judicium dabo, judicium non dabo*: Judex cognoscebat  
de omnibus quæstionibus cum juris, tum etiam facti, ve-  
rum quæ essent & leviores, & ad judicandum faciliores.  
Sig. dict. loc. *Arbiter* quæ bonæ fidei & arbitrariæ appella-  
ræ. *Recuperatores* dicti, de rebus privatis recipiendis reddendisque cognoscebant. Quando de jure potius quam de  
facto quæreretur, prætor causam ad centumviros, qui consi-  
lium ejus erat ordinarium, remittebat: Hinc Cic. I. de  
oratore: *Volitare in foro, hæere in jure, ac pratorum  
tribunalibus, judicia privata magnarum rerum obire, in qui-  
bus sæpe non de facto, sed de aequitate & jure certetur, ja-  
ctare se in causis centumviralibus, in quibus usucapionum, tu-  
telarum, gentilitatum, agnationum, alluvionum, circum-  
lucionum, nexorum, Mancipiorum, parietum, luminum,  
stillicidiorum, testamentorum ruptorum, aut ratorum, cete-  
rarumque rerum in numerabilia jura versentur, cum omnino*  
quid



quid suum, quid alienum, quare denique civis, an peregrinus, servus an liber sit, insignis est impudentia. Si de facto quæstio versaretur, Recuperatores judices ab eo dabantur, præscripta judicandi formula, qua judicium constituerat, Si paret R. dare oportere. Dato autem acceptoque judicio, obtinuit, ut satisfactiones præstarentur, vel a litigatoribus, vel eorum procuratoribus. Nimir: *judicatum solvi, & rem ratam habere*, alterum ad actorem, hoc ad procuratorem pertinet. Quibus rebus ita peractis litem contestabantur. *Contestari* autem litem dicebantur, cum ordinato judicio, utraque pars dicebat, *testes esto te*. Festus. *contestari* enim significat testibus adhibitis aliquid declarare ac profiteri, & quod ita fiebat præsentibus testibus dicebatur fieri *contestato l. 1. ff. quod jussu. l. 1. §. 12. ff. de agnoscend. lib.* Atque ita in litis contestatione *contestari* est cum utraque pars dicit, *testes estote*, quasi simul testentur. Cujac. *lib. 9. observ. cap. 21.* ait *Litis contestationem esse ejus rei de qua controversia est apud judicem, ex utraque parte factam narrationem testibus præsentibus*. Hoc genere, inquit, res in judicium deducitur, & litis nomen accipit. Nec enim proprie lis est, antequam contestetur, sed controversia *l. 25. §. si ante. ff. de hered. petit.* Lis contestata videtur, cum Judex per narrationem negotii & responsionem causam audire cæpit. Verum perperam statuit Ictus florentissimus litis contestatione rem in judicium deduci, & actorem contestando litem facere, judicium dictare, reum accipere: *arg. l. 11. ff. de jud.* Et optime Faber in suis *Ration. de hered. petit.* annotavit, nullum posse esse judicium, antequam Judex quisquam sit; Judex autem nullus est, nisi qui a prætore aut alio magistratu post litem contestatam datur. Qui in judiciis ordinariis jure veteri, in quibus ipsi magistratus non solebant judicare, post litem apud se contestatam dabant judicem, qui de facto cognosceret & pronunciaret. *l. 4. Cod. de pedan. jud.* itaque nullum potest esse judicium, nisi præce-

dat & absoluta sit prius litis contestatio. Tum iudicis dati incipiebant partes, & de causa cognoscendi & pronunciandi facultatem nanciscebatur. Quæ præcedebant, omnia fiebant in jure apud prætorem vel magistratum, cui dandi iudicem erat potestas. Quare quicquid a tempore litis contestatæ usque ad sententiam latam fiebat, id omne in iudicio fieri dicebatur. Observandum iudicem datum non mandantis, sed sua vice fungi, itaque in cognoscendo & pronunciando utebatur cognitione & potestate sua, non ejus qui dederat, vel Prætoris vel alius cujuscunque magistratus. Cognoscebat enim plerumque de facto: jus accipiebat ex formula actionis a Præatore ipsi præscripta atque data. Hinc Papinianus in *l. 1. §. 4. ff. ad S. C. Turpillian.* respondit, facti quæstionem esse in arbitrio sive potestate judicantis. Quare ne quidem referre de hujusmodi quæstionibus ad magistratum potest, id est ad eum, qui ipsum iudicem constituit, consilii gratia, ut ab eo informetur. *l. 3. Cod. de pedan. jud.* Potestas exequendi & coercendi pertinet ad eum, qui iudicem dedit, ita ut iudicis dati potestas sententia pronunciata finiatur. Judex postquam semel sententiam dixit, postea judex esse desinit ut inquit Ulpianus in *l. 55. ff. de re jud.* coercitiones & judicati executiones illæ non nisi coram & a prætore fieri poterant, quoniam judex datus nullam omnino habebat jurisdictionem neque imperium, scilicet mixtum quod jurisdictioni inest, atque ei ita cohæret, ut ab ea divelli nequit *l. 3. ff. de jurisd.* adeoque ipse sententiam suam exequi non poterat, sed magistratus, a quo datus erat: *A Divo Pio rescriptum est, magistratus populi Romani, ut iudicum a se datorum vel arbitrorum sententiam exequantur hi, qui eos dederunt l. 15. ff. de re jud.* Hæc jam satis arbitrator de jurisdictione prætoris, cum de extra ordinaria, tum etiam ordinaria iudicis dandi licentia, quæ sibi locum vindicabat in iudiciis privatis atque ordinariis. Verum annotandum, præterquam quod tam amplam in iurisdictione potestatem habuerit Prætor urbanus, ad ejus officium



cium multa quoque alia pertinuisse jura. Literas allatas, in Senatu recitabat, ut apud Liv. videre est lib. 32. cap. 31. ubi inquit. *Literæ consulum è Gallia de gestis prospere sub idem tempus Romam allatæ. M. Sergius Prator urbanus in Senatu eas, deinde ex auctoritate patrum ad populum recitavit. Edicendo quoque comitia consularia, Senatusque jussu duumviros creabat, bonis interdicebat, Consules e Provinciis evocandi potestatem habebat. Idem lib. 22. cap. 33. Itaque duumviri ad eam rem creati ab Æmilio pratore urbis, Cn. Pupius & Casio Quintius Flaminius, ad eam in arce faciendam locaverunt. Ab eodem pratore ex Senatusconsulto literæ ad consules missæ: ut si iis videretur, alter eorum ad consules creandos Romam veniret. se in eam diem, quam jussissent, comitia edicturum. Habendi Senatus ei quoque jus. Idem lib. 32. cap. 26. Hujus rei tam fœda judicium Romam ad L. Cornelium Lentulum pratorem urbis delatum est. Servi duo ante lucem ad eum venerunt, atque ordine omnia quæ facta futuraque erant exposuerunt, quibus domi custodiri jussis: Prator, senatu vocato, edoctoque quæ indices afferrent, proficisci ad eam conjurationem quarendam atque opprimendam jussus. Interjecto vero tempore, Prætoris crevit potestas, ita ut data sit illi omnis publici privatiq; juris potestas. Tradit Suet. Octavium Augustum appellationes quotannis urbanorum quidem litigatorum prætori delegavisse urbano, in ejus vita cap. 33. Quæ appellationes quamquam in causis civilibus stante repub. rariores, attamen patet a prætore ad prætorem appellatum ex 3. Verri-  
na.*

---

S. 28. *Post aliquot deinde annos, non  
sufficiente eo pratore, quod multa*

*turba etiam peregrinorum in civitatem veniret: creatus est & alius prætor, qui peregrinus appellatus est ab eo, quod plerumque inter peregrinos jus dicebat.*

**P**ost aliquod deinde annos, non sufficiente eo prætore ] Phigius Prætoris peregrini creationem in annum V. C. DX. incidisse refert. Sig. in Fastis. C. Lutatio Catulo, & A. Posthumio Albino coss. primum duos prætores creatos opinatur, ad annum 511. Quorum si alter fuerit peregrinus, sequeretur, inter urbani & peregrini Prætoris primam creationem plusquam 120 annos interfuisse. Alii volunt 507, vel 512. Prætozem peregrinum creatum. *Creatus est & alius Prætor, qui peregrinus appellatus est.]* Cum multa turba peregrinorum in civitatem veniret, quorum multitudini unus prætor satisfacere non posset, necesse fuit Prætori urbano collegam addere; qui jus item diceret, sed diversis muneribus. Hic inter peregrinos, ille inter cives jus dicebat. Quare cognominibus fuere distincti, hic Prætor urbanus, alter peregrinus dictus. Quamquam & Prætor peregrinus quandoque & inter peregrinos & cives jus dicebat, ut puta si peregrinus adversus civem actionem instituisset: quia actor sequi debet forum rei: forte & si civis adversus peregrinum, quia commune id utriusque forum est: Urbanus autem inter cives tantum jus dixisse præsumendus. Verum observandum ab hac consuetudine recessum nonnunquam; ita ut jurisdictionem urbanam & peregrinam fuisse conjunctam aliquando legamus. Quemadmodum Æmiliū Prætozem, cujus peregrina fors erat, suam jurisdictionem mandasse collegæ suo Atilio Prætori urbano legimus. Liv. lib. 24. cap. 44. Sic quoque



que lib. 25. cap. 3. *Et Prætores provincias sortiti sunt : P. Cornelius Sylla urbanam & peregrinam, quæ duorum ante fors fuerat. Et lib. 39. cap. 39. tradit Senatum mortuo C. Decimio Prætore urbano, in P. Cornelium Prætorem peregrinum, urbanam præturam contulisse. Attamen honoratior & major urbana prætura peregrinâ fuit, quamquam ambo iisdem creabantur auspiciis, uterque Jurisdictionem exercerent in urbe, atque par in utroque potestas erat. Hinc major quoque urbanus prætor dictus. Quamobrem Brutum & Cassium Prætores designatos inter se contendisse, uter juris inter cives dicundi provinciam obtineret, apud Appianum legimus. & Dion. lib. 42. refert M. Cæcilium indigne tulisse, quod prætura urbana sibi non obtigisset, qua dignitate Cæsar collegam Tribonium ornâverat : Quod autem parem habuere potestatem, sibi invicem testatur intercedendi facultas, ita ut alter alterius decreto intercedere posset. Quemadmodum L. Pisonem peregrinum Prætorem Cajo Verri Prætori urbano intercessisse apud Ciceronem legimus de Verre Prætore urbano. Itaque L. Piso multos codices implevit earum rerum, in quibus ita intercessit, quod iste aliter, atque edixerat, decrevisset. Quod vos oblitos esse non arbitror, quæ multitudo, qui ordo ad Pisonis sellam isto Prætore solitus sit convenire. Quem iste collegam nisi habuisset, lapidibus coopertus esset in foro. Sed eo leviores istius injuriæ videbantur, quod erat in æquitate prudentiaque Pisonis paratissimum perfugium, quo sine labore, sine molestia, sine impensa, etiam sine patrono homines uterentur. Sic M. Cælium Rufum Prætorem peregrinum, tribunal suum juxta sellam Caji Trebonii Prætoris urbani collocasse testatur Julius Cæsar lib. 3. de bell. civ. ubi inquit, iisdem temporibus Romæ M. Calius Rufus Prætor causâ debitorum suscepta, initio magistratus tribunal suum juxta C. Trebonii Prætoris urbani sellam collocavit : & si quis appellavisset, de æstimatione & de solutionibus quæ per arbitrium fierent, ut Cæsar præsens constituerat, fore auxilio*

*pollicebatur.* Imo majorem jurisdictionem habuisse Prætorem peregrinum, quam habuit Urbanus inde patet, quod Prætoris urbani Jurisdictione erat sine, ulla imperii meri parte: Peregrino non tantum jurisdic-tio inter peregrinos erat; verum videtur quoque quæstionem capitalem de repetundis, quæ peregrinorum sociorum causa instituta erat, exercuisse. Unde Asconius Pæd. *in orat. Cicer. in toga cand.* inquit; *Cajum Antonium, qui multos in Achaia spoliaverat, ab iis eductum in jus ad M. Lucillum præto-rem, qui jus inter peregrinos dicebat: Lucillumque quod Græci postularant, decrevisse.* Bald. *ad h. t.*

*§. 29. Deinde cum esset necessarius magistratus, qui hastæ præesset, decemviri in litibus judicandis sunt constituti.*

**D**Einde cum necessarius esset magistratus, qui hastæ præesset ] Magistratus vocat Decemviros Pomponius, qui litibus judicandis constituti, hastæ præerant. Generaliter omnes magistratus juridicundo, vel jurisdictioni, vel tribunali præesse dicuntur, specialiter hi de quibus jam actum. Alii præerant equitibus, alii præerant ædibus, alii ærario, alii rebus capitalibus, alii annonæ vel rebus provincialibus, & hoc loco decemviri litibus judicandis præesse dicuntur, Cujac. *ad h. t.* Perperam autem Budæus & Zasius ab hac Florentina lectione recessi, auctoritate Codicis Norici moti maluerunt pro *Decemviris, Centumviros* legere, quam lectionem a Pomponii mente alienissimam testatur manifeste vox *magistratus*, quod honoris nomen nos docet, Ictum hic non sermonem habere de cen-



centumviris, utpote qui tantum Judices, non magistratus erant, & consequenter voce *magistratus* non continentur. Hos decemviros sive hunc magistratum hastæ præfuisse inquit Ictus, scil. judicio centumvirali; de quo statim. Usus autem hastæ in judiciis adhibendæ ab initio & ipsius urbis conditæ primordio videtur petendus; in memoriam fortasse Romuli primi Romanorum regis, quem hasta assidue usum fuisse traditum, introductus. Quamobrem Quirinum appellatum volunt: Quiris enim Sabinorum lingua hasta dicebatur. Hinc canit Ovid. *lib. 2. Fast. vers. 475.*

— — — *At tertia dicta Quirino.*

*Qui tenet hoc nomen, Romulus ante fuit.*

*Sive quod hasta curis priscis est dicta Sabinis:*

*(Bellicus a telo venit in astra deus)*

*Sive suum Regi nomen posuere Quirites:*

*Seu quia Romanis junxerat ille Cures.*

*Curis est Sabinis hasta: unde Romulus Quirinus, qui eam ferebat est dictus, Festus. Quare etiam Juno, cui hasta sacra habetur, ideoque ejus pleræque statuae hasta subnuntantur, dicitur Dea Quiritis, & ipsa passim Quiris appellatur. Vid. Plutarch. in *Quæst. Roman.* Sic & Mars *Quirinus* dictus apud Romanos Sabinosque, quia ipsi tanquam Deo bellico hasta sacra. Hunc apud Gell. *lib. 4. cap. 6. Ut terram movisse nunciari solet, eaque res procuratur: ita in veteribus memoriis scriptum legimus, nunciatum esse Senatui, in sacratio, in regia, hastas Martias movisse.* Hasta autem reges quam alio quodam insigni potius usos opinantur, quod erat belli justii & imperii Symbolum, ideoque Quiris dicta, propter rectam æquitatem: & ita fortasse Quirini, ab æquo quirendo vel quirando nomen habere putatur. Phig. *Annal. lib. 1.* Quamobrem fortasse velut insigne justitiæ deorum simulacris olim additam fuisse, quam & pro diis immortalibus veteres coluisse tradit Pompejus Trogus *l. 43. c. 3.* Unde in justo suscipiendo & indicendo bello*

hastæ utebantur, quo indicto, deinde suo loco reponeretur. Unde apud Liv. lib. 1. cap. 32. *Fetialis* (ait) *hastam ferratam, aut sanguineam prævulsam ad fines eorum ferebat, & non minus tribus puberibus præsentibus, dicebat: Quod populi priscorum Latinorum, hominesque prisci Latini adversus populum Romanum Quiritium fecerunt, deliquerunt, quod populus Romanus Quiritium bellum cum priscis Latinis jussit esse, senatusque populi Romani Quiritium censuit, consensit, conscivit, ut bellum cum priscis Latinis fieret: ob eam rem ego populusque Romanus populis priscorum Latinorum, hominibusque priscis Latinis bellum indico, facioque: Id ubi dixisset, hastam in fines eorum emittebat.* Ab hac belli indicendi ratione vetus adagium fortasse dimanavit, *hastam & caduceum mittere*, quod significare arbitratur Rodig. *antiq. lect.* l. 21. c. 16. ut alicui pro arbitrio vel bellum ineundi, vel pacem amplectendi detur facultas. Quæ belli indicendi ratio licet sublata postea videatur, tamen mansit tanquam quædam ejus imago alia consuetudo, scil. ut hastam Romæ jacerent in columnam, quæ ante Bellonæ templum fuit: de qua ita Festus. *Bellona dicitur Dea bellorum, ante cujus templum erat columella, quæ bellica dicebatur: Supra quam hastam jaciebant, cum bellum indicabatur.* Quia ex hisce perspicimus foris in iusto indicendo & gerendo bello hastæ adhibendæ consuetudinem habuisse Romanos, non abs ratione nobis alienum videri debet, domi in iustitia administranda ejus quoque usum apud eos obtinuisse, præsertim quando consideratur a nobis tanquam insigne & Symbolum iustitiæ & æquitatis, quæ in utroque certandi genere locum sibi vindicare debet. Unde & hasta ipsum iudicium denotat, in quo agitur de distributione iustitiæ inter eos, qui de re aliqua controversiam & litem movent, apud eum vel eos qui jurisdictioni & iustitiæ administrandæ præsumt. Quemadmodum magistratus, quorum mentionem in hoc § facit Jurisconsultus noster, qui hastæ præsumt, nimir. iudicio centumvirali: Ita apud

Valer.



Valer. Max. l. 7. c. 8. Testamento is filium heredem instituit : quod Ti. Longus sanguine proximus, haste judicio subvertere frustra conatus est. Magis enim centumviri, quid scriptum esset in tabulis, quam quis eas scripsisset, considerandum existimaverunt. Et Cic. in oratione de lege Agraria contra Rullum inquit : Primum causa populi Romani hereditatem decemviri judicent, cum vos volueritis de privatis hereditatibus centumviros judicare. Et consequenter, haste judicium apud Valerium, centumvirale judicium significat. Imo Lucanus hastam decemvirorum pro centumvirali dixit, quia decemviri judicio centumvirali præsidebant atque centumviros cogebant. Ita Suet. in Aug. cap. 36. Auctor (inquit) aliarum rerum fuit; ut centumviralem hastam, quam quaestura functi consueverant cogere, decemviri cogerent. Et Lucanus ad Pisonem

*Seu trepidos ad jura decem citat hasta virorum,  
Et firmare jubet, centeno judice causas.*

Itaque siue dicimus hastam decemviralem siue centumviralem, unum idemque judicium scil. privatum, siue praetorium, cui decemviri præsidebant, significamus: Quippe, ut inquit Sig. lib. 1. de jud. Siue enim hasta sit Pratoria siue decemviralis, siue Centumviralis, parum refert, cum hasta pro privato judicio accipiat. Mihi vero una eademque omnium hasta videtur, nempe Pratoria, quam Decemviri & Centumviri posuerint, ut judicium Praetorium esse demonstraretur. Quippe Jurisdictionis erat judicium centumvirale, Praetorque id dabat, ut tradit Plinius lib. 5. Epist. ult. Sedebant iudices (scil. centumviri) decemviri venerant, observabantur advocati, silentium longum: tandem a Praetore nunciis, dimittuntur centumviri, eximitur dies. causa dilationis, Nepos Praetor qui legibus quaerit, proposuerat breve editum, &c. Hoc facto Nepotis commotus praetor, qui centumviralibus praesidet, deliberaturus, an sequeretur exemplum inopinatum, nobis otium dedit.

*Decemviri litibus judicandis sunt constituti ]* Cum enim prætores, quibus, licet ad jus dicendum creati erant, vacatio a belli administratione nequidem data est, ut tradit Liv. lib. 23. cap. 32. vel quod aliis muneribus occupati, judiciis quibus præesse solebant, vacare non poterant, decemviri creati fuere, qui vice prætorum fungerentur, & eorum sustinerent partes, litibusque dijudicandis, iisque dirimendis incumberent, atque vacarent: qui abs re, cui inserviebant, Decemviri litium judicandarum appellati sunt. Eorum creationem secundum Pomponii mentem in idem fere tempus, quo Prætor peregrinus factus est, incidisse dicendum videtur, quo triumviri monetales & capitales, & quatuorviri viarum curandarum, circa annum V.C.DXII, constituti quoque fuere. E corpore autem centum virorum decemviros fuisse opinatur Torrentius in notis ad Suet. in Aug. cap. 36. quanquam alios convocandi jus habebant: Eorum autem munus & officium erat, præsidere centumviris eosque cogere, litigatores citare, iique omnino hæc posita totum judicium pro suo arbitrio moderati sunt. Sig. lib. 1. de jud. Quid autem erat centumvirale judicium docet nos Festus lib. 3. cum inquit, Centumvitalia judicia a centumviris sunt dicta. Nam cum essent Romæ triginta & quinque tribus, quæ & curiæ sunt dictæ, terni ex singulis tribubus sunt electi ad judicandum, qui centumviri appellati sunt, & licet quinque amplius, quam centum fuerint, tamen quo facilius nominarentur, centumviri sunt dicti. Quorum numerus postea ad 180 crevit, manente tamen eodem nomine, ut videre est apud Plinium Epistolarum lib. 6. *Fæmina* (inquit) splendide nata nupta prætorio viro, exheredata ab octogenario patre, intra undecim dies, quam ille novercam ei amore captus induxerat, quadruplici judicio bona paternæ repetebat. Sedebant iudices centum & octoginta, (tot enim quatuor consiliis conscribuntur) ingens utrinque advocatio & numerosa subsellia præterea densa circumstantium corona, latissimum judicium multiplici circulo ambibat. Ex quibus quoque

con-



constat in plura interjecto tempore, aucto judicum numero, judicia centumviralia consilia distributa fuisse, unde *quadruplex judicium* Plinius vocat. Imo & ante Plinii ætatem, antiquioribus temporibus idem obtinuisse docet Quintilianus, lib. 12. Cum inquit, *Trachalum cum in basilica Julia diceret, primo tribunali, quatuor autem judicia, ut moris est cogerentur, atque omnia clamoribus fremerent, & auditum & intellectum, quod agentibus ceteris contumeliosum fuit, laudatum quoque ex quatuor tribunalibus memini.* Et idem Plinius lib. 4. epistolarum: *Proximè cum apud centumviros dixissem, subit recordatio, egisse me juvenem æque in quadruplici judicio.* Habebatur autem hoc consilium ut ex Quintiliani statim adducto loco perspicimus, non in foro, verum sub tecto in Basilicis, id est in aulis, quæ ei officii causa plures fuere constructæ, undecim refert P. Victor in libello de urbis Rom. region. & locis. Earum autem illustre fuere Porcia & Julia. Illa a Censorio Catone; hæc a Julio Cæsare excitata, ut & Opimia. Tranquillus in *Julio. c. 10.* *Ædilis præter comitium & forum, Basilicasque, etiam Capitolium ornavit, porticibus ad tempus extructis.* Hujus Julix Basilicæ descriptionem eleganter depinxit Vitruv. lib. 5. In qua, ut testatur Quintilianus, quatuor erant tribunalia, quæ inter se usque adeo proxima, ut actiones unius tribunalis ab alio exaudiri possent. De hac quoque Martialis lib. 6. Epigram. 38.

*Jam clamor centumque viri, densumque corona*

*Vulgus, & infanti Julia tecta placent.*

Et Plinius quoque alibi: *Descenderam in Basilicam Juliam auditurus, quibus proxima comperendinatione respondere debebam.* De quibus autem causis Centumviri cognitionem habebant, & dijudicabant describit Cic. libro 1. de Oratore. *Nam volitare in foro, harere injure, ac Prætorum Tribunalibus, judicia privata magnarum rerum obire: in quibus sæpe non de facto, sed de aequitate ac jure certetur: Factare*  
*se in*

se in causis centumviralibus, in quibus usucapionum, tutelarum, gentilitatum, agnationum, alluvionum, circumlutionum, nexorum, mancipiorum, parietum, luminum, stillicidiorum, testamentorum ruptorum aut ratorum, ceterarumque rerum innumerabilium jura versentur. Testamentorum & hereditatum controversias ad centumviros pertinuisse jam supra ex Valerio, Cicerone *de lege Agraria contra Rullum* constat. Perperam vero opinatur Cujacius, non tantum de civilibus, verum & de capitalibus causis judicasse centumviros, auctoritate aliorum auctorum in hanc fortasse opinionem adductus. Tradit enim Quintilianus lib. 4. Quibusdam in judiciis, maximeque capitalibus, ut apud centumviros, ipsi judices exigunt sollicitas & accuratas actiones, contemnuntque se, nisi in dicendo etiam diligentia appareat, credunt, nec doceri tantum, sed etiam delectari volunt. Atque illud ipsum (inquit) satis luculenter ostendit Ovidius, cum canit,

*Nec male commissæ est nobis fortuna reorum,*

*Usque decem decies inspicienda viris.*

Vix enim ait *fortuna judicium*, fortunæ reorum dicitur alia, quam in capitali causa, in l. 23. ff. *de statu hom.* Sic quoque Lucanus.

*Sentrepidos ad jura decem citat hasta virorum.*

Vix enim, inquit, *trepidi* dicuntur alii, quam rei capitalium criminum, qui pallentem famam experiuntur. Ovidius in *arte amand.*

*Non tantum trepidos ut tueare reos.*

Verum non videntur mihi hæc Cujacii argumenta tanti ponderis, ut ejus opinionem amplecterer: Supra enim annotavimus & ex auctoribus omni exceptione majoribus loca quædam descripsimus, quæ satis dilucide nobis ostendunt Prætoris Jurisdictionem ad privata & civilia pertinuisse negotia, merum imperium eum non habuisse, ideoque de nullo judicasse crimine jure magistratus, quem gerebat: Hinc publica & capitalia sive criminalia judicia non exercebat,

cum



cum autem judicium centumvirale erat prætorium, cui vel ipse vel postea decemviri præsidebant, judicia capitalia non erant hujus fori, & ad cognitionem centumvirorum non perveniebant: Non juvat illud Quintiliani opinionem Cujacii, quippe & causa existimationis capitalis dicitur, ut videre est, in l. 103. ff. de verb. sig. & Poena capitalis ad famam & statum ac existimationem ea interpretatione sæpe transferri solet: ut cum de capite & fortunis alicujus agatur, de existimatione & fama ac facultatibus intelligi par est. Sic Cic. pro Q. Roscio Comædo: *Si qua enim (inquit) sunt privata judicia summa existimationis, & pene dicam capitis, tria hæc sunt, fiducia, tutela, societatis. Aequè enim perfidiosum & nefarium est, fidem frangere, quæ continet, vitam; & pupillum fraudare, qui in tutelam pervenit; & socium fallere, qui se in negotio conjunxit.* Et idem in oratione pro Quintio, de capite & fortunis Quintii dicere se obtestatur. Petebat enim Mævius adversarius, ut ei ex edicto bona possideri liceret; ideo quod Quintius vadimonium non obierat. Sic causæ status non perperam capitalis dicuntur. Sic capitis diminutiones seu, status mutationes, dicuntur maximæ vel mediæ vel minimæ. Caput enim in jure civili modo vitam, modo libertatem, modo familiam significat. Sic quoque ad illa Lucani & Ovidii responderi potest, quod non vano timore vexatur & angebatur, qui de fama quæ cum vita pari passu ambulat, de fortunis suis vel libertate, quam nemo bonus nisi cum anima simul amittere cupit, litigat. Quamobrem in hisce rebus adversum vim & improborum hominum impetum defendendis, amplam satis potestatem concessere leges, quas etiam cum nece infaustis defendi posse arbitror, sin aliter vis illata repelli nequeat, non secus ac si vita in summum esset adducta discrimen. Huic itaque judicio, ut supra a nobis relatum, præsuere decemviri, quos litibus judicandis constitutos affirmat Pomponius, quorum licet apud scriptores aliquando mentionem fieri legimus,

mus, attamen non adeo omnia expedita & certa sunt, quæ de hoc magistratu tradita invenimus. Videmus hodie antiqua marmora in quibus vetus nominis scribendi ratio extat. **X VIRI STILITIBUS JUDICANDIS.** Id est litibus; quæ vetus inscriptio probat longe ante Augustum hunc magistratum creatum fuisse, cum veteres, *stlocum, & stlatum, & Sritavum, Stlitem* dicebant, vid. Lipseum de vetere Scriptura.

*S. 30. Eodem tempore & quatuor viri, qui curam viarum gererent: & triumviri monetales, aris, argenti, auriflatores: & triumviri capitales, qui carceris custodiam haberent: ut, cum animadverti oporteret, interventu eorum fieret.*

**E**T quatuorviri qui curam viarum gererent ] Cum urbis maxime intersit, ut viæ bene muniantur sternanturque, hinc summa olim fuit Senatus cura atque diligentia in reficiendis fulciendis atque adornandis viis, non tantum intra, sed & extra urbem, ut commode posset unusquisque per eas ire, agere, & ad urbem accedere & recedere. Ideone Appius ille Cæcus viam munivit, non qua populus uteretur, sed qua sui posterī latrocinaurentur, inquit Cic. Pro Milon. Earum vero curandarum munus censoribus primo commissum fuit, ut ex Cic. colligimus in 3. de ll. Censores, inquit, urbis, templa, vias, aquas, ævadium, ve-



*vestigalia tuentor.* Sic T. Quintium Flaminium, & M. Claudium Marcellum censores viam filice sternendam a porta Capena ad templum Martis locavisse, apud Livium legimus. Ita quoque Q. Fulvium Flaccum & Aulum Posthumium Albinum Censores vias quoque filice sternendas in urbe, & glareâ extra urbem substruendas marginandasque primos omnium locavisse refert. Verum interjecto tempore, fortasse quod aliis rebus occupati huic muneri vacare non poterant, hæc cura ad Ædiles translata fuit, ut supr. ubi de Ædilibus eorumque munere disputavimus, annotatum fuit, & constat ex l. 12. ff. de per. commod. rei vend. & l. unic. ff. de via pub. & ne quid. ubi Papinianus, Ædiles studeant, ut quæ secundum civitates sunt viæ, adequantur, & effluxiones non noceant domibus, & pontes fiant ubicunque oportet, & §. 2. Curent autem ut nullus effodiat vias, neque subruat, Non permittant autem vixari in vias, neque stercora projicere, neque morticina, neque pelles jacere. Unde legimus apud Suet. in Vespan. cap. 5. Mox cum Ædilem eum C. Caesar suicensens, propter curam verrendis viis non adhibitam, luto jussit oppleri: Verum tandem specialis magistratus creatus est, ad quorum munus pertineret viarum curam habere, qui Quatuorviri viarum curandarum nominati fuere, idque intra urbem: quippe extra urbem viarum curam Duumviri gesserunt. Ita enim Dion. lib. 4. Porro hi viginti viri in locum viginti sex virorum successerunt: eorum tres ad capitalia judicia sunt ordinati: alii tres cudendo numismati præsunt: quatuor vias urbanas curant: decem judiciis iis quæ ad centumviros sorte deferuntur, præficiuntur. Duo enim iis qui vias extra urbem curabant, & quatuor qui in Campaniam mittebantur, abrogati erant. Libera enim adhuc republica consuetudo obtinuerat, ut populus quotannis XXVI viros crearet, quæ munia ita distribuebantur, ut modo dictum, quam consuetudinem eatenus mutavit Augustus, quatenus loco XXVI virorum viginti viros creavit,

*Et Triumviri monetales, aris argenti, auri flatores* ] Monetales dicti quod monetæ curam gerebant, ut nequid in ejusmodi metallis corruptelæ admisceretur. Verum ut essent numismata probi auri argentique, & iusti ponderis, nequid Respub. detrimenti ex monetæ corruptela caperet. Optandum esset, ut & in nostra Repub. scil. in singulis civitatibus, quibus jus est auri argentique signandi, aliisque quibusdam in Regionibus nobis vicinis, diligentius, imo summo cum rigore ejus cura ageretur ab iis, quibus hæc provincia demandata est, ne monetæ artifices sive monetarii ut appellantur in *l. 6. Cod. de dignit.* propter metallorum male factam mixturam, vel corruptelam, adeo adulteratam monetam cuderent fabricarentque, cum quoad valorem & materiam, tum quoad speciem sive formam: Cui monetariorum illicito habendi amor, si non tempestive occurrant, quicumque in singulis civitatibus, equibus tanquam tot membris constat Reipub. corpus, summæ rerum præsumunt, verendum est, cum huic malo mederi conantur, adeo altè ejus egerit radices, ut nisi cum summo reipub. detrimento illud eradicari posse sint experturi. Tutius enim opprimitur malum vitiumque aliquod in suis quasi cunabulis, quam ubi inveteratum sit & jam vires acceperit: juxta illud Virgilii.

*Principiis obsta, sero medicina paratur.*

*Neglecta solent incendia sumere vires.*

Sed ad rem redeamus. Monetales igitur dicti, quod monetæ curam habebant: *Moneta* dicta a *monendo*, unde Junoni hoc cognomen inditum Suidas refert, quod bello Pyrrhi & Tarentino consulentes Romanos de pecuniarum inopia monuisset, **PECUNIAM NON DEFORE JUSTITIAM ET ARMA COLENTIBUS.** Romani inde voti compotes facti, *Junonem Monetam* coluere, tanquam consultricem, a monendo sic dictum, atque decrevere quod in æde Junonis

Ca-



Capitolina nummi cuderentur, & inde *Moneta* vox ad numismata translata est. Quanquam alii sic dictam volunt, quod nos illius character sive impressio moneat cum autoris, tum pretii. Ipse etiam locus cudendis nummis destinatus *moneta* vocatur. Ammianus Marcellinus lib. 22. cap. XI. *Dracontius moneta prepositus & Diodorus quidam veluti comes, injectis per crura funibus simul exanimati sunt: ille quod aram in Moneta, quam regebat, recens locatam, evertit. Sidon. Apollin. carm. 23.*

*Delubris, Capitoliis, Monetis.*

Et Macrobius in *Somnium Scip.* lib. 1. cap. 6. *Semine semel intra formandi hominis monetam locato, hoc primum artifex natura molitur, ut die septimo folliculum genitivum circumdet humori ex membrana tam tenui, qualis in ovo ab exteriori testâ clauditur, & intra se claudit liquorem.* Proprie vero nota nummis impressa moneta est. Constat autem apud Romanos demum post primum bellum Punicum illam impressionem alicujus figuræ sive formæ vel imaginis in ære sive auro vel argento, quod æris appellatione venit, in usum fuisse, & consequenter tum primum creatos fuisse Triumviros monetales; Quamvis multis ante seculis cum Janus pater, quo nomine Noachum denotarunt, secundo in Italiam venisset, sub Nino tertio rege Babylonico, æs signatum fuisse supra ad §. 22. annotatum fuit. Romanos vero ante Servium Tullium, tertium Romanorum Regem, ære usos fuisse Plinius indicat, eoque gravi, id est rudi, informi, nondum signato, quo appenso non numerato debita exsolvebantur. Unde libripendes qui æra pendebat. Audiamus Plinium lib. 33. cap. 3. *Proximum scelus fecit, qui primus ex auro denarium signavit: quod & ipsum latet auctore incerto. Populus Romanus ne argento quidem signato, ante Pyrrhum regem devictum, usus est. Librales (unde etiam nunc libella dicitur, & dupondius) appendebantur asses. Quare æris gravis pœna dicta. Et adhuc expensa in rationibus dicuntur: item impendia, & dependere. Quin & militum*

stipendia, hoc est, stipis pondera, dispensatores, libripendes dicuntur: qua consuetudine in his emptioibus, qua mancipii sunt, etiam nunc libra interponitur. Livius lib. 5. Deni millibus æris gravis nos condemnat. Et Festus: Pendere pœnas, solvere significat: eo quod ære gravi cum uterentur Romani, penso eo, non numerato, debitum solvebant: unde etiam pensiones dictæ. Et Liv. lib. 4. cap. 60. Quia nondum argentum signatum erat, æs grave plaustris ad ararium convehebant. Verum notandum æris gravis pœnam dictam usque ad signatum ex argento nummum, atque adeo usque ad illud tempus, quo imminutum primo pondus æris: ut intelligas non rudi modo & informi, quale ante Servium Tullium, Numæ imperii Romani moderantis habenas temporibus fuit, sed & signatum a Servio catervisque deinceps, grave æs fuisse a pondere nuncupatum. Harduinus in notis ad Plin. lib. 33. cap. 3. Festus. Grave æs dictum a pondere: quia deni æses, singuli pondo libræ, efficiebant denarium ab hoc ipso numero dictum. Æs itaque grave aliud fuit rude & nulla forma insignitum, usque ad Servium regem; aliud fuit signatum, post illum regem, quod tamen grave permanfit usque ad id tempus, quo unciales & semunciales facti sunt. Vid. de hac re latius disputantem Doctissimus Gronovius, lib. 3. de pecunia vetere. Et Salmas. cap. 14. de usuris. Romæ autem (ut inquit Plinius cit. loc. Servius Tullius rex primus signavit æs. Antea rudi usus Romæ Timeus tradit. Signatum est nota pecudum. Unde Varro lib. 2. de re rust. Et quod æs antiquissimum quod est flatum, pecore est notatum. Postea anno V. C. 485. quinto ante primum bellum punicum, argentum primo Romæ signatum fuisse Q. Fabio Pictore & Qu. Ogulnio Gallo coss. testatur idem Plinius. Et placuisse, addit, denarium pro decem libris æris, quinarium pro quinque, sestertium pro dupondio & semisse. Livius in Epitom. lib. 15. tradit. Victis Tarentinis tum primum populum Romanum argento vii capisse. Varro tamen contrarium vide-



tur affirmare apud Charis. lib. 1. *Annal.* ubi tradit, Nummum argenteum conflatum primum a Serv. Tullio dicunt. Respondit Doctissimus & de Repub. literaria optime meritis Johan. Fred. Gronov. l. 3. c. 4. *de pecun. vet.* Certum esse eum nummum non fuisse publici usus, sed temporum, & notam memorabilis alicujus eventus. Et consequenter perperam nummi argentei, qualis in usu apud Romanos fuit, signandi & conflandi institutum ad Servium referre Hottomanum tradit in *libr. de re numar.* Posse quidem fieri, ut a Servio Tullio hoc institutum fuerit, sed propter Reipub. tenuitatem postea omissum esse, atque in desuetudinem abiisse. Postea aureus quoque nummus percussus est post annum LXII. ut idem Plinius refert lib. 33. post urbem conditam DXLVII. Ita ut tria genera monetæ apud Romanos in usu fuisse testetur Isidorus. Prius (inquit) *area pecunia in usu fuit, postea argentea, deinde aurea subsecuta: sed ab ea qua cepit nomen retinuit.* Itaque æris nomine & alia monetæ genera continentur. Hinc obæratī qui ære alieno oppressi, id est qui multum auri argentique aliis debent. Unde & *Ærarium* in quo & aurum & argentum recondebant Romani, & pecunia publica asservabatur, ab ære, quia illud primo fuit in usu.

*Æris, Argenti, Auri flatoris.* ] Unde in antiquis denariis crebro occurrunt III-VIR. A. A. A. F. F. *Triumvir auro, argento, Ære, flando, feriundo.* Verum observandum in antiquis denariis aliquando occurrere IIII-VIR. A. P. F. *Quatuor-vir argento publice feriundo.* Ex quibus discimus, aliquando ad Quatuor-viros curam signandæ monetæ pertinuisse, idque circa Julii Cæsaris tempora. Melius videtur Tribonianus hasce in antiquis denariis notas, loco *æris, argenti, auri flatores; æri, argento, flando, feriundo,* interpretatus fuisse, quoniam ipsi triumviri non signabant neque cudebant monetam, verum flando, sive feriundo erant tantum præpositi atque præfecti, ejusque habebant curam, utpote quorum erat, ut dicere incepimus, of-

ficiū providere ne quid detrimenti respub. ex adultera & corrupta moneta caperet, ut & materia sive substantia, quantitas & qualitas iusta esset & proba & pondus debitum. Quod munus olim ad censores pertinuisse legimus apud Ciceronem de L. L. dum ait. *Censores pecunias censento.* Verum postea visum est e. republica fore, hoc negotium peculiari alicui magistratui mandare, quare Triumviri monetales creati, ad quos hanc curam transtulerunt. Quid si vel in materia vel qualitate peccatum sit, reproberi dicuntur nummi, adulterini, ut lege Cornelia de falsis teneatur, qui eos flaverit l. 9. ff. ad L. Cornel. de falsis.

Et Triumviri capitales, qui carceris custodiam haberent: ut cum animadverti oporteret, eorum interventu fieret. ] De his Plautus in *Amphitryone*.

*Quid faciam nunc, si tresviri me in carcerem compegerint.*

Creati hi fuere Curio Dentato cos. de Samnitibus triumphante, Florus *Epitom. Livii*, lib. 11. *Curius Dentatus Consul, Samnitibus cassis, & Sabinis, qui rebellaverant victis, & in ditionem acceptis, bis in eodem magistratu triumphavit. Colonia deducta sunt, Castrum, Sena, Adria, Triumviri capitales tunc primum creati sunt.* Ad eorum, inquit Pomponius, curam pertinuisse carceris sive latomiarum custodiam, verum carceris custodes non fuere: fuit autem Latomiarum carcer Romae prope Tullianum locum. Quod de hoc carceris genere sermonem habet Pomponius docet nos Livius lib. 32. cap. 26. *In timore (inquit) civitas fuit, obsides captivosque Pœnorum ea moliri. Itaque & Romae vigilia per vicos servata: jussique circumire eas minores magistratus, & Triumviri carceris Latumiarum intentiorem custodiam habere jussi.* Erant autem Latomia proprie loca, in quibus lapides ad aliquod opus excidebantur. Plaut. in *Captiv. act. 3. Scn. V.*

*Inde ibis porro in latomias lapidarias.*

*Quia in iis locis, postquam magna vis lapidum excisa fuerat,*

rat,



rat, carceres constituebantur, hinc interdum illa vox pro carceribus accipitur. Idem Liv. lib. 37. cap. 3. Per eosdem dies principes Aetolorum tres & quadraginta, inter quos Damocritus & frater ejus erant, a duabus cohortibus missi a M. Acilio Romam deducti, & in Lautumias conjecti sunt. Id est in carcerem. Et Callistratus in l. 9. Succurritur etiam ei qui in vinculis fuisset. Vinculorum autem appellatio latius accipitur: nam etiam inclusos, veluti lautumiis, victorum numero haberi placet: quia nihil interfit, parietibus, an compedibus teneatur. Lautumia non Latomia scribi vult Gronov. in notis ad Liv. lib. 37. cap. 3. Atque ita scribendum esse in Digestis, Cicerone, Plauto, optimos habere liberos summos viros observasse: idque ipsum confirmare maxime jocos Sabini apud M. Senecam *controv. 27.* Cum movisset homines & flebili oratione & diserta, rediit tamen ad sales. Rogavit ut in Lautumias transferretur: Non est, (inquit) quemquam vestrum decipiat nomen ipsum Lautumia; illa animo mea lauta res est. Scitote, inquit Gronov. illud nomen ortum, ut sint Lautumia dictæ, quasi lauta minima. Et Schottus ad locum Senecæ, Quamvis autem Latomus dicatur, Lautumias tamen veteres potius, quam Latomias, ut Locon Petronius arbiter pro Laocoon; & Laodicæa pro Laodicea. Lautomiarum mentionem facit Varro lib. 4. de ling. lat. Quod Syracusis, inquit, ubi de causa custodiuntur Latomia, exinde Lautumia translatum. Ita quoque Plaut. in Pœnul. act. 4. scen. 2.

Ita me Dî ament: vel in lautumiis, vel in pistrino mavelim  
Ætatem agere.

Unde Asconius, Lautumia carcer Syracusis. Et ita quoque scribendum affirmat Cujac. lib. 6. observat. 7. Hujus itaque carceris custodiam habuisse Triumviros testatur Pomponius, & alii auctores confirmant. Quæstio hic posset moveri, num ipsi Triumviri capitales de capitali crimine cognoverint, vel an eorum tantum officium & munus erat

exequi sententiam & decretum judicis. Putat Corasius ad hunc *Titulum*, Triumviros & de criminibus cognovisse & capitaliter judicasse; quippe inquit, Pomponius eos magistratibus annumerat: & Salustius ipse, quo maxime adversarii nituntur, eos rerum capitalium judices dicit. Sed vero magis consentanea mihi videtur eorum sententia, qui istiusmodi Triumviros executores sententię criminalis fuisse affirmant, quod evidenter testatur Valer. Max. lib. 5. cap. 4. *Sanguinis ingenui mulierem prator apud tribunal suum capitali crimine damnatam triumpho in carcere necandam tradidit. Quo receptam, is qui custodia praeerat, misericordia motus, non protinus strangulavit. Aditum quoque ad eam filia, sed diligenter excussa, ne quid cibi inferret, dedit: existimans futurum, ut inedia consumeretur. Cum autem jam dies plures intercederent, secum ipse querens, quidnam esset, quod tamdiu sustentaretur; curiosius observata filia, animadvertit, exerto ubere famem matris lactis sui subsidio lenientem. Qua tam ad mirabilis spectaculi novitas ab ipso ad Triumvirum, a triumpho ad Praetorem, a Praetore ad concilium judicium perlata, remissionem pœna mulieri impetravit. Ex quibus judicii ordinem & rationem perspicimus. Scil. Triumviros crimina ad Praetorem detulisse; Praetorem consilium atque judices cogisse; judices in consilium misisse, qui ubi judicassent, judicati sive sententię ab iis latę executio injungebatur iterum Triumviris. Sic quoque idem tradit lib. 8. cap. 4. n. 2. Alexandrum Fannii Servum, cum in suspicionem C. Fl. Equitis Romani occisi venisset, quamvis sexies tortum pernegavisset se ei culpę affinem esse: verum perinde atque confessum reum, a iudicibus damnatum, a L. Calpurnio triumpho in crucem actum esse. Et Salustius in *Catilinaria*. Cujus verba hæc sunt: *Senatus in Catonis sententiam discessit. Consul optimum facturus, noctem quę instabat, ante capere: nequid eo spacio novaretur. Triumviros, quę ad supplicium postulabat, parare jubet. Ipse dispositis praesidiis, Lentulum in carcerem**



*deducit: idem fit cateris per praetores. Et paulo infra, In eum locum postquam demissus Lentulus, vindices rerum capitalium, qui praeceptum erat, laqueo gulam fregere. Aliæ editiones habent iudices rerum capitalium. Quare ipse Corasius adducit hunc locum, ut probaret rerum capitalium iudices ipsos fuisse Triumviros. Verum ab aliis hoc mendum correctum est, & maxime quia verosimile videtur Salustium hoc loco per vindices non voluisse denotare Triumviros, sed potius lictores, utpote qui rei tam levissimæ & abjectæ incubuerint, ut annotavit quidam in notis ad Salust. idque magis vero consensaneum videtur, quia legimus apud Plutarchum in vita Ciceronis: Forum egressus Consul, cum ad carcerem ventum esset, tradit lictori Lentulum, eumque strangulari iussit. Quanquam etiam responderi posset, quod hanc Salustii loquendi formulam ita rigide interpretari non debemus, quasi ipsi Triumviri propria manu illam criminalem sententiam executi fuerint, & Lentulum necaverint, verum iis iubentibus & presentibus id actum esse Suetonius indicare voluit. Ita Valerius, Sanguinis ingenui mulierem Prator apud Tribunal suum crimine damnatam, Triumviro in carcere necandam tradidit. Et lib. 8. cap. 4. n. 2. statim allegato. Itaque quoties apud auctores legitur morte aut supplicio aliquem affecisse, ita interpretandum est, quasi interventu eorum lege actum est. Nam ut inquit Pomponius noster, quoties animadverti oporteret, interventu eorum id fieri necesse erat. Sed notandum fas non fuisse triumvirali supplicio virginem vel immaturas puellas afficere, licet maximorum criminum reæ essent, & poenæ capitali obnoxiae, ut ex Tacito colligimus 5. Annal. cap. 9. ubi de Sejani filia sermonem habens inquit: Tradunt ejus temporis auctores, quia triumvirali supplicio affici virginem inauditum habebatur, a carnifice laqueo juxta compressam: exin oblisis faucibus, id ætatis corpora in Gemonias abjecta. Dio. l. 58. Liberi ejus (Sejani) ex Senatus consulto necati sunt, filia quam pactus erat Claudii filio, con-*

stuprata prius a carnifice, quasi impium esset, virginem in carcere perire. Suet. in Tib. c. 61. Immatura puella, quia more tradito nefas esset virgines strangulari, vitata prius a carnifice, dein strangulata. Sed annotavit Lipsius, cur ait Tacitus inauditum virginem adfici triumvirali supplicio, id est laqueo: Id ego ita caperim, inquit, quasi non simpliciter virginem dixerit, sed impubem investemque. Lex enim non tam virginitati ignotum cautumque voluit, quam atati. Ita nec pueros interfici fas, nisi toga sumpta & relatos in viros: Hinc apud Dionem scriptum, a Triumviris in proscriptione jussu puerum quendam togam virilem sumere, ut scilicet jure posset interfici. Hinc itaque priusquam ultimo Sejani filia fuit affecta supplicio, a carnifice stuprata, ut jam compressa de virginataque mulier videretur plena annis. Triumviris quoque capitalibus mandatum fuisse docet Liv. lib. 39. ut Vigiliis quoque per urbem disponerent; & ne qui nocturni cœtus fierent, observarent: utque ab incendiis caveretur: Hinc P. Villius triumvir nocturnus a P. Aquilio trib. pleb. accusatus, populi judicio concidit: quia vigilias negligentius circumierat. Et M. Mulvius, Cn. Lollius, L. Sextilius triumviri, quod ad incendium in sacra via ortum extinguendum tardius venerant, a trib. pleb. die dicta ad populum damnati sunt. Valer. lib. 8. cap. 1. Pertinuit etiam ad eorum munus *Sacramenta* exigere; erat autem *Sacramentum*, ut describit Festus, æs quod poenæ nomine pendebatur, sive in rem agitur, sive contenditur. Varro autem sic lib. 4. Ea pecunia, inquit, quæ in iudicium venit in litibus, *Sacramentum* a sacro qui petebat, & qui inficiebatur, de aliis rebus uterque quingentos aris ad pontem deponebant, de aliis rebus item certo alio legitimo numero assium. *Sacramenta* Græcorum, quæ in contestanda lite deponebantur: Qui vicerat iudicio, suum *Sacramentum* a sacro auferbat, victi ad ærarium redibat. Id muneris autem Triumviris injungebatur, ut ejusmodi *Sacramenta* exigent, judicarentque ut Sex, Festus in-

dicat



dicat *de verb. sig. lib. 17.* ex lege L. Papirii Trib. pleb. cujus verba ad hunc modum restituenda apud Rævard. legimus *lib. 2. varior. eap. 18.* **QUICUNQUE POST HAC PRÆTOR FACTUS ERIT QUI INTER CIVES JUS DICET, TRESVIROS CAPITALIS POPULUM ROGATO: IIQUE TRESVIRI CAPITALIS QUINQUE A POPULO FACTI ERUNT SACRAMENTA EXIGUNT JUDICANTQUE, EODEMQUE JURE SUNTO UT EI EX LEGIBUS PLEBEI QUE SCITIS, EXIGERE, JUDICARE, ESSEQUE, OPORTET.** Cæterum nec quidem Sacramenta duntaxat exigebant judicabantque Triumviri capitales; verum etiam de servis furibusque & aliis vilibus atque infimæ abjectæque conditionis hominibus cognoscebant, eosque apud Columnam Mæniæ puniebant, ut videre est apud Asconium. Hinc adolescens ille apud Plaut. in *Asinaria*, cui cum scorto negotium fuerat. *Act. 1. Scen. 2.*

*Ibo ego ad tresviros, vestraque ibi nomina*

*Faxo erunt:*

Verum quemadmodum interjecto tempore, cæteri magistratus, aliis in eorum locum substitutis, fuere abrogati, ita quoque Triumvirorum munus & officium lapsis temporibus ad præfectum vigilum translatum est, ut videre est ex toto tit. *ff. de offic. præfect. vig.*

*S. 31. Et quia magistratibus, vespertinis temporibus, in publico esse inconueniens erat, quinque*  
N 5
viri

*viri constituti sunt cis Tiberim,  
& ultra Tiberim, qui possint pro  
magistratibus fungi.*

**E**T quia magistratibus vespertinis temporibus in publicum esse inconveniens erat. ] Cum enim magistratibus debetur honor & reverentia, magis conveniens eorum dignitati, ut negotia quæ tanquam jure magistratus & ratione officii ipsis peragenda & administranda incumbunt, aperta die, id est post solis ortum & ante ejus occasum fiant, ut conspici posset eorum majestas & persona discerni, quam venerari omnes tenentur, qui sub eorum imperio degunt: noctu enim nimis eorum dignitas & persona exponi videtur improborum hominum pravis machinationibus & occultis insidiis. Quippe cum terrori malis sunt, cavere sibi debent, ne ab ejusmodi impiis & facinorosis opprimantur, qui tenebrarum præsidio se tutos fore arbitantes, sapissime eam opportunitatem non prætermittunt sese vindicandi ab iis, a quibus facinorum suorum conscii, malo aliquo affici metuant, vel propter admissa scelera jam puniti sunt; qui si ipsi facultatem neque occasionem habeant, ejusdem criminis & facinoris socii exequuntur, quod ipsi facere nequeunt. In duodecim tabulis apud Gell. lib. 17. cap. 2. scriptum fuisse legimus. *Ante meridiem causam conscito, cum perorant ambo presentes. Post meridiem presenti litem addicito. Si ambo presentes, sol occasus suprema tempestas esto.* Et idem lib. 14. cap. 7. Ex Varronis lib. Epistolicarum questionum 4. describit *Senatusconsultum ante exortum, aut post occasum solem factum ratum non fuisse.* Propterea fortasse ne magistratus vespertinis temporibus in publico esset. Contrarium vero apud Athenienses Areopagitæ integri ac severi iudices observarunt: illi enim noctu & in tenebris semper judicabant. Eam potissimum ob rationem,



nem, ne spectatores essent personarum, qui causas orabant & patrocinantur, quorum aspectu sapissime animum judicis commoveri posse arbitrabantur, verum ad ea quæ dicerent animum tantum attenderent, & secundum ea judicarent. Hinc supi. annotavimus ad l. 1. h. t. nullum admisisse procemium sive præfationem, quia suspecta ipsis erant qui judicis animum afficere, & a vero deflectere poterant.

*Quinqueviri constituti sunt cis Tyberim & ultra Tyberim.* ] Varia Quinquevirorum genera fuisse, ex Livio discimus. Erant alii agris dividendis præfecti, unde legimus apud Liv. lib. 6. cap. 21. de quinqueviris Pomptino agro dividendo creatis. Erant alii qui dicebantur mensarii, quod æs alienum pro his qui solvendo non essent de publico solverent Liv. lib. 7. cap. 21. *Inclinatis, inquit, semel in concordiam animis, non consules scœnebrem quoque rem, quæ distingere unanimos videbantur, levare aggressi, solutionem alieni æris in publicam curam verterunt: quinqueviris creatis, quos mensarios ab dispensatione pecuniæ appellaverunt.*

Erant alii creati muribus turribusque reficiendis Liv. l. 25. cap. 7. scribit idem lib. 3. cap. 9. a C. Terentillo Arsa tribuno plebis legem promulgatam, ut quinqueviris legibus de consulari imperio scribendis crearentur. Quam tamen legem Dionys. accuratissimus & diligentissimus Romanæ historiæ scriptor, non de quinqueviris, verum decemviris promulgatam fuisse scribit. Erant alii quos adjutores Triumviris capitalibus datos scribit Liv. lib. 39. cap. 14. *uti cis; Tyberim suæ quisque regionis ædificiis præessent.* eos itaque recte hic Pomponius Triumviris subjungit, qui vespertinis temporibus, quum magistratus ad id temporis in foro esse inconveniens erat, eorum vices gerebant, & pro iis officio fungebantur. Itaque revera magistratus non erant, sed officio & auctoritate cujus vicem gerebant, utebantur. Postea horum Quinquevirorum munus ad Aediles translatum est, ut infra tradit Ictus.

S. 32. *Capta deinde Sardinia , mox Sicilia , item Hispania , deinde Narbonensi provincia: totidem prætores , quot provincia in ditionem venerant , creati sunt , partim qui urbanis rebus , partim qui provincialibus præessent. Deinde Cornelius Sylla quæstiones publicas constituit: veluti de falso , de parricidio , de sicariis : Et prætores quatuor adjecit. Deinde Gajus Julius Cæsar duos prætores , Et duos ædiles , qui frumento præessent , Et à Cerere Cereales constituit. Ita duodecim prætores , sex ædiles sunt creati. Divus deinde Augustus sedecim prætores constituit. Post deinde Divus Claudius duos prætores adjecit qui de fidei commissio jus dicerent , ex quibus unum Divus Titus detraxit : Et adjecit Divus Ner-*



*Nerva, qui inter fiscum & privatos jus diceret. Ita decem & octo prætores in civitate jus dicunt.*

**C** *Apud deinde Sardinia* ] Est autem Sardinia insula in mari Mediterraneo amplissima, ferax frugum, frumenti ditissima, unde a Timæo inter præcipuas insulas primo loco ponitur, cum ob magnitudinem, tum etiam propter fertilitatem, hominumque multitudinem. Strabo lib. 14. Et lib. 5. tradit magnam omnium rerum habere copiam, excellenter autem ejus solum frumentibea-tum esse. De ejusdem fertilitate Horat. lib. 1. *carm. od. 31.*

— — — *Non opima.*

*Sardinia segetes feraces:*

Hinc quoque Valerius Max. lib. 7. cap. 6. *Siciliam & Sardiniam, benignissimas urbis Romanæ nutrices* vocat. Et Varro de re Rust. lib. 2. *Igitur quod nunc intra murum fere patresfamilia correpserunt, relictis falce & aratro, & manus movere maluerunt in theatro ac circo, quam in segetibus ac vinetis, frumentum locamus, qui nobis advehat, qui saturi sumus, ex Africa & Sardinia.* Flor. lib. 4. cap. 2. *Siciliam Sardiniamque annona pignora* vocat. Salvianus lib. 6. *de vero Dei judicio, Sardiniam Siciliamque appellat fiscalia horrea, & vitales Romæ urbis venas. Dives ager frugum apud Claud. de bell. Gildonico. Et Silius Italicus lib. 12. de Sardinia canens.*

*Qua videt Italiam, saxoso torrida dorso,  
Exercet scopulis latè freta; pallidaque intus  
Arva coquit, nimium Cancro fumantibus Austris  
Cætera propense Cereris nutrita favore.*

Ma

Magnam vero tamen ejus partem asperam & parum paratam esse docet idem Strabo *lib. 5.* Aer ejus admodum pestilens & peregrinis valde infesta est ; & ibi præcipue, ubi feracissima : de qua Mela *lib. 2. cap. ult.* *Ceterum fertilis, & soli quam cali melioris : atque ut fecunda, ita pene pestilens.* Unde quoque Cicero Quintum fratrem moneat in *epist. 3. lib. 2.* etiam tum cum optime valeret, meminisse eum oportere in Sardinia se esse : Et *lib. 7. Epist. 29. ad famil.* Tigellium quendam Sardum ait esse hominem patria sua pestilentiorem. Quare apud Symmachum *lib. 9. epist. 39.* Nihil enim de Sicilia reportavit, nisi bonam conscientiam, & malam valetudinem : horreis autem tantum frugis invexit, quantum illi provinciæ anni contulerat. Tacit. *lib. 2. annal. cap. 85.* refert, sub Tiberio fuisse factum Senatusconsultum, ut quatuor millia Judeorum in insulam Sardiniam veherentur : qui si interiissent ob gravitatem cæli vile damnum fore. Unde Martial. *lib. 4. epigram. 60.* Sardiniam Tiburi, ut pestilentissimam saluberrimæ regioni opponens.

*Nulla fata loco possis excludere : cum mors  
Venerit, in medio Tibure Sardinia est.*

Scilicet si mors ad venerit quacunquē in regione degit homo, sive in Tibure cælo saluberrimo, sive in Sardinia regione pestilentissima, fati necessitati cedendum. Sardinia olim a Græcis mercatoribus a figura vocata est *Ichnusa*, quod formam vestigii humani referret. Aristoteles in *Mirabilibus* illa autem insula ut videtur *Ichnusa* primum appellata est, quia humanum vestigium ambitu suo maxime refert. Solinus *capite 4.* *Sardinia quoque, quam apud Timæum Σανδαλιῶτιν legimus Ἰχνησάν* apud Crispum, in quo mari sita sit, quos incolarum authores habeat, satis celebre est. Causam hujus appellationis tradit Plin. *lib. 3. cap. 7.* ubi inquit, Sardiniam ipsam *Timæus Sandaliotin* appellavit ab effigie soleæ, *Myrsilus Ichnusam a similitudine vestigii.*

Hinc



Hinc Claudianus de bello Gildonico *carmen IV. vers.*

507.

*Humana speciem planta sinuosa figurat*

*Insula: Sardam veteres dixere coloni.*

Postea vero Colonia ex Lybia eo deducta a Sardo Herculis filio, Sardo seu Sardinia ab eo dicta est, cujus fanum celeberrimum in Sardinia, quod Σαρδοναίον & εἰρὸν indiget at Ptolomeus, Salmas. Plin. exercit: in Solin. Nihil attinet dicere, ut Sardus Hercule, Norax Mercurio procreati, cum alter a Lybia, alter ab usque Tartesso Hispania in hosce fines permeavissent, a Sardo terræ, a Norace Nora oppido nomen datum. Solin. cap. 4. Et Martianus Capella lib. 6. Ceterum, inquit, Sardinia a Sardo filio Herculis appellata. Pausanias in Phocicis. Primi in Sardiniam navibus transmigrasse dicuntur Afri, duce Sardo filio Maceridis, cui apud Ægyptios & Afros Herculis cognomen fuit. Et de Maceride quidem nihil refertur illustrius quam ejus iter Delphos. Sardus vero coloniam Afrorum in Ichnusam deducendam suscepit. Unde mutato priore vocabulo de ejus nomine insula dicta est. Putat Bochartus Macharid apud Pœnos Herculis fuisse cognomen, quorum sermone Macharid est δ'ἐκφοβῶν qui exterret seu terribilis. Sic Levit. 26. vers. 6. Et dabo pacem in terra & dormietis & non erit (Macharid) qui exterreat & Deut. 28: 26. Voce igitur (inquit) Hæbreis tam usitata Pœnos suspicor Herculem suum Macharid cognominasse, atque inde Græco μαχήριδα Maceridem. Verum quicquid de Sardo dicitur valde sibi suspectum dicit. Eidem videtur nomen Σαρδῶ Pœniciæ originis esse, & idem valere Græcis Ichnusa; Hebræi- יצא saad, vestigium notat, Græci reddunt τὰ ἰχθυῖν αὐτῶν. Et Lament 9, 18. צער רכר vulgatus vestigia nostra. Inde Σαρδῶ vel Σαρδῶν dicta videtur hæc insula, sive Græci R. inferuerint aut etiam ipsi Pœni, qua Epenthesi nihil frequentius. Hinc ramus Hebraice dicitur Seapha & Serapha. Pœnis sane diu Sardiniam subditam fuisse ex Historiis constat: imo & anti-

tiquissimas Phœnicum colonias eo missas testatur Diodorus, adeo ut nomen Punicæ posset esse originis. Et hæc insula, ut idem Solinus tradit *serpentum* expers, sed quod aliis locis *serpens*, hoc *solifuga* Sardis. Agris animal per exiguum, qua aranei forma, *solifuga* dicta, quod solem fugiat. Pro *solifuga*, *solipuga* legendum ac scribendum docet Salmas. in suis *exercitationibus*. Plin: *Solipuga* dictæ non quod in sole vehementius pungant, ut putat Festus. Verum quod minutulum animal ita acriter pungat, ut totum videatur esse punctura. Vid. Salmas. *dict. loc.* Huic incommodo, inquit Solinus, accedit & herba *Sardonis*, qua in defluviis fontaneis provenit justo largius. Ea si edulio fuerit nescientibus, nervos contrahit, rictu diducit ora, ut qui mortem oppetunt facie ridentium intereant. Hinc in proverbium abiit *risum Sardonium*, in eos qui intus tristes, & foris læticiam præferunt ridentesque moriuntur. Quinam populi hanc insulam inhabitant, apud Bochartum videre lib. I. cap. 31. Hoc certum varios eam inhabitasse populos, usque ad, Carthaginienses eam occuparint, postea Pœni Carthaginienses insulam obtinuerunt, adjutique ab incolis bellum contra Romanos gesserunt. Verum quando insulam in suam redegerint Carthaginienses potestatem non satis constat. Quanquam multa adferri possint pervetustæ hujus colonix testimonia, & quidem ipsum insulæ nomen, quod supra Punicæ originis esse diximus, jam Homeri ævo obtinuit. Et testatur quoque Diodor. antiquissimas Phœnicum colonias eo missas. Carthaginiensibus devictis & domitis, omnia in potestatem Romanam venerunt. Tradit de antiq. jure Provinc. cap. 4 Sig. anno V. C. DXC. Carthaginienses a Romanis incusati, quod naves mercatorum spoliassent, Sardiniam jam pridem bello a se partam, impetrandæ pacis causæ, Romanis tradidisse. Juxta quæ refert Zonaras hisce verbis: Tum etiam Sardinia Pœni citra pugnam Romanis cesserunt, ac pecunias alias tribuerunt; quod cum negotiatores Romanos populati esse mari incusarentur,



tur, Romanorum arma nondum satis firmatis opibus timuerunt. At Livius tradit in princip. lib. 21. ubi inquit Angebant ingentis spiritus virum (scil. Amilcarem Hannibalis patrem) Sicilia Sardiniaque amissa: nam & Siciliam nimis celeri desperatione rerum concessam, & Sardiniam inter motum Africae fraude Romanorum, stipendio etiam superimposito, interceptam. Non diu vero post pacem cum Carthaginiensibus initam, cum Sardi instigantibus Poenis arma cepissent, T. Manlio Torquato consule duce, in potestatem redacti sunt. Liv. lib. 23. cap. 60. Et in Sardinia res per T. Manlium Praetorem administrari ceptae, quae omisae erant, posteaquam Q. Mucius praetor gravi morbo est implicitus. Eorumque confecit uno praelio XXX millia, & mille trecentos vivos cepit, & infra. Ibi navibus longis deductis, impositoque, quem secum adduxerat, milite, Romam navigat, Sardiniamque perdomitam nunciat patribus: Deque eo ita Eutropius lib. 3. cap. 3. Manlio Torquato, Cajo Atilio Balbo consulibus, de Sardis triumphatum est: & pace omnibus locis facta, Romani nullum bellum habuerunt, quod his post Romam conditam semel tantum Numa Pompilio regnante contigerat. Et Vellejus. Sardinia inter primum & secundum bellum Punicum, ductu T. Manlii consulis certum accepit imperium. Verum postea anno V. C. 578. iterum rebellantes a Tib. Sempronio Graccho consule perdomiti sunt, quem Romam rediisse & tantam captivorum secum traxisse multitudinem ferunt Frontinus & Auctor de viris illustribus, ut longa venditione res in proverbium venerit, & Sardi venales pro rebus vilibus vulgari loco celebrati sint. Vid. Liv. lib. 41. cap. 17. Hujus proverbii meminit quoque Cicero Epist. 24. ad fam. Habes Sardas venales, alium alio nequiores. De eodem quoque videre est apud Plutarch. in problem. & Festum.

Interjecto tempore cadente imperio Romano a Sarrazenis occupata est, quorum jugum sustinuit, donec Genuensibus & Pisanis inter se certantibus, cujusnam imperio cederet insula, Pontificis Bonifacii VIII. concessu Arrago-

niis armis, ipsis tanquam injustis rerum Dominis detracta fuit, Mariana *de rebus Hispania lib. 16. cap. 19.* Unde postea jure hereditario ad Carolum V. Cæsarem devoluta, & deinde per Philippum Caroli filium in Hispaniarum Regum ditionem concessit: hodieque *Cerdeña* nominatur.

*Mox Sicilia* ] Hanc insulam Diodor. Sic. lib. 5. ait insularum esse præstantissimam & antiquitate rerum commemorandarum facile primas tenere: Olim, inquit, a figura *Tinacriæ*, id est, *Triquetra* nomen habuit. Postea a *Sicanis* cultoribus, *Sicania* dicta. Et tandem a *Siculis*, qui ex Italia cum tota illa gente trajecerunt, *Sicilia* nuncupata est. *Trinacria* sive *Triquetra* a trianguli specie dicta. Plin. lib. 3. cap. 8. in tres enim partes sive promontoria diducta est. Hinc apud Horat. lib. 2. Satyr. 6.

— — — Quid? militibus promissa *Triquetra*  
Prædia Cæsar, an est Itala tellure daturus  
Prædia *Triquetra*, hoc est *Sicula*.

Et apud Ovid. Fast. lib. 4. vers. 419.

Terra tribus scopulis vastum procurrit in aquor  
*Trinacris*; a posito nomen adepta loci.

Item Metamo. lib. 5.

Vasta gigantes injecta est insula membris  
*Trinacris*.

Sic quoque apud Virgil. lib. 1, *Æneid*.

*Littore Trinacrio*, dederatque abeuntibus heres,  
ubi Servius, *Trinacrio* Græcum est quod tria *ἀνέγχα* habeat, id est promontoria, *Lilybeum*, *Pachynnum* & *Pelorum*. Latine autem *Triquetra* dicitur. Strabo lib. 6. *Pelor* enim unum est de tribus promontoriis, quæ *Siciliam* efficiunt *Triquetram*, Et Solin. cap. 5. Ergo *Sicilia*, quod cum primis assignandum est, diffusis promontoriis *Triquetra* specie figuratur. *Pachynus* spectat in *Poloponnesum*: *Pelorias* adversa vespero *Italiam* videt: *Lilybeum* in *Africam* extenditur. Vid. Mel. lib. 2. cap. 7. Et lib. 3. *Æneid*.



*Ante & Trinacria lentandus remus in unda,*  
 ubi annotavit idem Servius, multos & Trinacriam dicere. Verum hanc observat differentiam, ut quotiescunque Sicilia significatur, Trinacria totum per R. dicatur, quotiens Sicula per unam R. ut *Trinacia cernitur Ætna.*

Idem Poëta.

*Præstat Trinacrii metas lustrare Pachyni  
 Cessantem,*

Et Claud. *de bello Gildonico carm. 15. vers. 457.*

*Romani jam finis erit Trinacria regni.*

Et in bello Get. *carm. 26.*

### IPSA ETIAM DIFFISA BREVI TRINACRIA PONTO,

Elegans vero hujus insulæ descriptio *lib. 1. de raptu Proserp.* Sicania vero Thucididi dicta a Sicanis cultoribus, qui primi hanc incolam demonstrantur incoluisse, vid. Diodor. *Sic lib. 5.* Alii a *Sicano* duce ita dictam volunt, vel a *Sicanis*, inter Latii populos a Plinio numeratis, quos inde profectos insulam Italiæ vicinam occupasse, & eam a gentis nomine Sicaniam nominasse refert Servius in illud Virgilii *Æneid. lib. 8.*

*Tunc manus Ausonia, & gentes venère Sicana.*

Verum doctissimus Bochartus *lib. 1. cap. 30.* non sine ratione opinatur Sicanos Siciliæ indigenas esse, eosque a Pœnis, qui Siciliæ partem occuparunt, punica voce *Sicani* dictos, qui Siculorum Pœnis erant proximi, quasi vicinos dixeris: Hebræis enim inquit, & Syris *Saken*, cujus plur. *Sekenim*, vicinum sonat. Inde *Sekenim* vel latine Sicani passim appellantur populi Judæis vicini. Sic quoque verosimile putat denominationem *Σικελίας*, deduci a nomine *escol* quod Hebræis est botrus, ut Syris *segol* & *segul*, ob vinearum in ea insula fertilitatem, quam refert Diodorus disertissimis verbis *lib. 13.* uti & Homerus, qui Cycloperum terram, id est, Siciliam eam describit eximiis vitibus fœcundam *Odyss. lib. 9. vers. 111.* Hinc apud Diodorum *lib. 5.*

de fertilitate hujus insulæ sermonem habens inquit. *In hac Deas, quas diximus omnium primas sese ostendisse, primasque ob soli bonitatem hic fruges pervenisse memorant. Quæ clarissimus etiam Poëtarum suo testimonio confirmat.*

*Absque satù hic crescunt, & vomeris omnia sulco.*

*Hordeum & alticomum triticum, vitesque parentes*

*Uvarum & vini: Qua Jupiter imbribus auget.*

Unde Virgil. 1. *Æneid.*

*Vina, bonus quæ deinde cadis onerarat Acestes,*

*Littore Trinacrio, dederatque abeuntibus heros,*

Et Silius lib. 14. de hac insula

*Multa solo virtus, jam reddere fœnus aratris,*

*Jam montes umbrare olea, dare nomina Baccho.*

Vina imprimis Mamertina e Sicilia olim summo in pretio habuere veteres. Hinc Plinius lib. 14. cap. 6. Genera autem vini alia aliis gratiora esse quis dubitet? Quamobrem de principatu se quisque judicem statuatur. Quartum inquit curriculum publicis epulis obtinere a Divo Julio (is enim primus auctoritatem his tribuit, ut in epistolis ejus apparet) Mamertina, circa Messanam in Sicilia genita. Ex iis Potulana, ab auctore dicta, in loco proximo Italiae laudantur præcipue. Athenæus lib. 1. cap. 21. Mamertinum extra Italiam provenit, nempe in Sicilia, Italicum tamen vocatur, leve, suave, validum. Et Martial. lib. 13. Epigram. 117.

*Amphora Nestorea tibi Mamertina senecta.*

*Si detur, quodvis nomen habere potest.*

id est, vel Falernum, vel Setinum, vel Cacubum dici potest; & cum præstantissimo quoque vino de bonitate contendere. Præter uvarum & vinearum fertilitatem & bonitatem frumenti ingentem quotannis proferebat copiam, ita ut Romani imperii horreum fuerit appellata. Quare Plin. lib. 18. c. 10. Cum centesimo germine quidem & Leontinos Siciliae campos stipulas fundere. Hinc Cereri dicatam tradit Diodor. lib. 5. & Cic. 6. in Verr. Vetus est, inquit, opinio, quæ constat ex antiquissimis Græcorum literis



*literis atque monumentis, insulam Ciciliam totam esse Cereri ac Libera consecratam: hoc cum ceteræ gentes sic arbitrantur, tum ipsis Siculis tam persuasum est, ut agris eorum insitum atque innatum esse videatur. Alii vero Siciliam dictam putant quasi Sicilitam resectam maris impetu ab Italia, cujus pars olim fuit. Apud Turneb. lib. 26. cap. 3. Seculæ fascēs sunt Varroni a secando, & sicilire deducitur, quod est tanquam seculire; inde sicilices: Ennius apud Festum*

*Incedit miles vulgo Sicilibus latis.*

*Sunt autem Silices apud Gellium hasta, habentes spicula lata. Inde Strabo lib. 1. Sicilia nihilo magis frustum ab Italia abruptum judicari potest: Quondam enim Bruttio agro cohæruit, mox interfuso mari avulsa est Plin. lib. 3. cap. 8. Seneca Consolat. ad Marcian. cap. 17. Videbis primum ipsam insulam, ab Italia angusto intercisam freto, quam continenti quondam cohæsisse constat: subitum illo mare interrumpit, &*

*Hesperium Siculo latus abscidit.*

*Quamobrem Græci Rhegio nomen dedere, quasi avulso, Ante Romanos, nunquam tota insula uni paruit domino, verum partem Syracusani, partem Carthaginieneses habuere, donec Romani tempore primi belli Punici partem, quam Carthaginieneses possederant, jure belli sibi acquiescere, & in provinciæ formam redegere, ut testatur Zonaras, cum scribit, Q. Lutatium Cerconem consulem in Siciliam profectum omnia cum Catulo composuisse, ac Siciliae arma ademisse; atque ita Siciliam a Romanis, excepto Hieronis regno, servitute mulctatam. Postea vero bello Punico secundo, Hierone rege Syracusanorum mortuo, constantissimo Populi Romani socio, Syracusas ab amicitia Romana alienatas M. Marcellus consul in Siciliam ad Pœnos inclinantem profectus, diu a se oppugnatas tandem cepit, & Romano quoque adjecit imperio. M. Lævinus tamen in provinciæ formam redegit.*

*Item Hispania ] Hispaniam Romani vocarunt quicquid*

terrarum Pirenæis montibus, mari mediterraneo, atque Oceano ipso est conclusum, Pirenæis quidem ab Oriente, mediterraneo vero a meridie, a reliquis partibus Oceano. Sig. *de jur. Provinc. lib. 1. cap. 5.* Strabo *lib. 3.* Fuit autem Hispania divisa primo a Romanis in ulteriorem & citeriorem. Ulterior a Bæti flumine Bætica, qua & Lusitania quoque, quæ hodie Portugallia nuncupatur, continetur. Citerior Terraconensis a clarissima Terracone civitate appellata fuit, vid. Plin. *lib. 2. cap. 1.* Postea vero in tres partes fuit partita T. Baticam a freto Herculeo, & mari Iberico ad Anam Fluvium: *Lusitaniam*, ad Oceanum occiduum inter Anam & Durium Fluvium; & *Terraconensem*, longe maximam, ab his ad Pyrenæos montes & utrumque mare porrectam. vid. Melam. *lib. 2. cap. 6.* De ejus nominis origine non consentiunt scriptores: Pompejus Trogus *lib. 44. cap. 1.* primo Iberiam appellatam tradit a veteribus, ab Ibero amne, postea ab Hispano Hispaniam cognominatam fuisse. Sic quoque Plin. *lib. 3. cap. 3.* *Iberus annis navigabili commercio dives, ortus in Cantabris, haud procul oppido Julio brica, CCCCL. M. pass. fluens; navium per CCLX. M. a Varia oppido capax, quem propter universam Hispaniam Græci appellavere Iberiam.* Et Curt: Ruf. *lib. 10. cap. 1.* *Hispanias deinde, quas Iberiam Græci a flumine Ibero vocabant, adire; &c.* Olim ab Hespero Atlantis Fratre Hesperiam dictam perhibent. Nonnulli ab Hespero stella occidua, quæ in Hispania occidit & ad quam ferme respiciunt in eam regionem navigantes, Hesperiam nuncupatam volunt. Alii Hispaniæ nomen derivant ab rege *Hispalò*, & condita ab eo urbe *Hispali*: verum hæc nominis origo non admodum antiqua esse potest, quoniam ex Strabone aliisque Historicis constat, *Hispalem* ipsam Romanorum fuisse coloniam *lib. 3.* & a Julio Cæsare conditam urbem, quæ hodie Sevilla vocatur. Plin. *lib. 3.* *Et a lava Hispalis colonia cognomine Romulensis.* Juliam Romulam a Julio Cæsare nuncupatam ait Isidorus *lib. 15. orig. cap. 1.*

Alii



Alii tradunt Semele nato & in Hispaniam appulso, totaque provincia victricibus armis parere imperio coacta, e sociis unum ad res gerendas relictum Pana nomine effecisse, ut Provincia primum *Pania*, deinde additione unius literæ *Spania* diceretur. Doctissimus vero Bochartus lib. 3. cap. 7. ipsum Hispaniæ nomen, vel *Spania* ut veteres scripsere, ostendit mere esse Hebraicum; *Hebrais enim*, inquit, *Saphan est cuniculus*. Inde *Spania dicta cuniculosa regio*; quo epitheto partem Hispania Celtiberiam insigniit Catullus.

*Cuniculosa Celtiberia fli  
Egnati.*

Varro de Re rustica lib. 3. cap. 12. *Tertii generis est, quod in Hispania nascitur, simile nostro lepori ex quadam parte, sed humile*. Unde apud Plin. lib. 8. cap. 29. M. Varro auctor est, *a cuniculis suffossus in Hispania oppidum*. Sed Phœnices, pergit, *jure merito regionem universam, in qua cuniculi olim fuerunt ita frequentes, ut intactum nil relinquerent*. Nec radicibus solum & stirpibus & seminibus essent noxii, sed & oppida ipsa continuis suffossionibus subverterent. Quin & vicinis Balearibus tam infesta fuit hac pestis, ut ab Augusto coacti sint milites deposcere, quibus se tuerentur adversus hac animalcula. Sic quoque vocem Iberiæ ex Phœnicum lingua petendam asserit vir doctissimus. Hebræis enim *eber*, Chaldæis *ebra* vel *ibra* est transitus, & quicquid est ulterius. Inde plurale *ebri* vel *ibri*, terminos & fines significat. Merito igitur, inquit, *Iberi dicti*, qui ex Phœnicum sententia terrarum fines ultimos occuparint; Hispani nempe, quorum urbem Calpen Tyrii putaverunt esse terræ habitatæ terminos. Hanc Hispaniæ terram tradit Mela, uvis, equis, ferro, plumbo, ære, argento, auroque adeo abundare, & fertilem esse, ut sicubi ob penuriam effœta & sui dissimilis est, linum tamen aut spartum alat. Et Plinius lib. 3. cap. 3. in fin. *Metallis, plumbi, ferri, aris, argenti, auri, tota ferme Hispania scætet*. In-

vadendæ porro Hispaniæ inquit Signonius, Romanis eadem causa, quæ Sicilia fuit, nempe ut Pœnis occurrerent, qui majorem fere partem ejus Amilcare primum, deinde Asdrubale Amilcaris genero occuparant. *Primi autem omnium in Hispaniam contra Afros exercitum duxere* Cn. & P. Scipiones, belli Punici secundi initio, qui octavo ejus belli anno a Pœnis cæsi sunt, postquam multas regiones Romanæ fecissent ditionis. Quorum gloriam postea P. Scipio P. F. qui postea Africanus dictus, cumulavit, multaque prospere gessit: Hic enim Hispaniam, quæ patris, patruisque continuatis cladibus tota fermè defecerat, recepit. Ejus virtute factum ut imperium Pop. Romani, usque ad Anam flumen propagatum sit, atque Hispania omnis præter Lusitaniam & Callæciam ab occidente, & Cantabriam, Austriamque a Septentrione, sub ditionem populi Romani concesserit, & ducis virtute in provinciam redacta sit, quod contigisse anno V. C. DXLIII refert Sig. lib. 1. de antiq. jur. Provinc. Quo anno tradit Livius *Hispani primam continentis provinciam factam esse*. Idem vero lib. 2. cap. 12. de Hispania inquit, *Itaque ergo prima Romanis inita provinciarum, quæ quidem continentis sint, postrema omnium nostra demum ætate, ductu auspicioque Augusti Cæsaris perdomita est*. Cadente vero Romano imperio, Gothi, Vandali, Suevi, Alani, eam partiti fuere, donec tandem Gothi rerum potiti sunt. Interjecto vero tempore A. C. 1470. in unius Ferdinandi Arragoniæ R. qui duxerat Isabel- lam Castellæ & legionis hæredem, Hispaniarum regnum, potestatem venit. Johanna ex hoc matrimonio filia, Philippo Austriaco fuit nupta, & ex eo genuit Carolum V. Imperatorem, qui imperii fasces sponte filio Philippo secundo tradidit. Hic regnum Portugalliæ post mortem Sebastiani anno 1578. simulque totam Africam & Asiam litoralem suo adjecit imperio. Quod deinde ad ejus descendit hæredes & successores, excepta Lusitania, Philippum 3. & 4. Carolum II. qui immensi hujus imperii habenas hodie summa cum gloria & laude moderatur,

Dein-



Deinde *Narbonensi Provincia*] Gallia olim a veteribus divisa fuit in *Cisalpinam* & *Transalpinam*; *Cisalpinam* dixere, quam hodie communi vocabulo *Lombardiam* vocamus, quæque hodie *Italiæ* pars est. Ex altera enim *Alpium* parte intra *Italiæ* latæ sumptæ terminos, ad utramque *Padi* ripam, Galli habitaverunt usque ad *Rubiconem* fluvium, unde ea regio *Gallia Cisalpina*; *Guilel. Hill. comment. in Dionys. Justin. lib. 20. cap. 5.* tradit causam Gallorum in *Italiam* adventus, intestinam scil. discordiam, & assiduas domi dissensiones. Dicebatur quoque hæc *Galliæ* pars olim *Tonsa* sive *togata*, ita dicta quod populi illi Romanorum more *toga* utebantur. *Transalpina* cujus una pars *Comata* vocata est a comæ nutriendo studio, altera *Braccata* a genere vestium, *Plin. lib. 3. cap. 4.* quæ & *Gallia Narbonensis*, a *Narbone* *Tectosagum* oppido sic appellata: Quam tradit *Strabo lib. 4.* totius *Galliæ* Emporium. *Cæsar lib. 1. de Bell. Gall.* *Galliam* in tres partes divisam tradit, quarum unam incolunt *Belgæ*, aliam *Aquitani*, tertiam, qui ipsorum linguâ *Celta*, nostra *Galli* appellantur. Hanc *Narbonensis* *Provincia* Romanis charissima; eamque cæteris *Galliæ* partibus magis consitam, ideoque etiam lætiores esse, tradit *Mela lib. 2. cap. 5.* Et *Plin. lib. 3. cap. 4.* ait agrorum cultu, virorum morumque dignatione, amplitudine opum, nulli provinciarum postferendam, breviterque *Italiam* verius, quam provinciam. In quatuor dividitur *Regiones*, *Occitanam* a *Garumna* ad *Rhodanum*, *Provinciam* a *Rhodano* ad *Alpes* maritimas, *Delphinatum* a *Druentia* Fluvio & montibus ad *Hisaram* fluvium, & *Sabaudiam* ab *Hisara* ad *Rhodanum* & *Lemnum* lacum.

*Provincia*] *Provincia* nomen, inquit *Sig. de antiq. jur. Prov. lib. 1. cap. 1.* tribus modis populus Romanus totius hujus rationis auctor accepit: uno, pro regione, quam aut armis devictam, aut quocunque modo in potestatem adductam, ipse magistratui suo administrandam subjecit; altero pro quacunque regione, in qua bellum Romanus Imperator admini-

*stravit ; tertio pro quacunque muneris procuratione.* Huic autem loco prima verbi significatio cæteris conjunctior est, ita ut hic appellatione provinciæ ejusmodi regio intelligi debeat, quæ ab Italia sejuncta, populi dominio subjecta erat, id est quæ tum vectigalia Populo Romano pendebat, tum magistratui populi Romani fœderis lege obtemperare tenebatur, a qua immunis Italia, utpote quæ jure Italico donata, suis legibus & magistratibus utebatur, & consequenter provinciæ appellatione, quanquam quidem vectigalis facta, non continebatur. Quamobrem Sigonius definit brevissime provinciam regionem, quæ jus provinciale consecuta est, scil. quæ legibus suis & magistratibus jus dicentibus spoliata est, in qua jus illud, quod provinciale vocamus, potissimum consistebat: Populus enim Romanus non uno eodemque modo tractabat eas regiones, quas in potestatem redigebat, verum pro suis cujusque meritis leges accipiebant. Quo contigit ut aliæ civitates vectigales, aliæ immunes, aliæ servitute, aliæ libertate affectæ sint. Cujus rei arbitrium primordio Reipub. penes senatum fuit, qui acceptis ab Imperatore de subactis & debellatis hostibus, & regione Romano imperio adjecta literis, de multa & premiis eorum, qui superati erant, consultavit, & Imperatorem certiores fecit quid sibi fieri placeret, missis ad eum decem aut quinque legatis, ut ex eorum sententia de hostibus & eorum regione statueret: Quibus de rebus Imperator certior factus, aut ex certa senatus, si ita præscriptum fuerat, voluntate, aut de communi decem legatorum sententia victis gentibus aut ignovit, aut in provinciæ formam redegit. Sig. *dict. loc.* Ignovisse dicebatur, quando libertate sua frui ipsis permetteret, id est suis uti legibus, suosque creare magistratus more & ritu patrio: in provinciæ vero formam redigebat, cum Romanis legibus & magistratui obtemperare tenebantur.

Quæ cum de universa regione, tum de singulis civitatibus populisque constituta erant, ea in concione silentio per



per præconem factò Imperator fere præconi pronuncianda mandabat, ac postremo Romam, relicto aliquo præfecto provinciæ, decedebat. In has itaque provincias mittere solebant Romani suos magistratus, qui & juridicundo & exercitui præerant, & vectigalia procurabant: Ita ut nulla esset provincia, quæ non habebat proconsulem vel prætorem, & quæstorem: Nam stante repub. aliæ provinciæ *consulares* erant, aliæ *prætorie*; Provinciæ consulares erant, quas illi, qui in urbe consulatum gesserant, consulari obtinebant imperio, ad quas peracto consulatu proficiscentes, proconsules dicebantur. Sic Prætorie erant, quas, qui Prætores proximo anno in urbe fuerant, Prætorio imperio obtinebant. Verum notandum Provincias non ex sui natura & essentia vel consulares vel prætorias fuisse, ita ut certæ quædam provinciæ consulis, aliæ prætoribus decerni deberent, verum senatum eas in potestate habuisse constat, & quas prætorias, quas consulares esse vellet, quotannis pro judicio suo statuisset, quo contigit sæpissime, ut aliquando consulares Prætorie, & Prætorie consulares efficerentur. Quare apud Ciceronem legimus, *ex consulare provincia facere Prætoriam.*

Totidem Prætores, quot Provincia in ditionem venerant, creati sunt ] Crescentibus provinciis, & latius patefcente imperio, prætorum numerum augere necesse habuere Romani. Duobus igitur prætoribus urbano & peregrino quatuor hi additi prætores provinciales, ad numerum provinciarum, quas enumerat Pomponius; verum in eo differt Ictus a Livio, qui Hispaniæ dat duos Prætores, atque ita sex efficit, omissa Narbonensi Provincia, ita enim inquit, lib. 32. cap. 28. Cn. Cornelio, & Q. Minutio coss. omnium primum de provinciis consulum prætorumque actum, prius de prætoribus transacta res, quæ transigi sorte poterat. Urbana Sergio, peregrina jurisdictio Minutio obigit. Sardinium Acilius, Siciliam Manlius, Hispaniam Sempronius citeriorem, Helyius ulteriorem est sortitus. Sed Respondit Cu-

Cujacius Pomponium ex duabus Hispaniis maluisse facere unam, quod & plerumque ad fortiendam utramque unus admitteretur, quam omittere Narbonensem, quæ postea proconsulem habuit.

Deinde Cornelius Sylla ] Omittit Pomponius prænomen nimir. *Lucius*. Quisnam hic fuerit L. Cornelius Sylla neminem fugere potest, qui a limine tantum antiqua salutavit veterum scriptorum monumenta: ex iis enim perspicimus nobilem fuisse Romanum, ex antiqua Scipionum oriundum familia, eruditum & facundum, astutum sed gloriæ imprimis cupidum virum, animo grandem, successuque adeo felicem ut dubitari posse dicat Salustius, utrum fortior, an felicior fuerit. De eo tradit Plin. *de viris illustribus*. Cum adhuc parvulus a nutrice ferreretur, mulierem obviam dixisse, salve puer tibi & Reipub. tuæ felix. Et statim quæsitâ, quæ hæc dixisset, non potuisse inveniri. Q. Florus Tertull. *Apolog. contra gentes cap. II*. Quis ex illis diis vestris gravior & sapientior Catone, justior & militarior Scipione, quis sublimior Pompejo, felicior Sylla, copiosior Crasso, eloquentior Tullio. Scribit Appianus equestrem imaginem Syllæ auream ante rostra positam cum inscriptione: CORNEL. SYLLÆ. IMPERAT. FORTUNATO. Felicem se eo dici voluit, quod inimicos Marianos feliciter ultus esset. *Occiso demum C. Mario septies consulis filio, Felicis nomen assumpsit* Vellejus lib. 2. Et Plin. *natur. histor. lib. 7. cap. 44*. Unus hominum ad hoc avi felicitis sibi cognomen asseruit L. Sylla, civili nempe sanguine, ac patriæ oppugnatione adoptatum. Verum ut inquit Jul. Solin. *Polyhist. cap. 7*. Dictus potius, quam fuerit felix. Nisi, ut inquit Plinius *loc. cit.* ideo felicem Syllam appellari quis velit, quod proscribere tot millia civium ac trucidare potuerit. Quare apud Suet. in Tib. *cap. 59*. Adspice felicem sibi, non tibi, Romule Syllam. O prava interpretatio & futuro tempore infelix. Adolescentulus omnibus editus fuit vitis. Hinc Valer. Max. *lib. 6. c. 9*.



*Turpem adolescentulum & virum fortem dicerem, nisi ipse se felicem appellari maluisset. Verum sub Mario ad Quæsturam euectus, ineuntis adolescentiæ vitia meliori vivendi ratione emendare cepit. L. vero Sylla usque ad quæstura sua comitia vitam libidine, vino, ludicæ artis amore, inquinatam perduxit. Idem dict. loc. missus a Mario ad Bocchum Mauritaniam regem legatus, Jugurtæ Numidarum regis proditi a Boccho, ad quem confugerat, manibus catenas injecit. Mithridatem compescuit: socialis belli fluctus repressit. Cinnæ dominationem fregit: Postremo Dictatura auctus, rempub. milere oppressit, ita ut nemo illo invito, nec bona, nec patriam, nec vitam retinere posset: teste Cicer. 2. in Verrem. Crudeliter enim totam urbem atque omnes Italiæ partes civilis sanguinis fluminibus inundavit Valer. Max. lib. 9. cap. 2. Privatus autem ad postremum dictatura deposita Puteolis (oppidum est distans decem millibus passuum a Neapoli) periit Pæthiriasi, id est morbo pediculari, sexagesimum ingrediens annum. Plutarch. in Mario. Dissentit autem a cæteris omnibus fere auctoribus Valerius, qui dicit Syllam nimia iracundiæ violentia supremum diem obiisse. lib. 9. cap. 3. ubi inquit. Quid Sulla dum huic vitio obtemperat? nonne multo alieno sanguine profuso, ad ultimum & suum erogavit? Pæteolis enim ardens indignatione, quod Granius princeps ejus colonia pecuniam a decurionibus ad refectiorem Capitolii promissam cunctantius daret; animi concitatione nimia, atque immoderato vocis impetu convulso pectore, spiritum cruore ac minis mistum evomuit.*

*Quæstiones publicas constituit]* Id est publica constituit judicia: quæstiones enim sunt publica judicia, inde ducto nomine, quod in iis reo in iudicium vocato, nocens sit an innocens constituto iudicio quæritur. Quæstio enim status & constitutio causæ dicitur. Inquit vero Fabius lib. 3. quod Quæstio in judiciali materia dupliciter accipienda sit. Altero modo quo dicimus multas quæstiones habere

bere controversiam : quo etiam minores omnes complectimur. Altero quo significamus summam illam, in qua causa vertitur : ex qua nascitur status an factum sit : an rectè factum sit. Verum hic quæstio pro publico judicio accipitur : & quæstor is dicitur, qui quæstionem habet scilicet qui inquirendum curat de crimine, de eoque iudicium exercendum : cui iudicio præerat olim prætor, ideoque veteri nomine quæstor vocabatur. *Quarere* enim proprium pro præesse dicitur. Cic. pro Rabyr. *Accusavi de pecuniis repetundis. Iudex sedi, prætor quæsi.* Sed quoniam in exercendis quæstionibus, sive iudiciis criminum, servi sæpe tormentis subiciebantur, qui testes sæpe rerum domi perpetratarum erant, hinc quæstio aliquando pro tormentis accipi potest, ut patet ex *tot. tit. ff. & Cod. de quæst.* & ipsa tormenta quæstiones appellatæ, inde fortasse, quod tormentis veritas credatur exquiri, & invitis extorqueri. An autem iste adhibendarum quæstionum sive tormentorum mos & usus ad eruendam facti veritatem, rationi & æquitati atque humanitati sit conveniens nec ne, alio loco a nobis, si Deus velit, disputabitur. Quæstiones igitur hic rectè interpretamur iudicia publica. *Publica* ideo dicta, quod cuivis e populo actio permitteretur, *publica autem dicta sunt, quod cuivis e populo executio eorum plerumque datur* inquit Imperator *inst. lib. 4. tit. 18.* Executio hic est criminalis accusatio, ita enim utimur executionis verbo *l. 11. ff. de accusat.* atque sæpissime apud Latinos ultionem significat. Quemadmodum Reipub. interest plures habere defensores, ita etiam plures malefactorum accusatores. *Caterum (ut inquit Sig. cap. 1. lib. 2. de jud.) iudicia publica fuere decreta, quæ de criminibus, quæsitore aliquo iudicium exercente, iudices ab eo dati fecerunt, pro ut leges de singulis criminibus cognoscendis latæ jusserunt.* Notandum tamen, non omnia iudicia, in quibus crimen vertitur, publica esse, sed ea tantum, quæ ex legibus iudiciorum publicorum veniunt, ut *Julia Majestatis, Julia de Adulteriis, Cornelia*  
de



de Sicariis, & Veneficiis, Pompeja de Parricidiis, Julia peculatus, Cornelia de testamentis, Julia de vi privata, Julia de vi publica, Julia ambitus, Julia repetundarum, Julia de annona l. 1. ff. de publ. jud. Publica etiam dici putat Duarenus, quod olim eorum cognitio & animadversio ad populum pertineret, qui lege lata quæstiones, & quæstionum judices constituebat; quippe cum lege Valeria vetabatur de capite civis Romani injussu populi animadvertere, sive jus dicere, quæstores constituebantur a populo, qui capitalibus rebus præessent l. 2. h. t. §. 23.

Quæri hic possit num tot secula ante Syllam nullæ in Romana Rep. sive sub regibus, sive consulibus, fuerint publicæ quæstiones, quarum originem videtur Pomponius ad Syllam referre, cum eas ab eo tradit constitutas. Certissimum est longe ante Syllam a L. Trib. pl. legem latam esse, qua quæstionem repetundarum perpetuam fecit, ut Cicero scribit hisce verbis: *Carbone forum tenente plura judicia fieri ceperunt, nam & quæstiones perpetuæ* (de hisce enim Pomponius sermonem habet) *hoc adolescente constitutæ sunt, quæ nullæ ante fuerant. L. enim Piso trib. pl. legem primus de pecuniis repetundis Censorino & Manlio cos. tulit.* Post hanc de repetundis quæstionem interjecto tempore & aliæ quoque de peculatu, de Majestate, & de ambitu perpetuæ factæ sunt. Imo de veneficio etiam Romæ quæsitum publice constat, cum civitatis primores incertis & occultis morbis e medio tollerentur, ancillæ cujusdam indicio patfactum est muliebri fraude civitatem premi, matronasque venena coquere, quibus tot viri absumebantur. Quod ubi compertum est, occisæ viginti in forum matronæ, apud quas venena deprehensa erant, cum duæ ex iis contenderent salubria esse, quæ faciebant, medicamenta, ab confutante indice bibere jussæ, haud abnuentibus illis bibere, epoto medicamento, suamet ipsa fraude omnes interierunt, comprehensæ extemplo earum comites, magnum numerum matronarum indicaverunt, ex quibus 170 damnatæ,

natæ. Quo primum tempore de veneficiis Romæ quæsitum Liv. lib. 8. cap. 18.

*Veluti de falso, de parricidio, de Sicariis. Et Prætores quatuor adjecit.* } Ita sese habet Florentina lectio: Quatuor autem putat Cujacius aliique horum verborum interpretes leges Cor. Sullam instituisse, & hisce tribus adjiciendam esse legem Corneliam de injuriis. Quot enim (inquit) sunt adjecti prætores, tot credibile est fuisse constitutas quæstiones, & prætoris de injuriis extat mentio in l. 35. ff. de injur. ubi inquit Ulpianus, *Si quis atrocem injuriam fecerit, qui contemnere injuriarum judicium possit ob infamiam suam & egestatem, Prætor acriter exequi hanc rem debet, & eos, qui injuriam fecerunt, coercere.* Sig. lib. 2. de jud. cap. 4. enumerat inter leges a Cor. Sylla latas legem de veneficis, nullam legis Corneliæ de injuriis mentionem faciens. Et propterea (inquit) Pomponius prætores quoque quatuor, ut de iis quærerent, addidit. Verum reponit Cujacius, cui ex lege Cornelia de Sicariis obtigit quæstio, etiam de veneficiis procul dubio quærît, ut cui ex lege testamentaria, & ex nummaria; Itaque proprium hanc de veneficis legem prætorem non habuisse. Corasius longe ab hac Cujacii sententia recedit, & fatetur se hunc diu multum distorsisse, cum sciret judicium de injuriis privatum esse: ex l. 7. §. 1. ff. de injur. ubi inquit Ulpianus, *Si dicatur homo injuria occisus, nunquid non debeat permittere Prætor privato judicio legi Corneliæ præjudicari?* Ita etiam in l. 7. Cod. de injur. *Injuriarum causa non publici judicii, sed privati continet querelam.* Et l. ult. eod. *Si quando injuriarum actio (quam inter privata delicta veteris juris auctores connumerant &c.* Et tamen video inquit a Pomponio nostro inter quæstiones publicas a Sylla constitutas, repositum: ut non possim propterea non valde mirari conniventiam scriptorum, qui hunc salebrosam locum, tam belle dissimularint: licet enim lege Cornelia ex tribus causis de injuriis datam actionem, Ulpianus Justinianusque re-



referant: De iis tamen causis publicam quæstionem non esse, sed privatam videre est in *l. 1. 2. 3. ff. de privat. delict.* Et fatetur se nihil habere quid dicat, nisi hæc verba de *injuriis* subdititia esse & ab audaculo quodam nobis obtrusa, & loco de *injuriis* reponendum censet de *repetundis*, quoniam nuspiam ab aliquo Cornelio aut Sylla crimen injuriarum publica quæstione coercitum legimus. Sane Paulus Ictus in *l. 42. §. 1. ait* actionem injuriarum pro publica utilitate quidem exerceri, attamen privatam esse: ideoque in ea ex lege Cornelia procuratorem dari posse. Cicero quoque *lib. 2. de invent.* injuriarum actionem privatam fuisse affirmat. Ita ut hic locus merito suspectus videri debeat. Verum largiter putat hic Lipsius Pomponium errare, sentientem totidem Syllam instituisse prætores, quot quæstiones constituit. Constat enim sapissime apud eundem Prætorem plures quæstiones exercitas fuisse: quippe ut vult Balduinus ad *h. t.* quæstio de parricidis comprehensa fuit lege & quæstione de sicariis tempore Cornelli Syllæ, idque ex Cicerone in *orat. pro Sex. Roscio*, probari posse affirmat; ita ut Cornelia lex & quæstio de sicariis pertinuerit quoque ad parricidas: & consequenter non videatur de his instituta quæstio diversa, donec Pompejus & legem de iis tulerit, & proprium quæstorem instituerit. Quid igitur, inquit, superessent duæ tantum quæstiones publicæ ex lege Cornelia, nempe de sicariis & de falso? nam & falsi quæstio comprehendebat quæstionem de veneficio, ut videre est *l. 1. §. ad leg. Cornel. de sicar.* Quicquid sit, putat Lipsius ad numerum quæstionem Syllam non auxisse numerum prætorum, sed in universum duos tantum addidisse. Ita ut non plures octo prætores ad Ciceronis ævum, & non decem, ut voluit Ictus fuerint. Quippe ut ex Dione constat, Cæsar primus dictator instituit decem prætores *lib. 42.* Ut enim (inquit) pluribus gratiam posset referre, decem prætores ad insequentem annum designavit. Sin autem Pomponio fidem habeamus, adjectis duobus prætoribus urbano &

peregrino , quatuor Provincialibus , & pro numero quæstionum quatuor aliis , decem tempore Syllæ prætores constitutos constabit.

Deinde *Cajus Julius* duos Prætores & duos Ædiles , qui frumento præessent , & a *Cerere* cereales constituit. ] Ita enim *Suet. in Julio* , cap. 41. *Senatum supplevit , patricios al-legit ; prætorum , ædilium , quæstorum , minorum etiam magistratuum numerum ampliavit.* Supra de Ædilibus plebis , qui in monte sacro primum a plebe & ex plebe creati sunt , atque de Ædilibus Curulibus , qui e patribus creati fuere quædam disputavimus , hic *Pomponius* Ædilium Cereali-um mentionem facit , quos *Julius Cæsar* creavit , ut es-sent qui rei frumentariæ operam darent , atque præessent fru-mento. Hi etiam ex plebe creati , unde quædam anti-quæ inscriptiones , **ÆDILES PLEBEI CEREAL-ES**. Didicerant enim *Romani* quanti sit momenti in *Repub.* frumenti & annonæ habere copiam , rerumque usu expertes sæpissime bellis intestinis annonæ caritatem causam præbuisse. Quæ vix evitari poterat nisi constitu-to aliquo magistratu , qui ejus curam gereret , & abs re nomen haberet. A *Cerere* itaque *Cereales* dicti. Fuit enim *Ceres* , *Saturni* & *Opis* filia , *Dea* frugum ab antiquis ha-bita , a gerendis frugibus , ut tradit *Cic. lib. 2. de natur. Deor.* *Ceres* tanquam *geres* , priore litera immutata , sic dicta. Inter divos hac de causa relata , quod leges prima hominibus tulisse sit credita. Nam ante frumenti usum a *Cerere* inventum , ferarum more mortales sine lege vaga-bantur , quæ feritas interrupta est , invento frumentorum usu. Hinc *Cereris* numen veteres ad eam terram potissi-mum transferebant , quæ frumenti ferax erat. Ædilium itaque munus annonæ reique frumentariæ præesse. Unde *Apulei* : 11 *Metam. Annonam Curamus* , ait , & *adi-lem gerimus*. Frumentum vero explorabant , probabant , dividebant , ac providebant ut ejus copia esset. Legimus apud *Liv.* frumentarios pecunia ab ædilibus damnatos ob annonam compressam.

Deinde



*Deinde Divus Augustus sedecim Prætores constituit*] Numerum prætorum Augustum auxisse testatur Suet. in ejus vita *cap. 37.* verum quot prætores adjecit non tradit. Si Pomponio fidem habeamus, & numerum ab eo traditum velimus explere, quatuor de novo creasse prætores dicendum. Cum enim tempore Julii Cæsaris duodecim jam prætores fuisse scribit Ictus, divumque Augustum sedecim constituisse, necessario sequitur quatuor Augustum prætores adjecisse prioribus sicuti jam dictum. Verum hac in re admodum variant authores. Tacit. *1. annal. cap. 14.* Tiberium duodecim præturæ candidatos nominasse, qui numerus jam ab Augusto traditus erat, refert. Id saltem certissimum quemadmodum Cæsar, ita quoque Augustus sæpissime prætorum numerum & auxit & diminuit. Quippe Augustus jam summa rerum potitus minuit Cæsarianum numerum, qui ad sedecim usque creverat, ad decem reduxit. *Augustus vero decem tantum prætores, quia pluribus opus non haberet, constituit, id in plures etiam annos, inquit Dio. lib. 53.* Anno DCCLXIV. creavit decem. Ita tamen ut multis deinceps annis duodecim duntaxat crearet. Ad prima adjecit oculos Pomponius, ad ultima Tacitus cum de duodenario numero sermonem habet, Lipsius *dict. loc.* verum lubitu Cæsarium numerus vel auctus vel diminutus sæpissime fuit.

*Divus Claudius duos prætores adjecit qui de fideicommissis jus dicerent*] Fideicommissa dicuntur quæ restituenda fidei alicujus committuntur. Eum in finem inventa, ut, quibus olim hæreditatem vel legata relinquere vetabant leges, quorum in numero habebantur peregrini & cælibes, iis, si quid relictum a se vellent, eorum fideicommittebant, cum quibus erat testamenti factio activa vel passiva, qui capere ex testamento poterant. Iis ea conditione legata sive hæreditatem vel integram vel partem ejus relinquebant, ut restituerent. *Quæ, ut inquit Imperator, ideo fideicommissa appellata sunt, quia nullo juris vinculo, sed tantum pa-*

dore eorum , qui rogabantur , continebantur. Postea vero Divus Augustus semel iterumque gratia personarum motus , vel quia per ipsius salutem rogatus quis diceretur , aut ob insignem quarundam perfidiam , jussit Consulibus authoritatem suam interponere. Quod quia justum videbatur & populare erat , paulatim conversum est in assiduam jurisdictionem : tantusque eorum favor factus est , ut paulatim etiam prætor proprius crearetur , qui de fideicommissis jus diceret , quem fideicommissarium appellabant. Et hoc est quod tradit Suet. in Claud. cap. 23. ubi inquit , Jurisdictionem de fideicommissis quotannis , & tantum in urbe delegari magistratibus solitam , in perpetuum , atque etiam per provincias potestatibus ( scil. Præsidibus ) demandavit. Id est , ut dicit Imperator , in assiduam Jurisdictionem convertit : scil. non opus in singulis negotiis , neque quotannis , eam demandari , verum jam jure magistratus obtinebatur , imo proprius prætor constitutus est , qui fideicommissarius vocabatur , qui de fideicommissis cognoscebat & jus dicebat. Verum notandum , interdum quoque consules de iis jus dixisse , quamvis proprius jam creatus erat magistratus , ut perspicimus ex fragment. Ulpiani tit. 25. §. 12. Sed cognitio ( inquit ) est Romæ quidem consulum , aut Prætoris , qui fideicommissarius vocatur. Et Quintil. lib. 3. cap. 6. Non debes ( inquit ) apud Pratorem petere fideicommissum , sed apud consules. Major enim Pratoria cognitione summa est. Itaque ratione fideicommissorum , quæ petebantur , vel cognitio erat consulum , vel prætorum , de majoribus consules , de minoribus prætor cognoscebat sive judicabat.

*Jus dicunt* } diverso tamen modo , quidam enim cognoscendo per se , quemadmodum Prætor fideicommissarius. Tantus erat favor fideicommissorum , ut de iis cognoscere fideicommissarius ipse debebat. Itaque non poterat dare judicem. Quare persecutio fideicommissi non actio specialiter ac proprie dicebatur , ut & ceteræ , quæ non habebant juris ordinarii executionem. l. 17. §. 2. ff. de verb. fig.



fig. ubi inquit Ictus. Persecutionis verbo extraordinarias persecutiones puto contineri : ut puta fideicommissorum , & si qua alia sunt , qua non habent juris ordinarii executionem. Alii jus dicebant dando judices pedaneos , qui nullam habebant jurisdictionem , verum judicandi tantum facultatem. l. ult. ubi & apud quem cognit. in integ. Nam & jus dicere magistratus dicitur cum dat judicem , quia judicis dandi licentia est jurisdictionis , ut supra annotavimus ex l. i. & 3. ff. de jurisd.

---

S. 33. Et haec omnia , quotiens in re publica sunt magistratus , observantur : quotiens autem proficiscuntur : unus relinquitur , qui jus dicat , is vocatur praefectus urbi. qui praefectus olim constituebatur , postea ferè Latinarum feriarum causa introductus est , & quotannis observatur. nam praefectus annonae , & vigilum non sunt magistratus , sed extra ordinem , utilitatis causa constituti sunt : & tamen hi , quos Cistiberes diximus , postea aediles Senatusconsulto creabantur.

**I**N *republica* ] Id est in civitate, in urbe Roma & intra muros ejus. Ita Salust. in *conjurat. Catilin.* Postea, inquit, Piso in citeriorem Hispaniam Quaestor pro Pratore missus est, ad nitente Crasso, quod eum infestum Cn. Pompejo cognoverat: neque tamen Senatus provinciam invitus dederat: quippe fœdum hominem a repub. procul esse volebat. Et Tacit. 16. annal. cap. 3. Helvidius & Paconius Italia depelluntur: Mantanus patri concessus est; predicto, ne in repub. haberetur.

*Profisciscuntur* ] Id est quoties omnes ab urbe discedunt, ita ut nullus relinquatur magistratus, qui jus dicat, & urbis custodiam habeat, absentibus omnibus magistratibus. Prætores quoque licet creati fuerant ut jurisdictioni præessent, & civibus litigantibus jus redderent, attamen oburgens bellum oportebat ad illud proficisci nonnunquam, ejusque curam suscipere. Itaque ne justitiæ administratio absentibus magistratibus, quibus ejus incumbebat cura, cessaret, præfectus constituebatur, qui urbis custodiam haberet, justitiam administraret, atque provideret ne respub. interim aliquid detrimenti caperet.

*Is vocatur Præfectus urbi* ] Constat hunc magistratum olim & sub regibus fuisse, ut quoties Rex abesset, regia præfectus obiret munia. Causam instituti hujus magistratus, describit Tacit. lib. 6. cap. 10. & 11. de L. Pisone Pontifice sermonem habens, ejusque laudes referens, ita inquit. Sed præcipua ex eo gloria, quod præfectus urbi recens, continuam potestatem, & insolentia parendi graviolem, mire temperavit. Namque antea profectis domo regibus, ac mox magistratibus, ne urbs sine imperio foret, in tempus deligebatur, qui jus redderet, ac subitis mederetur. Feruntque ab Ramulo Dentrem Romulium, post ab Tullo Hostilio Numam Marcium, & ab Tarquinio Superbo Spurium Lucretium, impositos. Dein consules mandabant; duratque simulacrum, quotiens ob ferias Latinas præficitur, qui consulare munus usurpet. Regibus exactis, consulibus etiam foris bellum proficiscen-



ciscentibus, idem mos creandi præfectos, qui domi rempub. administrarent, aliquamdiu servatus fuit. Liv. lib. 1. in fin. de Bruto Tribuno Celerum differens, inquit, eum in castra profectum, imperium in urbe Lucretio præfecto urbis, jam ante ab rege instituto, reliquisse. Et paulo post. *Duo consules inde comitiis centuriatis a præfecto urbis ex commentariis Servii Tulli creati sunt, L. Junius Brutus, & L. Tarquinius Collatinus.* Prætoribus vero creatis, qui, advocatis bello consulibus, in urbe jus redderent, in tantum præfecti urbi creari desierunt, ut tantum, quemadmodum statim ex Tacito allegavimus, simulacrum quoddam feriarum Latinarum sit relictum.

*Feriarum Latinarum causa introductus est.*] Harum latinarum feriarum crebrò fit apud Livium mentio. Primo eas rex Superbus instituit, eam potissimum ob causam, ut, quemadmodum Latini rerum publicarum causa ad lucum Ferentinæ convenirent, sic sacrorum gratia in monte Albano cogerentur. Fuit autem locus, ut tradit Dionysius, in monte Albano, ubi populus Romanus & Latini foederati convocabantur, ut Jovi Latiali communi consensu facerent sacrificium; cumque eorum alii agnos, alii caseum, alii lac, alii alia domo attulissent, tauro immolato, suam quisque carnis partem acciperent, hoc solenne *Latias* appellatum, ad extrema usque reipub. tempora est conservatum. Neque enim ante consules exire paludati in provincias consueverant, quam ferias latinas indixissent, atque iis in monte Albano cum Latinarum civitatum magistratibus operam dedissent. Hinc est quod scribit Livius lib. 5. cap. 17. *Latinas ferias instauratas, quod legati ab Ardea questi in Senatum essent, sibi in monte Albano Latinis, carnem ut assolet, datam non esse.* Et lib. 37. *Latinas instauratas, quod Laurentibus carnis, quæ dari debet, data non erat.* His autem feriis dicavit unum diem Superbus, quo tempore devicit Etruriam. Exactis vero regibus & alter adjectus est, ob libertatem adeptam; postea vero tertius

accessit, ob plebis quæ secesserat reditum. Anno demum urbis 396. composita, quæ diu civitatem turbaverat, de plebejo consulatu seditione, quartus additus. Cum autem hoc feriarum tempore, ex urbe primores civitatis cæterique magistratus abesse debebant, & pars populi numerosior sacra hæc vetusto ritu in montem Albanum factura unà cum magistratibus conscendebant, ne interim urbs sine imperio foret, hic magistratus creari cæptus videtur, qui munus suum exerceret per eos dies, quibus feriarum causa abessent magistratus. *Coras. in comment. ad tit. de offic. Præfect. urb.* qui dies quia pauci cum primis erant, & interim a negotiis civilibus abstinebatur, religionis potius causa constitutus censeretur, ad sedandos tumultus, & continendos tantisper in officio cives, quo respectu eum jus convocandi senatum habuisse ex *Gell. lib. 14. cap. ult.* censet *Frantzhius in comment. ad h. t.* Hunc vero magistratum ab Augusto valde auctum atque ornatum fuisse ex veterum monumentorum auctoribus perspicitur, cuius postea in immensum crevit auctoritas. Hinc *Mæcenatis apud Dion. lib. 52. Oratio. Præfectus etiam urbis ex primariis viris quidam creandus est: qui omnes magistratus, quos geri ante hunc convenit, gesserit, non ut per absentiam magistratuum rempublicam administret: sed ut cum reliquis in rebus urbi præsit, tum causas quoque eas a quibus provocatio competit, capitalesque etiam omnes, exceptis iis, quas post dicam, in urbe, ac extra urbem usque ad LXXXI millia passuum dijudicet.* Quare apud *Euseb. Olymp. CLXXXVIII. Messala Corvinus primus præfectus urbis factus, sexto die magistratu se abdicavit, incivilem potestatem esse contestans.* Id est immodicam, quam habere non decebat civem. Imo in tantum processit, ut *Nero a cognitionibus Præfecturæ urbis, honoris initia auspicaretur, Suet. in Nerone. cap. 7.* Et ut supr. ex *Tacito* descripsimus *Piso* viginti annis præfecturam urbis, velut instar magni muneris, gerere non dubitavit. Extatque *Divi Severi* epistola ad *Fabium Chilonem*



lonem præfectum urbi, quæ magnam ei Jurisdictionem dedit, ita ut omnia omnino crimina, nec tantum ea, quæ intra urbem; verum ea quoque quæ extra urbem intra Italianam admittuntur, sibi vindicabat. Hinc Cassiod. *lib. 6. Dictio- ni tuæ non solum Roma commissa est* (quamvis in illa contine- antur universa) *verum etiam intra centesimam potestatem re- protendere antiqua jura voluerunt, ne tantæ civitatis judicem muralis agger includeret, cum Romæ omnia possideret.* Quod autem dicitur Præfectum *l. fin. ff. de præfect. urb.* extra urbem, id est extra centesimum ab illa lapidem, & conse- quenter extra terminum suæ potestatis sive jurisdictionis constitutum jubere judicare, hoc interpretamur, quod non quidem ipse exercet extra illum terminum jurisdictionem aliquam, verum quod judicem dare possit, qui intra cen- tesimum ab urbe lapidem judicat, in suo territorio & intra jurisdictionis terminos. Alioqui posset ei impunè non pareri: *l. fin. ff. de jurisd.* Vel uti glossa, legendum *nec extra urbem*, Aut potius dicendum est, terminos urbis in *d. l. fin. ex l. 2. ff. de V. S.* non de centesimo lapide, sed ædificiis urbis, quibus urbs Roma finitur, accipiendos esse, sensumque esse, Præfectum urbis quotiens urbe ex- cedit, non habere potestatem jusdicendi extra illius mu- ros, sicut nec Prætor habuit, licet de omni causa, quæ ad centesimum usque lapidem accidit, in urbe jus diceret, judicem quæ extra urbem etiam judicat, dare possit: nam nec Proconsul, etsi statim imperium habere incipiat, quo urbe excessit, antequam provinciam ingressus est, pote- statem exercet *l. 1. de offic. Procons.* Amplam itaque Præ- fectus urbi habebat potestatem atque jurisdictionem, om- nium ut diximus criminum habebat cognitionem. Servos qui ad statuas confugerunt, vel sua pecunia emptos, ut ma- numittantur, de dominis quærentes audiet. Sed & pa- tronos egentes de suis libertis audiet, & maxime si ægros se esse dicant, desiderentque a libertis exhiberi: relegandi deportandique in insulam, quam imperator assignavit,

licentiam habent. *l. 1. ff. de ff. Præf. urbi.* Solent quoque ad eum mitti tutores, qui male in tutela sive cura versati, graviori animadversione indigent, quam ut sufficiat eis suspectorum infamia. *§. 7. ff. eod.* Cura carnis omnis ut iusto pretio præbeatur, ad officium Præfecti pertinet: & ideo forum suarium sub ipsius cura est. Sed & cæterorum sive pecorum, sive armentorum, quod ad hujusmodi præbitionem spectat, ad ipsius curam pertinent. *§. 11. ff. eod.* Quies quoque populi, & disciplina spectaculorum ad Præfecti urbi curam pertinere videtur: & sane, debet etiam dispositos milites stationarios habere ad tuendam populi quietem, & ad referendum sibi quid in urbe agatur. *§. 12. ff. eod.* Et diligenter curare ne quid circa urbis custodiam aut munus vigiliarum segniter exequutum foret, quamobrem custos urbis vocatus est. *Juven. Satyr. 13. vers. 157.*

*Hac quota pars scelerum, quæ custos Gallicus urbis  
Usque a Lucifero, donec lux occidat, audit.*

Fuit enim *Rutilius Gallicus* urbis Præfectus temporibus Domitiani: apud quem secundas dignitatis partes obtinuit, omniaque ad eum urbis jura ab aliis magistratibus deferbantur. De quo etiam *Statius, lib. 1. Sylv. 4. vers. 5.*

— — — *Dubitataque Sydera cernit  
Gallicus, es cælo, diis es, Germanice cordi,  
Quis neget? erubuit tanto spoliare ministro  
Imperium fortuna tuum.*

& *vers. 15.*

*Quippe manet, longumque ævo redeunte manebit,  
Quem penes intrepida mitis custodia Roma.*

Sed & *Seneca* & *Josephus* custodem urbis appellant, quem *Suet. in Tiberio cap. 41.* Præfectum fuisse tradit. Ita enim inquit. *Postea princeps in ipsa publicorum morum correctione cum Pompejo Flacco & L. Pisone noctem continuumque biduum epulando potandoque consumpsit: quorum alteri Syriam Provinciam, alteri Præfecturam urbis confestim detulit, codicillis*  
que-



quoque jucundissimos, & omnium horarum amicos professor. De eodem Seneca epist. 83. L. Piso urbis custos ebrius, ex quo semel factus fuit. Majorem partem noctis in convivio exigebat: usque in horam sextam fere dormiebat, hoc ejus matutinum. Officium tamen suum quo tutela urbis continebatur, diligentissime administravit. Huic & Divus Augustus dedit secreta mandata, cum illum praeponeret Thracia, quam perdomuit: & Tiberius proficiscens in Campaniam, cum multa in urbe & suspecta relinqueret, & invisa. Puto quia illi beneceſſerat Pisonis ebrietas, postea Coſum fecit urbis praefectum, virum gravem, moderatum, sed merſum vino & madentem. Et Vell. lib. 2. de eodem ita inquit, Atrox in Thracia bellum ortum, omnibus ejus gentis nationibus in arma accensis, L. Pisonis, quem hodie diligentissimum atque eundem lenissimum securitatis urbanae custodem habemus, virtus compressit. Plinius Curatorem urbis Praefectum appellat. Hanc vero dignitatem interjecto tempore tam infimae sortis habita est, ut Heliogabalus teste Lampridio in ejus vita, voluerit per singulas urbes lenones praefectos facere, & ut essent in urbe 14, & fecisset si vixisset, promoturus omnes turpissimos, & ultimae professionis homines.

Nam praefectus annonae & vigilum non sunt magistratus ]  
 Annona dicitur quicquid ad alimoniam pertinet. Itaque annonae praefectus dicebatur qui ejus curam gerebat, atque providebat ne populus annonae caritate & inopia praemeretur, ut panis ubique copia esset, & ut audiret eos, qui deferrent ad eum, quae ad utilitatem annonae pertinebant. l. 13. ff. de accus. l. fin. ad l. Jul. de annonae. Originem hujus magistratus tradit Liv. lib. 4. cap. 12. ubi inquit, Postremo pepulere plebei haud adversante Senatu, ut L. Minutius praefectus annonae crearetur; felicior in eo magistratu ad custodiam libertatis futurus, quam ad curationem ministerii sui: quamquam postremo annonae quoque levata, haud immerito & gratiam & gloriam tulit. Hujus magistratus quoque mentionem facit Tacit. 1. annal. cap. 2. & 13. annal.

cap. 21. Et de Pompejo annonæ præfecto ita Appian. *Alex. de bel. civ. lib. 2.* At populus Romanus fame pressus, Pompejum annonæ præfecit, eique, sicut prius in bello Piratico, viginti ex senatu ministros addidit: quibus ille circa provincias dimissis, brevi urbem replevit omnigenis copiis rerum ad victum pertinentium: & hinc quoque auctus est tam gloria quam potentia. Fuit autem hic magistratus extraordinarius. Sæpius enim ut quæque negotia occurrebant, quæ extraordinariam curam requirere videbantur, alii atque alii magistratus creabantur. Postea ordinarium fecit Augustus, ut Suet. tradit in *ejus vita*, cap. 37. qui eum curatorem frumenti populi dividendi vocat. Quo plures, inquit, partem administrandæ reipub. caperent, nova officia excogitavit: curam operum publicorum, viarum, aquarum, alvei Tiberis, frumenti populo dividendi &c. Putat Casaubonus in suis animadversionibus in Suet. ad hunc locum, qui hanc curam sustinebat alio nomine dictum *Minutia curatorem*, ut in lapide veteri insculptum interpretatur. CURATOR. AQUARUM. ET. MINUTIÆ. CUR. ALBEI TYBERIS. ET. CLOACARUM. URBIS. Verum observandum, hanc curationem quam præfecturam vocamus, cum illis curatoribus, qui ex S.C. in provincias mittebantur, ad frumentum emendum, & comparatum ad urbem mittendum curabant, non confundendam. Quorum meminit Cic. ad Atticum lib. 15. *epist. 9.* ubi inquit, III Nonas vesperi a Balbo redditæ mihi litteræ, fore Nonis Senatū, ut Brutus in Asia, Cassius in Sicilia frumentum emundum, & ad urbem mittendum curarent. Et Paulus Ictus in l. 21. ff. ad Municipalem, frumento comparando curatoris constituti mentionem facit. Præfecto autem annonæ nihil aliud incumbibat, quam frumenti ad urbem ab istius curatoribus missi distributio, atque divisio, nec non curare ut undique adveheretur, advectumque & in horrea publica transfusum justo pretio posset parari atque distribui. Imo si quid ultra proprios usus aliquis possideret in medium

ponen-



ponendum curabat, Fenestella. *lib. 2. cap. 15.* ita ut si quis uberes proventus expectando, fructus suos æquis pretiis vendere declinet extraordinarium committat crimen. *l. 6. ff. de extraord. crim.* Ita Seneca *de vitæ brevitæ cap. 19. ad Paulinum.* Simile tu putas esse, utrum cures, ut in corruptum a fraude advehentium & negligentia frumentum transfundatur in borrea, ne concepto humore vitietur, & coalescat, ut ad mensuram pondusque respondeat. Hanc autem præfecturæ dignitatem summi honoris loco habitam ex Cassiodoro constat, quæ eam præfecturæ urbi proximam facit: Unde & Pompejus magnus hanc sibi delatam dignitatem, non recusavit. Verum senescente imperio Romano, viluisse quoque hoc annonæ curandæ munus tradit Boëtius *de consolatione lib. 3.* Si quis (inquit) quondam populi curasset annonam, magnus habebatur. Nunc ea præfectura quid abjectius? Magistratum tamen non esse inquit Pomponius, proprie scilicet, sumpto magistratuum nomine pro iis, qui ordinariam habent & perpetuam in urbe jus dicendi potestatem. Cæterum non impedit quo minus sint magistratus, scilicet extraordinarii, quemadmodum dictator, & magister equitum, quanquam enim hi erant extraordinarii, attamen inter magistratus relati fuere. Vocantur enim magistratus potestates omnes, qui res humanas, quæ quidem ad rempub. pertinent, publica auctoritate curant Sig. *de antiq. jur. civ. Rom. cap. 20. lib. 1.* quorum quatuor recensentur jura, unum positum in imperando, alterum in jure dicendo, tertium in referendo, quartum in auspicando, magistratus alii majores, alii minores; iterum alii ordinarii, alii extraordinarii, illi centuriatis creabantur comitiis: hi extraordinem in summa reipub. necessitate, vel quando ejus utilitas id postulabat. Vide quæ annotavimus *ad §. 4. h. t.* Præfectum autem annonæ jus dixisse ostendit. *l. 13. ff. de accusat. l. fin. ff. ad l. Jul. de annona.* Ideoque merito præfectura dicitur magistratus. Hinc quoque Onuphrius præfectum annonæ annumerat magistratui minori extraordinario.

dinario. *lib. 2. de civit. Rom.* Idem dicendum de Præfecto vigilum, cui excubiæ urbis commissæ sunt, & incumbit providere, ne incendia fiant, sive delinquatur: hinc omnes inquilinos admonere soliti erant, ne negligentia aliqua incendii casus oriatur *l. 3. §. 4. ff. de offic. Præfect. vig.* Apud vetustiores incendiis arcendis Triumviri præerant, qui ab eo quod excubias agerent, nocturni dicti sunt *l. 1. ff. eod.* Hinc M. Mulvius, Cn. Lollius, L. Sextilius triumviri, quod ad incendium in sacra via ortum extinguendum tardius venerant; a trib. pleb. die dicta ad populum damnati sunt Valer. Max. *lib. 8. cap. 1.* Interveniebant quoque nonnunquam Ædiles & Tribuni plebis *d. l. 1.* Deinde Augustus maluit per se huic rei consuli, quamobrem hunc magistratum instituit. Suet. *in Aug. cap. 30.* Adversus incendia excubias nocturnas commentus est. Dio *lib. 55.* ad annum 759. Quumque eo tempore multa in urbe incendiis essent vastata, libertinos septem locis ad ea curanda constituit, equitem eis præfecit: quos, & si haud diu ad officium gerere pati statuerat; tamen re ipsa expertus utilissimum ac maxime necessarium esse eorum munus, perdurare jussit. Suntque nostra etiam atate nocturni hi custodes, non ex libertinis tantum, sed ex aliis etiam militibus: murosque in urbe tenent, & mercedem publice accipiunt. Nam ut inquit Strabo *lib. 5.* Continentes Romæ substructiones fiunt ab crebras ruinas, incendia, assiduasque venditiones &c. Erant autem septem cohortes præfecti vigilum e libertinis conscriptæ; quos ut annotavit Casaub. *ad d. l. Suet. in August. cap. 30.* alii milites per contemptum vocabant Sparteolos, ut opinor, inquit, a funibus, quorum multus usus in restringendis incendiis: vel a Sparteis tunicis quibus erant amicti. Quemadmodum eos vocat vetus Juvenalis Scholiastes ad hæc verba ex *lib. 5. Sat. 14. vers. 305.*

*Dispositis prædives hamis vigilare cohortem*

*Servorum noctu Licinus jubet,*

ad quæ verba *Dispositis prædives hamis*, per translationem, inquit, disciplina militaris, Sparteoli Romæ, quorum cohortes in  
tute-



tutelam urbis cum hamis & cum aqua vigilias consueverunt curare vicibus. Hamæ Turneb. intelligit de vasibus aquariis rotundioris figuræ, & ventris globosioris, quibus ad incendia restinguenda utebantur. Unde illud Juvenalis interpretatur de homine incendium metuente, & vasa aquaria contra incendium parata habente. lib. 2. cap. 29. Et lib. 19. cap. 23. ad vers. adfert ad eam Columellam. lib. 17. de cucurbita sic loquentem.

— — — Sive globosi

Corporis, atque utero nimium quæ vasta tumescit,  
Ventre leges medio: Sobolem dabit ille capacem  
Narycia picis, aut Actai mellis hymetti,  
Aut habilem lymphis hamulam, Bacchove leganam.

Alii interpretantur de instrumentis, quibus disturbantur ædificia, a similitudine hamorum, sicque usurpatur in l. 3. §. 3. ff. de præfecto vigil. Sciendum est autem, Præfectum vigilum per totam noctem vigilare debere, & coërrare calciatum cum hamis & dolabris. Cato de re Rustica cap. 133. in rusticis instrumentis recenset hamum. In l. 12. §. 21. ff. de instrum. leg. 1. Canales, Harpagones, & Hamos instrumento contineri inquit Ictus. Cognoscebat autem Præfectus vigilum de incendiariis, effractoribus, furibus, raptoribus, receptatoribus l. 3. ff. de Præfecto vigil. nisi si qua tam atrox, tamque famosa persona sit, ut præfecto urbi remittatur. Habuit vero jus fustium, flagellorum, virgarum d. l. 3. & in servos fugitivos l. ult. ff. eod. adversus capsarios quoque, qui mercede servanda in balneis vestimenta suscipiunt, judex est constitutus d. l. 3. §. 5. In servum vero furem jus necis habuisse videre est in l. penult. ff. de condict. caus. dat. aliter in graviora delicta ipse non animadvertibat, ut statim diximus, verum ad præfectum urbi remittebat reum. Hinc in l. unic. Cod. de Præfect. vig. Præfecti vigilum hujus urbis nihil de capitalibus causis sua auctoritate statuere debent: sed si quid ejusmodi evenierit, Culmini tuæ potestatis referre, scil. præfecti urbis, ut ex inscriptione constat, referre, ut de memoratis causis celsiore sententia judicetur.

Quos

*Quos Cistiberis diximus* ] Intelligit quinque viros quos supra dixit cis & ultis Tiberim constitutos fuisse, qui quamvis minores erant magistratus, tamen postea cæperint evehi ad ædilitatem curulem.

---

*S. 34. Ergo ex his omnibus, decem tribuni plebis, consules duo, decem & octo prætores, sex ædiles, in civitate jura reddebant.*

**E***rgo* ] Concludit hic Ictus historiam suam de magistratibus scil. Urbanis Romæ constitutis, & ad sua usque tempora retentis. Quos omnes in civitate jura reddidisse tradit, ejusmodi itaque qui jurisdictionem exercebant, actiones & judicia dabant, eaque omnia faciebant quæ ad jus dicentis officium, quod latissimum est, pertinebat *l. i. ff. de jurisdic.*

**F I N I S.**



G. VANDER MUELEN

I N

HISTORIAM

P O M P O N I I

D E

ORIGINE JURIS,

*Et omnium Magistratum & suc-  
cessionem prudentium, Exer-  
citationes.*

PARS III.



TRAJECTI ad RHENUM,

---

Ex Officina FRANCISCI HALMA, Academiæ  
Typographi, cIdo Idc xciii.

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO

THE UNIVERSITY OF CHICAGO



# PRAEFATIO.

**P**ost originem juris ejusque  
processum, & Magistratu-  
um nomina, eorumque  
dignitatem, potestatem, & Juris-  
dictionem, cognitam & explica-  
tam, Ictus rectum disputandi tra-  
mitem sequens, de auctorum suc-  
cessionem quædam dicere non abs re  
fore judicavit. *Quia* (inquit) *ut*  
*exposuimus per eos, qui juridicundo*  
*præsunt, effectus rei accipitur: quan-*  
*tum est n: jus in civitate esse, nisi sint,*  
*qui jura regere possint. Post deinde*  
*de auctorum successionem dicemus: quod*  
*constare non potest jus, nisi sit aliquis*  
*jurisperitus, per quem possit quotidie*  
*in melius produci. §. 13 h. t.* Civilis  
juris cognitio atque interpre-  
tatio in summo semper honore &  
æstimatione habita fuit, quam-  
obrem apud Romanos viri maximi,

*P R Æ F A T I O.*

doctrina , virtute & genere præstantes, ad hanc excolendam Spartam animum applicuêre , quorum diligentia & summæ eruditioni debemus , quod jus illud, quo hodie utimur, ubi patriæ leges vel consuetudines silent, ex tot Ictorum doctis responsis , interpretationibus , & fori disputationibus collectum & quasi compositum, atque ab iis quotidie in melius productum ad nos pervenerit, quam obrem juris auctores a Pomponio vocantur. Longe diversi ab istis Rabulis forensibus , fori latratoribus & rixatoribus , qui suam juris scientiam tanquam immaturum foetum in forum propellunt , qui ad ravim usque in foro tanquam in foco laurus virens crepitant , alternis jurgiis convitiantur , rixantur, latrant tenso jecore , qui sonitum verborum in-

nem,



P R Æ F A T I O.

nem , nulla scientia , nulla sententia crocitant , quibus,

--- *Immensa cavi spirant mendacia folles ,*

*Conspuiturque sinus.*

Quorum lingue volubilitas inanis, ridenda & puerilis est , conjunctaque cum aliquot legum rubricis, cancellis circumscribitur forensibus. Quos neque judicum reverentia , neque modo agendi & more contineri videmus. Polet: *Hist. for. Rom. lib. 2.* Si ejusmodi blaterones , & ut Gellius inquit , leves , futiles , & importuni locutores , qui nullo rerum pondere innixi, verbis humidis & lapsantibus defluunt , quorum disputationes fori nihil continent quam inania verba , mutua jurgia & convitia, atque vituperandam quandam scurrilitatem , quæ tantum ignominiaæ foro

P R Æ F A T I O.

inurit, quantum eidem adfert decoris honestorum oratorum & patronorum auctoritas. Quod si inquam ejusmodi Rabulæ forenses a foro arcerentur, tot rixarum prælia, tot lites non fererentur inter mortales, quibus tanquam assiduus latratibus excercentur tribunalia; imo quid dicam? non videremus internecivo & immortali odio sese mutuo prosequi, quos arctissimo & tanquam nodo Gordio, generationis & conjugii vinculo sibi invicem devinxit natura. Non difficile mihi esset ejusmodi litium non in foro, sed domesticos intra parietes, parentes inter & liberos, maritum & uxorem creatores & fatores, digito monstrare & dicere HIC est. Illis debemus, quod res forensis, ut idem inquit, *Polet*. ad tantam humilitatem e summo honorum fastigio



P R Æ F A T I O.

gio dejecta fit , ut pauci admodum virtute & genere præstantes, causis agendis in foro operam dent & inserviant. Cum olim , ut inquit Ictus , apud Romanos, imo & apud nos , in tanto honore fuerit juris civilis , id est ejus juris quod quisque populus sibi fecit proprium , cognitio atque scientia , ut plurimi summi & maximi viri semper eam professi fuerint. Qui non tantum jura discentibus sese dabant ; verum etiam consulentibus de quibuscunque rebus respondebant , in foro disputabant & causas orabant , suisque clientibus fideliter & honeste, ut patronum decet , operam suam præstabant. Testatur illud Cic. in *Bruto*. cum inquit , *Ego autem juris civilis studio multum operæ dabam* , *Q. Scævola* , *P. F. qui quanquam nemini se ad do-*

## P R Æ F A T I O.

*cendum dabat, tamen consulentibus respondendo, studiosos audiendi docebat. Et deinde, Alteros respondentes audire sat erat, ut ii, qui docerent, nullum sibi ad eam rem tempus ipsi seponerent, sed eodem tempore & discipulis satisfacerent & consulentibus.*

Quid enim aliud est rem forensem agere? atque eam, quam ex ore præceptoris accepimus juris scientiam, rebus & factis applicare, id est theoriam cum praxi conjungere, Jus scriptum & non scriptum, mores & consuetudines interpretari, unum per alterum explicare, & ex convenientia vel disconvenientia unius cum altero, quod justum est deducere, illationes & argumenta formare, quibus in foro causas agentes, jus quod clientibus suis competere putant, tueantur & adstruant. Habet enim quisque populus & ci-



P R Æ F A T I O.

vitæ, quemadmodum & nostra, jus proprium sibi constitutum, suosque mores & consuetudines, quas sequi solemus in iis, de quibus statuunt atque disponunt: ubi vero silent, locum sibi vindicat jus Romanum, nobisque agendorum norma est, secundum quam res sive jus nostrum vindicamus atque persequimur. E quibus facile perspicimus causarum patronum vel causidicum, non solum juris, in quo versatur, cognitione imbutum, verum etiam juris Romani scientia instructum esse oportere; hæc enim adeo sibi invicem cohærent, ut qui utriusque notitia animum non informaverit, potius causarum 'Ovos, quam patronus dici mereatur. Usus fuit Populus Romanus & jure scripto & non scripto, sive moribus seu consuetudine. Jus

## P R Æ F A T I O.

scriptum tum publicum tum privatum ex ll. xii. tab. tanquam ex fonte suo dimanasse superius annotavimus: non scriptum populi ex tacita & dictis ac factis declarata voluntate derivatur, longa consuetudine introductum & approbatum. Utriusque juris, de quo nobis sermo est, perfectam notitiam atque scientiam habuisse, quos autores juris hic prædicat Pomponius, testantur tot doctissima atque subtilissima eorum responsa, & eruditissima scripta, quorum seriem & Historiam nobis descriptam tradit Ictus, ne ulla unquam vetustas eorum deleret memoriam, qui optime de jure meriti, digni sunt, ut ad posteros transmittantur & nomina illorum & vitæ cujusque instituendæ & agendæ ratio, tanquam exemplum, quod imitandum sibi ob oculos ponerent, & ad quod sese componere quemque juri operam daturum oportet.

G. VAN-



G. VANDER MUELEN

I N

HISTORIAM POMPONII

D E

ORIGINE JURIS,

Et omnium Magistratum & successionem  
prudentium Exercitationes.

---

S. 35. *Juris civilis scientiam plurimi  
& maximi viri professi sunt: sed  
quorum maxima dignationis a-  
pud populum Romanum fuerunt,  
(eorum) in presentia mentio ha-  
benda est, ut appareat, à quibus  
& qualibus hæc jura orta, & tra-  
dita sunt. Et quidem ex omnibus,  
qui scientiam nacti sunt, ante Ti-  
berium Coruncanium publicè pro-  
fessum*

*fessum neminem traditur : ceteri autem ad hunc vel in latenti jus civile retinere cogitabant, solumque consultatoribus vacare potius, quàm discere volentibus se præstabant.*



*Quibus & qualibus hæc jura orta & tradita sunt.* ] Hæc Pomponii verba non ita intelligenda, quasi illi viri, quos Juris civilis scientiam profectos tradit Ictus, juris & legum condendarum potestatem habuissent, quod solius summi imperantis est, verum vel eatenus ortum ab ipsis jus dicitur, quatenus quotidie in melius productum paulatim receptum est, quæ innovatio sive succedanea mutatio videtur quædam nova legumlatio, quæ ad juris peritos tanquam autores & causam proximam hujus innovationis refertur; ideoque ab ipsis quasi orta dicitur: vel pars hic sumitur pro toto, & indigitatur jus, quod sine scripto venit, & auctoritatem sumebat a prudentum solummodo eruditione & dignitate. Verum notandum, quanquam responsa prudentium juris vim obtinuerint, illam tamen non ab auctoribus suis Jurisconsultis, verum ab ipso Cæsare obtinuisse. Augustus enim Cæsar, cum vidisset iis justam deesse auctoritatem, primum edixit, ne quis sola suorum studiorum fretus fiducia, sine Principis permisso de jure responderet. Deinde voluit, ut ii, quibus permetteret, publica & principali donarentur auctoritate.

*Vel in latenti jus civile retinere cogitabant* ] In occulto, penes se, ut olim testatur Liv. lib. 9. abditum fuisse jus civile in Pontificum penetralibus,



§. 36. Fuit autem imprimis peritus Publius Papirius, qui leges regias in unum contulit. Ab hoc Appius Claudius, unus ex decemviris, cujus maximum consilium in duodecim tabulis scribendis fuit. Post hunc Appius Claudius ejusdem generis maximam scientiam habuit: hic Centemmanus appellatus est, Appiam viam stravit, & aquam Claudiam induxit, & de Pyrrho in urbe non recipiendo sententiam tulit: hunc etiam actiones scripsisse traditum est: primum de usurpationibus, qui liber non extat. Idem Appius Claudius, qui videtur ab hoc processisse, R. litteram invenit: ut pro Valesii, Valerii essent, & pro Fusiis Furii.

**F**uit autem imprimis peritus Publius Papirius, qui leges Regias in unum contulit ] De eodem Papirio sermonem habere videtur Pomponius in §. 2. h. r. quam

quamvis eidem Sexti prænomen tribuit: quippe cum nequidem ipsi antiqui auctores de Papirii prænومine inter sese convenerunt, mirum nobis videri non debet Ictum nostrum, qui ex eorum monumentis, suam de juris Romani Historiam composuit, non adeo de eo sibi quoque constituisse. Dionysius & modo Cajum, modo Manium sive Mamium Papyrium vocat. Putat Cujacius P. verius prænomen. Complures ait, libros manu scriptos pro *Sexti*, habere hanc notam præscriptam VI. quæ forte mendum peperit. An idem Pontifex Max. an vero rex sacrificulus fuerit, in incerto quoque. Hottomannus putat eundem hunc nostrum Papyrium fuisse, quem primum regem sacrificiorum creavere, virum quietis amantissimum, ut tradit Dionysius. Verum cum idem autor nostro Papirio prænomen Caji tribuit, quem regem autem fuisse scribit sacrificiorum, Manium appellat, videtur diversus Manius Papirius rex sacrorum primus post exactos reges ab eo, quem leges regias in unum contulisse tradit Ictus noster. Quicquid sit, certum esse videtur nostrum Papirium floruisse Tarquinio Superbo regnante, & sub initio libertatis Romanæ. Eumque post liberatam ab importuna Tarquinii dominatione civitatem, leges regias tam Sanctas quam prophanas, quatenus novæ reipub. formæ conveniebant, in usum publicum deduxit atque uno comprehendit volumine. Quod jus civile Papyrianum appellarunt. Imo quia, ut inquit Ictus noster, §. 2. de suo nihil quicquam adjecit, sed quod leges sine ordine latas in unum composuit. Rævard. lib. 1. cap. 1. de auctoritate prudent. jus Papirianum & Sextum Papisium rectius hic legi posse inquit, quam jus Papirianum, quam Sextum Papyrium, & ut suam sententiam vero consentaneam probet, adducit locum Ciceronis *Epist. ad famil. lib. 4. descriptum*. Ubi ita Papirio Pæto scribit. *Epist. 21. Sed tamen, mi Pæte, quid tibi venit in mentem negare, Papirium quemquam, nisi plebejum fuisse? fuerunt enim patricii minorum gentium,*  
( de



(de quibus ad §. 9. h. t. quædam in chartam coniecimus) quorum princeps L. Papirius Mugillanus, qui consul cum L. Sempronio Atriatino fuit) cum ante censor cum eodem fuisset, annis post Roman conditam CCCXII. Sed tum Papirii dicebantur. Post hunc, XIII. fuerunt sella curuli ante L. Papirium Crasum, qui primum Papirius est vocari desitus. Quemadmodum Valesii & Fusii, postea Valerii & Furii dicti fuere, Quinctil. lib. 1. Nihil autem difficultatis habet, quod Pomponius supra dicto §. 2. tradit, Papyrium illum, qui leges regias variis temporibus latas, in unum corpus compositas divulgavit, vixisse quidem temporibus Superbi regis, atque e principalibus fuisse viris: verum Superbum, cujus ibi mentionem facit, Demarathi Corinthii filium fuisse, & consequenter longe ante exactos reges Papirium nostrum floruisse dicendum, in eo fallit. Ad dictum enim §. 2. errorem Icti nostri demonstravimus, & ostendimus non Superbum, sed Tarquinium Priscum filium Demarathi Corinthii fuisse, ideoque Pomponium errasse in nomine: Verum hunc nodum. dissolvimus dicendo Tarquinium Superbum non quidem fuisse Demarathi Corinthii filium, verum quia a Tarquinio Prisco genitus ejus nepos fuit, & consequenter sub generali verbo filii satis comprehendere potuit juxta l. 84. ff. de V. S. ubi inquit Ictus. Filiorum appellatione omnes liberos intelligi. Ergo & nepotes; quippe quos appellatione liberorum contineri perspicimus ex l. 220. ff. eodem. Vide plura ad dictum §. a nobis annotata. Cui accedit, quod Dionys. Halicarnass. lib. 3. antiquitatum autor diligentissimus, tradit in vita Anci Marci eum commentarios, quos Numa Romanorum rex de sacris conscriptos reliquerat, transcripsisse in tabulas, & in foro proposuisse legendas quibuslibet, quæ tandem (inquit) vetustate sunt abolitæ; nondum enim in usu erant columnæ æræ, sed in quernis tabulis incidebantur tam leges quam sacrorum ritus: quæ tabulæ post exactos reges rursus in publicum usum revocatæ sunt per summum Pontificem C. Papyrium.

*Ab hoc Appius Claudius, unus ex decemviris, cujus maximum consilium in duodecim tabulis scribendis fuit.* ] Claudia familia duplex fuit, patricia & plebeja, nec potentia tamen nec dignitate altera minor, unde Ascon. in Cic. pro Scauro. *Fuerunt due familiae Claudiae: earum, quae Marcellorum appellata est, plebeja: quae Pulchrorum, patricia.* Et ipse Cic. lib. 1. de oratore. *Quid, qua de re inter Marcellos, & Claudios patricos centumviri iudicarunt? cum Marcelli ad liberti filios stirpe, Claudii patricii ejusdem nominis hereditatem, gente ad se rediisse dicerent, nonne in ea causa fuit oratoribus de toto stirpis, ac gentilitatis jure dicendum.* Utrum vero hae familiae, quemadmodum ejusdem nominis, ita quoque ejusdem originis fuerint, non adeo constat.

Notat Torrent *ad Suet. in Tiberio cap. 1.* complures ejusdem nominis, ac fortassis etiam originis familias eodem tempore & patricias & plebejas fuisse. Ut de Cornelia testatur Cicero 2. de legibus. Et de Papiria familia lib. 9. *Epist. 21.* Quod devenire certum erat, cum non tota gens aliqua, verum certa tantum ejus gentis familia vel a plebe transibat ad patricos, vel a patriciis ad plebem. Orta autem est haec nobilis familia ab Regillis Sabinorum oppido, unde apud Tacitum *Annal. 4.* *Post Sabina nobilitas, Attus Clausus, ceteraque Claudiorum effigies, longa ordine spectarentur.* Ab hoc Atto sive Appio Clauso fuit propagata Appiorum familia, qui Regillis Romam recens conditam, cum magna clientum manu commigravit, auctore Tito Tatius consorte Romuli. *Suet. in Tib. cap. 2.* Et *Liv. lib. 2. cap. 16.* *Seditio inter belli pacisque auctores orta in Sabinis, aliquantum inde virium transtulit ad Romanos.* Namque Appius Clausus, cui postea Appio Claudio fuit Roma nomen, cum pacis ipse auctor a turbatoribus belli premeretur, nec par factioni esset, ab Regillo magna clientum manu Romam transfugit. Quod accidit ut tradit *Suet. in Tib. sexto fere post reges exactos anno.* Qui post suum adven-



ventum non civitas tantum data est, verum a patribus inter patres quoque lectus est. Liv. dicto loco. Atque paucis interjectis annis consulatum obtinuit. Deinceps procedente tempore, duodetriginta consulatus, dictaturas quinque, censuras septem, triumphos septem, duas ovationes hæc familia adepta est. Suet. in Tib. d. l. Ex illustri hac familia noster jurisperitus originem ducit, natus ex filio illius Appii Clausi Regillani quod cognomen & illi mansit, viro consulari, homine acri & plebi infesto. Liv. lib. 2. cap. 56. Sux vero familiæ gloriam magis afflixit, quam honestavit. Adolescens autem patri, cui diem dixerant tribuni, ante judicii diem sive inventa sibi morte, sive morbo, supremum diem obeunti, pietatem egregie præstitit. Prolato enim (inquit Dionysius lib. 9.) in forum cadavere filius ejus a tribunis & coff. petiit, ut quod instituto majorum in præstantium virorum funere soleret fieri, sibi quoque concionem de more cogere, & funebrem super patre orationem habere permitterent. Tribuni vero, dum populus adhuc vocaretur a consulibus, obstiterunt, ac denunciarunt adolescenti ut cadaver e foro tolleretur. Non tulit hoc populus, nec dissimulavit hanc injuriam, ut inhonoratum corpus ejiceretur; sed permisit adolescentem patri extremum & moribus receptum honorem persolvere. Sic quoque Liv. lib. 2. cap. 61. Ante tamen quam prædicta dies veniret, morbo moritur, cujus laudationem cum tribuni plebis impedire conarentur, plebs fraudari solenni honore supremum diem tanti viri noluit: & laudationem tam aequis auribus mortui audivit, quam vivi accusationem audiverat, & exequias frequens celebravit. Postea cum anno trecentesimo altero, quam condita Roma erat, iterum civitatis formæ mutandæ plebem cupido cæperat, a consulibus ad decemviros, quemadmodum a regibus ante ad consules, imperium translatus est. Decemviri itaque creati sunt, quorum in numero legum potissimum creandarum causa Appius Claudius, de quo nobis sermo; quia enim in eum

annum consul designatus erat, pro honore ipsi honor reddebatur. Collegis quidem suis æqualis honore, verum potestate longe superior; quippe apud quem, ut tradit Livius, *regimen totius magistratus erat, favore plebis*. Initio Magistratus summa moderatione & æquitate usus est adversum plebem, adeoque novum sibi ingenium induerat, ut plebicola repente omnisque auræ popularis captator evaderet, pro truci sævoque insectatore plebis. Postquam vero decem tabulas legum confecissent decemviri, eæque ingenti hominum expectatione essent propositæ, vulgatur rumor duas deesse tabulas, quibus adjectis, absolvi posset velut corpus omnis Romani juris. Quæ expectatio, cum dies comitiorum appropinquaret, desiderium decemviros creandi iterum fecit. In annum sequentem eandem potestatem & dignitatem rursus obtinuit. Atque tum demum detracta larva, suo vivere ingenio caput, suosque collegas, priusquam inirent magistratus, in suos mores formare, ut omni pro suo nutu & arbitrio administraret. Cum autem natura pronus esset ad vitia, multa crudeliter & libidinose haud obniventibus collegis exequiebatur, cujus argumentum satis erit exemplum intempestivi & scelerati amoris ejus, quo ardens L. Virginii filiam alteri desponsatam stuprare conatus fuit, notasse ad §. 24. *h. t.* ad quem mitto lectorem. Hinc inquit Suet. in *Tib.* multa multorum Claudiorum egregia merita, multa etiam secus in Rempub. admissa. Quorum in numero ponit illud Claudii decemviri detestandum facinus, qui cum legibus scribundis & justitiæ administrandæ præerat, ipsum jus quasi pedibus conculcavit & foedissime violavit, dum conatus est virginem ingenuam per vim, libidinis gratia, in servitutem asserere.

*Post hunc Appius Claudius ejusdem generis maximam scientiam habuit. Hic centimanius appellatus est.* ] Centimanum appellatum putat Antonius Faber in  *suis rationalibus*  ideo, quod plura fecisset in republica ornanda, quam ab



uno homine fieri potuisset crederetur. Sed verius est malè Pomponium eum Centimanum appellare, illud enim cognomen Fabiæ, non Claudiæ gentis proprium fuisse, testis est Livius. Itaque pro *Centimanus Cæcus* potius legendum cum aliis viris doctis arbitror, evincit id ipsum Ictus Ulpianus l. 1. §. 5. ff. de postulando. Appius denique *Claudius Cæcus consiliis publicis intererat, & in Senatu severissimam dixit sententiam de Pyrrhi captivitate.* Hoc eodem nomine eum Suet. in Tib. appellat, cum inquit, *Sed ut præcipua commemorem, Appius Cæcus societatem cum rege Pyrrho, ut parum salubrem iniri dissuasit.* Ita quoque Verr. in Fastis, atque Appianus in Samniticæ Historiæ fragmentis. Crassus primum deinde Cæcus appellatus est. Frontinus de aquaductibus. Censor fuit anno U. C. 441. L. Papirio Cursore 5. & C. Junio Bulbo 2. coss. collega ei datus C. Plautius, vel ut alii volunt L. Claudius, qui venox cognominatus ob inquisitas aquæ venas. Quamquam clara admodum fuit ejus censura ob multa quæ fecit præclara opera, tamen Senatorium amplissimum ordinem fœde inquinavit, allegendo in Senatum libertinorum filios. Suet. in Claud. cap. 24. quam Senatus lectionem infamem & invidiosam vocat Liv. lib. 9. cap. 29. quamobrem collega Appii sese magistratu abdicans, solus cætera perfecit, quo contigit, ut feliciorum ad posteros transmiserit sui memoriam.

*Appiam viam stravit* ] Sic enim Liv. dict. loc. *Memoria tamen felicioris ad posteros nomen Appii quod viam munivit, & aquam in urbem duxit: id est lapidibus stravit.* Ita quoque Cic. pro Cælio. *Appius Claudius pacem Pyrrhi dirimit, aquam adduxit, viam munivit.* Et Pro Milone. *Hoc enim sæpe ab istis dicitur perinde, quasi Appius ille Cæcus viam munierit, non qua populus uteretur, sed ubi impune sui posterii latrocinarentur.* Ab auctore vero Appia denominata est, cujus quoque fit mentio in l. 41. §. 5. ff. de legat. 3. ubi: *Concubina inter cætera his verbis legaverat, fundum in Appia*

*cum villico suo contubernali ejus & filiis dari volo.* Incipit autem a porta Capena, ea latitudine, ut plaustra duo ex adverso sibi occurrentia libere exciperet. Quam viam Cæsar Dictator vel exornavit vel restituit. Commissa dehinc illi Appiæ viæ cura, ingentes prodegit pecunias. Novissime vero Trajanus eam restituit, & Brundisium usque stravit. Marlianus in urbis Romæ Typographia lib. 7. cap. 17.

*Et aquam Claudiam induxit.* ] Quod & Livius testatur loco statim allegato, Anienem nimir. ut videre est apud Plin. cap. 34. de viris illustr. Unde hæc quoque ab auctore aqua Claudia dicta est. Quæ alias Appia vocari solet, fortasse ad differentiam aquæ, quam Claudius Cæsar in urbem induxit. Ait Marlian. lib. 4. cap. 21. Ommum autem primum Appium Claudium ex agro Lucullano arcuato opere deduxisse aquam, ab eodem authore literis traditur. Qui novem solum aquas suo tempore in urbem fluxisse sic commemorat. Nunc autem in urbem influunt Appia, Anio vetus, Martia, Tepula, Julia, Virgo, Alsetina, quæ eadem vocatur Augusta, Claudia, Anio novus.

*Et de Pyrrho in urbe non recipiendo sententiam tulit.* ] De eo Cic. cap. 6. de Senect. Ad Appii Claudii senectutem accedebat etiam, ut Cæcus esset: tamen is cum sententia Senatus inclinaret ad pacem, & fœdus faciendum cum Pyrrho, non dubitavit dicere illa, quæ versibus persecutus est Ennius:

*Quæ vobis mentes, rectæ quæ stare solebant,*

*Ante hac, dementes sese flexere via?*

*cæteraque gravissime: notum enim vobis carmen est: & tamen ipsius Appii extat oratio. Atque hanc egit ille septem & decem annos post alterum consulatum: cum inter duos consulatus anni decem interfuissent, censorque ante consulatum superiorem fuisset. Ex quo intelligitur, Pyrrhi bello grandem sane fuisse: & tamen sic a patribus accepimus. Sic quoque in Bruto. Possumus Appium Claudium suspicari disertum; quia Senatum jam jam inclinatum a Pyrrhi pace revocaverit.*



rit. Et Valer: Max: cap. 13. lib. 8. tradit Appium jam fessum vivendo, se in Curiam lectica deferri jussisse, ut cum Pyrrho deformem pacem fieri prohiberet. Et Liv. Epitom. 13. memoriæ prodidit, Cyneam legatum a Pyrrho ad Senatum missum, petiisse, ut componendæ pacis causa rex in urbem reciperetur, de qua re cum ad frequentiore Senatum referri placuisset, Ap. Claudium, qui propter invaletudinem oculorum, jam diu a publicis consiliis abstinerat, venisse in curiam & sententia sua tenuisse, ut id Pyrrho negaretur. Unde Ovid. in 6. Fast.

*Appius est auctor: Pyrrho qui pace negata,*

*Multum animo vidit; lumine captus erat.*

Ulpianus Ictus in l. 1. §. 5. inquit Appium Claudium Cæcum cum consiliis publicis intererat, in Senatu severissimam dixisse sententiam de Pyrrhi captivis.

*Hunc etiam actiones scripsisse traditum est, primum de usurpationibus, qui liber non extat*]. Scil: libellum illum composuisse de actionibus legitimis, quem Enæum Flavium scribam ejus surripuisse & populo dedisse supra ad §. 7. annotavimus, a quo dictum jus Flavianum, quod multo justius Appianum vel Claudianum dici debuisset. Fab. in Rational. ad h. t. Præterea de usurpationibus scripsisse eum refert Pomponius, verum hunc librum sua ætate desiderari refert. Est autem usurpatio legis actio, qua usucapio interruptitur. Si enim id quod possideo, necdum tamen usucepi, ab aliquo solenniter usurpetur, sive apprehendatur, is, si ejus rei dominus est, possessionem meam sua usurpatione interruptit: Nulla enim usucapio procedit, ubi continuatio possessionis deest, atqui usurpatio est possessionis interruptio, ergo usucapionem impedit, quia continuationem possessionis tollit. Scribit Cic. pro Cecinna. *Legem in l. XII. tab. jubere usum & auctoritatem fundi esse biennii.* Idem in Topicis scribit, ex eadem lege *usum & auctoritatem fundi esse biennii: ceterarum rerum usum esse annum.* Ex quibus

perspicimus duo ea lege contineri, sine quibus nulla procedat usucapio, scil. possessio, quam usum vocat Cicero, & tempus: & quidem ejusmodi possessio, quæ continua est non interrupta, nulla interveniente usurpatione. Ita enim Icti notant, *usurpare* in legibus non *uti*, in quo sensu apud oratores occurrit, verum idem esse, quod alterius possessionem interrompere, suamque retinere & confirmare. Hinc Paulus in l. 2. ff. de usurpation. *Usurpation est usucapionis interruptio. Oratores autem usurpationem frequentem usum vocant.*

Idem Appius Claudius, qui videtur ab hoc processisse R. litteram invenit: ut pro Valesii, Valerii essent, & pro Fusii Furii ] Videtur hic locus quodammodo corruptus; Quippe videntur ea verba ab hoc processisse ad tertium aliquem Appium pertinere, qui a secundo processit, & tamen eundem esse ait Ictus: verum quid sibi velit Pomponius mihi non constat. Alii, qui Appio Cæco hanc literæ mutationem tribui non posse sibi persuadunt, pro Idem, Item, vel inde legunt. Paulo ante ex Epistola Ciceronis ad famul. annotavimus L. Papium Crassum, primum Papium vocatum fuisse. Unde Varro: de ling. Lat. lib. 6. In multis (inquit) verbis, in quo antiqui dicebant S. postea dixerunt R. ut in carmine S, aliorum sunt hæc Cosaulæ, dolosi, eso. Sic Arbosem pro arbore antiqui dicebant & robore pro robore. Fest. lib. 1. Sic Asa, Nesvo, Casmen, pro Ara, Nervo, Carmen. Sic Fenose unciasio, pro fœnore unciario: Arafit, vocasit, secuesit, pro Ararit, Vocarit, Secuerit. Lipsius de vetere scriptura. Et Quintil. l. 1. c. 4. Nam (ait) Valesii & Fusii, in Valerios Furiosque venerunt, ita arbos; labos, vapos etiam, & clamios ac lasēs atatis fuerunt. Ad hanc scripturæ mutationem alluisse videtur Martialis lib. 6. Epigram: 17.

Cui nam, Cinname, te jubes vocari;  
Non est hic, pogo, Cinna, Barbarissimus:  
Tu si Furius ante dictus esset,  
Fur ista ratione dicereris.



S. 37. Fuit post eos maxima scientia Sempronius, quem populus Romanus σοφὸν id est sapientem appellavit: nec quisquam ante hunc, aut post hunc hoc nomine cognominatus est. Gajus Scipio Nafica, qui optimus à senatu appellatus est: cui etiam publice domus in sacra via data est, quo facilius consuli posset. Deinde Quintus Mucius, qui ad Carthagenienses missus legatus, cum essent duæ tesserae posita, una pacis, altera belli, arbitrio sibi dato, utram vellet referret Romam, utramque sustulit, Et ait Carthagenienses petere debere, utram mallent accipere.

**F**uit post eos maxima scientia Sempronius, quem populus Romanus σοφὸν id est sapientem appellavit: nec quisquam ante hunc aut post hunc hoc nomine cognominatus est. ] Vixit hic P. Sempronius non post Appium, ve-

rum eodem tempore, quo Appius censura fungebatur. Genere plebejus, unde cum Tribunus plebis esset creatus, sensit eum Appius acrem adversarium; vehementer enim contra finiendæ intra legitimum tempus censuræ actionem suscepit ex lege Æmilia, non popularem magis quam justam. Extat gravissima & acerbissima ejus in Appium oratio apud Liv. l. 9. c. 34. Postea & ipse consulatum obtinuit anno V. C. 449. ut ex Fastis consularibus perspiciamus, vid. Liv. l. 9. c. 45. Primus e plebe Pontifex creatus fuit, & paulo post censuram quoque obtinuit Liv. lib. 10. cap. 9. neque post hosce gestos summos honores, præturam aspernatus est. Eum σοφὸν id est sapientem Populum Romanum appellasse tradit Ictus, propter summam, qua præditus erat, sapientiam sive juris prudentiam, ea enim nihil nisi civilis sapientia est l. 1. §. 5. ff. de extra-ord. cognit. Sane Justinianus, quos prudentes dicimus, Σοφῆς Græce vocat. Quod cognomen ipsi soli tantum dederunt, ita ut post eum nec ante quisquam hoc nomine cognominatus sit: Nec obstat quod paulo infra Pomponius testatur Publium Attilium primum a populo sapientem id est σοφὸν appellatum fuisse, & consequenter plures fuisse, cui hoc cognomen a populo Romano dictum. Quippe etiamsi in sua σοφῆς id est sapientem significat, attamen nominis sono a se invicem differunt, & major dignitas Græca quam latina sapientis appellatione contineri videtur. Unde nunquam Attilius σοφῆς, neque Sempronius sapiens dictus fuit. Videtur hoc cognomen hujus familiæ fuisse proprium; Unde M. Sempronii Sophi fit mentio apud Liv. Epitom. 18. hujus proculdubio filius. Quæ familiarum nomina sicuti & locorum quacunque lingua retinentur sæpissime, nec per interpretationem in aliam linguam transfunduntur. Inter Romanæ severitatis exempla eundem ponit Valer. Max. l. 6. c. 3. n. 12, eo quod conjugem repudiaverit, quia ignorante se ludos spectaverat. *Jungendus* (inquit) *est his P. Sempronius Sophus, qui conjugem*  
*repudiavit*



repudii nota affectit, nihil aliud quam se ignorante ludos ausum spectare. Cujusmodi repudii causam interjecto tempore ab Impero. Theodosiano & Justiniano approbatam videmus. in l. 8. §. 3. Cod. de repud. ubi prohibetur, ne quis alio modo jugalem suam expellat, nisi adulteram vel veneticam &c. vel ipsi invito sine justa & probabili causa foris scilicet pernoctaverit, vel circensibus, vel theatralibus ludis, vel arenarum spectaculis, in ipsis locis, in quibus hæc adsolent celebrari, marito prohibente vel ignorante interfuerit. Tunc enim inquit Imperator, necessario concedendi permittimus facultatem, & causas diffidii legibus comprobare.

Gajus Scipio Nasica. ] Errat hic Pomponius in prænomine, non Gajus enim, verum P. Scipio Nasica dictus fuit. Ortus Patre Cn. Scipione Calvo, qui consul cum Marcello fuit; atque in Hispania cum fratre P. Scipione, Africani patre Punicis insidiis interemptus est. Quapropter Livius fratres patruales hunc & Africanum vocat.

Qui Optimus a Senatu appellatus est. ] Sic quoque Plin. lib. 7. c. 34. Vir optimus (inquit) semel a condito ævo judicatus est Scipio Nasica, a jurato Senatu. Et Liv. lib. 29. cap. 14. P. Scipionem, Cn. filium, ejus qui in Hispania ceciderat, adolescentem nondum quæstorium, judicaverunt in tota civitate virum optimum esse. Idemque testatur Solinus cap. 7. Vir Optimus Nasica Scipio judicatus est, non privato tantum testimonio, sed totius Senatus sacramento. Cum bello Punico secundo, a decemviris librorum Sybillinorum carmen inter Sybillina esset inventum, fore ut hostes ex Italia pellerentur, si mater Idæa Pessinunte, civitate Phrygiæ Romam advecta esset: legati itaque ad Regem Attalum missi, qui ea tempestate ibi regnabat, ut senatus populi que nomine Deam ab eo peterent. In via legatis Delphicum Apollinem consulentibus, ecquid spei habere possent de impetranda matre a Rege Attalo, responsum ab oraculo traditum, impetraturos se a Rege quod peterent,

rent, modo curarent, cum Deam Romam attullissent; ut a viro optimo totius civitatis acciperetur. Cum igitur legati impetrassent quod petissent, Deam Romam apportari eamque Tarracinæ jam esse, recens nuncius adesset, haud parvæ rei iudicium Senatum tenebat, qui vir optimus in civitate esset, P. Scipionem adolescentem nondum quæstorium, judicaverunt virum in tota civitate optimum esse: itaque cum omnibus matronis Ostium obviam ire Deæ iussus est: isque eam de nave accipere, & in terram elatam tradere ferendam matronis.. Idem testatur Valer. lib. 8. cap. 25. Cum (inquit) *Rarum specimen honoris a Scipione quoque Nasica oboriur: Ejus namque manibus & penatibus nondum quæstorii, Senatus Pythii Apollinis monitu, Pessinunte accersitam Deam excipi voluit: quia eodem oraculo præceptum erat, ut hæc ministeria Matri Deum a Sanctissimo viro præstarentur.* Et Cic. de Haruspicum responsis. *Sacra ista nostri majores adscita ex Phrygia Roma collocarunt: quæ vir is accepit, qui est optimus a P. R. iudicatus P. Scipio, foemina autem, quæ matronarum castissima putabatur Q. Claudia.* Hinc apud Ovid. lib. 4. Fast. vers. 260.

*Mater abest; Matrem jubeo, Romane requiras.*

*Cum veniet, casta est accipienda manu.*

Et vers. 347.

*Nasica accepit: templi tunc extitit auctor.*

*Augustus nunc est: ante Metellus erat.*

Pluraque ibi Poëta. Prætor creatus anno 559. & Hispaniam ulteriorem sortitus trans Iberum multa secunda prælia fecit, quo terrore non minus quinquaginta oppida ad eum defecerunt, adeo ut Hispaniam citeriorem quoque, ne tota rebellaret, suspensam tenuerit. Idem mox Proprætor Lusitanos pervastata ulteriori provincia cum ingenti præda domum redeuntes, in ipso itinere aggressus est, cum diu incerto eventu pugnatum erat, in eo discrimine constitutus, vovit ludos Jovi, si fudisset cecidissetque hostes:

tan-



tandem gradum acrius intulere Romani , cessitque Lusitanus , deinde prorsus terga dedit : & cum institissent fugientibus victores , ad duodecim millia hostium sunt cæsa ; capti quingenti quadraginta , omnesque ferme equites , & signa militaria capta centum triginta quatuor. Liv. lib. 35. in princip. Quibus rebus feliciter gestis Romam reversus , in maximo consulatus ambitu , competitor ex Patriciis L. Quintio Flaminio , & C. Manlio Volpone in campum descendit , verum repulsam tulit , Quamquam tantum præjudicium Senatus pro se haberet , quo optimus in civitate vir judicatus erat , qui matrem Idæam Pessinunte venientem in urbem acciperet , obtinere tamen non potuit ut competitori præferretur ; Quamvis ducebat eum Africanus , quamvis idem comitia habebat. Liv. l. 35. c. 10. Insequentem tamen annum V. C. 562. Consulatum obtinuit , cæterisque competitoribus prælatus est , ut testatur Liv. lib. 35. cap. 24. ubi inquit *Eo quoque anno magna ambitio fuit : quod patricii tres in unum locum petierunt. P. Cornelius Cn. F. Scipio , qui priore anno repulsam tulerat : & L. Cornelius Scipio , & Cn. Manlius Volso. P. Scipioni ut dilatum viro tali non negatum honorem appareret , consulatus datus est.*

*Additus ei de plebe collega M. Acilius Glabrio.]* Consules inito magistratu , patres , priusquam de provinciis agerent , res divinas facere majoribus hostiis jusserunt in omnibus fanis , in quibus lectisternium in majorem partem anni fieri solet , precarique , quod Senatus de novo bello in animo haberet , ut ea res Senatui populoque Romano bene ac feliciter eveniret. Quibus peractis Senatus decrevit , ut consules Italiam & Græciam fortirentur. Cui Italia evenisset Provincia , cum Boiis jussus bellum gerere , Acilioque Græcia , Cornelio Italia evenit. Itaque cum exercitu in Bojos profectus signis cum iis collatis egregie pugnavit. Duo detriginta millia hostium cæsis : captis tribus millibus & quadringentis , magnamque hanc fuisse victoriam

riam apparet , quod & castra capta sint , & Boii post eam pugnam extemplo dediderint sese , & quod supplicatio ejus victoriæ causa decreta ab senatu , victimæ majores cæsa. Quamobrem triumphum egit consul universo consentiente senatu, ne quicquam obtinente tribuno plebis P. Semppronio Blæso. In quo triumpho Gallicis carpentis arma signaque , & spolia omnis generis transvexit , & vasa ænea Gallica : & cum captivis nobilibus equorum quoque captorum gregem traduxit : auri quoque atque argenti infecti factique magna vis fuit. *Liv. lib. 35. cap. 38. & 40.*

*Cui etiam publice domus in sacra via data est , quo facilius consuli posset ]* Sacra via dicta , quia per eam augures ex arce profecti solebant inaugurari , sacraque quotquot mensibus in arcem ferre , secund. *Varr. Sex.* autem Pomp. sacrae ideo obtinuisse nomen tradit , quod in ea foedus iustum sit inter Romulum & Tatium. In hac via Scipioni domum datam tradit Ictus noster , ut eo scil. facilius posset consuli , tanto semper in pretio olim jurisperiti habiti fuere apud Romanos , existimantes maxime interesse Reipub: ut in ea sint prudentes , qui de jure consuli & respondere possent. Quorum domus , ut inquit Cicero , quasi *oraculum totius civitatis est.* Verum non adeo certum est , an iste honos ad nostrum Scipionem , quam ejus filium potius pertineat , propterea quod ea , quæ de Scipionis jurisperitia auctores prædicant , ad hujus , quem autor noster laudat , filium P. Scipionem Nasicam , quem Corculum appellarunt veteres , referenda videantur. Cum is dignior fuit , qui in ordinem Jurisconsultorum referatur. Quod videtur affirmare autor de viris Illustribus , dum ait , *Eloquentia primus , juris scientia consultissimus , ingenio sapientissimus , unde vulgo Corculus dictus.*

*Deinde Quintus Mucius , qui ad &c. ]* Pro Mucio hic reponendum Q. Fabius ; hic enim revera fuit hujus legationis princeps , de eo ita *Gell. lib. 10. cap. 27.* *Quod Q. Fabius imperator Romanus dedit ad Carthagenienses epistolam*



*stolam, ubi scriptum fuit, Po. Ro. misisse ad eos hastam & caduceum signa duo belli ac pacis: ex quibus utrum vellent eligere: quod elegissent, id unum ut esse missum existimarent. Carthagenienses responderunt neutrum sese eligere. Sed posse quia attulissent utrum mallerent relinquere, quod reliquissent, id sibi pro electo futurum. M. Varro autem non hastam ipsam neque ipsum caduceum missa dicit: sed duas testiferas: in quarum altera caduceum, in altera simulacra hastae fuerunt incisa. Q. Fabium hanc suscepisse legationem testatur quoque Liv. lib. 21. cap. 18. Eumque sinu ex toga facto dixisse, hic vobis bellum & pacem portamus: utrum placet sumite. Sub hanc vocem haud minus ferociter, daret utrum vellet, succlamatum, & cum is iterum effuso sinu bellum dare dixisset, accipere se omnes responderunt: & quibus acciperent animis, iisdem se gesturos. Male huic Quinto Fabio adjecisse Rutilium de vitis veterum Jurisconsultorum, cognomen Pamphilum annotavit Guielm. Grotius de vitis Juriscons. lib. 1. cap. 2. fuit quidem in eadem legatione quidam Pamphilus, verum ei Q. Boebius nomen fuit, ut Livius eum appellat, lib. 21. cap. 7. & 18.*

---

*§. 38. Post hos fuit Tiberius Coruncanius, ut dixi, qui primus profiteri coepit: cujus tamen scriptum nullum extat, sed responsa complura & memorabilia ejus fuerunt. Deinde Sextus Aelius, & frater ejus Publius Aelius, & Publius*

blius Atilius , *maximam scientiam in profitendo habuerunt : ut duo Ælii etiam consules fuerint. Attilius autem primus à populo sapiens appellatus est. Sextum Ælium etiam Ennius laudavit & exstat illius liber , qui inscribitur Tripertita , qui liber veluti cunabula juris continet. Tripertita autem dicitur , quoniam lege duodecim tabularum preposita , jungitur interpretatio : dein subiexitur legis actio. Ejusdem esse tres alii libri referuntur , quos tamen quidam negant ejusdem esse. Hos sectatus ad aliquid est Cato. Deinde Marcus Cato princeps Porciæ familiæ , cujus & libri exstant : sed plurimi filii ejus , ex quibus ceteri oriuntur.*

**P**ost hos fuit Tiberius Coruncanius , ut dixi , qui primus profiteri cœpit : cujus tamen scriptum nullum extat , sed respon-



*responsa complura & memorabilia ejus fuerunt.*] Alii Titum eum appellant, sed verius Tiberium ejus prænomen fuisse, cum in vetustis libris scriptum sit TIB. CORRUNCANUS. Tradunt autem Plutarchus & Probus TI. Tiberium significare. Corruccanios autem Camerio oriundos esse testatur Tacitus in oratione Claudii Imperatoris pro civitate Gallorum, ubi inquit, *Neque enim ignoro Julios Alba, Corruccanios Camerio, Porcios Tusculo; Et ne vetera scrutemur, Etruriâ Lucaniaque & omni Italiâ in Senatum accitos.* Cicero quoque municipem fuisse dicit nostrum Corruccanium in *Oratione pro Sylla*: Hinc Tib. Corruccanius Camerinus dictus. Hæc autem familia non admodum illustis fuit, sed obscura, ex qua noster natus, verum virtutis ergo Romæ per omnes honorum gradus evehctus, ipse suam familiam nobilitavit atque illustrem fecit. Anno V. C. 473. consulatum gessit cum P. Valerio Lævino, sub initio belli Tarentini, ut videre est apud Justin. lib. 18. cap. 1. Postea quingentis circiter ab vrbe condita annis primus e plebe Pont. Max. creatus est. Hinc apud Vellej. Paterc. lib. 2. cap. 128. *Antiqui ante primum bellum Punicum adhinc annos CCC. Titum Corruccanium, hominem novum cum aliis honoribus, tum Pontificatu etiam maximo, ad principale extulere fastigium &c.* Hunc autem ex Pontificum commentariis longe plurimum ingenio valuisse ait Cic. in *Bruto*. Atque tanta fuisse sapientia, ut ad eum de omnibus divinis atque humanis rebus referretur scribit 3. de orat. *Hæc (inquit) fuit Tib. Corruccani, hæc proavi generis mei Scipionis, prudentissimi hominis sapientia, qui omnes Pontifices maximi fuerunt, ut ad eos de omnibus divinis atque humanis rebus referretur.* Et in oratione pro Domo, *Prudentissimum Pontificem* eum appellat. Hic autem primus fuit, ut inquit Pomponius, qui publice juris scientiam profiteri cœpit, quæ olim in Pontificum penetralibus abdita erat, latebatque: attamen scriptum nullum reliquit, verum responsa complura

plura & memorabilia ejus fuerunt. Meminit responsi cujusdam Cicero 2. *de ll.* ubi ait placuisse P. Scævola & Coruncanio Pontificibus Maximis, eos qui tantundem capissent, quantum omnes hæredes, sacris alligari. Memorabilia a Paulo Icto memorialia dicuntur, quo nomine & libros quoque reliquit, ut testatur inscriptio l. 144. ff. *de v. s.* Et sic quoque apud Gellium memorialium libri constanter inscribuntur *lib. 6. cap. 7. lib. 5. cap. 6.* Præpositum autem est, quod Pomponius Tib. Coruncanium, post Q. Fabium, & Scipionem Nasicam ponit, cum utroque fuerit multo antiquior, & sexaginta plusquam ante annis susceptam a Fabio ad Carthaginienfes legationem consul fuerit. Verum non accurate admodum Pomponius in recensenda Jurisconsultorum successionem temporis ordinem observat, quod ei condonandum.

*Deinde Sextus Ælius* ] Æliorum gens, quæ, ut inquit Festus, ex multis familiis conficitur, primitus quidem plebeja, verum interjecto tempore illustris fuit: Ita ut principes Romanæ civitatis cum ea matrimonia contrahere non recusarent. Ex qua familia oriundus Sextus Ælius, magnum ei attulit decus & ornamentum: quem maximum oratorem, maximumque jurisconsultum prædicat Tullius in *Bruto*. Cum inquit, *Numeroque eodem fuit Sextus Ælius, juris quidem civilis omnium peritissimus, sed etiam ad dicendum paratus.* De eo quædam annotavimus ad §. 7. *h. t.* quæ hic non repetemus. Consul autem fuit cum Quintio Flaminio, anno ab urbe condita 555. Verum ambo præter ordinem magistratuum coss. creati sunt: Quinctius ex Quæstura multo ante gesta. Sex. Ælius ex Ædilitate Curuli, sic ut neuter Præturam, & ille nec Ædilitatem attigerit, Phig. *Annal. lib. 10.* Ælio Italia, Quinctio Macedonia obtigit. Quorum ille nil memorabile gessit. Sig. in *Fast.* Huic Ælio Cati quoque cognomen adjiciunt, de quo vid. *dict. §. 7.* Multos de jure civili scripsit libros. Hinc *Jus Ælianum d. §.*



Extat præterea, ut inquit Ictus, illius liber, qui inscribitur *tripertita*. Qui liber veluti cunabula juris continet, scilicet prima initia & rudimenta. Tripartita autem dicitur, quoniam in lege XII tabb. præposita jungitur interpretatio, deinde subtexitur legis actio. Hinc *interpretem antiquum* eum vocat Tullius 2. *de ll.* Et Justinianus *juris antiqui conditorem*. l. 1. *cod. de comm. serv. manum*: Licet se non satis intelligere diceret, quid verbum *lessum* in XII tabb. significat. In quibus scriptum. MULIERES GENAS NE RADUNTO, NEVE LESSUM FUNERIS ERGO HABENTO. Suspiciari tamen esse vestimenti aliquod genus funebris. L. vero Ælius ejusdem interpretes, *Lessum* quasi lugubrem ejulationem interpretatus est. Quæ interpretatio vero magis videtur consentanea, quia lex Solonis id ipsum vetat: quam legem decemviri iisdem prope verbis in decimam tabulam coniecisse Cicero autor est. Hinc 2. *Tuscul.* Et hic nimirum est fletus, quem XII. tabb. in funeribus adhiberi noluerunt. Scripsit idem noster & commentaria quædam, quorum Cicero meminit 1. *orat.* ubi inquit. Et in P. Mucii fratris sui libris, & Sex. Ælii commentariis scriptum protulisse. Meminit ejus etiam Celsus in l. 3. §. 1. ff. *de actione empt. & vend.*

Et Frater ejus Publius Ælius, & Publius Attilius, maximam scientiam in profitendo habuerunt] Hi ergo etiam post Coruncanium publicè jus profitebantur, & quidem post eum primi, qui jura discere volentibus sese dabant ultro ac publicè præstabant. Fuit autem P. Ælius non minus juris scientia, quam belli gloria clarus, omnibus in Repub. perfunctus honoribus: quippe primum Ædilis, deinde Prætor creatus est Liv. lib. 29. cap. 38. Deinde M. Servilius dictator comitorum habendorum causa dictus, magistrum equitum P. Ælium dixit. Et eodem habente comitia, creatus est cum Cn. Lentulo consul. Liv. lib. 30. cap. 39. & 40. anno V. C. 552. ut habet Sig. in *Fast. & Phig.*

10. *Annal.* Quo anno bellum Punicum finitum fuit. Sic quoque Plin. *lib. 18. cap. 18.* Et frugibus ostentum semel (quod equidem invenerim) P. Ælio, Cn. Cornelio *coff.* quo anno superatus est Hannibal. Interjecto tempore, cum de agris veterum militum relatum esset, qui ductu Scipionis proconsulis ejusque auspicio in Africa bellum perfecissent, decreverunt patres, ut M. Junius prætor urbis, si ei videretur, decemviros agro Samniti Appuloque, quod ejus publicum populi Romani esset, metiendo dividendoque crearet. Quorum & in numero fuit P. Ælius Pætus. Liv. *lib. 31. cap. 4.* Deinde Narniensium legatis quærentibus, ad numerum sibi colonos non esse, & immistos quosdam non sui generis pro colonis se gerere, earum rerum causa triumvir cum Sex. Ælio fratre & C. Cornelio Lentulo creatus. Liv. *l. 32. c. 2.* Augur postmodum creatus supremum obiit diem, atque in ejus locum suffectus Q. Ælius Pætus ex fratre nepos Liv. *lib. 41. cap. 21.* Cum vero hic P. Ælius frater fuit Sexti, de quo paulo ante, non male a Pomponio hic traditur duos Ælios & quidem fratres consules in Repub. fuisse. Beata autem sane tum Respub. merito dici poterat, in qua fiebant ex prudentibus consules, & non consules antequam prudentes. Fab. *in ration. ad h. t.*

*Attilius autem primus sapiens appellatus est.* ] P. Attilium cum appellavit paulo ante Pomponius: alii reponunt L. Acilium, idque auctoritate Ciceronis in *Lalio* ita scribentis. *Scimus Lucium Acilium apud patres nostros appellatum esse sapientem, quia prudens esse in jure civili putabatur.* Et idem 2. de ll. *Mulieres genas ne radunto, neve lessum funeris ergo habento.* Hoc veteres interpretes, Sex. Ælius & L. Acilius, non satis intelligere se dixerunt. Meminit & Festus Acilii interpretis XII tabb. Hunc primum a populo sapientem nominatum scribit Ictus, non σφόν, ut de Sempronio supra dictum, e quibus perspicimus, hunc locum cum superiore non pugnare.

*Hos adsectatus aliquid est Cato. Deinde Marcus Cato Princeps*



*ceps Porciæ familiae.* ] Hic textus omnium fere consensu ita restituendus, *Hos sectatus ad aliquid est deinde M. Cato, Princeps Porciæ familiae.* Aliter enim sensus horum verborum non constat. Pomponius Lætus de *Jurisperitis* hunc locum ita restituit. *Deinde Cato Porciæ familiae Princeps, Tusculo genitus, cujus libri extant.* Fuit enim hic noster Tusculanus, quod & Cicero testatur 2. de ll. ubi inquit; *Cato cum esset Tusculi natus, in populi Romani civitatem susceptus est: itaque cum ortu Tusculanus esset, civitate Romanus, habuit alteram loci patriam, alteram juris.* Nepos in *Catone.* *Cato ortus municipio Tusculo, adolescentulus, priusquam honoribus operam daret, versatus est in sabinis, quod ibidem pradium a patre relictum habebat.* Et apud Gell. lib. 3. cap. 23. *At Cato Consularis & Censorius, publicis jam privatisque rebus opulentus, villas suas in excultas & rudes, ne tectorio quidem praelitas fuisse dicit ad annum usque ætatis suæ septuagesimum.* Atque ibi postea his verbis utitur: *neque ne mihi, inquit, ædificatio, neque vasum, neque vestimentum ullum est manu preciosum, neque preciosus servus neque ancilla est: si quid est, inquit, quod utar, utor. Si non est egeo, suum cuique per me uti atque frui licet: tum deinde addit: vitio vertunt, quia multa egeo, at ego illis quia nequeunt egere.* Hæc mera veritas Tusculani hominis, egere se multis rebus, & nihil tamen cupere dicentis &c. *Principem Porciæ familiae eum Pomponius vocat: quod & Vellejus confirmat. l. 2. c. 35. Et Solin. cap. 5. Cato Princeps Porciæ gentis, senator optimus, orator optimus, optimus Imperator.* Idem testatur Valer: Max. lib. 3. cap. 2. ubi ait. *Felicior progenie sua superior Cato, a quo Porciæ familiae principia manarunt.* Patre autem Marco non admodum illustri genitus, ob ejus singulare ingenium, & optimas animi dotes, moresque integros a Valerio Flacco Romam ductus, nec diu post Romana civitate donatus est, & omni in ea, ut scribit Tullius de *Senectute*, dignitatis honore sanctus est. Principio, ut testatur Plutarchus, tertio

nomine non Cato, sed Priscus vocabatur. Consequenti tempore Cato ei virtutis nomen extitit. Romani enim eum; in quo multarum rerum usus est, Catonem nominant. Floruit autem circa belli Punici secundi tempora usque ad Punicum bellum tertium; natus post primum Fabii consulatum, itaque anno V. C. 521. Fuit enim Fabius, ut ex fastis constat, consul 520. Annos vero quinque & octoginta natus vitam cum morte commutavit, L. Marcio Censorino & M. Manilio coss. anno V. C. 604. Quæstor fuit P. Cornelio Scipione Africano Consule. Deinde Ædilis factus cum C. Helvio. Quadriennio post Prætor provinciam obtinuit Sardiniam. Consulatum gessit cum L. Valerio Flacco, anno V. C. 558. Consules Provincias sortiti, M. Catoni Hispania, Valerio Italia evenit. M. itaque Cato cum classe & exercitu in Hispaniam profectus, ab emporiis expeditionem incipiens, difficili prelio hostium ad quadraginta milla occidit, castris exiit & agris late populatis, plurimos populos subegit & in deditiorem recepit. Ob quas res feliciter gestas supplicationem in triduum Patres Romæ decreverunt. Itaque ipse consul, ut Nepos tradit, ex Hispania triumphum deportavit. Deinde cum eodem Flacco censor factus, ita severe præfuit ei potestati, ut abs re cognomen nactus fuerit, & appellatus Censorius: nam & in complures nobiles animadvertit, & multas res novas edicto addidit, qua re luxuria reprimeretur, quæ jam tum incipiebat pullulare. Nepos *in vita ejus*. Hinc censor, cum L. Flaminium T. Flaminii fratrem & ante consulem, quod ad arbitrium mulierculæ, cujus amore tenebatur, quendam in Provincia cui præerat, securi percusserat, e Senatu eiecit, ut refert Tullius *de Senect.* quamobrem sibi, populusque Romanus consularem statuam in templo posuit, cum hac inscriptione. **M. CATO MORUM RESTITUTOR** Magnis eum laudibus extollit Liv. lib. 39. cap. 40. ubi inquit, *In hoc viro tanta vis animi ingenique fuit, ut quo-*

*cum-*



cunque loco natus esset, fortunam sibi ipse facturus videretur; nulla ars, neque privata, neque publica rei gerenda, ei defuit. Urbanas rusticasque res pariter callebat. Ad summos honores alios scientia juris, alios eloquentia, alios gloria militaris provexit. Huic versatile ingenium sic pariter ad omnia fuit, ut natum ad id unum diceres, quodcunque ageret: in bello manu fortissimus, multisque insignibus clarus pugnis: idem posteaquam ad magnos honores pervenit, summus imperator, si causa oranda esset, eloquentissimus: Nec is tantum, cujus lingua, vivo eo vigeret, monumentum eloquentiae nullum extet. Et lib. 34. cap. 18. testatur. In consule eam vim animi atque ingenii fuisse, ut omnia maxima minimaque per se adiret atque ageret: nec cogitaret modo imperaretque quæ in rem essent, sed pleraque ipse per se transigeret: nec in quemquam omnium gravius severiusque, quam in semetipsum imperium exerceret: parsimonia & vigiliis & labore cum ultimis militum certaret: nec quicquam in exercitu suo præcipui, præter honorem atque imperium haberet. Nec minus excelluit in juris scientia, ut testatur Cicero 3. de orat. Quid enim (ait) M. Catoni præter hanc politissimam doctrinam transmarinam, atque adventitiam defuit? num quia jus civile didicerat, causas non dicebat? aut, quia poterat dicere, juris scientiam negligebat? at utroque in genere & laboravit & præstitit. Idem de Catone prædicat Quintil: lib. 12. cap. 3. M: Cato cum in dicendo præstantissimus, tum juris fuit idem peritissimus. Et alibi etiam Tullius. Quid ille M. Cato? nonne & eloquentia tanta fuit, quantam illa tempora, atque illa ætas, in hac civitate ferre maximam potuit, & juris civilis omnium peritissimus.

Cujus & libri extant, sed plurimi filii ejus, ex quibus cæteri oriuntur] Ex patre & filio cæteri oriuntur Catones sive Porcii, qui Romæ diu floruerunt. Filii autem superioris nati Catonis patris virtutes & gloriam æmulati, magnam quoque nominis sui famam reliquerunt. Filius enim major natus, quanquam juvenis, plurimos tamen in juris disciplina libros,

tanquam doctrinæ & juris imprimis scientiæ, qua præditus fuit, reliquit egregia specimina & monumenta, quod Gell. testatur *lib. 13. cap. 19.* ubi inquit. Major Catonis filius, qui prætor designatus patre vivo mortuus est, egregios de juris disciplina libros reliquit. Idem quoque Catonianæ regulæ auctorem fuisse admodum verosimile est. Cujus titulus extat in digestis *lib 34. tit. 7.* Catonianæ sententiæ fit mentio *in l. 86. ff. de condit. & demonstr.* vid. quoque *l. 10. §. 1. ff. de Ædilit. Edict. l. 44. §. solut. Matrem* ejusdem observationem de mensis intercalari, ex jure Pontificio petitam perspicimus ex *l. 98. §. 1. ff. de V. O.* Commentariorum juris a Paulo lecto in *l. 4.* citantur libros 15. *§. 1.* ubi inquit. Cato libro quinto decimo scribit &c. Commentariorum juris civilis a Catone compositorum meminit quoque Festus in verbo *Mundus.*

*§. 39. Post hos fuerunt Publius Mucius, & Brutus, & Manilius: qui fundaverunt jus civile, ex his Publius Mucius etiam decem libellos reliquit. Brutus septem: Manilius tres, & extant volumina scripta, Manilii monumenta. illi duo consulares fuerunt: Brutus prætorius; Publius autem Mucius etiam pontifex maximus.*



**P**ost hos fuerunt Publius Mucius ] Scævolarum oriundus illustri familia, in qua complures juris scientia florentissimi extitere, ut non immerito quasi hereditaria ejus gentis existimata sit. Unde Scævola nomen Mucianæ impositum familiæ, scil. a L. Mucii Patricii generis adulescente. Cui Cordo ab initio cognomen fuit. Cum enim ipsi indignum videbatur populum Romanum servientem tum sub regibus esset, nullo bello, nec ab hostibus ullis obsessum esse, liberum eundem populum ab iisdem Etruscis obsideri, quorum sæpe exercitus fuderit, itaque magno audacique facinore eam indignitatem vindicandam ratus, Regem Porfennam per insidias in castris aggredi constituit: abdito itaque intra vestem ferro proficiscitur, atque ubi eo venit, in confertissima turba prope regium tribunal constitit; ibi cum stipendium forte militibus daretur, & scriba cum Rege sedens pari fere ornatu multa ageret, cum milites vulgo adirent, forte fortuna scribam pro rege obtruncat. Cum regii satellites comprehensum ante regis tribunal retraxissent, dextram accenso ad sacrificium foculo injicit, eique postea a clade dextræ manus Scævola cognomentum inditum. Hinc Scævola qui sinistra manu pro dextra utuntur, quos Ulpianus l. 1. ff. de *Ædilitio Edicto* ait non esse morbosos aut vitiosos, præterquam si imbecillitate dextræ validius sinistra utuntur: sed hos non scævas sed mancos dici: sic scæva res dicitur mala quasi sinistra: *κακὸν* enim græce sinistrum dicitur: vulgus scævam & malam rem vocat. Fuit hic noster Scævola filius P. Mucii Scævola consulis anno V. C. 578. Meminit ejus Javolenus in l. 66. ff. *solut. matrim.* Anno V. C. 620. consulatum gessit, cum Calpurnio Pisone, qui Frugi dictus est; qui incidit in illud tempus, quo Gracchus seditiosas agrarias leges animo volvebat, in quem noster Mucius peroravit in Senatu. Eundem Pontificem quoque Maximum fuisse tradit Pomponius. Quod & Cic. testatur 2. de *orat.* Cum inquit, *Ab initio rerum Romanarum usque ad P. Mucium*

*Pont. Max. res omnes singulorum annorum mandabant litteris, quæ consuetudo in ejus Pontificatu abrogata videtur. Et in orat. pro domo, P. Scævola, inquit, Pont. Max. pro collegio respondit, quod in loco Licinia C. F. injussu populi dedicasset, sacrum non videri esse. Fuit etiam & eximius orator: qui valde prudenter & acutè & paulo etiam copiosius loqui, quam ex æqualibus suis multi asserit, Cic. in Bruto. Verum non minus exercitatus in jure civili, ita ut merito eum Pomponius inter clarissimos Jurisconsultos recenseat. Quod legum & consuetudinis qua cives ejus uterentur, ad agendum, cavendum, dicendumque peritus erat. Adeo ut juris civilis fundatorem eum fuisse testetur. Deque eo ita Cic. in 1. de orat. Si, inquit, quaereretur quis nam ictus vere nominaretur, P. Mucium nominarem. Scripsit libros 14. ut videre est ex l. 30. ff. pro Socio. ubi inquit Paulus. Mucius libro quartodecimo scribit, non posse coiri, ut aliam damni, aliam lucri partem socius ferat, Servius in notatis Mucii ait, nec posse societatem ita contrahi. Ex quibus perspicimus Servium in libros P. Mucii notas scripsisse. Ejus quoque meminit Pomponius in l. ult. ff. de legation: tradit Valer. lib. 8. cap. 8. n. 2. eundem nostrum Mucium optime pila luisse, quia videlicet ad hoc diverticulum animum suum forensibus ministeriis fatigatum transferre solebat. Alveo quoque & calculis vacasse interdum, cum bene ac diu jura civium & cæremonias deorum ordinasset. Quod & Cic affirmat de orat. 1. Licet ista ratione dicamus, pila bene & duodecim scrupis ludere proprium esse Jurisconsulti, quoniam utrumque eorum P. Mucius optime fecerit. Male itaque, ut annotavit Guielm. Grot. de vitis Jurisc. lusum pilæ & calculorum Valer. dicto loco Q. Mucio Auguri tribuit.*

*Et Brutus ] Meminit hujus Bruti Cic. lib. 7. Epist. 22. sicuti & Sext: Ælii & M. Manilii, eosque coævos fuisse ex eadem epistola perspicimus. Putat Phigius in annal: ad annum 665, hunc fuisse patrem Bruti, qui Cæsarem inter-*



interficiendo rempub. in pristinam libertatem asserere animum induxerat. Sed aliter sentit Guiel. Grot. Atque hunc ejusque filium diversum putat a Bruto, qui Cæsarem occidit ejusque patre. Propterea quod Cic. in *Bruto*. utriusque mentionem faciens, postea Brutum quoque patrem Tyrannicida, posteriori sæculo inferit, eumque magis boni Senatoris, quam oratoris laude cohonestat, quod in Icti Bruti filium non quadrat. Cui sententiæ quemcumque qui digenter evolverit Ciceronem de *Clar. orator*. subscripturum arbitror. Orator insignis, juris publici privatiq. peritus. Sæpius Cicero eum virum optimum nominat & juris peritissimum de *Clariss. orat.* Iisdem temporibus inquit, M. Brutus, in quo magnum fuit, Brute, dedecus generi vestro, qui cum tanto nomine esset, patremque optimum virum habuisset, & juris peritissimum, accusationem factitaverit ut Athenis Lycurgus. Ex quo perspicimus Heroum filii sæpe noxæ; Hic magistratus non petivit, sed fuit accusator vehemens, & molestus, ut facile cerneret naturale quoddam stirpis bonum degeneravisse vitio depravata voluntatis. Quemadmodum contraria juxta sese posita elufescunt magis, ita quoque quando degenerem filium cum optimo patre comparo, quo hujus virtutes & egregiæ animi dotes magis splendescunt, eo filii depravata indoles, & inquinatus omnibus vitiis animus, quasi in illustri positus theatro, ab omnibus magis conspicitur, & consequenter culpatur. Cum enim opulentæ essent patri possessiones, amplaque prædia; fundos enim tres habebat, Privernatem, Albanum & Tiburtem, & præter hos Balneas. Hæc omnia paterna bona dilapidavit & decoxit filius degener. Hinc illi contumeliarum aculei, quibus L. Crassus in quodam judicio eum oppugnavit, quorum mentio apud Cic. 2. orat. cap. 55. Ubi ita inquit, Cum enim Brutus duos lectores excitasset, & altera de Colonia Narbonensi Crassi orationem legendam dedisset, alteri de lege Servilia, & cum contraria inter sese de repub. capita contulisset, noster hic fa-

*cetissime tres partes Bruti de jure civili libellos tribus legendos dedit: Et libro primo, FORTE EVENIT, UT IN PRIVERNATI ESSEMUS. Brute, testificatur pater se tibi Privernatem fundum reliquisse. Deinde ex libro secundo, IN ALBANO ERAMUS EGO, ET MARCUS FILIUS. Sapiens videlicet homo cum primus nostræ civitatis: norat hunc gurgitem: metuebat, ne, cum is nihil haberet, nihil esse ei relictum putaretur. Tum ex libro tertio, in quo finem scribendi fecit, tot enim, ut audiavi Scævola dicere, sunt veri Bruti libri, IN TIBURTI FORTE ASSEDI-MUS EGO, ET MARCUS FILIUS. Ubi sunt ii fundi, Brute, quos tibi pater publicis commentariis consignatos reliquit? Quod nisi puberem te, inquit, jam haberet, quartum librum composuisset, & se etiam in balneis lotum cum filio, scriptum reliquisset. Quibus lepidis sane faceriis refutatus est a Crasso M. Brutus. Sed ut ad nostrum revertamur. Virum Prætorium appellat Pomponius, quod aliquando præturâ perfunctus fuisset. Quemadmodum vir consularis dicitur, qui aliquando consulatum gessit. l. 1. cod. de dignit. Majores magistratus non obtinuit, fortasse quod ad eos non adspiravit: Quot libros de jure civili reliquit, ex statim citato Ciceronis loco constat: verum tres tantum numerat Cicero, septem autem eum reliquisse libros Pomponius affirmat. Verum hosce auctores conciliat Bertrandus: dicendo Brutum revera tres tantum reliquisse libros, quorum ipse auctor extitit, attamen plures ei tributos, ut colligimus ex Tullii verbis. Cum inquit: Tot enim, ut audiavi Scævola dicere, sunt veri libri Bruti: argumentum quod ea tempestate plures, quam tres ipsum composuisse libros credebatur. Qui error ad posteriora delapsus sæcula, Pomponium fortasse in erroneam hanc opinionem adduxit, Brutum tot scripsisse libros, quot enumerat. Quam tamen conciliationem vir ipse Bertrandus vix admittit, ne eam admittendo Pomponium*



tacite ignorantiae accusaret; quod non facile praesumendum de auctore nostro, propter perfectam ejus eruditionem. Quare potius textum mutare voluit, quam existimare Pomponium vulgarem errorem, Ciceronis & Scævolæ sententiis prætulisse, & hac quidem ratione, ut majorem numerum ad Manilium, minorem ad Brutum referat, & unius dictionis transpositione hoc modo textum restituat, *Sep-tem Manilius, Brutus tres*. Quæ transpositio eo verosimilior videtur, quia ipse Pomponius ait, Manilium *plura volumina composuisse*. Quæ locutio librorum copiam denotat. Bruti nostri Icti meminit Ulpianus l. 27. §. 22. ff. ad L. Aquil. Si mulier, inquit, pugno vel equa ictu a te percussa ejecerit, Brutus ait, *Aquila teneri, quasi rupto*. Et l. 13. ff. de in diem addict. Sic quoque Paulus in l. 3. §. ff. de acquir. vel amitt. posses. ubi ait. *Ceterum quod Brutus & Manilius putant eum, qui fundum longa possessione cepit etiam thesaurum cepisse, quamvis nesciat in fundo esse, non est verum*. Quamvis juris fuit peritissimus, homo tamen erat, ideoque multis quoque erroribus obnoxius.

*Manilius* ] De pronomine & familia hujus Icti non inter se conveniunt scriptores: quidam ex nobilissima Manliorum familia oriundum tradunt. Eumque ex iis fuisse Manliis, qui, post Marcum Manlium Capitolii defensorum perduellionis damnatum, decreverant, ne quis suæ gentis Marcus appellaretur, Guilelm. Grot. de vitis Ictorum cap. 6. lib. 1. Sentiant vero alii hunc nostrum Manilium non ortum fuisse e patricia Manliorum, sed plebeja Manliorum familia. Plebis enim tribunatum gessisse Manlios constat vel ex illo Manilio, cujus legem Cicero prætor suavit, qua Mithridaticum bellum Cn. Pompejo mandabatur. Præterquam, quod auctore Festo in verbo *Manlia*, *Manlia gentis patricia decreto nemo ex ea Marcus appellatur, quod M. Manlius, qui Capitolium a Gallis defenderat, cum regnum affectasset, damnatus necatusque est*. Consulatum gessit anno 604, cum L. Marcio Censorino, juxta Cassiodo-

dorum initio belli Punici tertii, Ita enim Cic. ad *Attic. lib. 12. epist. 5.* Et vide, quæso, *L. Libo*, ille qui de *Ser. Galba*, *Censorinone*, & *Manilio*, an *T. Quintio*, *M. Acilio* *coff. Tribunus plebis fuerit.* Sic quoque in *Bruto cap. 27.* Nam & quæstiones hoc adolescente constitutæ sunt, quæ antea nullæ fuerunt, *C. L. enim Piso*, tribunus plebis legem primus de pecuniis repetundis, *Censorino* & *Manilio Coff. tulit.* Meminit quoque ejus Cic. *lib. 4. Epist. 16. ad Att.*

Exstant volumina scripta, *Manilii monumenta*] Summum fuisse eum Ictum testatur Cic. *1. de orat.* ubi de veris Ictis sermonem habens, in eorum quoque numero Manilium collocat. Atque de ejus auctoritate ita in *3. de orat.* Meminerunt illi *Sext. Ælium*, *M. vero Manilium* nos etiam vidimus transverso ambulante foro: quod erat insigne, eum, quia id faceret, facere civibus omnibus consilii sui copiam, ad quos olim & ita ambulantes, & in solio sedentes domi, sic adibatur: non solum ut de jure civili ad eos, verum etiam de filia collocanda, de fundo emendo, de agro colendo, de omni denique negotio aut officio referretur, &c. Fundatorem Pomponius juris civilis appellat, ejus doctrinæ meminit *Paulus in l. 3. §. 3. ff. de acquir. vel omitt. posse.* Tres libros eum de jure civili reliquisse testatur Pomponius, verum supr. annotavimus septem legendum esse, quam lectionis mutationem tot ejus monumenta, quæ longe prædictum numerum trium librorum superasse verissimum est, sequendam satis affirmant. Composuit præterea quasdam leges de venalibus vendendis Manilianas dictas, quarum quoque mentionem facit Cic. *1. de orat. c. 58.* Nec quisquam inquit est eorum, qui, si jam sit edescendum sibi aliquid, non *Teucrum Pacuvii* malit, quam *Manilianas venalium vendendorum leges ediscere.* Item *Varro de Manilii actionibus lib. 2. cap. 7.* *Emptio*, inquit, *equina* similis fere ac *bo-um*, & *asinorum*, quod eisdem rebus in emptione dominum mutatur; ut in *Manilii actionibus* sunt perscripta.



S. 40. *Ab his profecti sunt Publius Rutilius Rufus, qui Romæ consul, & Asiæ proconsul fuit: Paulus Virginius: & Quintus Tullius Cicero ille Stoicus, Panætii auditor, qui & ipse consul. Etiam Sextus Pompeius Gnaei Pompeii patruus fuit eodem tempore: & Coelius Antipater, qui historias conscripsit: sed plus eloquentia, quam scientia juris operam dedit, etiam Lucius Crassus, frater Publii Mucii, qui Mucianus dictus est, hunc Cicero ait jurisconsultorum disertissimum.*

**P**ublius Rutilius Rufus ] Fuit hic P. Mucii discipulus, quoad juris civilis addiscendam disciplinam. Scribit enim Cic. 2. de off. ejus adolescentiam ad opinionem & innocentiam, & juris scientiam P. Mucii commendasse donum. Philosophus vero fuit Stoicus, in Bruto cap. 30. testatur Cic. eum fuisse virum doctum, Gracisque litteris eruditum, Panætii auditorem, & prope perfectum in Stoicis: quorum peracutum, & artis plenum orationum genus, sed tamen exile, nec satis populari assensionem accommodatum, imitatur. Quam,

Quamobrem inter summos oratores non videtur recensendus : jejunas enim ejus orationes fuisse dicit Cicero, verum de jure multa preclara ejus opera fuere, magnumque munus de jure respondendi sustinebat. Ejus meminit Ulpianus in l. 10. §. 3. ff. de usu & habitat. Ubi inquit. *Utrum autem unius anni sit habitatio, an usque ad vitam, apud veteres quaesitum est? & Rutilius donec vivat, habitationem competere ait: quam sententiam & Celsus probat libro octavo decimo digestorum.* Vide & l. 3. §. 9. ff. de penu legat. Sic quoque in l. 1. §. 2. ff. de arbor. cadend. *Si arbor adibus alienis impendeat, utrum totam arborem jubeat Prætor adimi, an vero id solum, quod super excurrit, queritur?* Et Rutilius ait, *a stirpe excidendam, idque plerisque videtur verum.* Variæ in eum fuere collocatæ in Repub. dignitates; Quæstura, Prætura & consulatus. Imo & tribunus militaris fuit sub Scipione, testante Appiano. de bellis Hispan. cap. 305. Scipio, inquit, Rutilio Rufo, tum tribuno militum (qui etiam harum rerum historiam edidit) imperat, ut assumptis quatuor equitum turmis, hostium impetum propulset. Quæstor fuit Quintii Prætoris in Asia, ut refert Asconius Pædian. in divinat. Præturam eum gessisse docet Ulpianus in l. 1. §. 1. ff. de bon. libert. ubi inquit, *Et quidem prius Prætor Rutilius dixit &c.* Consulatum obtinuit anno V. C. 648. Postquam jam ante repulsam passus fuerat, competitorem habens Æmilium, quem sibi prælatum adeo ægre tulit, ut eum in judicium vocaret, at ille absolutus, ambitus adversarium accusavit, in quo judicio accidisse tradit Cic. ut Scaurus accusator ostenderet in Rutilii tabulis litteras. A. F. P. R. dicere actum fide Rutilii; Rutilius autem: ante factum, post relatum: C. Cannius æques Rom. cum Rufo adesset, exclamat neutrum illis litteris declarari: Quid ergo inquit Scaurus? Æmilius fecit, plectitur Rutilius. Cic. 2. de orat. lib. 2. Quamvis autem hic esset vir optimus & innocentissimus, ita ut nemo Cicerone testante, neque integrior, neque sanctior esset in civitate, tamen



men adversariorum calumniis oppressus est : summa enim ejus integritas atque innocentia damnationis exiliique sui causa fuit. De eo enim ita Liv. *Epitom.* 70. P. Rutilius vir summæ innocentiae, quoniam legatus C. Mucii proconsulis a publicanorum injuriis Asiam defenderat, invisus equestri ordini, penes quem judicia erant, repetundarum damnatus, in exilium missus est. Et Flor. l. 3. c. 17. Senatus, exilio Metelli, damnatione Rutili, debilitatus, omne decus majestatis amiserat. Et apud Vellej. lib. 2. P. Rutilium virum non sæculi sui sed omnis ævi optimum, interrogatum lege repetundarum, maximo cum gemitu civitatis damnaverunt.

Verum intergritate & virtute sua adeo sibi conciliaverat Asiæ populos, ut ipsi Asiam petenti omnes provinciæ illius civitates legatos secessum ejus operientes obviam miserunt. Exulare aliquis hoc loco, an triumphare justius dixerit : Valer. lib. 2. cap. 10. Eum autem Smyrnæos sibi civem addidisse tradit Tacit. 4. *Annal.* cap. 43. Atque cum ei Syllana victoria reditus in patriam offerretur, maluit, nequid contra leges faceret, in exilio remanere, quam ad suos revertere lares. Valer. lib. 6. cap. 4. Quamobrem Ovid. *De Ponto* lib. 1. eleg. 3.

*Et grave magnanimi robur mirare Rutili,*

*Non usi reditus conditione dati.*

*Smyrna virum tenuit, non Pontus & hostica tellus;*

Ab amico consolatus, quod brevi ad penates suos rediret, Quid tibi, inquit, malè feci, ut mihi pejorem reditum, quam exitum optares, malo ut patria exilio meo erubescat, quam reditu mereat. Librorum, quos reliquit meminit Athenæus, eumque refert historiam rerum Romanarum scripsisse in lib. 6. *Δειπνοσοφιστῶν*, cap. ult. & Vell. in lib. 2. cap. 2. Scripsit & de vita sua libros aliquot, composuit & orationes quasdam, inter quas, de modo *edificiorum*, quam recitasse senatui & populo Augustum tradit Suet. in *ejus vita* cap. 89. Eum scil. in finem, ut luxus inhiberetur, & incendia amoverentur. Hinc Strabo. lib. 5. dicit consti-

tu,

tutum fuisse ab Augusto, nequis ædes altius quam septuaginta pedes tolleretur. Quam altitudinem ad 60. pedes reduxit Trajanus Imperator teste Aurel. Victor. in *Epitom.* ubi ait. *Quibus omnibus Trajanus per exquisita remedia plurimum opitulatus est; Statuens ne domorum altitudo sexaginta superaret pedes, ob ruinas faciles, & sumptus, si quando alia contingerent, exitiosos.* Hinc Ulpianus in *l. 1. §. 17. ff. de noni oper. nunc.* inquit, *Nuntiamus autem, quia jus aliquod prohibendi habemus, aut si quid contra leges, edictave Principum, quæ ad modum edificiorum facta sunt, fiet.*

*Paulus Virginius* ] Quis nam hic fuit Paulus Virginius non constat. Locum hunc depravatum putat Muretus non absque ratione. Alii pro Paulo Virginio, reponunt Scaurum Vigellium, quem una cum aliis Stoicæ disciplinæ addictum, & cum Panætio vixisse, Cicero tradit 3. *de orat. cap. 21.* *Quid est, inquit, quod aut Sext. Pompejus, aut duo Balbi, aut meus amicus, qui cum Panætio vixit M. Vigellius, de virtute hominum Stoici possint dicere, qua in disputatione ego his debeam, aut vestrum quisquam concedere.* Verum quicquid de hoc disputamus mera divinatio est & conjectura: ideoque ad certiora advertere animum consultius erit & utilius.

*Et Quintus Tubero ille Stoicus* ] Addit Pomponius ille *Stoicus*, ut scil. discerneretur ab aliis, qui ejusdem tuere nominis. Meminit enim Valer. *lib. 4. cap. 9.* *G. Ælii Tuberonis, generis Æmilii Pauli, qui Persam regem vicit & captum in triumphum duxit. De eo quoque Plinius lib. 33. cap. 11. ubi dicit. Hunc Tuberonem, cum legati Ætolorum in consulatu prandentem in scitilibus adissent, missa ab his vasa argentea non accepisse, neque aliud habuisse argenti ad supremum vitæ diem, quam duo pocula, quæ L. Paulus senex, ei ob virtutem devicto Perseo donasset.* Alter Pauli Æmilii nepos de quo nobis jam sermo. Tertius qui filio operam dedit, de quo infra §. 46. Fuit igitur noster L. Pauli



Pauli nepos. Ita enim Cic. in *Bruto* cap. 31. *Et quoniam Stoicorum facta est mentio, Q. Ælius Tubero fuit illo tempore, L. Pauli nepos, nullo in oratorum numero, sed vita severus, & congruens cum ea disciplina, quam colebat: sed ut vita, sic oratione durus, incultus horridus. Itaque honoribus majorum respondere non potuit. Avunculum habuit Africanum minorem, ut testatur quoque Cic. cum inquit cit. loc. Qui quidem in triumphatu judicaverit contra P. Africani, avunculi sui testimonium, vacationem augures, quo minus judiciis operam darent, non habere. Ex hoc Ciceronis loco evincimus errare Pomponium, quod consulem hunc nostrum Tuberonem fuisse tradit: quoniam ait Cicero eum honoribus majorum non potuisse respondere. Eundem anno V. C. 586. Q. Ælium, hujus patrem consulem fuisse in fastis invenimus. Auditorem Panætii (ita enim scribendum, non Panfæ) vocat Pomponius, a quo disciplina Stoica imbutus, eam in omnibus suis actionibus & moribus expressit, atque secundum eam vitam instituit, ita ut merito Pomponius eum *Stoicum* appellet. Quæ durioris vitæ degendæ ratio, cum ea, quam colebat disciplina congruens, ei sine dubio obstitit, quod ad consulatum non fuerit admissus: idque eo verosimilius, quod cum aliquando Prætoriiis comitiis candidatus in campum L. Paulo avo & P. Africano avunculo nixus, descendisset, eandem ob causam repulsa inde notatus abierit. Ita enim Valer. l. 7. cap. 5. n. 1. Q. Ælius Tubero, a Q. Fabio Maximo, epulum populo nomine P. Africani patris sui dante, rogatus ut triclinium sterneret: lectulos Punicanos & pellibus hadinis stravit: & pro argenteis vasis Samia exposuit. Cujus rei deformitate sic omnes offendit, ut cum alioqui vir egregius haberetur, comitiis que Prætoriiis candidatus in campum P. Paulo avo, & P. Africano avunculo nixus descendisset, repulsa inde notatus abierit. Ita quoque Cic. pro Muræna. Fuit eodem ex studio vir eruditus apud patres nostros & honestus homo & nobilis Q. Tubero. Is cum epulum Q. Maximi Africani patris sui*

D

nomine

nomine populo Romano daret. Rogatus est a Maximo, ut triclinium sterneret: cum esset Tubero ejusdem Africani sororis filius: atque ille homo eruditissimus Stoicus stravit pelliculis hædinis lectulos punicanos, & exposuit vasa Samia: quasi vero esset Diogenes Cynicus mortuus, & non divini hominis Africani mors honestaretur. Hujus in morte celebranda graviter tulit populus Rom: hanc perversam sapientiam Tuberonis: itaque homo integerrimus, civis optimus, cum esset L. Pauli nepos, P. Africani, ut dixi, sororis filius, his hædinis pelliculis Prætura dejectus est. Parsimoniam hujus multis locis celebrat Seneca, atque eam nobis imitandam proponit. vid. epist. 95. & 109. Inter juris peritos merito eum recenset Pomponius. Ita enim Agell. lib. 1. cap. 22. M. autem Cicero in libro, qui in scriptus est de jure civili in artem redigendo, verba hæc posuit: Nec vero scientia juris majoribus suis Q. Ælius Tubero defuit, doctrina etiam superfuit. in quo loco, superfuit, significare videtur, supra fuit & præstitit, superavitque majores suos doctrina sua superfluenti, tum & nimis abundanti. Disciplinas enim Tubero Stoicas & dialecticas percalluerat. Summam ejus fuisse in jure auctoritatem videre est in l. 7. ff. de supellect. leg. Meminit ejus quoque Javolenus in l. 77. ff. de contrah. emp. Et Ulpianus l. 13. §. 30. ff. de action. empt. & vend. Quibus ex legibus colligit Bertrandus eum de jure venditionis aliquid scripsisse, quod admodum verisimile est, propter toties allegatam in materia venditionis a jureconsultis ejus sententiam.

*Sextus Pompejus.* ] Hunc Cicero in Bruto ait præstantissimum ingenium contulisse ad summam juris civilis, & ad perfectam Geometriæ, & rerum Stoicarum scientiam. Fratrem habuit Cn. Pompejum Strabonem magni Pompeji patrem, quem consulem fuisse anno V. C. 669. cum L. Porcio Catone in Fastis videre est.

*Et Cælius Antipater.* ] Cic. in Brut. cap. 26. eum ait fuisse, ut illis temporibus, scriptorem luculentum, juris valde peritum, multorum etiam, ut L. Crassi, magister. Eloquent-



quentiæ tamen teste Pomponio majorem, quam juris scientiæ operam dedit. Historias conscripisse multas, verum sine nitore & palæstra; ita enim Cic. de ll. *Fannii autem atate conjunctus Antipater paulo inflavit vehementius, habuitque vires agrestes ille quidem atque horridas, sine nitore & palæstra, sed tamen admonere reliquos potuit, ut accuratius scriberent.* Et alibi. *Calius neque distinxit historiam varietate locorum, neque verborum collocatione, & tractu orationis leni ab æquabili perpolivit illud opus, sed, ut homo neque doctus, neque maxime aptus ad dicendum, sicut potuit dolavit, vicit tamen superiores.* Imperator tamen Adrianus, vetusti generis dicendi studiosus, eum Salustio præferebat, ut testatur Spartianus in Adriano. cap. 16. *Amavit inquit, præterea genus dicendi vetustum, controversias declamavit. Ciceroni Catonem, Virgilio Ennium, Salustio Calium prætulit.* Ex eo multa Gellius, Priscianus, Charisius. Meminit Quintilianus cujusdam Cælii, quem inter oratores recenset, verum an idem ille de quo Pomponius, certo affirmare non auderem. De eo ita, *Multum ingenii in Calio, & ei præcipue in accusando multa urbanitas, dignusque vir, cui & mens melior & vita longior contigisset. Inveni, qui Calium præferrent omnibus; inveni, qui Ciceroni crederent, eum nimia contra se calumnia sanguinem perdidisse. Sed est sancta & gravis oratio, & castigata & frequenter vehemens quoque. Imitator autem est Atticorum, fecitque illi properata mors injuriam, si quid adjecturus, non si quid detracturus fuit.*

*Etiam Lucius Crassus.* ] potius Licinius Crassus. Apud Gell. lib. 1. cap. 13. legimus a Sempronio Asellione, & plerisque aliis historiæ Romanæ scriptoribus traditum, eum quinque habuisse rerum bonorum maxima & præcipua; quod esset ditissimus, quod nobilissimus, quod eloquentissimus, quod Jurisconsultissimus, quod Pontifex Maximus; Maximum quoque oratorem nuncupat eum Cic. in Brut. c. 36. & c. 38. ita de eo differit. *Equidem, quanquam Antonio tantum tribuo, quantum supra dixi, tamen Crasso nihil statuo fieri po-*

tuisse perfectius, erat summa gravitas, erat cum gravitate junctus facetiarum & urbanitatis oratorius, non scurrilis lepos. Latine loquendi accurata, & sine molestia diligens elegantia: in differenda mira explicatio: cum de jure civili, cum de æquo & bono disputaretur, argumentorum & similitudinum copia. Imo in explicanda æquitate nihil eo copiosius. Ita enim multa tum contra scriptum pro æquo & bono dixit, ut hominem acutissimum Q. Scævola, & in jure, in quo illa causa vertebatur, paratissimum, obrueret argumentorum, exemplorumque copia: atque ita tum ab his patronis aequalibus, etiam consularibus, causa illa dicta est, cum uterque ex contraria parte jus civile defenderet, ut & juris peritorum eloquentissimus Scævola putaretur.

Et Paulo infra: Noli, inquam, Brute, existimare, his duobus quidquam fuisse in nostra civitate præstantius. Nam, ut paulo ante dixi, consultorum alterum disertissimum, disertorum alterum consultissimum fuisse, sic in reliquis rebus ita dissimiles erant inter sese, statuere ut tamen non posses utrius te malles similiorum. Crassus erat elegantium parcissimus, Scævola parcorum elegantissimus. Crassus in summa comitate habebat etiam severitatis satis: Scævola multa in severitate de erat tamen comitas. Consularum gessit anno V. C. 658. cum Q. Scævola Cíc. in Brut. cap. 64. cum quo omnes magistratus gessisse præter tribunatum & censuram idem testatur: L. Licinii Crassi oratoris, & Q. Mucii Scævola Pontif. Max. oratoris ac Icti consulum meminit Ascon. Pædian: in Cornel. Hisce consulibus lata est lex Licinia & Mucia de regendis in sua civitate sociis. Cum enim summa cupiditate civitatis Romanæ Italici populi tenerentur, & ob id magna pars eorum pro civibus Romanis se gereret, necessaria lex visa est, ut in suæ quisque civitatis jus redigeretur, verum ea lege ita alienati animi sunt principum Italicorum populorum, ut ea vel maxima causa belli Italici, quod post triennium exortum est, fuerit. Sic quoque 3. off. cap. 11. Nam esse pro cive, qui civis non sit, re-

atum



*Num est non licere : quam tulerunt legem sapientissimi consules , Crassus & Scævola : usu vero urbis prohibere peregrinos , sane in humanum est. Proconsul , cum in Gallia rem bene gessisset , eamque ob causam triumphum postulasset , non impetravit ut tradit Cic. l. 1. de invent. ubi inquit L. Licinio Crasso cos. quosdam in citeriore Gallia , nullo illustri neque certo duce , neque eo nomine , neque eo numero präditos , ut digni essent hostes qui populi Rom. esse dicerentur ; quod tamen excursionibus latrocinii infestam provinciam redderent , consecratus est , & consecit. Romam redit : triumphum ab Senatu postulat. Verum is ipsi denegatus fuit , ut satis manifeste testatur Cic. in orat. contra L. Pison. ubi inquit , Eadem cupiditate vir summo ingenio präditus C. Cotta , nullo certo hoste , flagravat : eorum neuter triumphavit , quod alteri illum honorem collega , alteri mors ademit. Ubi ita Pædianus. Crasso autem collega fuit Q. Scævola Pontifex : qui cum animadverteret , Crasso , propter summam ejus in repub. potentiam ac dignitatem , Senatui in discernendo triumpho gratificari , non dubitavit reipub. magis quam collega habere rationem : ac , ne fieret , S. C. intercessit. Sed idem provinciam , cujus cupiditate plerique etiam boni viri delinquebant , deposuerat , ne sumptui esset arario.*

**S. 41.** *Post hos Quintus Mucius Publii filius , Pontifex maximus jus civile primus constituit , generatim in libros decem & octo redigendo.*

**Q.** *Mucius Publii filius ] De Publio Mucio , cujus hic filius , supra egimus. Avum habuit P. Scævola ,*  
D 3 *qui*

qui consulatum gessit cum M. Lepido anno V. C. 578. ut testantur Cassiodori annales. Fuit autem hic noster juris disciplinâ florentissimus, hinc toties ejus in jure mentio, neque rarior apud Ciceronem. Orator non infacundus. De eo enim ita Cic. 1. de orat. cap. 39. Cum Q. Scavola, æqualis, & collega meus, homo omnium, & disciplina juris civilis eruditissimus, & ingenio, prudentiaque acutissimus, & oratione maximè limatus, atque subtilis, atque ut ego soleo dicere, juris peritorum eloquentissimus, eloquentium jurisperitissimus &c. Vide etiam quæ supr. de Crasso annotavimus. Et in Brut. magnum juris civilis usum apud Scavolam fuisse tradit. Et cap. 44. eod. Nam Scavolæ dicendi elegantiam satis ex iis orationibus, quas reliquit, habemus cognitam. Sic quoque cap. 52. eod. Quare quis ex populo, cum Q. Scavolam pro M. Coponio dicentem audiret in ea causa, de qua ante dixi, quidquam politius, aut elegantius, aut omnino melius aut exspectaret, aut posse fieri putaret? In principio Lælii, sive de amicitia dialogi, eum appellat Romanæ civitatis unum ingenio & justitia præstantissimum. Summæ justitiæ qua præstitit exemplum tradit Cic. 3. off. 15. ubi inquit. Q. quidem Scavola, P. filius, cum postulasset, ut sibi fundus, cujus emptor erat, semel indicaretur, id que venditor ita fecisset, dixit, se pluris æstimare: addidit centum millia. Gell. lib. 1. cap. 9. dicit eum juris scientia celebrem fuisse. Sapientissimum consulem appellat eum Cic. 3. off. cap. 11. eo potissimum quod summus erat juris consultus. Juris enim prudentes sæpissime sapientes dicebantur. Recenset quoque eum inter veteres Juris conditores Gellius lib. 4. cap. 1. quam juris civilis scientiam tanquam gentilem hereditatem accepisse merito Bertrandus ait: cum in ea familia permultos fuisse juris disciplina eruditissimos legimus, de P. Mucio, de M. Mucio augure sæpe sermonem habet Cic. in Bruto, & ubique utriusque summam juris prudentiam prædicat. Hujus enim domum propter mirabilem juris scientiam, qua peditus erat



erat oraculum fuisse totius civitatis testatur Cic. *in Bruto*. Qui tot præclaras possidebat animi dotes, merito in repub. a minoribus ad summos honores, quos jure suo quodammodo sibi vindicare poterat, evectus fuit. Ita ut omnes gesserit magistratus, a Tribunatu initium faciens. Tribunus enim plebis fuit anno post, quo functus eo magistratu erat L. Crassus: eoque in rostris sedente suasit Serviliam legem Crassus: verum de ejus tribunatu nequicquam audisse se scribit Cic. *in Bruto cap. 43*. In omnibus aliis magistratibus collega Crassi fuit, excepta censura; eum enim magistratum neminem unquam Scævolarum petiisse tradit Cic. *eod.* Ædilitate magnificentissima cum L. Crasso functus est, ut videre est apud Cic. *3. off. cap. 16*. Et cum eodem consulatum gessit anno 658. postquam anno V. C. 653. in prætura collegæ fuissent. Deinde Proconsul Asiam provinciam sortitus, *eam tam sancte, tamque fortiter, obtinuit; ut senatus deinceps in eam provinciam ituris magistratibus, exemplum atque formam officii Scævolarum decreto suo proponeret*, teste Valerio *lib. 8. cap. 15*. Quare & ejus provinciæ cives in honorem & memoriam proconsulis, diem festum publicum instituerunt, quem MUCIA appellarunt, ut refert Ascon. Pædian. *in divin. Cic.* Tandem quoque Pontifex Max. creatus est: de quo magistratu dicere ei mos erat, Pontificem neminem bonum esse, nisi qui jus civile cognosset. Cic. *2. de leg.* Quemadmodum universa hujus viri sanctissimi vita, ita quoque mors illustris fuit. Orta enim inter Syllam & Marium contentione, cum Syllæ partibus favere crederetur, instigante Mario filio tum cos. Damasippi Prætoris jussu omnis nobilitas convenit. Obseflaquæ curia, sic de senatu, quasi de carcere qui jugularentur educti. Vell: *lib. 2. cap. 26*. Damasippus prætor Domitium, Scævolarum etiam pontificem maximum & divini humanique juris autorem celeberrimum, velut faventem Syllæ partibus, in Curia Hostilia trucidavit. Tum Scævola fugiens & vestales amplexus aras, in Curia Hostilia

C. Fimbriæ jussu trucidatus est, cadavere in flumen abjecto. Licet Valerius lib. 9. cap. 11. non occisum sed vulneratum solum modo velit; cum inquit, *Non tam atrox est C. Fimbriæ factum & dictum; sed si per se aestimetur, utrumque audacissimum: is egerat, ut Scævola in funere C. Marii jugularetur: quem postquam ex vulnere recreatum comperit, accusare ad populum instituit. Interrogatus deinde quid de eo secus dicturus esset, cui pro sanctitate morum satis digna laudatio reddi non posset: respondit, se objecturum illi, quod parcius corpore telum recepisset. Cicero tamen eum occisum aperte testatur in orat. pro Q. Roscio Amer. ubi inquit, Quo Pop. Rom. nihil vidit indignius nisi ejus viri mortem, quæ tantum potuit, ut omnes cives suos perdiderit & afflixerit, quos quia servare per compositionem volebat, ipse ab iis interemptus est. De interitu hujus magni viri ita canit Lucanus lib. 2. vers. 126.*

*Te quoque neglectum violatæ Scævola dextra  
Ante ipsum penetræ Deæ, semperque calentes  
Mactare focos: parvum sed festâ Senectus  
Sanguinis effudit jugulo, flammisque pepercit.*

De ejus magni viri morte ita August. de civit. Dei lib. 3. cap. 28. *Mucius Scævola Pont. Max. quoniam nihil aliud apud Romanos, nihil templo Vestræ sanctius habebatur, aram ipsam amplexus, occisus est: ignemque illum qui perpetua cura virginum semper ardebat, suo pene sanguine extinxit. Huic Icto plurima juris prudentia Romana accepta ferre debet, quæ singulari commentario complexus est Balduinus, de Juris prudentia Muciana. Ab eo cautio Muciana, cujus passim in jure mentio. l. 79. §. 2. ff. de cond. & demonstr. Qui post Mucianam cautionem legatum accepit, si contra cautionem aliquid fecerit, stipulatione commissâ, etiam fructus, heredi restituit: hoc enim legatarius & in exordio cavere cogitur. Et §. 3. eod. Quamvis usufructus, cum morietur legatarius, inutiliter legetur, tamen cautionis Mucianæ remedium, usufructu quoque sub conditionem alicujus non faciendi locum habet.*

Scri-



Scriptit quoque libros O'P'Ω'N ut constat ex indice Justiniani. Composuit præterea, ut Pomponius affirmat, libros decem & octo, quibus jus civile, quod antea confuse & præpostere, nullaquæ docendi ratione adhibita ab anterioribus in jure civili traditum erat, in artem redegit. Ad quos libros notavit Ictus Pomponius, ut apparet ex inscriptione l. 39. ff. ad L. Aquil. Et lib. 40. ff. de action. empt. & vend. Ad eosdem quoque libros notasse videtur Servius, ut videre est in l. 3. §. 6. ff. de penuleg. Unde apud Gell. lib. 4. cap. 1. Præterea de penu adscribendum putavi, Servium Sulpicium in reprehensis Scavola capitibus scripsisse, Sejo Ælio placuisse non quæ esui tantum & potui forent, sed tus quoque & Careos in penu esse.

---

§. 42. *Mucii audiores fuerunt complures : sed præcipua auctoritatis Aquilius Gallus, Balbus Lucilius, Sextus Papirius, Gajus Juventius, ex quibus Gallum maxima auctoritatis apud populum fuisse Servius dicit : omnes tamen hi à Servio Sulpicio nominantur, alioquin per se eorum scripta non talia exstant, ut ea omnes adpetant : denique nec versantur omnino scripta eorum inter manus hominum,*

*sed Servius libros suos complevit :  
pro cujus scriptura , ipsorum quo-  
memoria habetur.*

**A**quilus Gallus] Cajus Aquilius Gallus eques Roma-  
nus Plin. lib. 7. cap. 1. a Q. Mucio Pontifice Max.  
jus civile didicit : In quo maxime exercitatus fuit ,  
dicit eum Tullius in *Bruto* hominem acutum & exercita-  
tum , qui promptam & paratam in agendo & respondendo  
celeritatem obtinuit , quo contigit , ut apud populum Ro-  
manum maximæ fuerit auctoritatis auctore Pomponio , sum-  
mis laudibus eum prosequitur Cic. in orat. pro *Cacinn.* ubi  
inquit ; Hoc loco per commode accidit , quod non adest is ,  
qui paulo ante affuit , & adesse nobis frequenter in hac causa  
solet , vir ornatissimus C. Aquilius. Nam ipso præsentem , de  
virtute ejus & prudentia timidius dicerem , quod & ipse pu-  
dore quodam afficeretur ex sua laude , & me similis ratio pu-  
doris a præsentis laude tardaret. Cujus auctoritati dictum est  
ab illa causa concedi nimium non oportere. Vereor de tali viro  
ne plus dicam , quam vos aut sentiatis , aut apud vos comme-  
morari velitis. Quapropter hoc dicam , nunquam ejus aucto-  
ritatem nimium valere , cujus prudentiam populus Romanus  
in cavendo , non in decipiendo perspexerit : qui juris civilis  
rationem , nunquam ab æquitate sejunxerit : qui tot annos in  
genium , laborem , fidem suam populo Romano promptam  
expositamque præbuerit : qui ita justus & bonus vir est , ut na-  
tura non disciplina consultus esse videatur : ita peritus ac pru-  
dens , ut ex jure civili non scientia solum quadam , verum  
etiam bonitas nata videatur : cujus tantum est ingenium ita  
prompta fides , ut quicquid inde haurias , purum , liquidum-  
que te haurire sentias. In evolvendis digestorum libris mul-  
ta nobis occurrunt Aquilianæ juris prudentiæ vestigia , ut  
in l. 6. §. 2. ff. si servit. vind. l. 17. §. 6. ff. de action. empt.



*l. 30. §. 40. ff. de legat. 1. Et l. 29. §. 1. ff. de legat. 3. aliisque pluribus locis. Ab eo quoque stipulationes Aquilianæ denominatæ, quarum formulam describit Florentinus in l. 18. §. 1. ff. de acceptil. Et Justinianus in §. 1. inst. quibus mod. toll. oblig. Huic autem juris disciplinæ sustinendæ adeo sese tradidit, ut verosimile est ejus gratia consulatum nunquam petiisse. Cæterum prætura functus est, in qua collegam habuit M. Tullium Ciceronem, quo tempore apud Ciceronem de pecuniis repetundis quærebatur, & de ambitu apud C. Aquilium causa dicebatur. Hinc appellat eum Tullius collegam & familiarum suum. Cic. Pro Cluent. Quid mea de pecuniis repetundis? Quid C. Aquilii, apud quem nunc de ambitus causa dicitur. Et in Topic. Solebat Aquilius collega & familiaris meus, cum de littoribus ageretur, quæ omnia publica esse vultis, quærentibus iis, ad quos id pertinebat, quid esset litus ita desinere, qua fluctus eluderet. Et in 3. offic. cap. 14. Sed quid faceret? nondum Aquilius, collega & familiaris meus, protulerat de dolo malo formulas: in quibus ipsis cum ex eo quæretur, quid esset dolus malus: respondebat, cum esset aliud simulatum, aliud actum. Sic quoque 3. de nat. Deor. Inde everriculum malitiarum omnium, judicium de dolo malo, quod C. Aquillius familiaris noster protulit. Quem dolum idem Aquillius tum teneri putat, cum aliud sit simulatum, aliud actum. Celebre autem est illud æquitatis & justitiæ, quam professus est juris noster verus sacerdos Aquillius, exemplum, quod memoriæ prodidit Valer. lib. 8. cap. 2. ubi inquit, Quod cum C. Visellius Varro gravi morbo correptus, trecenta millia nummum ab Otacilia Laterensi, cum qua commercium libidinis habuerat, expensa ferri sibi passus est; eo consilio, ut si decessisset, ab heredibus eam summam peteret, quam legati genus esse voluit, libidinofam liberalitatem debiti nomine colorando. Evasis deinde Visellius ex illa tempestate adversus vota Otaciliæ. Quæ offensa, quod spem prædæ suæ morte non maturasset; ex amica obsequenti,*

quenti, subito districtam fœnerationem agere capit, nummos petendo; quos ut fronte invereconda, ita inani stipulatione captaverat. De qua re C. Aquilius, vir magnæ auctoritatis, & scientia juris civilis excellens, judex adductus, adhibitis in consilium principibus civitatis, prudentia & religione sua mulierem reppulit. Domum habuit, ut scribit Plinius lib. 17. cap. 1. in colle Viminali omnium consensu multo pulcher-  
rimam ea ætate.

L. Lucilius Balbus.] Meminit hujus Lucilii Balbi Cicero in *Bruto*. cap. 42. ubi eum vocat hominem doctum & eruditum, juris peritissimum considerata tarditate præditum. Cujus sub auspiciis juri civili operam dedit Servius Sulpitius, a quo discipulo maxime videtur illustratus: Errat autem Rutilius quod hunc idem putat, quem Cicero in libris de *natura Deorum* disputantem introducit: qui in Stoica disciplina tantos fecerat progressus, ut cum, excellentibus in eo genere Græcis compareretur. De utroque sermonem habet Cic. ad *Attic.* lib. 8. *epist.* 9. illum majorem, hunc minorem sive juniorem vocat. *Sed hæc omittamus* (inquit) *augemus enim dolorem retractando.* VI. *Kalend. vesperi* Balbus minor. (Cui Cornelius nomen fuit) *ad me venit &c.* & Paulo infra; Balbus quidem major *ad me scribit &c.* Fuit hic patruus minoris; vid. quoque Plin. lib. 5. cap. 5. & Cic. *epist.* 7. lib. 10. *ad famil.*

Sextus Papyrius.] Numeratur quoque a Pomponio Sextus Papyrius inter auditores Q. Mucii, hujus scripta quidem non extant per se, ut inquit noster Ictus; eaque inter manus hominum non versantur, verum ea Servius in libros suos traduxit. Qua ratione Sexti cæterorumque Mucii auditorum, qui in hoc recensentur & memoriam ab obligatione vindicavit.

Cajus Juventius.] Putat Corasius legendum T. Juventius, idque Tullii autoritate. Ejus mentionem facit Cic. in *Bruto*. c. 48. ubi inquit, In eodem genere *causarum multum erat T. Juventius, nimis ille quidem lentus in dicendo, & pene frigidus:*



aus : sed & callidus , & in capiendō adversario versutus , & præterea nec indoctus , & magna cum juris civilis intelligentia. Cujus auditor P. Orbius , meus fere aqualis , in dicendo non minus exercitatus , in jure autem civili non inferior , quam magister fuit.

---

S. 43. Servius cum in causis orandis primum locum , aut pro certo post Marcum Tullium obtineret , traditur ad consulendum Quintum Mucium de re amici sui pervenisse : cumque eum sibi respondisset de jure Servius parum intellexisset , iterum Quintum interrogasse , & à Quinto Mucio responsum esse , nec tamen percepisse : & ita objurgatum esse à Quinto Mucio : namque eum dixisse , turpe esse patricio , & nobili , & causas oranti , jus in quo versaretur ignorare : ea velut contumelia Servius tractatus , operam dedit juri civili : & plurimum eos , de quibus locuti sumus ,

an-

*auduit : institutus à Balbo Lucilio : instructus autem maximè à Gallo Aquilio , qui fuit Cercinæ. Itaque libri complures ejus exstant Cercinæ confecti. Hic cum in legatione periisset , statuam ei populus Romanus pro Rostris posuit : & hodieque exstat pro Rostris Augusti, hujus volumina complura exstant : reliquit autem propè centum & octoginta libros.*

**S**ervius Sulpicius ] Ser. Sulpicius. Q. F. Lemonia, Rufus (tot enim habuit cognomina, ut patet ex Cicerone, Philipp. 9.) ex antiquissima nobilissimaque Romæ Sulpitiorum familia oriundus fuit. Is in prima juventute se totum eloquentiæ exercitationibus, Philosophiæque studiis dedit, in quibus ut majores indies faceret progressus, Rhodum cum Cicerone sese contulit, ita enim Cic. in Brut. cap. 41. Et ego, de me, inquam, dicere nihil est necesse: de Servio autem & tu probe dicis, & ego dicam quod sentio. Non enim facile quem dixerim plus studii, quam illum & ad dicendum, & ad omnes bonarum rerum disciplinas adhibuisse. Nam & in iisdem exercitationibus ineunte ætate fuimus; & postea una Rhodum ille etiam profectus est, quo melior esset & doctior. Votique sui compos factus est, cum, ut inquit Pomponius, in causis orandis primum locum, aut certe post M. Tullium, obtinueret.



nuerit. Verum hac gloria non contentus, cum inde rediit, ad juris disciplinam excolendam applicuit animum, in qua maluit esse primus, quam in eloquentia Ciceroni æqualis. Videtur mihi, inquit Cic. *dict. loc. in secunda arte primus esse maluisse, quam in prima secundus.* Nec fefellit opinionem eventus, quippe longe omnium, non ejusdem modo ætatis, sed eorum etiam, qui fuissent, in jure civili principem esse ei contigit. Ita Cic. in *Bruto. cap. 41.* Hic Brutus, Aintu? inquit, etiam Q. Scævola Servium nostrum anteponis? Sic enim, inquam, Brute, existimo, juris civilis magnum usum & apud Scævolam, & apud multos fuisse: artem in hoc uno: quod nunquam effecisset ipsius juris scientia, nisi eam præterea ei didisset artem, quæ doceret rem universam tribuere in partes, latentem explicare definiendo, obscuram explanare interpretando; ambigua primum videre deinde distinguere, postremo habere regulam, qua vera & falsa judicarentur, & quæ quibus positæ essent, quæque non essent consequentia. Et mox. Recte, inquam, intelligis, sed adjunxit etiam & litterarum scientiam, & loquendi elegantiam, quæ ex scriptis ejus quorum similia nulla sunt, facillime perspicui potest. Et Philipp. 9. Nam reliqua Servii Sulpicii vita multis erit, præclarisque monumentis ad omnem memoriam commendata, semper illius gravitatem, constantiam, fidem, præstantiam, in republica tuenda curam, atque prudentiam, omnium mortalium fama celebrabit. Nec vero filebitur admirabilis quædam & incredibilis, & pene divina ejus in legibus interpretandis, æquitate explicanda, scientia. Omnes, ex omni ætate, qui hac in civitate intelligentiam juris habuerunt, si unum in locum conferantur, cum Servio Sulpicio non sunt comparandi. Juris civilis auctorem, & virum bene literatum vocat eum Gell. lib. 2. cap. 10. Quintilianus juris antistitem appellat lib. XI. cap. 1. *inst. orat.* Objurgationem Q. Mucii causam fuisse refert Pomponius, quæ Servium impulit, ut juri civili daret operam, uti in hoc nostro videre est § ad quam re-

reprehensionem Mucii quidam respexisse volunt Ciceronem in oratore cum inquit , *Quid est turpius , quam legitimarum & civilium controversiarum patrocinia suscipere , cum sit legis & civilis juris ignarus.* Honores multi in eum fuere collati , Quæsturam cum L. Murena petiens obtinuit , provinciamque sortitus est Hostientem non tam gratiosam & illustrem , quam negotiosam & molestam , ut ait Cic. *Pro Muræna.* Deinde Prætor renunciatus , quæstionem peculatus exercuit , ut testatur Cic. *pro Muræna* , ubi præturam Servii describit. *Quid tua fors ? tristis , atrox , quæstio peculatus : ex altera parte lachrymarum & squaloris : ex altera plena catenarum atque judicum. Cogendi iudices , invitati retinendi contra voluntatem. Scriba damnatus , ordo totus alienus , Syllana gratificatio reprehensa : multi viri fortes , & prope pars civitatis offensa est , lites severe æstimata , Cui placet obliviscitur : cui dolet , meminet.* Postremo tu in provinciam ire noluisti. Postea vero Consulatum petens , & L. Murenam competitorem habens , ab eo superatus est , quod adeo ægrè tulit , ut eum ambitus accusaverit , verum defensu a Cicerone , hujus criminis absolutus est. Attamen consulatum obtinuit cum M. Claudio Marcello anno V. C. 702. ut Dio , Cassiodorus , Plutarchus testantur. Et Liv. *Epitom.* 108. *In petitione consulatus M. Cato repulsam tulit , creatis co. Ser. Sulpitio & M. Marcello.* Sic quoque Lentulus in *epist. ad Senatum l. 12. ad famil.* *Fœdere quoque , quod cum his , M. Marcello , Ser. Sulpicio renovatum erat : quo juraverant Rhodii , eosdem hostes se habituros , quos S. P. Q. R.* Anno ante consulatum , turbata jam repub. interrex creatus est , atque sine collega , consulem declaravit Pompejum ad V. Kalend. Martias , ex Senatus sententia.

*Institutus a Balbo Lucilio : Instructus autem maxime a Gallo Aquilio , qui fuit Cercinæ ]* De duobus hisce juris peritis quibus in jure civili usus est Servius , statim egimus , verum opinatur Corasius & Muretus , pro *Cercina* , hic legendum



dum Cecinna, sive Cecina, quia non verosimile est Gal-  
 lum Aquilium, a quo potissimum institutum Servium  
 Pomponius tradit; tam procul Roma abfuisse, ut Cer-  
 cinnam insulam incoletet, qui in litibus Romæ judican-  
 dis perpetuò occupatus erat. Est enim Cercina insula in  
 Africa, teste Mela. *lib. 2. cap. 7. In Africa*, inquit,  
*contra majorem Syrtim Euteletos, contra minoris promonto-*  
*ria, Meminx & Cercina.* Verum errat Corasius, dum Ce-  
 cinnam dicit oppidum in Etruria, & agro Volaterrano,  
 non procul a Pisis, a Cecinna fluvio, qui muros alluit, sic  
 appellatum: nuspiam enim talis oppidi denominatio, neque  
 apud Melam, neque alios Geographos occurrit, quod le-  
 gisse me memini. Legimus apud Plin. de fluvio Cecinna *l. 3.*  
*cap. 4.* Verum oppidi, quod a fluvio denominationem ha-  
 beret, nulla fit mentio, quare nihil mutandum alii censent;  
 idque eo magis, quod jurisconsultus hic bis *Cercina* mentio-  
 nem facit, & hujusmodi repetitio deliberationem præsup-  
 ponat.

Hic cum in legatione periisset ] Cæsare mortuo, cum  
 Mutinæ Decium Brutum obsideret M. Antonius, ut ab in-  
 ceptis desisteret, & ad saniozem rediret mentem, Senatus  
 decrevit, ut tres legati mitterentur ad Antonium, quia  
 desperatis illum consiliis ad pacem & sanitatem revocarent.  
 Quorum in numero fuit Ser. Sulpitius. Qui quamvis illam  
 legationem ob adversam valetudinem potius declinare vo-  
 luisset, attamen amore patriæ eam suscepit. Verum ingra-  
 vescente indies in itinere morbo, priusquam ad Antonium  
 pervenisset, prope castra ejus vitam cum morte commutavit,  
 Quamobrem contendit Cicero *Philipp. 9.* opponente sese  
 Publio Servilio, ut ei statuam pro rostris poneretur.  
*Reddite igitur, inquit, Patres conscripti, ei vitam, cui ade-*  
*mistis, vita enim mortuorum in memoria vivorum est posita.*  
*Perfécite, ut is, quem vos ad mortem inscii misistis, immorta-*  
*litatem habeat a vobis. Cui si statuam in rostris decreto vestro*  
*statueritis, nulla ejus legationem posteritatis in obscurabit oblivio.*

*Statuam ei populus R. pro rostris posuit.* ] Hanc ei statuam non ponendam censuit, ut statim diximus, Publ. Servilius, propterea quod hic honos iis tantum debebatur, qui ferro in legatione essent interfecti, contra vero sentiebat Cicero. Ego, inquit, P. C. sic interpretor sensisse majores nostros, ut causam mortis censuerint, non genus esse querendum. Etenim cui legatio ipsa morti fuisset, ejus monumentum extare voluerunt, ut in bellis periculosis obirent homines legationis munus audacius. Non igitur exempla majorum querenda, sed consilium est eorum, a quo ipsa exempla nata sunt, explicandum. Et in fine, Quas ob res ita censeo. Cum Ser. Sulpicius, Qu. F. Lemonia, Rufus, difficillimo Reip. tempore, gravi periculosoque morbo affectus, auctoritatem Senatus, salutemque reipub. vitæ suæ praposuerit, contraque vim, gravitatemque morbi contenderit, ut ad castra Antonii, quo Senatus eum miserat, perveniret: isque cum jam prope castra venisset, vi morbi oppressus, vitam amiserit in maximo reipub. munere: ejusque mors consentanea vitæ fuerit, sanctissime honestissimeque acta, in qua saepe magno usui reipub. Ser. Sulpicius & privatus & in magistratibus fuerit, cum talis vir ob rempub. in legatione mortem obierit, Senatui placere, Ser. Sulpicio statuam pedestrem aneam in Rostris ex hujus ordinis sententia statui, circumque eam statuam locum gladiatoribus, ludisque liberos, posterosque ejus quaque versus pedes quinque habere, quod is ob remp. mortem obierit, eamque ob causam in basi inscribi: utique C. Pansa, A. Hirnius, consules, alter, ambove, si eis videbitur, quæstoribus urbis imperent, ut eam basim statuamque faciendam, & in Rostris statuendam locent: quantique locaverint, tantam pecuniam redemptori solvendam, attribuendamque curent. &c. De Rostris hic nihil dicemus, cum de iis egimus ad §. 4. h. t.

Hujus volumina complura extant: reliquit autem prope centum & octoginta libris.] Horum complures Cercinæ confectos tradit Pomponius. Imprimis fecit notas ad Q. Mu-



cii Scævola scripta, quarum meminit Paulus in l. 30. ff. pro Socio. Servius, inquit, in notatis Mucii ait, nec posse societatem ita contrahi, &c. Scripsit præterea de dotibus librum singularem, de quo Gell. lib. 4. cap. 4. Sponsalia in ea parte Italia, quæ Latium appellatur, hoc more atque jure solita fieri scripsit Servius Sulpicius in libro, quem scripsit de dotibus. Et Neratius in l. 8. ff. condict. caus. dat. Quod Servius in libro de datibus scribit, &c. Composuit & de Testamentis libros duos, ut ex Gellio perspicimus l. 6. c. 12. Nisi in eo loco malis legere de detestandis sacris, ut putat Scaliger in notis suis ad Festum. Cujus opinionem amplecti nequeo, quia ibi de testamentis sermonem habens Gellius, scil. qua ratione testamentum verbum duplex esse scripserit Ser. Sulpicius, verosimile est hanc Servii sententiam in libris, quos de testamentis composuit, atque ubi de iis specialiter tractavit, invenisse. Propriaque illa testamenti Etymologia, quam ex libris Servii refert Gell. quod est mentis contestatio, ad testamentariam materiam pertinet. Ad Edictum quoque libros duos composuit, quos ad Brutum inscripsit, eos perquam brevissimos fuisse testatur Pomponius in fin. sequent. §. Hinc Ulpianus in l. 5. ff. de inst. act. Nam & Servius libro primo ad Brutum ait &c. Responsa ejus plurima in digestis occurrunt, relata potissimum ab Alphenio & Mela. Præclarum ejus responsum extat in l. 21. ff. de negot. gest. ubi inquit Paulus. Nam & Servius respondit (ut est relatum apud Alphenum libro trigesimo nono Digestorum) cum a Lusitanis tres capti essent, & unus ea conditione missus, uti pecuniam pro tribus adferret, & nisi redisset, ut duo pro eo quoque pecuniam darent,isque reverti nolisset, & ob hanc causam illi pro tertio quoque pecuniam solvissent, Servius respondit æquum esse, Pratorem in eum reddere judicium. Ejus responsum quoque refert Pomponius in l. 57. ff. de leg. 3. Ad leges duodecim tabb. quosdam scripsisse commentarios colligi posse videtur ex l. 237. ff. de verb. Sig.

S. 44. *Ab hoc plurimi profecerunt: ferè tamen hi libros conscripserunt: Alfenus Varus, Gajus, Aulus Ofilius, Titus Cæsius, Aufidius Tucca, Aufidius Namusa, Flavius Priscus, Gajus Atejus, Pacuvius, Labeo Antistius, Labeonis Antistii pater, Cinna, Publicius Gellius. Ex his decem, libros octo conscripserunt, quorum omnes qui fuerunt, libri digesti sunt ab Aufidio Namusa in centum quadraginta libros. Ex his auditoribus plurimum auctoritatis habuit Alfenus Varus, & Aulus Ofilius, ex quibus Varus & consul fuit: Ofilius in equestri ordine perseveravit, is fuit Cæsari familiarissimus: & libros de jure civili plurimos, & qui omnem partem operis fundarent, reliquit: nam de legibus*  
Vi-



Vicesimæ primus conscripsit, de jurisdictione: idem edictum pratoris primus diligenter composuit. nam ante eum Servius duos libros ad Brutum per quam brevissimos ad edictum subscriptos reliquit.

**A** B hac plurimi profecerunt ] Enumerat hic Ictus discipulos, qui juris civilis disciplinam a Servio didicerunt, ejusque sub auspiciis tantos in ea fecerunt progressus, ut omnes fere libros conscripsisse testatur Pomponius, maximum argumentum & prudentiæ, & doctrinæ Servii.

*Alphenus Varus* ] P. Alphenus Varus, Cremonæ natus, dignus ut inter Servii discipulos numeretur, tum propter doctrinam, cum etiam summam auctoritatem, quam sibi paraverat; rerum antiquarum non incuriosus, ut tradit Gell. lib. 6. cap. 5. Diu in natali solo sutrinam exercuit si Acronio antiquo Horatii interpreti fidem habeamus, De eo Horatium cecinisse putant lib. 1. Sat. 3.

— — — *Alphenus vaser omni*

*Abjecto instrumento artis clausaque taberna,*

*Sutor erat; sapiens operis sic optimus omnis.*

*Est opifex, sic rex solus.*

Quia abjecta arte, clausaque taberna Romam se contulit, & Sulpicio Icto operam dedit, tandemque in juris scientia ita excelluit, ut vel consulatum obtinuerit. Anno enim V.C. 754. cum Pub. Vinucio consulatum gessit. Vastrum eum appellat Horatius ob astutiam & sagacitatem & vafritiem, subtilitatemque ad jus interpretandum aptam. Sic Cic. lib. 1. de nat. Deorum. Chrysippus

qui Stoicorum somniorum *vaserrimus* habetur interpret. *Va-*  
fer ut tradunt Grammatici, quasi valde *Afer*, propter in-  
sitam genti Africanæ calliditatem. Hoc quoque nomen  
juri apposuit Horat. lib. 2. Sat. 2.

— — — Nos expulit ille,

*Illum aut nequities, aut Vafri incitia juris.*

*Vasrum* jus dicit, inquit Guliel Grot. quia magna ejus pars  
tunc temporis in cautionibus & formulis consistebat, quas  
qui optime callebat, sæpe superior erat adversario. Scripsit  
digestorum libros quadraginta, ut ex indice Justiniano  
perspicimus, libri trigesimali quarti meminit Gell. lib. 6.  
cap. 5. Et Paulus l. 21. ff. de negot. gest. Hos libros Pau-  
lus in epitomen redegisse perspicimus ex inscriptione l. 30.  
& 31. ff. locat. & l. 44. ff. de evict. cujus inscriptio, *Al-*  
*phenus libro secundo digestorum a Paulo Epitomatorum. l. 45.*  
*ff. eod.* Præterea constat eum quoque scripsisse collecta-  
neorum sive conjectaneorum libros quatuor, Gell. lib. 6.  
cap. 5.

C. Aulus Ofilius ] Libenter eorum opinioni subscribo,  
qui Cajum prænomen Ofilii esse asseverant, expuncta vir-  
gula, quæ post Cajum ponitur, idque eo magis, quod nu-  
merus denarius sibi non constaret, si quis Cajum hoc loco  
in jurisconsultorum numero habendum existimaret. Fuit  
hic noster C. Aulus Ofilius equestris dignitatis, Servii Sul-  
picii auditor, a quo jus civile didicit, atque vivente adhuc  
Servio summam auctoritatem habuit in respondendo,  
adeo ut litigantes eum juxta Servium consularent, ut col-  
ligimus ex Cic. ad fam. lib. 7. epist. 21. ubi inquit, *Silii*  
*causam te docui, is postea fuit apud me, cum ei dicerem, tibi*  
*videri sponsonem illam nos sine periculo facere posse, si bo-*  
*norum Turpilie possessionem, Q. Capius Prætor ex edicto suo*  
*mibi dedit, negare ajebat Servium, tabulas testamenti esse eas*  
*quas instituisset is, qui factionem testamenti non habuerit; hoc*  
*idem Ofilium dicere, tecum se locutum negabat: meque roga-*  
*vit, ut se & causam suam tibi commendarem.* Vixit autem

Osta-



Octavii Cæsaris imperio, cui familiarissimus fuit, quo tempore & floruit Trebatius, qui quamvis juris peritissimus, eo tamen Osilius doctiorem fuisse tradit Pomponius, §. 45. Reliquit libros de jure civili plurimos, qui omnem partem operis fundarent, de legibus vicesima, de jurisdictione, ad Edictum Prætoris, ut patet ex l. 1. ff. ne quis eum qui in jus voc. ad quod eum diligenter scripsisse notat Pomponius. Nam ante eum Servius duos libros ad Brutum per quam brevissimos ad edictum subscriptos ediderat. Præterea libros actionum reliquit ad minimum sexdecim, quippe sexti decimi fit mentio in l. 3. §. 5. & 8. ff. de penu leg. & juris partiti libros quinque, ut videre est in l. 55. §. 1. ff. de legat. 3. Ad Atticum quoque scripsisse colligimus ex lib. 234. §. 2. de verb. sig. pariterque ex eo perspicimus eum in proprietate verborum indaganda admodum occupatum fuisse. Hujus uxor fuit Clodia, quam Plin. lib. 7. c. 48. refert vixisse 115 annos, & quindecies enixam fuisse.

Titus Cæsius ] De hoc jurisconsulto nihil certi affirmari potest, ignotus enim plane; refert inter oratores Marc. & Sext. Cæsios Tullius. Scripsit quoque ad P. Cæsium literas Cicero, tanquam ad jurisconsultum & patronum lib. 13. Epist. 5. ad fam. Verum ea ad hunc nostrum nihil pertinent, cum ob nominis diversitatem, tum etiam ob temporis rationem.

Aufidius Tucca. ] Quisnam hic fuerit Aufidius Tucca non certo constat: num idem ille fuerit, qui superfuit Virgilio, ab eoque heres ex parte scriptus fuit, admodum dubito, idque eo magis, quod prænomen ei fuit Plotius, ut Donatus annotavit. Mentio quoque fit in annalibus C. Servilii Tuccæ, quem anno V. C. 469. cum L. Cæcilio Metello consulem fuisse legimus, verum prænominis disparitas non patitur, ut illud de nostro Tucca intelligamus. Itaque cum divinare non possumus, quis nam fuerit hic noster Aufidius Tucca, de quo Pomponius habet sermonem, lectoris arbitrio litem dicendam relinquimus.

*Aufidius Namusa* ] Hujus mentio in pandectis passim fit, allegatur ejus auctoritas ab Ulpiano & Paulo in l. 5. §. 7. ff. commod. Nam & si servum tibi tectorem commodavero, & de machina cecideris, periculum meum esse *Namusa* ait: Et l. 2. §. 6. ff. de aqua & aqua pluv. arcend. Apud *Namusam* relatum est &c. Ab eo ait Pomponius condiscipulorum suorum scripta in centum quadraginta libros digestos fuisse.

*Flavius Priscus* ] Hic fides habenda Pomponio, nihil enim certi de hoc jurisconsulto affirmari potest, supra de C. Flavio commentati fuimus, verum id mimine ad hunc nostrum referri potest. Itaque quisnam hic fuerit, iterum lectori divinandum relinquimus.

*Cajus Attejus Pacuvius* ] Etiam & hic ignotus.

*Labeo Antistius, Labeonis Antistii pater* ] Labeonum nomen a labiorum magnitudine familiæ inditum, ut a Naso Nasones, vid. Plin. lib. 11. cap. 37. Et Donat. in *Eunuch*o Teren. act. 2. scen. 3. Fuit autem hic Antistius Labeo pater sapientiæ nomine illustris, qui Cæsare relicto, Pompejum secutus est, obtruncato Cæsare, Brutum. Tantique fuit animi, ut post aciem Pharsalicam Bruto & Cassio cæsis, ipsis superesse nolens sibi mortem invenit. Ita enim Appian. de bell. civ. lib. 4. *Labeo item vir nota sapientiæ, pater Labeonis ejus, qui nunc quoque inter juris consultos celebratur, effossa in tentorio ad sui corporis modum fovea, ubi reliqua servis mandavit, uxori quoque & libris scripsit quæ voluit, & literas servis commisit: fidissimum autem ex his dextra prehensum circum egit, ut mos est Romanis libertas facientibus: moxque gladium ei dedit, & jugulum præbuit. Et huic quidem tentorium pro sepulchro fuit.*

*Cinna* ] De hoc jurisconsulto nihil quicquam certi affirmari potest, existimat Bertrandus idem illum esse, quem Cassiodorus in Chronicis tradit consulem fuisse cum L. Valerio anno V. C. 758, temporibus Augusti Cæsaris, Ser-vii enim discipulum, ea ætate vixisse, certum est. Cui opi-

nioni



nioni quoque Corasius subscribit. Verum quæcunque hi jurisconsulti adferunt argumenta, examinat Gulielm. Grotius, atque ea huic nostro convenire non posse satis aperte ostendit. Quod de consule Cinna dicitur apud Senecam, qui anno 758. consul fuit, id L. Cinnæ tribuendum arbitratur, qui in Cæsarem conjuraverat. Idque eo magis, quod eum appellat stolidi ingenii virum, quod in jurisconsultum nostrum non quadrat. Quemadmodum alius quoque ab eo est Cinna Poëta, qui Smyrnam scripsit, cujus meminit Catullus *Epigram.* 96.

*Smyrna mei Cinna nonam post denique mensem.*

*Quam capta est, nonamque edita post hiemem:*

Verum si noster vixit tempore Augusti, ut quidam tradunt, & hunc Poëtam ante Augusti ævum vixisse ex commentariis, quos in Smyrnam Cinnæ sub Augusto Grammaticus L. Crassitius Palides scripserit, constat, sequitur hunc alium a nostro fuisse. Suet. *de illustr. gram.* In jure civili nostrum verlatum fuisse ostendunt ejus scripta, quorum meminerunt jurisconsulti Javolenus in *l. 40. §. 1. ff. de condit. & demonstr.* & Ulpianus in *l. 6. ff. de ritu Nupt.*

*Publicius Gellius* ] Non conveniunt inter se doctores neque de prænomine, neque cognomine hujus jurisconsulti. In Pandectis Florentinis legitur *Publicius Gellius*, quam lectionem, qui oppugnant, dicunt Publicii nomen, itemque Gellii diversarum familiarum esse cognomina, & consequenter jungi non posse; quod falsum esse ostendit Gulielm Grotius *de vitis Ictorum l. 1. cap. XI.* ex Valerio Max. *lib. 9. cap. 14.* ubi Publicii cujusdam libertini mentio fit. Et ex *l. 24. ff. quando dies leg. ced.* ubi Publicius prænominis loco est. Et Ulpianus *l. 18. ff. de stat. hom.* ubi D. Adrianus Publicio Marcello rescripsisse dicitur. Hotomanus Publicola Gellius legendum censet, ut sit L. Gellius Publicola, quem Cic. in *Brut. cap. 47.* dicit non tam vendibilem esse oratorem, quam ut nescires quid ei deesset: *nec enim inquit erat indoctus, nec tardus ad cogitandum, nec*

*Romanarum rerum immemor, & verbis solutus satis. Verum ut quidam ad hunc Ciceronis locum summa cum ratione annotarunt, ex eo colligi non potest, de L. Gellio Publicola sermonem Tullium habere, quoniam nulla hujus prænominis sive nominis fit mentio; Quemadmodum nec ex eo evinci potest, eum jurisconsultum fuisse. Et quid si eum jurisconsultum fuisse concedamus, ut inquit Grotius, cit. loc. ut tamen is auditor Servii & Vari aliorumque qui sub Augusto floruerunt coævus fuerit temporum ratio non permittit. Subjungitur enim a Cicerone L. Crasso & Marco Antonio & reliquis prioris ævi oratoribus, quod si ita est, non potuit a Servio proficere iste Gellius qui aliquot ante Ciceronis consulatum annis & consul & censor fuit, ut ex fastis videre est. Pub. Rutilius de vet. Ictorum vitis. & eum secutus Corasius ad h.t. malunt legere Publium Cæcilium, quam Publicium Gellium, sed qua nixi autoritate incertum. Aliquoties Cæcili apud Gellium fit mentio, cum Cæcili poëtæ lib. 17. cap. 21. tum Senatoris lib. 7. cap. 14. ubi pro C. Acilio Senatore, Cæcilio reponendum quidam annotarunt. De Sexto Cæcilio jurisconsulto sermonem habet lib. 20. c. 1. eumque in disciplina juris atque legibus populi Romani noscendis interpretandisque, scientia, usu auctoritateque illustrem fuisse testatur. Verum de hoc nostro Gellium intelligi non posse ex eo satis constat, quod ejus fuit coetaneus, quo familiariter usus est Gellius & consequenter floruit sub Trajano, adeoque eum ex Servii auditoribus non fuisse manifestum est. Itaque ne hisce immoremur diutius, eorum amplectimur opinionem, qui Florentinam lectionem tuentes, hunc nostrum Publicium Gellium idem illum affirmant, cujus fit mentio toties in jure, ut in l. 2. §. 8. ff. ad S. C. Tertyll. ubi inquit Ulpianus, Sed si sint sui heredes, verum hereditas ad eos non pertineat, videamus an mater admittatur, utputâ abstinuit se hereditate, Et Modestinus l. 51. §. 1. ff. de cond. & demonst. Heredi decem dare jussus, & liber esse, & hæredis heredi dando perveniet*



veniet ad libertatem : quod non similiter in legatarii persona custodiri, Publicius scribit.

---

**S. 45.** *Fuit eodem tempore & Trebatius, qui idem Cornelii Maximi auditor : fuit Aulus Cascelius, Quintus Mucius Volusii auditor : denique in illius honorem testamento Publium Mucium nepotem ejus reliquit heredem : fuit autem quaestorius : nec ultra proficere voluit, cum illi etiam Augustus consulum offerret. ex his Trebatius peritior Cascelio, Cascelius Trebatio eloquentior fuisse dicitur, Ofilius utroque doctior. Cascelii scripta non exstant, nisi unus liber Benedictorum. Trebatii complures : sed minus frequentantur.*

**E**T Trebatius ] C. Trebatius Testa, Cornelii Maximi auditor, ut Pomponius testatur, Labeonis præceptor, eques Romanus, summa in jure civili scientia præditus fuit. Cicerone admodum familiariter usus fuit, in cujus amici-

amicitiam fidemque adhuc adolescens sese contulerat, ostendunt id ipsum tot Ciceronis ad eum scriptæ literæ, ut & liber *Topicorum* ad eundem missus. Vel quoque Cajum Trebatium familiarem suum appellat *l. 4. ad famil. epist. 1.* Ciceronis quoque commendatione ad Cæsaris familiaritatem est admissus. Quam autem sincera fuerit ea commendatio perspicimus ex *epist. 5. ad fam. lib. 7. ad Cæsarem* scripta. Mitto igitur inquit, ad te Trebatium, atque ita mitto, ut initio mea sponte, post autem invitatu tuo mittendum duxerim. Hunc mi Cæsar, sic velim omni tua comitate complectare, ut omnia quæ per me possis adduci ut in meos conferre velis, in unum hunc conferas: de quo tibi homine hac spondeo, non illo vetere verbo meo, quod, cum ad te de Milone scripsissem, jure lusisti: sed more Romano, quo modo homines non inepti loquuntur; probiorem hominem, meliorem virum, prudentiorem esse neminem. Et ad ipsum Trebatium ita scribit epistola sequenti, In omnibus meis epistolis, quas ad Cæsarem aut ad Balbum mitto, legitima est accessio commendationis tuæ, nec ea vulgaris, sed cum aliquo insigni indicio meæ erga te benevolentia. Hæc itaque singulari commendatione in intimam Cæsaris pervenit familiaritatem, adeo ut ei Cæsar tribunatus commoda, sive stipendia, demto labore militiæ, deferret; Quæ contempsisse scribit Cicero propter urbis & urbanitatis desiderium, quo tenebatur, quas ineptias reprehendit in eo Cicero, eique persuadit, ut eas deponat, itaque paulatim Cæsaris benevolentia & Ciceronis adhortationibus substitit in castris. Orto postea civili bello, Cæsaris semper secutus partes, ipsumque Ciceronem sollicitare vehementer non destitit, ut vel Cæsaris partes amplecteretur, vel in Græciam se conferret. Plut. in vita Cic. Ita ut miretur jure Rutilius, Zassium credidisse Trebatium insigni inter optimates dignitate secutum Pompejanas partes, inter ventu Ciceronis restitutionem a Cæsare impetrasse, ac tum demum illa obtinuisse commodo, de quibus jam locuti. Idem Cæsarem refert Suet. in



*Cæsare cap. 78.* patribus universis conscriptis, cum plurimis honorificentissimisque decretis, adeuntibus se, sedentem pro æde Veneris genetricis admonuisse, ut assurgeret, quam admonitionem ægre ferens Cæsar minus familiari vultu Trebatium respexit. Quam insignis despecti Senatus contumeliam jure autores inter præcipuas Cæsariæ necis causas referunt, Fuit autem, ut de eodem refert Cicero in jure civili summa ejus scientia, & singularis memoria. *lib. 7. epist. 5. ad fam.* qua propter eum duxisse familiam inquit, id est, ut interpretantur comentatores, tanti ejus scientia apud alios fuit ponderis & momenti, ut ceteri ejusdem disciplinæ cultores eum sequerentur tanquam ducem & auctorem. Ita 4. *de finib.* dicet Cicero *sententiam ducere familiam*, quæ majorem vim habet & majoris est ponderis, & quasi caput aliarum: ita enim inquit: *Sed primum illud vide gravissimam illam vestram sententiam, quæ familiam ducit, honestum quod sit, id solum esse bonum, honesteque vivere bonorum finem: &c.* Magnam itaque Trebatii auctoritatem in jure prædicat, cum familiam eum duxisse affirmet. Plurima fit ejus mentio in Digestis, licet ejus sententia sæpius rejiciatur. Citatur in *l. unic. §. 1. ff. de offic. Quæst. l. 18. §. 3. & 4. ff. de dol. mal. l. 33. ff. de rei vind. l. 9. §. 7. ff. de usufr. l. 6. §. 6. ff. comm. divid. & passim plurimis aliis in legibus. Scribit Ulpianus in *l. 21. ff. de furt.* Trebatium exercuisse vulgarem illam quæstionem, *an is, qui ex acervo frumenti modium sustulit, totius rei furtum faciat an vero ejus tantum, abstulit?* Ofilius totius acervi furem esse putat: nam & qui aurem alicujus tetigit, inquit Trebatius, totum eum videri tetigisse, proinde & qui dolium aperuit, & inde parvum vini abstulit, non tantum ejus, quod abstulit, verum totius videtur fur esse. Sed verum est (inquit Ulpianus) in tantum eos furti actione teneri, quantum abstulerunt. In ejus modi furtorum quæstionibus enodandis ac dissolvendis Trebatium occupatum fuisse confirmat quoque Cic. in *epist.**

22. *ad fam. lib. 7.* ubi inquit ab eo inter Schyphos agitatam fuisse controversiam. *Posssetne heres, quod furtum antea factum esset, furti recte agere.* Notandum quoque quod non solum commendatione Ciceronis in intimam Cæsaris pervenerit familiaritatem, verum & eum Cæsare interfecto non minimum apud Octavium Augustum tenuisse locum: Utpote qui Trebatii potissimum suasu codicillorum usum recepit, ut ipse Imperator Justinianus tradit §. 1. *inst. de Codicil.* idque propter summam, qua in jure pollebat, auctoritatem.

*Aulus Cascelius Quintus Mucius Volusii auditor* ] Quis hic fuerit Q. Mucius Volusius, cujus auditorem nostrum Cascelium fuisse tradit Pomponius, non constat, ideoque hunc locum tanquam corruptum varii auctores varie emendarunt, Antonius Augustinus Quintii Mucii Volusii auditorem legendum putavit, quam lectionem & probat Magnus Cujacius, sed qua auctoritate mihi non liquet, cum nusquam apud auctores legisse me memini Muciorum familiæ Volusii cognomen inditum. Præterquam quod Volusius nomen gentis fuerit, ut putat Balduinus, qui Volusium Metianum Jurisconsultum multis posteriorem fuisse tradit, & consequenter huc referri non posse: Alii putant Q. Mucii Scævolaë auditor legendum, quod probabilius videtur. Verum rectius emendavit statim allegatus auctor, *Quinti Mucii & Volcatii auditor*, ita ut duos habuerit in jure præceptores: ac primo præceptore usus Scævola, postea eo mortuo Volcatii auditor fuit. Mucii discipulum fuisse testatur satis aperte Pomponius, tradens Cascelium in honorem illius scil. præceptoris Mucii, nepotem ejus testamento reliquisse heredem. Deinde enim non Volusium sed Volcatium audivisse affirmat Plinius *lib. 8. cap. 40.* ubi inquit, *Apud nos Volcatium nobilem, qui Cascelium jus civile docuit, asturcone e sub urbano redeuntem, cum advesperavisset, canis a grassatore defendit.* In quibusdam editionibus legitur Cæselium, sed malè; fuit autem noster Cascelius Trebatio & Ofilio æqualis, verum quemadmodum Trebatius fuit Cascellio peritior



ritior & Ofilius utroque doctior, ita Cascellius eloquentia & Trebatium & Ofilium superavit, uti testatur Pomponius, habebatur tamen in pretio noster Ictus; Ita enim Ammian. Marcel. l. 30. c. 4. Hi ut altius videantur jura cal-  
 re, Trebatium loquuntur, & Cascellium, & Alfenum, & Aurun-  
 corum Sicanorumque jam diu leges ignotas, cum Evandri matre  
 adhinc sæculis obrutas multis. Et Horat. de art. Poët. vers. 371.

— — — Consultus juris, & actor

Causarum mediocris, abest virtute disert

Meßalla, nec scit quantum Cascellius Aulus.

Sed tamen in pretio est.

Jurisconsultum miræ urbanitatis & libertatis fuisse testatur Macrobius. Saturnal. lib. 2. cap. 6. Cascellius (inquit) jurisconsultus urbanitatis miræ libertatisque habebatur, præcipue tamen is jocus ejus innotuit: Lapidatus a populo Vatinius, cum gladiatorium munus ederet, obtinuerat ut ædiles edicerent, ne quis in arenam nisi pomum misisse vellet. Forte his diebus Cascellius consultus a quodam an nux pinea pomum esset, respondit; Si in Vatinium missurus es, pomum est. Mercatori deinde, quemadmodum cum socio navim divideret interroganti respondisse traditur: Navim si dividis; nec tu nec socius habebitis. De libertate nostri Icti ita Valer. lib. 6. cap. 2. A. Casellius, (Cascellius legendum) vir juris civilis scientia clarus, quam periculose contumax: Nullius enim aut gratia, aut auctoritate compelli potuit, ut de aliqua earum rerum, quas trium viri dederant, formulam componeret. Hoc animi judicio victoriarum beneficia extra omnem ordinem legum ponens. Idem, cum multa de partibus Casaris liberius loqueretur, amicique, ne id faceret, monerent: Duas res quæ hominibus amarissima videntur, magnam sibi licentiam præbere respondit; senectutem & orbitatem. Quod attinet ad dignitates quibus ornatus fuit, ultra quæstoriam dignitatem proficere noluit, cum illi etiam Augustus consulatum offerret, propterea fortasse, ut Rutilius conjecturatur, quod presentem reipub. statum, in quem  
 ejus

ejus jam inciderat ætas, accipiendis a Tyranno magistratibus probare vellet a viro, in libera civitate & nato & ad virilem usque ætatem innutrito. Scripsit varia, verum ea non extant, nisi unus *Benedictorum* liber. Ad quem librum pertinere vult Bertrandus *l. 158. ff. de verb. sig.* Et *§. 7. l. 1. ff. quod vi aut clam.* Ejus mentionem in digestis sæpissime Icti faciunt, & præcipuè Javolenus *l. 39. ff. de vulg. & pupill. subst. l. 40. ff. de cond. & demonstr. & passim.* Notandum hic, plane ab hoc nostro Icto diversum esse Cæsellium illum cujus mentionem facit Agell. *lib. 2. cap. 16.* quem antiquarum lectionum comentarios scripsisse tradit. Quemadmodum & alius quoque fuit Cæcellius ille prædiator de quo Valer. *lib. 8. cap. 12.* ad quem Q. Scævola legum clarissimus & certissimus vates, consultores rejiciebat.

---

*§. 46. Post hoc quoque Tubero fuit, qui Ofilio operam dedit: fuit autem patricius, & transiit à causis agendis ad jus civile, maximè postquam Quintum Ligarium accusavit, nec obtinuit apud Cajum Cæsarem. Is est Quintus Ligarius: qui, cum Africæ oram teneret, infirmum Tuberonem applicare non permisit, nec aquam haurire, quo nomine eum accusavit, & Cicero*  
*defen*



*defendit. exstat ejus oratio satis pulcherrima, quæ inscribitur, pro Quinto Ligario. Tubero doctissimus quidem habitus est juris publici, & privati: & complures utriusque operis libros reliquit: sermone etiam antiquo usus affectavit scribere: & ideo parum libri ejus grati habentur.*

**P**ost hoc quoque Tubero fuit, qui Ofilio operam didit. ]  
 L. Tuberone patre nobili & patricio noster natus fuit, primum orator fuit, deinde ad causas agendas animum applicuit. Itaque adolescens, Q. Ligarium coram Cæsare accusavit, defendente eum Cicerone. Quod ad accusandum Q. Ligarium Tubero descenderit, eo contigisse tradit Pomponius, quod Ligarius non permisisset, cum Africæ oram teneret, infirmum Tuberone[m] applicare nec aquam haurire. Cæsar qui hanc describit Historiam lib. i. de bell. Gall. tradit non Q. Ligarium, sed Accium Varum, Tuberone[m] venientem Utinam cum navibus portu atque oppido prohibuisse. Et cum, inquit, in Africam venisset, (scil. L. Tubero) invenit in provincia cum imperio Attium Varum, qui ad Auximum amissis cohortibus protinus ex fuga in Africam pervenerat, atque eam sua sponte vacuam occupaverat, delectuque habito duas legiones effecerat, hominum & locorum notitiam, & usus ejus provinciæ nactus. Aditus ad ea conanda, quod paucis ante annis ex pretura eam provinciam obtinuerat. Hic venientem Utinam cum navibus Tuberone[m]

ronem portu atque oppido prohibet, neque affectum valetudine filium exponere in terram patitur, sed sublatis anchoris excedere eo loco cogit. Nullum hic quidem verbum de Q. Ligario Tuberonem prohibente portu atque oppido, quamobrem putat Bertrandus; eam non fuisse causam Tuberoni apud Cæsarem Ligarium accusandi, quam affert Pomponius, sed eam potius summam accusationis fuisse, quam Quintilianus refert *lib. XI.* Scil. quod Ligarius, cum jam bello civili Cæsariano jactabatur Resp. non Cæsaris partes amplexus fuerat, verum cum Repub. contra Cæsarem senserat. Neque pro Cn. Pompejo, inter quem inquit & Cæsarem dignitatis fuerat contentio, cum salvam utrique Rempub. vellent; sed pro Juba atque Afris inimicissimis populo Romano stetisset. Certissimum est, quod, cum Q. Ligarius non obtineret provinciam, ut tradit Cæsar, non potuerit prohibere Tuberonem cum navibus Uticam venientem portu, & consequenter non fuit causa accusationis, quam Tubero contra Ligarium suscepisse tradit Pomponius. Aliter describit hanc historiam Cicero in *orat. pro Ligario.* Scil. quod ante exortum inter Cæsarem & Pompejum bellum, Q. Ligarius cum Considio Consule legatus in Africam profectus a Considio abeunte, propter spectatam ejus virtutem ei Provinciæ vel invitus præficeretur: Bellum interea civile exarsit. Quamobrem ii qui in Africa erant, ducem quærebant, qui summæ rerum præesset. Cumque Ligarius ad patrios revertere lares properans, summum declinaret imperium, Accius Varus intervenit illudque libentissime arripuit. Interea Tubero qui castra Pompeji sequebatur, a Senatu in Provinciam missus est, quem adventantem Ligarius, ut inquit Pomponius *applicare non permisit, nec aquam haurire.* Itaque relictis Africæ oris in Macedoniam ad Pompejum redire coactus fuit. Finitis autem bellis civilibus, Tubero filius eum accusavit apud Cæsarem, non sine spe victoriæ fretus offensa Cæsaris in illum, verum patrocinate eum Cicero-



ne, tantum valuit facundia, ut Cæsar Ligarium absolverit, quamvis eum damnandi certum jam cæpisset consilium. Alii ex Ciceronis oratione colligunt P. Accium Varum missum fuisse cum imperio, ut Q. Ligario succederet, postque ejus adventum aliquamdiu in provincia mansisse. Interea Senatum Pompejo faventem L. Tiberonem ad eam obtinendam provinciam misisse: Verum eum cum navibus Uticam venientem, Accium Varum portu atque oppido prohibuisse, ut ex Cæsare perspeximus, atque hinc Tiberonis in Ligarium odium & ira, qua impulsus eum apud Cæsarem in foro pro tribunali sedentem accusavit.

Verum nuspiam in oratione pro Ligario scribit Cicero Accium Varum ex S. C. in Africam missum, sed plane contrarium ex Ciceronis verbis colligimus, cum inquit, *Interim P. Accius Varus, qui Prætor Africam obtinuerat, Uticam venit, ad eum statim concursus est, atque ille non mediocri cupiditate arripuit imperium, si illud imperium esse potuit, quod ad privatum clamore multitudinis imperita, nullo publico consilio deferatur.* Itaque summum imperium factum quidem sed non jure sibi vindicaverat P. Accius Varus, attamen quia de facto illud arripuerat atque obtinebat, merito si quid Tiberoni contigisset, quod contra jus fasque erat, id ipsum non Ligario, utpote qui jam deposuerat imperium, verum Accio Varo imputari debuisset. Unde Tiberonem, inquit Cicero, venisse in Africam jam occupatam scilicet ab Accio, propterea fortasse Cæsar de Ligario quamquam & eodem tempore, quo jam summum imperium Accius habebat in Provincia, restiterat, nullum habet sermonem, *de bell. Gal. cit loc.* quia deposito imperio ibi commorabatur tanquam privatus, & consequenter si non fuerit in Provinciam receptus Tiberonem cum filio ægrotante, verum portu atque oppido prohibitus, auctor hujus prohibitionis summum istius Provinciæ obtinens imperium Varus, non vero Ligarius, qui eo se abdicaverat, nominari debuit. Quemadmodum Cæsar facit, describens rem uti gesta

est. Itaque nullam video inter Cæsarem & Ciceronem dissensionem, cum testentur utrique Ligarium culpa vacuum. Cæsar quia aperte Accium Varum auctorem prohibitionis nominat; Cicero quia Ligarium, licet fuerit eadem tempestate in Provincia, fecisse negat, ut ex pulcherrima oratione, quæ inscribitur pro *Ligario*, quæ una est ex tribus orationibus Ciceronis, quæ Cæsarianæ vocantur, perspicimus; lectu sane digna; tanta enim in ea dicendi vis, tanta facundia, ut, quanquam Cæsar certum ut diximus, jam cæperat consilium damnandi Ligarium, absolutus tamen sit ab ipso Cæsare Ligarius. De facundissima hac oratione ita Plutarch. in *vita Ciceronis*. *Perhibent (inquit) quum accusaretur Ligarius, quod hostis Cæsaris fuisset, defendente reum Cicerone, dixisse ad amicos Cæsarem, quid obstat quin Ciceronem tanto intervallo audiamus dicentem, quando istum quidem jam dudum constat improbum hominem & hostem nostrum esse? Postea vero quam Cicero dicere orsus mirifice eum movit, variisque affectibus & mira gratia ejus progressa est oratio, colorem identidem Cæsaris faciem variasse, perspicuumque fuisse omnibus eum animi motibus versatum. Denique ubi pugnam Pharsalicam orator attigit, fuisse usque adeo permotum, ut toto corpore tremuerit, ac libelli aliquot, quos tenebat manibus, ei exciderim, Ligarium igitur expugnatus crimine absolvit.* Hæc ipse confirmat Cicero *Epist. 14. ad fam. lib. 6.* *Cum fratres (inquit) & proquinqui tui jacerent ad pedes, & ego essem locutus, quæ causa, quæ tuum tempus postulabat: non solum ex oratione Cæsaris, quæ sane mollis & liberalis fuit: sed etiam ex oculis & vultu, & multis præterea signis, quæ facilius perspicere potui quam scribere, hanc in opinionem discessi, ut mihi tua salus non dubia esset.* Cum autem Ciceronis facundia plus apud Cæsarem valuisset, quam Tuberonis oratio, ita ut absolutus fuerit à Cæsare Ligarius, Q. Tubero inde a causis agendis transiit ad jus civile, ut tradit Pomponius, & A. Ofilio operam dedit, doctissimusque habitus est cum publici tum etiam priva-



privati juris. Nimirum hoc vult Pomponius, Tiberonem non amplius causidici sed jurisconsulti munere functum. Notandum hic distinctionem esse, ut ex Cicerone aliisque scriptoribus manifestum est, inter Causidicos & Jurisconsultos: Causidici qui causas in foro agebant: Jurisconsulti, qui de jure respondebant, dicebantur. Memini me nuper hanc distinctionem legisse apud Lactantium de *mortibus persecutorum*, quem inter alios commentatores, notis suis doctissimis illustravit *Vir Nobilissimus & Amplissimus Gysb. Cuperus*, cujus summa eruditio & in publicis negotiis tractandis mira solertia atque prudentia, nominis famam per totum terræ orbem circumtulit, eumque ut civem de patria optime meritum, & cotidie bene merentem, ad summum honoris dignitatisque evertexit fastigium: apud dictum inquam scriptorem atque in nobilissimi viri ad eundem locum notis annotavi illam distinctionem, ita enim Lactantius *cap. 22. Eloquentia extincta, causidici sublati, jureconsulti aut relegati, aut necati.* Ad quem locum Vir Amplissimus, Recte hos distinguit; quia illi causas in foro vel judiciis agebant; hi vero de jure respondebant, uti vel ex Cicerone patet, & Hotomanni libello, quem *Jurisconsultum* inscripsit. Servii Sulpicii filiam sibi matrimonio junxit, ex qua filiam suscepit, quæ mater fuit Cassii Longini. Consulatum gessisse colligi posse videtur ex Plinio & fastis Capitolinis, anno 742. cum *Paulo Fabio Maximo*, temporibus Augusti. Meminit ejus consulatus Plin. lib. 8. cap. 17. Idem *Q. Tiberone, & Fab. Maximo* *coff. IV. Nonas Majas, Theatri Marcelli dedicatione, tigrim primus omnium Romæ ostendit in cavea mansuefactum.* Meminit quoque consulatus Frontinus de *Aqueductibus*, traditque exemplum Senatus-consulti tunc facti, de eorum officio & insignibus, qui aquis publicis præfuturi essent.

Dion. anno V. C. 743. consulis *Q. Ælii Tiberonis & Fabii Maximi* mentionem facit lib. 54. cap. 370. Scripsit autem noster libros complures cum publici tum etiam

privati juris. Verum quia sermone antiquo usus affectavit scribere : parum ejus libri grati habentur ut inquit Pomponius. Gell. lib. 14. cap. 2. tradit eum quoque scripsisse quædam præcepta super officio judicis. Scripsit præterea historias ut ex eodem Gellio colligi potest lib. 6. cap. 4. & lib. 10. cap. 18. ubi inquit C. TUBERO ( lege Q. Tubero ) Historiarum primo scripsit Servium Tullium regem populi Romani , cum illas quinque classes juniorum , census faciendi gratia , instituerit , pueros esse existimasse , qui minores essent annis septendecim : atque inde ab anno septimodecimo , quod idoneos jam esse reipub. arbitraretur , milites scripsisse : eosque ad annum quadragesimum sextum juniores , supraque eum annum seniores appellasse.

---

*§. 47. Post hunc maxime auctoritatis fuerunt Atejus Capito , qui Ofilium secutus est : & Antistius Labeo , qui omnes hos audiuit : institutus est autem à Trebatio. Ex his Atejus consul fuit. Labeo noluit , cum offerretur ei ab Augusto consulatus , quo suffectus fieret , ( & ) honorem suscipere : sed plurimum studiis operam dedit : & totum annum ita diviserat : ut Romæ sex mensibus cum studiosis esset ,*



esset , sex mensibus secederet , & conscribendis libris operam daret. Itaque reliquit quadringenta volumina : ex quibus plurima inter manus versantur. Hi duo primum veluti diversas sectas fecerunt : nam Atejus Capito in his , quæ ei tradita fuerant perseverabat : Labeo ingenii qualitate , & fiducia doctrinæ , qui & cæteris operis sapientiæ operam dederat , plurima innovare instituit , & ita Atejo Capitoni Massurius Sabinus successit , Labeoni Nerva , adhuc eas dissensiones auxerunt. Hic etiam Nerva Cæsari familiarissimus fuit : Massurius Sabinus in equestri ordine fuit , & publicè primus scripsit : posteaque hoc cæpit beneficium dari à Tiberio Cæsare , hoc tamen illi concessum erat. Et , ut

obiter sciamus, ante tempora Augusti publicè respondendi jus non à principibus dabatur: sed qui fiduciam studiorum suorum habebant, consulentibus respondebant, neque responsa utique signata dabant: sed plerumque iudicibus ipsi scribebant, aut testabantur, qui illos consulebant. Primus Divus Augustus, ut major juris auctoritas haberetur, constituit, ut ex auctoritate ejus responderent, & ex illo tempore peti hoc pro beneficio cæpit: & ideo optimus princeps Hadrianus, cum ab eo viri pratorii peterent, ut sibi liceret respondere, rescripsit eis, hoc non peti, sed præstari solere: & ideo si quis fiduciam sui haberet, delectari se, populo ad respondendum se prepararet. Ergo Sabino concessum est à Tiberio Cæsare,



sare, ut populo responderet, qui in equestri ordine jam grandis natu, & ferè annorum quinquaginta receptus est: huic nec amplæ facultates fuerunt: sed plurimum à suis auditoribus sustentatus est. Huic successit Cajus Cassius Longinus, natus ex filia Tuberonis, quæ fuit neptis Ser. Sulpitii: & ideo proavum suum Servium Sulpitium appellat. hic consul fuit cum Quartino, temporibus Tiberii, sed plurimum in civitate auctoritatis habuit, eo usque donec eum Cæsar civitate pelleret. expulsus ab eo in Sardiniam, revocatus à Vespasiano, diem suum obiit. Nerva successit Proculus. fuit eodem tempore & Nerva filius: fuit & alius Longinus ex equestri quidem ordine, postea ad præturam usque pervenit,

*sed Proculi auctoritas major fuit. nam etiam plurimum potuit, appellatique sunt partim Cassiani, partim Proculejani: quæ origo à Capitone, & Labeone cœperat. Cassio Cælius Sabinus successit, qui plurimum temporibus Vespasiani potuit. Proculo Pegasus, qui temporibus Vespasiani præfectus urbi fuit. Cælio Sabino Priscus Javolenus. Pegaso Celsus, patri Celso, Celsus filius, & Priscus Neratius: qui utrique consules fuerunt: Celsus quidem & iterum. Javoleno Prisco Aburnus Valens, & Tuscianus, item Salvius Julianus.*

**A**ttejus Capito] Quemadmodum, ut supra retulimus, Labeones a magnitudine Labeorum, a naso Nasones, ita a Capite Capitones dicti fuere. Ex hac familia oriundus noster Attejus Capito, maximæ auctoritatis Jurisconsultus, ut inquit, Pomponius, qui una



una cum Labeone sub Augusto floruit, pervenitque ad imperium usque Tiberii. Patrem habuit Capitonem virum Prætorium, avum centurionem Syllanum, Ita enim Tacit., lib. 3. *Annal. cap. 75.* Et Capito Attejus, de quo memoravi principem in civitate locum studiis civilibus adsecutus; sed avo centurione Sullano, patre prætorio: consulatum ei acceleraverat Augustus, ut Labeonem Antistium iisdem artibus præcellentem dignatione ejus magistratus anteiret. Namque illa ætas duo pacis decora simul tulit. Sed Labeo incorrupta libertate, & ob id fama celebratior. Capitonis obsequium dominantibus magis probabatur. Consulatum de quo hic Tacitus cepit inter suffectos anno V. C. 759. Cal. Julii ut testatur inscriptio in lapide præso Romæ.

C. ATEJO CAPITONE. C. VIBIO.  
POSTHUMO COS.

Summi obsequii & singulare adulationis exemplum eodem Taciti libro legimus *cap. 70.* L. Ennium (inquit) equitem Romanum, majestatis postulatum, quod effigiem Principis promiscuum ad usum argenti vertisset, recipi Cæsar Tiberius inter reos vetuit, palam aspernante Attejo Capitone, quasi per libertatem; non enim debere eripi patribus vim statuendi, neque tantum maleficio impune habendum; sane lentus in suo dolore esset; reipub. injurias ne largiretur. Intellexit hæc Tiberius, ut erant magis, quam ut dicebantur; perstititque intercedere. Aliud exemplum huic non dissimile refert Suet., de illustribus Grammaticis *cap. 22.* Ubi cum Pomponius Marcellus sermonis latini exactor molestissimus, ex oratione Tyberium reprehendisset, affirmavit Capito esse illud Latinum, & si non esset, futurum certè jam inde. Verum a Pomponio responsum. Mentitur (inquit) Capito, Tu enim Cæsar civitatem dare potes hominibus, verba non potes. Vel ut alii habent *cod. verbis non potes*, ita legendum censet quoque Bertrandus. Ejusmodi adulationes in causa fuere quod ei Augustum consulatum acceleravit ut tradit Tacitus. Fuit hic, ut dicere incepimus, Ju-  
ris-

risconsultus maximæ auctoritatis, præterea publici privati-  
 que juris erat peritissimus, ut testatur Gellius *lib. 10. cap. 20.* Pontificii juris inter primos eum peritum scribit  
 Macrobi. *lib. 7. Satur. cap. 13.* Verum, ut inquit Tacit.  
*3. annal. cap. 70.* *Eo insignitior infamia fuit, quod hu-*  
*mani divinique juris sciens, egregium publicum, & bonas do-*  
*mi artes debonestavisset.* Hanc autem insignem juris scien-  
 tiam ab Ofilio, de quo supra quædam delibavimus, acce-  
 perat, atque in iis quæ ei a præceptore suo tradita fuerant  
 constanter perseverabat, quo contigit, ut, quemadmodum  
 diversam a Labeone vitæ rationem habebat, ita quoque  
 diversam ab eo sectam constitueret. Scripsit libros multos,  
 quorum passim mentio apud Gellium: de Pontificio jure  
 quinque certe libros composuisse apud eundem videre est  
*lib. 4. cap. 6.* Et Festus in dictione *mundus.* Ex quo &  
 illa descripta quæ referuntur a Macrobio *lib. 7. cap. 13. Sa-*  
*turn.* de annuli gestatione, deque deorum formis annulis  
 non insculpendis. *Si volentibus vobis erit, inquit, in me-*  
*dium profera, quæ de hac causa apud Atejum Capitonem Pon-*  
*tificii juris inter primos peritum legisse meminit, qui, cum ne-*  
*fas esse sanciret deorum formas insculpi annulis, eousque pro-*  
*cessit, ut cur in hoc digito vel in hac manu gestaretur anulis non*  
*taceret.* Scripsit præterea libros plurimos *conjectaneorum*  
 Citatur enim ab Gellio *lib. 14. cap. 7.* liber ducentessimus  
 quinquagesimus nonus *conjectaneorum.* Sed quod, ait  
 inquit, *senatusconsultum duobus modis fieri solere, aut con-*  
*quisitis sententiis, aut par discessionem: parum convenire vi-*  
*detur cum eo, quod Atejus Capito in conjectaneis scriptum reli-*  
*quit.* Nam in libro ducentesimo quinquagesimo nono Tubero-  
 nem dicere ait, nullum *Senatusconsultum* fieri posse, *disces-*  
*sione non facta.* Quia in omnibus *Senatusconsultis*, etiam in  
 iis quæ per relationem fierent, *discessio* esset necessaria: idque  
 ipse Capito verum esse affirmat. Meminit quoque eorum,  
*lib. 20. cap. 2.* ubi de vocabulo *Siticinum*, Nos autem (in-  
 quit) in Capitonis Ateji *conjectaneis* invenimus, *Siticines* ap-  
 pel-



pellatos, qui apud sitos canere soliti essent, hoc est vita functos & sepultos, eosque habuisse proprium genus tubæ, a ceterorum differens. Et lib. 2. cap. 24. Legi adeo nuper in Capitonis Atei conjectaneis Senatus decretum vetus C. Faunio & M. Valerio Messala coss. factum; &c. Collectaneorum quoque libros aliquot reliquit: liber nonus ab Gellio citatur, qui inscriptus fuit de judiciis publicis. Nec non librum singularem de officio Senatorio eodem Gellio teste lib. 4. cap. 10. Sed ipsum, inquit, Capito Atejus in libro, quem de officio Senatorio composuit, scriptum reliquit. Eum de jure sacrificiorum quoque scripsisse testatur Macrob. Saturn. lib. 3. cap. 10. Præterea & epistolarum, quas scripsit, mentio fit apud Gell. lib. 13. cap. 12. Idem sermonem habet de litteris cujusdam Sinnii sive ut emendant alii Asinii Capitonis lib. 5. cap. 20. & 21. ex quo perspicimus plures fuisse Capitonis familias. Sic apud Tacit. 8. 4. annal. cap. 36. Fontejum Capitonem Asiæ proconsulem, infontem renunciatum, ubi compertum esset ficta in eum crimina, per Vibium Serenum. Alius quoque est L. Fontejus Capito, qui anno V. C. 811. cum C. Vipfano Aproniano consul fuit Nerone imperante, de quo Juvenalis Satyr. 13. vers. 17.

*Stupet hæc, qui jam post terga reliquit.*

*Sexaginta annos. Fontejo consule natus.*

De quo Tacit. Avaritiam Fonteji Capitonis adimendis assignandisque suæ militiæ ordinibus integre mutaverat, nec consularis legati mensura. Meminit ejus consulatus Plin. lib. 7. cap. 21. dum inquit, Nuperque Fontejo, & Vipfano consulibus annos novem genitum puerum a meridie ad vesperam 75 millia passuum cucurrisse. Fuit & alius C. Fontejus Capito consul anno V. C. 764. cum Germanico Cæsare, quem consulatum male nonnulli nostro Jurisconsulto attribuant: vid. Phig. annal. anno V. C. 758. & 765.

Et Antistius Labeo ] Est hic filius istius Labeonis cujus  
supra

supra meminimus §. 44. & sane dignus tanto patre fuit filius, cujus adauxit gloriam & propriis virtutibus familiam suam illustriorem & clariorem reddidit: *Fortesque creari fortibus & bonis suo confirmavit exemplo, atque paterna premens vestigia, juris civilis excolendæ disciplinæ sese totum tradidit, C. Trebatii præceptore usus, cujus sub auspiciis tantos in ea fecit progressus, ut publice tractandam suscepit, idque tanto cum fructu, ut ipse Capito ejus adversarius non in doctrina, verum in tota vitæ instituendæ & agendæ ratione fateri necesse habuerit, Labeonem Antistium legum atque morum Pop. Rom. jurisque civilis apprime doctum fuisse. Sed agitabat hominem libertas quædam nimia atque vecors: usque eo ut D. Augusto jam principe, & Remp. obtinente ratum tamen pensumque nihil haberet, nisi quod justum sanctumque esse in Romanis antiquitatibus legisset. Gell. lib. 13. cap. 12. Non potuit scil. secundum illud Ciceronis, necessitati cedere & tempori inservire, quod tamen semper sapientis fuisse affirmat. Ejusmodi tunc temporis reipub. facies erat, ut quanto quis servitio promptior, opibus & honoribus extolleretur, ut inquit, Tacit. 1. annal. cap. 2. Verso enim civitatis statu, nihil usquam prisca & intergri moris: verum omni exuta æqualitate jussa principis aspectabant; ex cujus jam unius nutu arbitrioque pendeabant. Libertate sublata & priscae reipub. legibus abolitis aut elusis, Omnes ruere in servitium Consules, Patres, Eques, & quanto quis illustrior tanto magis falsi & festinantes. Tacit. eod. cap. 3. Verum quanquam reipub. servitute premebatur, animum tamen liberum ab omni servitio & adulatione præseferbat Labeo, & in omnibus sive dictis sive factis & totius vitæ cursu declarabat, se in ipsa servitute libertate frui, cujus exemplum legimus apud Gellium dicto cap. 12. lib. 13. ubi refert quid Labeo per viatorem a tribunis plebis vocatus responderit. Quam a muliere, inquit, quædam tribuni plebis adversum eum aditi Gellianum ad eum misissent, ut veniret & mulieri responderet:*



ret: iussit eum, qui missus erat, redire, & tribunis dicere, jus eos non habere neque se neque alium quenquam vocandi; quorum moribus majorum tribuni plebis prehensionem haberent, vocationem non haberent. Posse igitur eos venire & prendi se jubere, sed vocandi absentem jus non habere. Simile libertatis exemplum tradit Suet. in Augusto. cap. 54. ubi inquit. Antistius Labeo Senatus lectione, cum vir virum legeret, M. Lepidum hostem olim ejus, & tunc exulantem legit, interrogatusque ab eo an essent alio digniores, suum quemque iudicium habere, respondit. Hæc immodicæ libertatis usu factum, ut Horatius eum in gratiam Augusti insanum prædicare non dubitaverit. lib. 1. Serm. Satyr. 3. hisce versibus.

*Si quis eum servum patinam qui tollere iussus,  
Semefos pisces, tepidumque ligurierit jus.  
In cruce fustigat, Labeone in sanior, inter  
Sanos dicatur? quanto hoc furiosius atque  
Majus peccatum est.*

Eum intra præturam stetitisse tradit Tacit. cui fidem habeo; quanquam Pomponius testetur consulatum suffectum ei obtulisse Augustum. Ita enim Tacit. 3. annal. Capitonius consulatum acceleraverat Augustus, ut Labeonem Antistium iisdem artibus præcellentem dignatione ejus magistratus anteciperet: & postea illi quod Præturam intra stetit commendatio ex injuria, huic quod consulatum adeptus est odium ex invidia oriebatur. Non enim verosimile est eum Augustum ad summum in repub. honoris culmen promovere voluisse, qui præsentem reipub. statum abnuens, ejus imperium abjiciendi & rempub. in pristinam libertatem asserendi animum, si occasio sese obtulisset, non obscure declaraverat. Quamvis honores sæpissime mutant mores, ejusmodi tamen mutationem in Labeonem nostrum virum constantem & nulla honorum vel dignitatum cupidine agitatum casuram sperare non poterat Augustus. Quanquam si boni civis officium implere voluisset, præsentem reipub. tueri statum & con-

fir-

firmatum reddere ipsi incumberebat : omni enim regiminis mutatio periculosa & multis obnoxia incommodis, vixque ea contigit sine summo reipub. detrimento; propterea quod omni penitus sublato imperio, tanquam fundamento suo destituta tota corrui societatis civilis sive reipub. fabrica, summaque omnium rerum inducitur confusio, & ad vetus relabitur Chaos resp. id est belli statum, in quo homo homini lupus, alter alterius imminet exitio, bona diripit, facultates, possessiones invadit, quo statu nullum pejus imperium fingi vel excogitari potest: ita ut merito statuamus, aliquam potius perferendam dominationem quamvis maxime importunam vel invisam, quam ut abjiciendo durum servitutis & Tyrannicæ potestatis sive dominationis jugum, semetipsos cives in libertatem & beatiorum vitæ conditionem asserere conentur, ne, dum mutatione imperii sive regiminis sese a tot malis liberare nitantur, iisdem magis immergantur ac obruantur. Quemadmodum enim navis sine gubernatore maris fluctibus huc illuc agitur, eorumque vi sæpissime ad scopulos appulsa dissolvitur atque sommergitur; ita quoque resp. dissoluto imperii vinculo, tot imbellum multitudinis male compositis desideriis huc illuc jactatur, & in tot scopulos impingit, ut, antequam per tam multa rerum discrimina in portum rejicitur, naufragium patiatur sæpissime, & omnium miseriarum sommergatur oceano. *Ferenda regum ingenia, neque usui crebras mutationes*, apud Tacit. *annal.* 12. Et idem *cap.* 4. *Hist.* 8. *Bonus civis meminit temporum quibus natus est, quam civitatis formam patres avique instituerunt: ulteriora miratur, præsentia sequitur, bonos principes voto expetit, qualescunque tolerat.* Quippe & apud Plutarch. legimus, nulla reipub. forma non melior est bello civili. Hæc illis dicta sunt, qui novarum rerum cupidi, omnes suas cogitationes ad Regna respub. perturbandas atque dilacerandas, ad omnia tum sacra tum profana permiscenda, cogitationes convertunt; Quamobrem multa  
sum-



summorum imperantium facta quasi reipub. maxime dam-  
nosa & noxa interpretantur, quæ nullam alicujus detri-  
menti, quod reipub. allatura in vulgus disseminant, præ  
se ferunt speciem; Ejusmodi momi tanquam perturbato-  
res societatis civilis considerari debent, & consequenter e  
reipub. ejiciendos atque penitus extirpandos esse, nullus  
dubito quin omnes boni cives mecum censeant. Verum  
ut ad Labeonem nostrum revertamur, quoniam testatur  
Agellius nimiam ejus libertatem ex illibata & constanti  
animi sanctitate atque integritate profectam fuisse, si qua  
in re oblitus fuerit obsequii & officii, quod Augusto tan-  
quam suo legitimo Principi debebat, condonandum id vi-  
ri nimio, quo ad pristinam conservandam libertatem fe-  
rebatur, amoris & studio, atque severis moribus, quos in  
totius vitæ cursu præ se tulit. Quare in adulationem neque  
submissus fuit, neque voluntatem Principis, licet mode-  
ratissimi, juris auctoritate sanctiorem habere potuit: Quæ  
incorrupta morum integritas & vitæ degendæ ratio Labeo-  
ni famam quidem conciliavit, verum ad summos honores  
aditum præcluserat, eo tamen cum fructu, ut ob id fama  
fuerit celebratior; spernebat honores, modo procul a nego-  
tiis studiis inservire poterat, quorum magis cura, quam ho-  
norum ambiendorum cupiditate tenebatur. Hinc totum  
ita diviserat annum, ut sex menses cum studiosis esset, sex  
mensibus secederet, & conscribendis libris operam daret,  
ut refert Pomponius: Ita quoque olim Demosthenem lo-  
cum ad scribendum procul ab hominum oculis strepituque  
remotum sibi delegisse testatur Plutarchus. Et ita omnes,  
qui seriis rebus & conscribendis libris operam dare voluere,  
solitudinem & secessum quæsi verunt: quemadmodum  
enim merulæ in remotis tesquis frigultiunt, & lusciniæ in  
solutidine Africanæ canticum adolescentiæ garriunt, & o-  
lores apud avios fluvios carmen senectæ meditantur, ita  
omnis scriptorum chorus solitudinem & nemora amat,  
ut animus curis vacuus, ad scribendum & meditandum

magis aptus esset; Juxta illud Horatii lib. 2. *Epist.* 2.

*Præter cetera me, Romæ ne poemata censes*

*Scribere posse, inter tot curas, totque labores?*

*Hic sponsum vocat: hic auditum scripta, relictis*

*Omnibus officiis: cubat hic in colle Quirini,*

*Hic extremo in Aventino visendus uterque.*

*Torquet nunc lapidem, nunc ingens machina tignum:*

*Tristia robustis luctantur funera plaustris.*

*Hac rabiosa fugit canis, hac lutulenta ruit sus.*

*I nunc & versus tecum meditare canores.*

*Scriptorum chorus omnis amat nemus, & fugit urbes:*

*Rite cliens Bachhi &c.*

Verum in hoc otio & secessu nihil minus quam otiosus fuit noster Labeo, ut testantur tot volumina, quæ eum reliquisse ad numerum quadraginta, tanquam assidui laboris testimonia, scribit Pomponius: Reliquit autem commentarios ad ll. XII. tab. ut ex Gellio perspicimus lib. 7. cap. 15. & lib. 20. c. 1. *Noct. Att.* Scripsit præterea libros *περίθρυον* sive probabilium, vel verisimilium, quos in epitomen redegit Ictus Paulus, ut patet ex inscriptione l. *fin.* ff. *si serv. vind.* & l. 10. ff. *ad leg. Rhod. de jactu.* Meminit quoque Gellius lib. 13. c. 10. librorum *posterorum*, qui post mortem ejus editi sunt, quorum librorum, inquit, tres continui *tricesimus octavus*, & *tricesimus nonus* & *quadragessimus pleni* sunt id genus rerum, ad enarrandam & illustrandam linguam latinam conducentium. Ad Edictum Prætoris quoque scripsisse idem affirmat eod. loc. Cum pergit, Præterea in libris, quos ad Prætoris Edictum scripsit, multa posuit partim lepide atque argutè reperta; sicut est, quod in quarto ad Edictum libro scriptum legimus; Soror, inquit, appellata est, quod quasi seorsum nascitur, separaturque ab ea domo, in qua nata est, & in aliam familiam transgreditur. Et libri primi ad Edictum meminit Ulpianus l. 1. §. 5. ff. *de fugitiv.* Libros quoque quam plurimos scripsit tam de officio Prætoris urbani quam peregrini; Meminit Ulpianus libri primi Prætoris



toris Urbani, l. 19. ff. de V.S. Et libri trigefimi primi Prætoris peregrini l. 9. §. 4. ff. de dol. mal. Fuit quoque auctor epistolarum aliquot, *Labeo libris epistolarum ait* &c. inquit Pomponius l. 30. §. 1. ff. de usucap. De jure Pontificio libros quoque quindecim vel plures scripsisse legimus apud Festum in verbo *Sistere*, ubi 15 libri mentionem facit, & in dictione *spurcum*, ubi librum decimum citat. Idem sermonem habet de Antistii Labeonis mortis causa stipulatione, cum inquit, *Mortis causa stipulatio existimatur fieri, ut ait Antistius Labeo, quæ ita fit, ut morte promissoris confirmetur, aut, ut quidam dixerunt, cujus stipulationis mors fuit causa.* Notandum hic, Labeonem non tantum florentissimum fuisse ætatis suæ jurisconsultum, verum & in aliis bonis artibus exercitatum fuisse, ut Gellius testatur l. 13. c. 10. cum inquit, *Labeo Antistius juris quidem civilis disciplinam principali studio exercuit & consulentibus de jure publicè responsitavit, ceterarum quoque bonarum artium non expertus fuit, & in grammaticam sese atque dialecticam litterasque antiquiores altioresque penetraverat, Latinarumque vocum origines rationesque percalluerat, eaque præcipuè scientia ad enodandos plerosque juris laqueos utebatur.* Quod & Festus Grammaticus affirmat satis cum Secespitam nobis ex Labeone sic describit. *Secespitam esse Antistius Labeo, ait, cultrum ferreum oblongum, manubrio rotundo eburneo, solido, vincto ad capulum auro argentoque, fixum clavis aneis ære Cyprio, quo flamines, Flaminicæ virgines, Pontificesque ad sacrificia utuntur. Eadem alias dicitur, qua in sacrario utuntur. Sacraria namque in templis, reticulo aneo olim sepiebantur, in quo tubæ relictæ sunt, per quas manibus sacra tangere licet.* Hinc contigit, quod fiducia doctrinæ & ingenii qualitate plurima innovare voluerit, ut refert Pomponius, quæ ab aliis non iisdem artibus imbutis non animadversa, vel prætermissa fortasse fuerant. Quia vero in multis dissentiebat Labeo a Capitone, quos duo ejusdem ætatis decora vocat Tacitus, hinc se-

etæ excitatæ. Capitonis partes secutum esse narrat Pomponius *Massurium Sabinum*, deinde *Cassium Longinum*, cui successerit *Celius Sabinus*, ut huic *Favolenus* & *Favoleno Julianus*: Labeonis partes amplexi tuere *Nerva*, deinde *Proculus*, cui *Pegasus* successerit, ut huic *Celsus*, & *Celso Neratius*. Frequens est in Pandectis harum dissensionum & sectarum mentio, multaque passim vestigia, quæ diligenter notare oportet, qui ad juris civilis disciplinam excolendam sese applicuit, propterea quod multis difficultatibus & juris nodis & laqueis ea observatio nos liberabit.

*Massurius Sabinus*] Hujus mentionem facit *Atheneus lib. 5.* quo libro fere nihil aliud *Massurii Sabini* sermones continentur. Fuit in jure civili maxime exercitatus, ita ut summa ejus esset auctoritas, de quo idem auctor *lib. 14.* *Masurius* vir longe optimus & sapiens, qui & interpret legum fuit nulli secundus, & musicis assiduam operam navavit, instrumentaque artis ejus tractavit feliciter. Meminit ejusdem *Persius 5. Satyr. vers. 88.*

*Vindicta, postquam meus a Pratore recessi,  
Cur mihi non liceat, jussit quodcunque voluntas,  
Excepto, si quid Masuri rubrica vetavit?*

Et *Arrianus lib. 4. in Epict. Enchirid.* quando inquit potius obtemperandum naturæ legibus, quam *Masurii*: Pro toto juri civili præstantissimum jurisconsultum nominavit: Sermonem quoque de eo habet *Plin. lib. 7. cap. 5.* Quem locum integrum ad verbum *Gellius* transcripsit *lib. 3. c. 16.* Ita *Plin.* *Masurius* auctor est, *L. Papirium* Pratorem, secundo hærede lege agente, bonorum possessionem contra eum dedisse, cum mater partum se XIII mensibus diceret tulisse: quoniam nullum certum tempus pariendi statum videretur. Idem *Gellius lib. 14. cap. 2.* Atque in rerum quidem diffisionibus comperendinationibusque & aliis quibusdam legitimis ritibus, ex ipsa lege *Julia* & ex *Sabini Masurii* & quorundam aliorum jurisperitorum commentariis commoniti & adminiculati sumus. *Sabinum* hic solum nominat, tanquam summæ auctoritatis



tis virum, & cæteris longe præstantiorem. Sic quoque ejus refert sententiam lib. 5. cap. 19. *Libertinos vero ab ingenuis adoptari quidem jure posse Massurius Sabinus scripsit &c.* Et lib. 10. cap. 15. *Massurius Sabinus scripsit &c.* Et ita ubique tanquam summi jurisconsulti ejus auctoritatem & sententiam prodit. Natalium splendore non admodum illustris fuit, verum ipse virtute sua propriisque meritis familiam clariorem illustrioremque fecit: Ex plebe enim natus ob virtutem & juris civilis eximiam cognitionem atque admirandam scientiam jam grandis natu, & fere annorum quinquaginta equestri ordini adscriptus est auctore Pomponio. Exiguæ adeo ei facultates fuere, ut plurimum ab ejus auditoribus sustentatus fuerit. Impetravit hic noster a Tiberio Cæsare facultatem publica auctoritate de jure respondendi, atque ita responsa sua non viva voce, verum litteris obsignata dedit, qua ratione dicit Pomponius eum publice scripsisse. Notandum enim quod ante Augusti tempora respondendi jus, non a Principibus dabatur; sed qui fiduciam studiorum suorum habebant, consulentibus respondebant, neque responsa signata dabant, sed plerumque iudicibus ipsi scribebant, aut testabantur, qui illos consulebant. Primus Divus Augustus, ut major juris auctoritas haberetur, constituit ut ex auctoritate ejus responderent, & ex illo tempore peti hoc pro beneficio cepit, testante Pomponio: Hinc Imperator §. 8. *inst. de jur. nat. Responsa Prudentum*, vocat sententias & opiniones eorum, quibus permissum erat de jure respondere. Nam, addit Imperator, antiquitus constitutum erat, ut essent qui jura publice interpretarentur, quibus a Cæsare jus respondendi datum est, qui jurisconsulti appellabantur; quorum omnium sententia & opiniones eam auctoritatem tenebant, ut iudices recedere a responso eorum non liceret, ut est constitutum. Interjecto vero tempore scribit Pomponius optimum Principem Hadrianum pristinum morem in usum revocasse: itaque cum viri Prætorii ab eo peterent, ut sibi liceret respondere, re-

scripsit eis, hoc non peti sed præstari solere, & ideo, si quis fiduciam sui haberet, delectari se: populo ad respondendum se præpararet. Nullum magistratum eum gessisse verosimile est, propterea quod nullius meminit; quamvis Bertrandus ex antiquo nummo, cujus inscriptio est

SABINUS TURPILIANUS III VIR.

asseveret eum Triumvirum fuisse, idque eo magis, quod noster Massurius floruit tempore Tiberii Cæsaris, ut testatur Pomponius, & ipse quoque Tiberii meminit *lib. 2. Memorabilium*, ut apud Gellium relatum est. Hic autem Triumvir inquit Tiberii seculo vixit. Turpilianus enim collega consul fuit anno urbis conditæ DCCCXIII cum Pæto, ut Cuspius & Cassiodorus testantur XXIII. annis tantum post mortem Cæsaris. Verum erroris eum facile convincit Guiel. Grotius, cum inquit, neminem auctorum Sabino nostro cognomen Turpiliani apposuisse, neque in dicta inscriptione Massurii nomen legitur. Præterea ex fastis consularibus manifestum est illum, qui anno V. C. DCCCXIII consul fuit, in quo collegam habuit Cæsonium Pætum, non Sabinum, verum Petronium Turpilianum nominatum. Deinde testatur Pomponius Cassium Longinum nostro Sabino successisse, qui jam anno V. C. 764. consul suffectus fuit & deinde iterum anno 783. consul renunciatus, cum M. Vinutio Quartimo, imperante Tiberio, ita ut sub Tiberio jam supremum obiisse diem videatur Sabinus, & consequenter tot annis post obitum Tiberii consul esse non potuerit. Cum autem noster summus esset Jurisconsultus, ita scripta, quæ reliquit, apud posteros magnæ fuere auctoritatis. Scripsit autem *juris civilis libros tres*, qui in indice Justiniano recensentur. In quibus & de furto quædam tradidisse colligimus ex Gellio *l. 11. c. fin.* ubi inquit, *Manifestum autem furtum est*, ut ait Massurius, *quod deprehenditur dum fit; faciendi finis est, quum perlatum est, quo ferri ceperat.* Sic etiam *lib. 4. cap. 1.* Massurius autem Sabinus in libro juris civilis secundo, etiam quod jumentorum causa apparatus esset, quibus



quibus dominus uteretur, penori attributum dicit. De officiis eorumque gradu quædam scripsisse in libro tertio juris civilis auctor quoque Gell. lib. 5. cap. 13. ubi ait, Massurius autem Sabinus, in libro juris civilis tertio, antiquiorem locum hospiti tribuit, quam clienti. Verba ex eo libro hæc sunt. In officiis apud majores ita observatum est, primum tutela, deinde hospiti, deinde clienti, tum cognato, postea affini, de qua causa fœmina viris potentiores sunt habitæ, pupillarique tutela muliebris prælatæ: etiam adversus quem affuissent, ejus filii tutores relictæ in eadem causa pupillo aderant. Eum præter libros, qui in indice Justiniano habentur, quoque commentarios de indigenis composuisse tradit idem Gell. lib. 4. cap. 9. ubi inquit, Massurius autem Sabinus in Commentariis, quos de indigenis composuit, Religiosum, inquit, est, quod propter sanctitatem aliquam remotum ac sepositum a nobis est. Verbum a relinquendo dictum, tanquam carimonie a carendo. Fastorum quoque libros aliquot scripsit, ut apud Macrobi. lib. 1. Saturn. videre est: Memorabilium complures. lib. 144. ff. de V. S. Citat Gellius librum septimum & undecimum memorialium lib. 4. cap. 20. & lib. 5. c. 6. Meminit Nonius Marcellus in verbo *Strigosus* libri XVII ejusdem Massurii Sabini, quem putat memorabilium Bertrandus eo fundamento, quod tot libros non ediderit, nisi memorialium. Vide quoque Plin. lib. 16. cap. 18. & lib. 15. cap. 29. 30. Præterea composuit libros ad Edictum Prætoris, quorum quintus citatur a Icto Paulo l. 18. ff. de oper. libert. Sui victu vestituque operas præstare debere libertum, Sabinus ad Edictum Prætoris Urbani libro 5. scribit. Scripsit quoque librum adseñsiorum, l. 5. §. 8. ff. de injur. Et ad Vitellium libros scripsit quam plures l. 45. ff. de leg. 3. Responsorum quoque secundus liber citatur a Callistrato l. 4. ff. ad L. Rhod. de jactu.

Nerva ] M. Coccejus Nerva, vir Senatorii ordinis, omnis divini humanique juris sciens, Labeoni successit, ejus secutus in jure disciplinam, cum Sabino veteres Labeo-

nis ac Capitonis dissensiones auxit. Patrem habuit Coccejum Nervam, qui anno V. C. 717. cum L. Gellio triumphali dominatu consulatum gessit, idem ille, qui, ut tradit Appianus *lib. 5. de bell. civ.* conciliandæ pacis causa inter Antonium & Cæsarem sese interposuit. Nostrum consulatu quoque functum tradit Tacit. *lib. 4. annal. c. 58.* quanquam ejus consulatus fasti nullam mentionem faciant: Unde dicendum videtur eum suffectum fuisse: Quamobrem nullum annum in commentariis conficit: Refert tamen Guiel. Grot. *de vitis juris.* tempus gesti ab eo consulatus, quod ex veteri inscriptione apud Smetium relata se eruisse tradit, quæ ita habet

Ti. Cæsar. Divi Augusti. F. Augustus

Pont. Max. Imp. VIII. Tribun. Pot. XXIV.

Dedit, C. Vibio Rufino M. Coccejo

Nerva Coss.

Unde discimus, inquit, Jurisconsultum nostrum circa nonum Tiberii annum, qui ordinarios consules habet C. Asinium suffectum fuisse. Cum enim eo anno, quo Augustus obiit, Tiberius XV Tribunitiæ potestatis annum egerit, sicut ex fastis constat, sequitur, ut ad numerum, quem inscriptio præ se fert, explendum, novem omnino anni de Tiberii imperio sint adjiciendi. Fuit hic noster avus Nervæ Imperatoris, ipse scientia juris illustris, ut tradit Front. *lib. 2. de aqueduct.* ubi & ipsum inter curatores aquarum urbis Romæ nominat, quam curationem Tiberius post Satrium Rufum demandavit S. Cornelio Cethego, & L. Vitellio Varrone Coss. habebat enim Tiberius eum sibi conjunctissimum. Quamobrem Cæsarem in Campaniam proficiscentem solus ex senatoribus secutus fuit. Ita enim Tacit. *lib. 4. annal. cap. 58.* Profectio arto comitatu fuit: unus Senator consulatu functus, Coccejus Nerva, cui legum peritia. Interjecto vero tempore, cum jam consuetudinem Tiberii, qui omnia cæde & libidine replevisset, ferre amplius non poterat, vir integer & præcæ probitatis, consilium moriendi cepit, integro



tegro statu, & corpore illæso. Ita enim Dion. 58. Nervaque consuetudinem Tiberii præterea non ferens, causa alia, tum quod a Cesare latas leges de contractibus, is renovaturus erat, velut occasiones angustæ fidei, & multorum tumultuum præbituras, multum hortante Tiberio, ut animum suum explicaret, nullo dato responso, vitam abstinentia finivit, quare motus Tiberius rem scenerariam temperavit. De eodem quoque Tacit. lib. 6. annal. cap. 26. cum inquit, Haud multo post Coccejus Nerva continuus principis, omnis divini humanique juris sciens, integro statu, corpore illæso, moriendi consilium cepit. Quod ut Tiberio cognitum; adsidere, causas requirere, addere preces, fateri postremo, grave conscientia, grave fama sua, si proximus amicorum nullis moriendi rationibus vitam fugeret: aversatus sermonem Nerva, abstinentiam cibi conjunxit. Ferebat ignari cogitationum ejus, quanto propius mala Reipub. viseret, ira, & metu, dum integer, dum intentatus, honestum finem voluisset. Scripsit in jure quosdam libros, verum eorum non constat numerus. l. 2. §. 28. ff. ne quid in loco pub. Videtur quædam scripsisse de usufructu, quantum colligi potest ex l. 13. §. 7. ff. de usufruct. ubi inquit Ulpianus, Sed, si adium usufructus legatus sit, Nerva filius, & lumina eum immittere posse ait: Responsa quoque ejus referuntur in Pandectis sæpissime, quæ ab aliis jurisconsultis refelluntur aliquando, ut videre est in l. 3. ff. de usufr. earum rer. aliquando & deridentur, ut in l. 9. ff. in quibus caus. pign. tacit. ubi inquit Paulus in fin. Et derisus Nerva Jurisconsultus, qui per fenestram monstraverat servos detentos ob pensionem, liberari posse.

G. Cassius Longinus ] Cassianorum familia Romæ vetusta atque illustis fuit, eaque patricia non plebeja ut vult Bertrandus, quamvis Taciti testimonio munitus, semper habita, ex hac oriundus noster, natus ex filia Tiberonis, quæ fuit neptis Servii Sulpitii, quamobrem proavum Servum Sulpitium appellat, ut tradit Pomponius. Fuit hic noster Consul temporibus Tiberii, cum Quartino, teste

Pomponio, quem erroris convincere tentat Lipsius in suis notis ad Tacit. Ita enim Tacitus 6. annal. cap. 15. Ser. Galba, L. Sulla *coff.* diu quæsito quos neptibus suis maritos destinaret Caesar, postquam instabat virginum ætas, L. Cassium & M. Vinicium legit. Vinicium oppidanum genus. Calibus ortus, patre atque avo consularibus, cetera equestri familia erat, mitis ingenio & comitæ facundiæ. Cassius plebei Romæ generis, verum antiqui honoratique, & severa patris disciplina eductus, facilitate sæpius quam industria commendabatur. Huic Drusillam, Vinicio Juliam, Germanico genitas conjungit. Ad hunc locum ita Lipsius. Ita rectè, inquit, estque ille qui consul cum M. Vinucio Quartino fuit anno urbis 783. Atque ejusmodi argumentis & rationibus hanc sententiam suam adstruit, quando ita pergit. Nam Suetonius disertè notat Drusillam collocatam L. Cassio Longino consulari: Pomponius de origine juris manum adiit viris magnis, qui scribenti credunt, C. Cassium Longinum illum, qui jurisconsultus, consulem fuisse cum Quartino Tiberii temporibus. Atque censent hunc ipsum esse, qui progener Cæsari nunc factus. Mihi cautio est ne temerè credam homini, etiam alias fallaci. Erras. Non est hic, Pomponi, juris Antistes ille, quem censes. Primum quia Tacitus inter elogia morum generisque, laudem ei nullam tribuit juris: deinde quia prænominibus diversi. Lucius hic est; Cajus ille tuus, constanti veterum scripto. Casiodorus ecce L. Cassium, & M. Vicinium *coff.* nominat. Suetonius in Cajo, L. Cassium Longinum: Et Tacitus in hoc loco. Diversi vita etiam & morte. Jurisconsultus ille in honore sub Claudio fuit, Syriam administravit, pulsus a Nerone, per Vespasianum rediit, & omne illud tempus vixit: iste sub Cajo proconsul Asiæ, & monentibus sortibus caveret Cassium, a Tyranno occisus est. Denique quid respondes ad illud Taciti, facilitate sæpius quam industria commendabatur? demit ecce illi industriam, ingenium: & audeant dicere, hæc convenire in magnum illum Sacerdotem. Hæc vir eruditione & doctrina florentissimus Justus Lipsius. Verum fugit me, quamobrem



obrem nostri Pomponii de C. Cassio Longino sermo, ei ita stomachum moverit: Quippe nullus dubito, quin Pomponius noster, si cum Lipsio in eundem sermonem incidisse ipsi contigisset, ejus de L. Cassio Longino sententiam amplexus fuisset, nec ille fortasse Pomponii opinionem rejecisset. Facile Lipsio concedimus, alium esse & diversum a nostro, de quo Tacitus, quod tum prænomen, tum uxor, quam in matrimonio habuit, & id genus alia, quæ de eo prædicat Tacitus, declarant. Quod & Suet affirmat, appellans quoque Lucium Cassium virum consularem, in *vita Calig. cap. 24.* cum inquit, *Ex his Drusillam vitiasse virginem prætextatus adhuc creditur. Atque etiam in concubitu ejus quondam deprehensus ab avia Antonia, apud quam simul educabantur. Mox Lucio Cassio Longino consulari collocatam abduxit, & in modum justæ uxoris propalam habuit.* Ita ut quidem verosimile sit anno 782 Lucium Cassium Longinum consulem fuisse cum Vinucio; Et forte idem hic fuit, quem postea Caligula proconsulem Asiæ, occidendum delegavit. Verum ex hisce non perspicimus errorem, cujus Pomponium Lipsius accusat: Non enim is M. Vinicius collegam dat Cassio Jurisconsulto, sed Quartinum, quem a Vinicio diversum fuisse, ex eo satis constat, quod huic Vinicio neque a Tacito, neque in Fastis, neque a Vellejo sive a quoquam alio, Quartini nomen tribuatur; Consules ergo simul L. Cassius Longinus, & M. Vinicius, & quidem ordinarii. Rursus consules C. Cassius jurisconsultus, & Quartinus, sed suffecti. Et quid si demus, inquit Guiel. Grotius. M. Vinicius nomen Quartini habuisse, potuit idem diversis temporibus L. Cassii Longini & C. Cassii Jurisconsulti in consulatu fuisse collega. Neque mirum id cuiquam videri potest in tanta suffectorum consulum multitudine, præsertim cum in Fastis Cassiodori tertio anno, postquam M. Vinicius & L. Cassius eum gesserunt honorem, iterum Vinicii & Longini nomen occurrat. Cum interjecto tempore Claudius Cæsar rerum summa potiteretur, Cassium

Sy-

Syriæ Provinciæ præfecit, ut testatur Josephus *lib. 20. cap. 1.* Defuncto rege Agrippa, inquit, sicut superiore volumine diximus, Claudius Cæsar misit successorem Marso Cassium Longinum, memoriæ regis amici hoc tribuens, a quo vivo adhuc per literas sæpe rogatus fuerat, ut Marsum amoveret ab administratione rerum Syriæ. Quam in Provincia cum esset, tunicam talarem, & sacerdotalem stolam, quam solum summum pontificem induere fas est, in Castellum Antonianam deponere voluit, Cæsaris mandatum de hac re Hierosolymitanorum primatibus exponens, ut esset in Romanorum potestate, quemadmodum olim fuerat. Joseph. dict. loc. Attamen postea Cæsar Claudius interveniente Agrippa Juniore, permisit Judæis, ut sacræ stolæ custodiam haberent. Ex eo potuit fere prædicari, quod legimus apud Livium de Sempronio: Bello quoque bonus habitus, ad cetera, quibus nemo ea tempestate instructior civis habebatur, congestis omnibus humanis a natura fortunaque bonis, nobilis idem ac dives erat: forma viribusque corporis excellebat, facundissimus habebatur. seu causa oranda, seu in Senatu & ad populum suadendi locus esset: juris Pontificii peritissimus; super hæc bellicæ quoque laudes, consulatus compotem fecerat. Quippe ita de Cassio nostro Tacitus 12 *annal. cap. 11.* Datum post hæc C. Cassio, qui Syriæ præerat, deducere juvenem ad ripam Euphratis. Ea tempestate Cassius ceteros præeminebat peritia legum. Nam militares artes per otium ignotæ, industriosque ac ignavos pax in æquo tenet, Attamen quantum sine bello dabatur, revocare priscum morem, exercitare legiones, cura, provisu deinde agere, ac si hostis ingrueret. Ita dignum majoribus suis, & familia Cassia ratus, per illas quoque gentes celebrata. Non legibus itaque tantum armatus, sed & armis quoque decoratus, ut utrumque tempus & bellorum & pacis rectè posset gubernari, ut inquit Imperator in *proem. inst.*) facile sibi in civitate summam conciliavit auctoritatem, atque ad summos honores aditum patefecit. Quæ fortasse nimia auctoritas Ne-

roni



roni suspecta, causa fuit, ut eum civitate ejecerit. Paulo tamen severiorem fuisse, quam ista ferebant tempora, ex Tacito perspicimus *lib. 14. c. 43.* qui memorat eum in Senatu severam in Pedanii secundi, præfecti urbis, a servo suo interfecti, reliquam, quæ sub eodem tecto mansitaverat, familiam, sententiam protulisse: obtinebat enim ex vetere more, ut domino occiso omnem familiam ad supplicium agi oporteret, idque etiam libera Repub. Quem priscæ severitatis ritum firmavit S. C. Silanianum sub Augusto, quo cautum refert Ulpianus *l. 1. ff. ad S. C. Silanian.* Quod, cum aliter nulla domus tuta esse possit, nisi periculo capitis sui, custodiam domini, tam ab domesticis, quam ab extraneis, servi præstare cogantur, S. C. introducta sint de publica quaestione a familia necatorum habenda. Quare Paulus 3. sentent. Domino occiso, de ea familia quaestio habenda est, quæ intra tectum fuit, vel extra tectum cum domino, eo tempore quo occidebatur. Hinc in *l. 1. §. 31. ff. eod.* Cum dominus in itinere esset occisus, de his, qui una cum eo fuerunt, cum occideretur, vel cum una fuissent profugerunt, supplicium sumendum est. Huic Neronianum Senatusconsultum amplius adjecit, ut, occisa uxore, etiam de familia viri quaestio habeatur; idemque ut juxta uxoris familiam observetur, si vir dicatur occisus, Paulus *dict. loc.* quod quamvis durum videatur, attamen ita scriptum est. Quare & ipse Cassius sententiam suam hisce verbis finit; Habet aliquid ex iniquo omne magnum exemplum, quod contra singulos utilitate publica rependitur. Tandem noster luminibus orbatus est, quam calamitatem & altera excepit, scil. in insulam Sardiniam ejus deportatio, quanquam luminibus captus infensum tamen Neronis animum effugere non poterat: Quæ omnia describit Tacit. *annal. 16. cap. 7. & 8.* ita enim: Mortem Poppæe ut palam tristem, ita recordantibus latam ob impudicitiam ejus sevitiæque, nova insuper invidia Nero complevit, prohibendo C. Cassium officio exequiarum, quod primum indicium mali, neque in longum dilatum est. Sed Silanus

lanus additur. Nullo crimine, nisi quod Cassius opibus vetustis, & gravitate morum, Silanus claritudine generis, & modesta juvenia præcellebant. Igitur missa ad Senatum oratione, Removendos a Rep. utrosque, differuit: Objectavitque Cassio, quod inter imagines majorum etiam C. Cassii effigiem coluisset, ita inscriptam: DUCI PARTIUM: Quippe semina belli civilis, & defectionem a domo Cæsarium quæsitam. Ac ut memoria tantum infensi nominis ad discordias uteretur, adsumpsisse L. Silanum Juvenem genere nobilem, animo præruptum, quem novis rebus ostentaret. Ipsum dehinc Silanum increpuit iisdem, quibus patruum ejus Torquatum, tanquam disponderet jam imperii curas, præficeretque rationibus & libellis & epistolis libertos! inania simul & falsa. Nam Silanus intentior metu, & exitio patrum ad præcavendum exterritus erat. Inducit post hac vocabulo indicum, qui in Lepidam Cassii uxorem, Silani amitam, incestum cum fratris filio, & diros sacrorum ritus consfingerent &c. Tunc (inquit) Senatusconsulto Cassio & Silano exilia decernuntur; de Lepida Cæsar statueret. Deportatusque in insulam Sardiniam Cassius, & Senatus jus exspectabatur. Ultima hæc verba variis ab auctoribus emendantur modis; Huic vulnere, inquit, Lipsius ad hunc locum, non medeor. Palmerius legit (ita ab Hieronimo Berchemio accepi, veteri meo amico) Senatus jussus exspectabatur. Franciscus Medices & senectus ejus exspectabatur. Vetranius ita scriptum legit, Deportatusque in insulam Sardiniam Cassius e Senatus jussu spectabatur, id est ex Senatus decreto. Haud scio (inquit) damnato Cassio quale jus Senatus exspectaretur. Franciscus Medices, ut diximus, legendum putabat, & Senectus ejus exspectabatur: id est, ut senectute caderet, contra quam acciderat Silano, cujus senectus non exspectata fuit. Alii potius legendum volunt: & exitus ejus exspectabatur. Hoc est timebatur, ne Centurionem Nero ad cædem ejus mitteret, ut in Silanum factum fuerat, & ut moris erat tunc, ad fugien-



giendam invidiam civitatis. Quidam delenda hæc verba opinantur, quoniam & sine his oratio satis integra: eaque nullo modo ad sententiam aptari posse putant, nisi hunc in modum trajiciantur: Tunc *Senatusconsulto Cassio & Silano exilia decernuntur, de Lepida Caesar statueret. Et Senatus ocus exequebatur: Deportatusque in insulam Sardiniam Cassius. Silanus tanquam Naxum &c.* Nonnulli iterum ea verba retinenda omnino putant, neque temerè delenda, verum pro vocabulo &, nec reponunt, atque legunt, *nec Senatus jus expectabatur*, id est, probabatur: spectari enim sæpius pro probari usurpatum legi affirmant, in qua significatione occurrit apud Ciceronem, 3. in *Verr. cap. 78.* ubi inquit. Ex omni pecunia, quam aratoribus solvere debui- sti, certis nominibus deductiones fieri solebant: primum pro *spectatione, & Collybo: Deinde pro nescio quo cerario.* Et in eadem significatione apud Virgilium aliosque probatæ notæ veterum monumentorum auctores.

— — — *Sunt nobis fortia bello*

*Pectora: Sunt animi, & rebus spectata juvenus.*

Virgil. 8. *Æneid.* 12. id est experimentis probata, decen- nali scilicet prælio, Servius. Et Terent. *Adelph. act. 5. Scen. 5.*

*Nam is mihi profecto est servus spectatus satis.*

sic quoque Andr. in prolegom.

*Posthac quas faciet de integro Comedias.*

*Spectandæ, an exigendæ vobis sint prius.*

*Spectandæ id est probandæ. Idem quoque act. 1. Scen. 1. vers. 64.*

— — — *Enimvero spectatum satis,*

*Putabam, & magnum exemplum continentia.*

*Spectatum id est probatum.* Hanc lectionem orationis sen- sui cæteris magis conjunctiorem putant, atque sensum esse, *Senatusconsulto Cassium & Silanum exilio quidem esse damnatos, verum Neronem Senatus jus sive judicium non spectantem vel probantem Cassium in insulam Sardi- niam*

niam deportasse, Silanum vero per Centurionem interfici iussisse, atque ita rejecisse Neronem senatus decretum, sententiamque mutasse: *exilium* enim & *deportatio in insulam*, diversa sunt. Exilii enim nomen generale est *l. 5. ff. de interd.* quippe & pro relegatione nonnunquam sumitur, quæ poena mitior est deportatione; relegati enim in insulam in potestate sua liberos retinent, quia & alia omnia jura sua retinent: tantum enim eis insula egredi non licet, & bona quoque sua omnia retinent. *l. 4. ff. eod.* Deportatio autem adimit civitatem Romanam *l. 6. ff. eod. l. 2. §. 17. ff. de pœnis.* Nec in Silani causa iudicium Senatus a Nerone probatum, cum eum exilio a senatu damnatum, morte punivit. Guiel. Grotius ita locum emendat, *Nec Senatus iussus expectabatur.* Atque hac ratione vulneri mederi posse existimat. Hoc enim voluit Tacitus, ait, postquam Senatusconsulto exilium generali vocabulo Cassio esset decretum, non præfinito certo aliquo loco, intra quem se contineret, quem senatus suo arbitrio reservaverat, milites Neronianos Cassium iussu Principis, non expectato Senatus imperio, in pessimi Cæli insulam, quo certius periret, deportasse. Sardinia enim pestilentia aëris infamis erat, hinc Martial. *lib. 4.*

— — — Cum mors  
Venerit in medio Tibure Sardinia est.

Videor mihi quasi in alium terrarum orbem delatus, quando hanc Criticorum turbam, quacum mihi res est, intueor, & plane alienam personam induo, quoties censoris agendi necessitas mihi imponitur; itaque qua me potissimum ratione expediam non video, & fateri necesse habeo, hanc opinionum varietatem me adeo fluctuantem efficere, ut quo me vertam, nesciam: utpote quæ mihi maiorem difficultatem puriant, quam ipse textus, quem emendandum suscepere delicati atque acuti nostri scioli, verborum aucupes diligentissimi & severi, qui in emendandis & interpretan-

dis



dis auctoribus eorumque scriptis dilacerandis totum vitæ spatium consumunt, & vix aliquid sese profecisse putant, nisi unum vel alterum cujusdam scriptoris verbum, vel sensum emendando, obscuriorem sæpissime vel magis multilatum, vel plane transformatum, id est ex alieno suum effecere, quem nobis pro auctoris genuino sensu vel propriis verbis obtrudunt. Verum hæc ideo a me dicta non sunt, quasi nullam emendationem vel interpretationem admittere vellem, neutiquam sane; eam enim quandoque summe necessariam arbitror, verum maneat usus & tollatur abusus, nimiaque ista licentia, quam sibi quidam censores & Critici arrogant, limitetur. Eam nemini concedendam, neutiquam vero Theologo in divinis explicandis literis, & Jurisconsulto in legibus interpretandis censeo, ne divinæ scripturæ autoritas ab humano pendeat arbitrio, vel incerto eoque arbitrario utamur jure, & jus novum quotidie constituatur. Memini me nuper non plane a me dissentientem, verum erudite admodum & docte de æffrenata hac quorundam criticorum & censorum libertate audivisse disputantem, Virum Consularem, amplissimis functum & etiamnum fungentem in civitate nostra Trajectina honoribus, ejusdemque quondam nomine confessui ordinum generalium, qui Hagæ comitis est, delegato, nunc vero illustribus & potentibus Dioceleos Ultrajectinæ ordinibus a secretis, D. *Paulum Voet van Winsen*, Virum, inquam, in omni disciplinarum genere exercitatum, & in publicis gerendis negotiis promptum, cujus e jucundissima consuetudine, quoties eâ uti mihi licet, semper doctior discedo. Sed ad rem redeamus, fateor hæc Taciti verba aliqua indigere emendatione, nisi dictionem &, idem significare dicamus quod *quamvis*, ita ut verborum sensus posset ejusmodi admitti, Et *deportatus in insulam Sardiniam Cassius*, & *Senatus jus expectabatur*, id est *quamvis Senatus jus* sive decretum *expectabatur*, de certo scil. loco, intra quem sese contineret Cassius. Vel ut superius annotavimus loco dictionis

&, voculam *nec*, reponere possumus, & quia levis tantum hæc emendatio, ad sensus intellectum sufficiens, eam cæteris præferendam existimavimus; Ita ut verborum sensus sit: *Deportatusque in insulam Sardiniam Cassius, nec Senatus jus expectabatur*, id est deportavit eum in dictam insulam Nero, antequam Senatus jus sive decretum de certo aliquo loco Cassii exilio destinato ad eum venisset: decreverat quidem Senatus exilium Cassio, verum locum exilii non eodem decreto statuerat, sed suo reservaverat arbitrio. Cum autem summo adversus Cassium Cæsar Nero odio flagraret, ideoque nihil magis quam ejus interitum cuperet; eum in dictam insulam, cujus pessimum est Cælum, deportavit, non expectato Senatus jure sive decreto, fortasse quia conjiciebat Senatum ad mitiorem inclinaturum pœnam Cassio infligendam, & consequenter vel ipsum exilium mitigaturum, vel exilii locum æquiores decreturum. Verum non respondit voto Neronis rerum eventus, supervixit enim ei Jurisconsultus noster, & a Vespasiano revocatus diem suum obiit, ut Pomponius testatur, relinquens posteris gloriosam sui memoriam, ut apud Plin. legimus, *lib. 7. epist. 24.* Lator, inquit, *etiam quod domus aliquando C. Cassii, hujus qui Cassianæ Scholæ princeps & parens fuit, servi & domino non minori.* Implebit enim illam *Quadratus meus*, ut decebit, rursusque ei pristinam dignitatem, celebritatem, gloriamque reddet, cum tantus orator inde procedet, quantus ille jurisconsultus. Multa noster doctrinæ & eruditionis suæ reliquit documenta, quæ abunde testantur summum eum fuisse Jurisconsultum; juris civilis enim decem aut plures fortasse composuit libros; decimum librum citat Ulpianus in *l. 70. §. 2. ff. de usufruct.* Et octavi fit sæpius mentio eod. tit. in *l. 7. §. 3. & l. 9. §. 5.* Et ex eodem fortasse libro desumpta, quæ refert Ulpianus *l. 17. §. 1. eod.* Ad hosce libros quædam annotasse Aristonem ex allegatis legibus perspicimus, quemadmodum quoque Javolenum fecisse constat ex *l. 28. §. 1. ff. de statulib.* Præterea



terea Cassium ad Vitellium notas scripsisse testatur Ulpianus in *l. 12. §. 27. ff. de instr. vel instrum.*

*Proculus*] Quemadmodum Cajus Cassius Sabino, ita Nervæ Proculus successit, & uterque doctrinam, quam diversæ sectæ antecessores Sabinus & Nerva professi sunt, tanquam sibi a diversæ disciplinæ Principibus Attejo nimir. Capitone, & Antistio Labeone summæ auctoritatis Jurisconsultis per manus traditam, magna constantia & mirabili perseverantia amplexi fuerunt foveruntque. Proculus dictus, quia a patre peregrinante a patria procul natus. *Proculus*, qui foris agente patre natis, Alexand. ab Alexand. *genial. dier. lib. 1. cap. 10.* Vide quoque Festum in verb. *Proculum*. Quisnam hic fuerit Proculus noster, cum plures ejusdem nominis extiterint, sub judice lis est, nisi illum eundem esse vellemus affirmare, qui Othonis partes sequutus, ab eo jam rerum potito, Præfectus Prætorio creatus est. Eum appellat Tacitus Licinium Proculum, *virum pravum, callidum, urbana militiæ impigrum, bellorum insolentem.* Ita enim Tacit. 1. *Hist. cap. 82.* Manipulati allocuti sunt Licinius Proculus, & Plotius Firmus Præfecti scil. Prætorii, quippe *cap. 46.* ejusdem libri, tradit auctor Plotium Firmum & Licinium Proculum, Prætorii Præfectos sibi legisse milites. Et idem auctor *cap. 87. ejusd. lib.* Peditum equitumque copiis Suetonius Paullinus, Marius Celsus, Annii Gallus, rectores destinati. Sed plurima fides Licinio prætorii præfecto. Is urbana militiæ impiger, bellorum insolens, auctoritatem Paullini, vigorem Celsi, maturitatem Galli, ut cuique erat, criminando, quod facillimum factum est, pravus & callidus, bonos & modestos anteibat. Sic quoque 2. *Hist. cap. 33.* Otho pronus ad decertandum. Frater ejus Titianus, & præfectus Prætorii Proculus, imperitia properantes, fortunam & deos & numen Othonis adesse consiliis, affore conatibus testabantur. Et *cap. 39.* Præfecto Brixellum Othone, honor imperii penes Titianum fratrem, vis ac potestas penes Proculum præfectum, Celsus & Paullinus, cum prudentia eorum

nemo uteretur, inani nomine ducum, aliena culpa prætendebantur. Tribuni centurionesque ambigui, quod spretis melioribus deterrimi valebant. Putat Guiel: Grotius nostrum Proculum, de quo Pomponius, diversum ab eo, cujus Tacitus meminit, fuisse, ejusque prænomen fuisse Sempronium, non vero Lucinium: quod tamen certo affirmare vix possumus, quoniam de eo nihil Jurisconsultus noster, & quantum conjecturis assequi possumus, idem ille noster, cujus tot locis mentionem facit Tacitus, idque eo potissimum, quod tradit Pomponius eum plurimum potuisse, ideoque ejus majorem quam cæterorum, quibuscum uno eodemque tempore vixit Jurisconsultis, auctoritatem fuisse; quippe alterius ejusdem nominis Jurisconsulti, qui tanta auctoritate polluit, nusquam apud authores mentio sit, nisi quod temporibus Alexandri Cæsaris alium quoque Proculum summæ auctoritatis Jurisconsultum floruisse tradat Lamprid. *in vita Alexand.* Verum eum Papinianus vocat discipulum & Alexandri familiarem, ac socium, quæ nostro non conveniunt prædicata, utpote qui successit Nervæ, vixitque multis ante eum seculis temporibus scil. Neronis. Sempronium Proculum, de quo in *l. 47. ff. de leg. 2.* hujus nepotem fuisse verosimile est. Quem consuluit, tanquam non levem juris authorem, ut eum Divi fratres appellant *l. 17. ff. de jure patron.* cujus summa autoritas Proculianæ sectæ nomen dedit. Scripsit autem Proculus *epistolarum* libros octo, qui in indice Justiniano recensentur, vel potius undecim reliquit, ut ex plurimis legum in digestis inscriptionibus perspicimus: ita *l. 69. ff. de contrah. empt.* cujus inscriptio *Proculus lib. 11. epistolarum.* Eadem quoque inscriptio *l. 12. ff. de præscript. verb. & l. 17. ff. de pact. dotal.* Composuisse præterea notas in quosdam Labeonis libros colligimus ex *l. 10. §. 1. ff. de neg. gest. & l. 69. ff. de cond. & demonstr.* ubi inquit Ictus Gajus, Si ita expressum erit, Titio si voluerit, do lego, apud Labeonem Proculus notat, non aliter ad heredem legatarii pertinere, quam si ipse



*legatarius voluerit ad se pertinere, quia conditio persona injuncta videtur.* Notavit vero ad Proculum Ursejus Ferox, ut colligi potest ex l. 11. §. 2. ff. de aqua & aqu. pluv. Apud Ferocem Proculus ait. &c.

*Nerva Filius* ] Floruit eodem tempore, ut inquit Pomponius, & Nervæ filius, quem patrem fuisse existimant M. Cocceji Imperatoris, qui imperium Romanum optimè administravit. Tacitus 15. annal. cap. 72. meminit Cocceji Nervæ prætoris designati, quem ita a Nerone elatum testatur, ut super triumphalem in foro imaginem, apud palatium quoque ejus sisteret. Quod ad nostrum pertinere Guiel. Grotius temporum seriem affirmare tradit. Ulpianus testatur, eum adeo felicis ingenii fuisse, ut decem & septem annos natus publice de jure responsitaverit. l. 1. §. 3. ff. de postul. Pueritiam, inquit, dum minorem annis decem & septem, qui eos non in totum complevit, prohibet postulare; quia moderatam hanc ætatem ratus est ad procedendum in publicum, qua ætate, aut paulo majore fertur Nervæ filium de jure responsitasse, Nominatur in jure frequenter, ac sæpius citatur. Scripsit autem libros de usucapionibus, ut testatur Papinianus l. 47. ff. de acq. possess. Plura de eo nuspiam memorantur.

*Fuit & alius Longinus ex equestri quidem ordine* ] Ex hisce verbis satis perspicimus, qua fuerit origine natus Cassius Longinus, de quo supra quædam commentati sumus; utpote quæ aliquam ad eum relationem habent, quasi dicere vellet Pomponius, quamquam hic noster Longinus ex Equestri quidem ordine quoque originem ducit, alius & diversus tamen est ab eo, de quo ante diximus. Ad Præturam eum pervenisse testatur Pomponius, itaque & diversus ab Consule Cassio Longino, cujus jam vitam, qui collegam in consulatum habuit Quartinum, descripsimus. Diversus quoque ab eo, cujus meminit Tacitus, quem plebeji generis Drusillam uxorem duxisse 6. annal. cap. 15. & Suet. consularem fuisse affirmat. Cum autem nuspiam plura, quam

quæ de eo tradit hic Pomponius, inveniamus, neque de scriptis ejus, sive responsis aliisque ejus monumentis nec nobis plura addendi vel de eo prædicandi est facultas.

*Cassio Calius Sabinus successit*] Non minimæ hic auctoritatis Jurisconsultus Longino successit, qui sub Vespasiano plurimum potuit, ob singularem juris civilis scientiam, qua præcellebat: quæ & in causa fuit, quod sibi Othonis quoque voluntatem & benevolentiam conciliavit, ut qui consulatum & quidem bimestrem in eum contulit, ut Tacitus testatur *Hist. lib. 1. cap. 77.* *Calio ac Flavio Sabinis, in Julios, Ario Antonio & Mario Celso, in Septembres: quorum honori ne Vitellio quidem victor intercessit.* Notandum post bella civilia honores & magistratus festinatos ac vulgatos, & interjecto tempore eo indignitatis prolapso honores & consulatus, ut Commodio imperante in unum annum viginti quinque consules crearentur. Meminit nostri Jurisconsulti quoque *Gell. lib. 7. cap. 4.* *Cum, inquit, Pileatos servos venum solitos ire, quorum nomine venditor nihil præstaret, Calius Sabinus jurisperitus scriptum reliquit. Cujus rei causam esse ait, quod hujusmodi conditionis mancipia insignia esse in vendendo deberent, ut emtores errare & capi non possent.* Quæ verba videntur desumpta ex libro, quem scripsit de Edicto Ædilium, cujus mentionem facit *Gell. lib. 4. cap. 2.* quoniam in eo de vendundis mancipiis tractare maxime subjectæ materiæ consentaneum est. Quam conjecturam a vero non alienam esse confirmat Jurisconsultus Gajus *l. 20. ff. de Ædil. edict.* auctoritatem Cœlii Sabini allegans, in quæstione de redhibendo mancipio. Notandum vero aliquando simpliciter Cœlium, nonnunquam etiam Cæcilium in digestis appellari, interdum addito cognomine Sabino, quod ideo dictum volo, ne sibi quis persuaderet, de alio sermonem habere Ulpianum in *l. 1. §. 7. ff. quando de pecul. act. annal. & l. 17. §. 1. 6. 7. 8. 12. 13. 15. 16. & l. 38. §. 7. & 11. ff. de Ædilit. Edict.* Et Venulejum in *l. ult. §. 2. ff. eod. & Pa-*  
pi-



pinianum , cum ejus quoque meminit in l. 72. §. 7. ff. de cond. & demonst. addito nomine Sabino.

Pegasus ] Proculum excepit Pegasus tanquam ejusdem disciplinæ, cujus princeps Antistes Labeo erat , successor & defensor ; floruit temporibus Cæsaris Vespasiani, sub quo consul fuit, sed suffectus cum Pusione, quando Senatusconsultum, quod ab eo Pegasianum nomen habet, conditum est, cujus meminit Justinianus Imperator inst. de fideicom. hered. §. 5. Sed quia , inquit, heredes scripti, cum aut totam hereditatem, aut pene totam plerumque restituere rogabantur, adire hereditatem ob nullum vel minimum lucrum recusabant , atque ob id exstinguebantur fideicommissa: postea Vespasiani Augusti temporibus Pegaso & Pusione consulibus Senatus censuit , ut ei , qui rogatus esset hereditatem restituere , perinde liceret quartam partem retinere , atque ex lege Falcidia ex legatis retinere conceditur. Nec obstat quod horum consulum nomina non inveniantur in fastis, quippe cum suffecti non ordinarii consules erant , ideoque eorum nomina in fastos non fuisse relata , nihil est quod miremur. Quemadmodum nec in illis reperiuntur Trebellius Maximus & Annæus Seneca , de quibus consulibus idem ait Justinianus Inst. eod. §. 4. Cum inquit, Et Neronis quidem temporibus Trebellio Maximo & Annao Seneca consulibus Senatusconsultum factum est. Quod Trebellianum a consule Trebellio dictum. Verum postea Justinianus Pegasianum Senatusconsultum in Trebellianum transfudit, ut inquit ipse Imperator §. 7. Inst. eod. ubi & rationem & causam hujus transfusionis reddere Imperatori placuit, cum inquit , Sed quia stipulationes ex Senatusconsulto Pegasiano descendentes , & ipsi antiquitati displicuerunt , & quibusdam casibus capciosas eas homo excelsi ingenii Papinianus appellat , & nobis in legibus magis simplicitas , quam difficultas placet, ideo omnibus nobis suggestis tam similitudinibus , quam differentiis utriusque Senatusconsulti , placuit, exploso Senatusconsulto Pegasiano , quod postea supervenit , omnem auctoritatem Trebelliano Senatusconsulto præstare, ut ex eo fideicommissaria ha-

veditates restituantur. Eodem imperante Vespasiano præfectus urbi fuit noster Pegasus, atque etiam ad Domitianum imperio devoluto, quod perspicimus ex Juvenali Poëta Sat. 4. vers. 77.

————— Rapta properabat ab olla  
Pegasus, attonitæ positus modo villicus urbi :  
Anne aliud tunc Præfecti ? quorum optimus , atque  
Interpres legum sanctissimus , omnia quanquam  
Temporibus diris tractanda putabat inermi  
Justitia.

Villicus dubiam hic habet significationem; vel enim pro custode urbis sumitur, quippe villicus proprie appellatur villæ gubernator, unde a villa villicus nomen habet. Hinc villicus dicitur servus, (ut M. Cato & L. Columella tradunt) qui villam gubernat, aut præest pago, & totius rei rusticæ curam habet. Villicus, ut ait M. Varro de re rust. primo agri colendi causa constitutus est, atque appellatus a villa, quod ab eo in eam convehuntur fructus, & evehuntur, quum veniunt. Quare ita quoque interpretari Poëtæ mentem possumus, quasi significare vellet, Romam jam non esse urbem suis gaudentem commodis ac legibus, sed villam esse, ejusque Præfectum villicum, extraneum, rusticum, non civem Romanum, quippe ob nimiam Neronis crudelitatem omnes honores & dignitates viluerant, nec licebat cuivis digne fungi officio. Ad hæc verba Villicus urbi Pithœus eleganter, sub Nerone urbis præfecturam jacuisse dicit, quasi scilicet urbs ipsa jam tum esset villa Principis & vilico traderetur. Primam tamen significationem cæteris præferrem, in qua occurrere videtur apud Cic. in Orat. pro Cn. Plancio. cap. 62. ubi magistratus, quasi Reipub. villicos id est custodes, præfectos, magistratos appellat, quando inquit, Omnes enim istiusmodi artes in iis reprehenduntur, qui cum professi fuerint, satisfacere non possunt: non in his, qui abfuisse ab istis studiis consueverunt vir-

tus,



ius, probitas, integritas, in candidato non lingua volubilitas, non ars, non scientia requiri solet. Nos in mancipiis parandis quamvis frugi hominem, si pro fabro aut pro textore emimus, ferre molestè solemus, si eas artes, quas in emendo sequuti sumus, forte nesciverit. Sin autem quem villicum imponeremus, quem pecori præficeremus, nihil in eo nisi frugalitatem, laborem, vigilantiam esse curamus. Sic Populus Rom. deligit magistratus, quasi Reipub. villicos: in quibus si qua præterea est ars, facile patitur: sin minus, virtute eorum & innocentia contentus est. De scriptis ejus nihil certi constat, citatur aliquoties in Digestis a Jurisconsultis, ut ab Ulpiano in l. 7. §. 1. ff. de Senat. & ab eodem in l. 41. ff. de acquir. rer. dom. sic etiam a Pomponio, Gajo, Papiniano, Paulo, aliisque juris auctoribus.

Priscus Favolenus ] Cœlio Sabino Priscus Favolenus sive Jabolenus successit, ut Pegaso Celsus scil. in eadem tradenda & explicanda juris disciplina; floruit autem temporibus Hadriani Trajanique, atque ad Antonii Pii imperium pervenisse Rutilius & Bertrandus ex quodam Capitolini loco in Antonini vita colligunt, cum inquit Antonium Pium multa de jure sanxisse, usumque fuisse Jurisperitis, Vinidio Vero, Salvio volente, Volusio Metiano, Ulpio Marcello & Jaboleno. Verum autumat Guielm. Grotius, Capitolinum de alio Jaboleno, quam de nostro, fortasse de ejus filio sermonem habere; vix enim credibile putat nostrum, quem scribit Plinius lib. 6. epist. 15. dubiæ sanitatis fuisse, per totum imperium Hadriani viginti & amplius annis ea vixisse valetudine, ut successori ejus consilia præbere capax fuerit, ut ex dicto Capitolini loco perspicimus. Functum hunc nostrum in Africa & Syria proconsulatu colligit Bertrandus, ex l. 5. ff. de manumis. vind. Ubi ita Julianus, An apud se manumittere possit is, qui consilium præbeat, saepe quaesitum est? Ego quum meminissem Iavolenum præceptorem meum, & in Africa & in Syria servos suos manumisisse, cum consilium præberet, exemplum ejus secutus, & in Prætura

& consulatu meo quosdam ex servis meis vindicta liberavi, & quibusdam Prætoribus consulentibus me idem suasi. Ex quibus constat inquit Javolenum magistratum in Africa & Syria gessisse; cum tantum hi, qui magistratum gererent, consilium præbere possent manumittere volentibus, & servos manumittere, vid l. 2. ff. de offic. ejus cui mand. Præterea comparationem instituit Julianus, quasi dicere vellet se iisdem fungentem magistratibus, quos præceptor suus Javolenus gesserat, ejus exemplum secutum idem fecisse, scil. & consilium præbuisse & servos suos manumisisse: quippe cum manumissio majoribus tantum competeat magistratibus, non poterat Julianus hic allegare exemplum Javoleni, quod imitandum sibi proposuerat, nisi & ipse majorem gessisset magistratum. Unde Glossa quoque annotat ad dictam legem, Javolenum iisdem functum fuisse magistratibus, quos se gessisse Julianus tradit, id est, & Prætorem & consulem fuisse. Ex eadem lege constat Jurisconsulto nostro Julianum præceptore usum fuisse, postea vero dubiæ sanitatis fuisse, & ut nonnulli volunt vix mentis compotem, ex supra dicta Plinii epistola. Cum enim Passienus Paulus elegos recitaret, & ita cepisset dicere, Prisce Iubes. Ad hoc Javolenus Priscus, (aderat enim ut Paulo amicissimus) ego vero, non jubeo, Cogita qui risus hominum, qui joci, est omnino Priscus dubiæ sanitatis: interest tamen officiis, adhibetur consiliis, atque etiam jus civile respondet: quo magis quod tunc fecit, & ridiculum & notabile fuit. Scriptis claruit plurimis, extant ejus quindecim libri ex Cassio, quorum passim in legibus fit mentio; ex decimo quinto desumpta l. 114. ff. de verb. sig. Epistolarum libros quatuordecim conscripsit. Et ex quartodecimo desumpta lex l. 56. ff. de cond. & demonst. Ad Plautum quinque composuit, ex quinto descripta lex 83. ff. de V. S. In Epitomen quoque redegit Labeonis posteriores libros, ut constat ex indice Justiniano, & multis inscriptionibus: Imo & notas ad eos scripsisse, videtur colligi posse ex l. 42. ff. de liberal. caus.



*Pegaso, Celsus Pater Celfo Patri, Celsus Filius.*] Floruit hic Celsus Pater temporibus Trajani, a quo tanto in honore habitus est, ut ei statuam erexerit. Celsus filius patris meminit in *l. 29. ff. de legat. 2.* eumque in consilio Duceni Veri Consulis fuisse refert, atque responsum patris de ejusmodi quæstione in dicto consilio proposita memorat, ut, cum Otacilius Catulus filia ex asse hærede instituta, liberto ducenta legasset, petiissetque ab eo, ut ea concubinæ ipsius daret, & libertus vivo testatore decessisset: & quod ei relictum erat, apud filiam remansisset; quærebatur an filia id fideicommissum retinere posset, an concubinæ, cui relictum erat, reddere teneretur? & respondit Celsus filiam cogi posse, ut præstet fideicommissum concubinæ, atque itum in sententiam suam. Ejus quoque meminit Ulpianus in *l. 3. §. 7. ff. cond. caus. dat.* ubi & sententiam atque responsum ejusdem quoque refert. Hujus filius dictus fuit *P. Juventius Celsus* ob summam in jure scientiam clarus. Is teste Pomponio bis consulatum gessit, primum imperante Trajano adeptus, collegam habens, ut quidam ex fastis affirmare volunt, Crispinum, anno 863 sive 865, Cassiodoro teste; Verum observandum ejus Celsi, cujus Cassiodorus meminit, alium fuisse prænomen ideoque diversum a nostro, quod perspicimus ex tabula Maphæorum ab Onuphrio prolata, quæ ita habet

L. PUBLIBLIO CELSO II. C. CLO-  
DIO CRISPINO COSS. ID. APRIL.

Quæ inscriptio eo magis de alio intelligenda videtur, quod in illa de *11.* ejus consulatu agatur, in quo collegam habuit *Q. Iulium Balbum*, non vero *Crispinum*. Præterquam quod & prænomine ab nostro differt, fortasse idem ille, qui cum *Palma Pigrino* & *Lusio*, sub imperio Adriani, Bays, senatu jubente invito tamen Adriano occisus est, propter insidias, quas Cæsari parasse dicebatur, Spartianus in *Adriano*. Fuit itaque noster potius consul suffectus, quam obrem nulla in fastis primi consulatus mentio. Alte-

rum

rum consulatum gessit sub Hadriano, in, quo, ut modo diximus, collegam habuit *Q. Iulium Balbum*, ut ex inscriptione veteris marmoris Romæ reperti refert Bertrandus, & ex Senatusconsulto istis temporibus facto constat: quod Senatusconsultum habemus in *l. 20. §. 6. ff. de hered. petit.* ubi ita scriptum, *Pridie idus Martias Quintus Iulius Balbus, & Publius Iuventius Celsus, Titius Aufidius, Oenus Severianus consules &c.* Præter consulatum præturam quoque gessisse auctor est Plin. *lib. 6. epist.* ubi contentionem Celsi cum Licinio Nepote describit. Bertrandus præterea ex veteris marmoris inscriptione, quam apud Rusilium & Brissonium videre est, colligit, eum Antonini Imperatoris attigisse tempora, atque eum officio & munere promagistri in libellis Imperatori oblatis subscribendis functum fuisse. Adrianum vero Imperatorem Iuventium in consilio habuisse testatur Spartianus in ejus vita. *Quum judicaret, inquit, in consilio habuit non amicos suos aut comites solum, sed jurisconsultos, & præcipue Iulium Celsum, Salvium Iulianum, Neratium Priscum, aliosque, quos tamen Senatus omnis probasset.* Legendum autem pro Julio Iuventium, ut viri docti ante nos annotarunt. Libros complures composuit. *Digestorum* enim libros scripsit 39. Ipse meminit libri sui 36 & 37. *l. 29. & 30. ff. de legat. 2.* Præterea reliquit *epistolarum* libros undecim, ut perspicimus ex *l. 3. §. 1. ff. de minor.* *Commentariorum* quoque libros septem, & *questionum* 19 composuit, Ulpianus enim meminit libri noni decimi *questionum*, & *commentariorum* septimi *l. 19. ff. de aur. argen. mund. leg.* Fuit autem æquitatis & veritatis summus cultor & amator, unde ex ejus ore illa justitiæ definitio, quod *jus sit ars æqui & boni. l. 1. ff. de just. & jur.* Imo adeo æquitatis observantissimus fuit, ut & patris sui sententiam tanquam ab æquitate alienam corrigere palam non veritus fuerit, ut constat ex *l. 3. §. 7. ff. de cond. caus. dat.* Ad eum quoque pertinent, quæ refert Paulus in *l. 91. §. 3. ff. de verb. oblig.*

cum



cum inquit, Et Celsus adolescens scribit eum, qui moram fecit in solvendo Stichō, quem promiserat, posse emendare eam moram postea offerendo: esse enim hanc quæstionem de bono & æquo, in quo genere plerumque sub auctoritate juris scientiæ perniciosè erratur. Imo & ipsum Senatum aliquando contra bonum & æquum aliquid statuentem, increpuisse auctor est Plin. lib. 3. epist. Sane optandum esset, ut omnium, qui juri operam navant, & imprimis eorum qui justitiam administrant, menti altius impressum esset illud axioma, *stricto juri aequitatem semper præferendam*; summum enim jus summa injuria, ut inquit Cicero, ἀνὲρ ἑκούσιος appellat Aristoteles, id est jus exactius duriusque. *Leges res præclaræ sunt: sed qui eas accuratius, quam par est, intuetur calumniator est.* Hinc apud Colum. lib. 1. *Nec sane est nobis vindicandum quicquid licet. Nam summum jus antiqui summam putabant crucem.*

Priscus Neratius] Hic Celsi patris in jure disciplinam sive velis Labeonis principis ejusdem, doctrinam amplexus est. Virum animi dotibus præclarum & juris imprimis scientiâ excellentem, sub Trajano & Hadriano Imperatoribus floruisse perhibet Pomponius; Quanti eum existimavit Trajanus, constare potest ex l. fin. ff. si quis a parent. manumis. ubi ejus potissimum consilio Imperatorem usum fuisse legimus. Imo adeo eum existimavit, ut frequentem opinionem fuisse scribat Spartianus in ejus vita, Imperatori id animi fuisse, ut eum, non Adrianum successorem relinqueret, multis amicis in hoc consentientibus, usque eo ut Prisco aliquando dixerit, *commendo tibi provincias, si quid mihi fatale contigerit.* Id ipsum tamen non alienavit Hadriani jam summa rerum potiti ab eo animum, verum & ejus quoque in administranda repub. consilio usus est, eumque summo in honore habuit, atque eodem imperante consulatum gessit, in quo collegam habuit Annium. Verum ut constat ex l. 6. ff. ad L. Cornel. de sicar. ubi inquit Ictus, *Is qui servum castrandum tradiderit, pro parte*

*te dimidia multatur ex Senatusconsulto, quod Neratio Prisco & Annio Vero coff. factum est.* Scripta hic noster reliquit plurima. *Membranarum libri extant 7. ut constat ex inscriptione l. 18. ff. de in rem verso. Responsorum libri 3. meminit libri primi Ulpianus in l. 3. ff. de usufr. accres. Regularum libri quindecim. Ex libro tertio desumpta est l. 2. ff. de confirm. tut. ex quarto l. 2. ff. de servit. rust. prad. Ex quinto & sexto. l. 15. ff. de acquir. rer. dom. l. 40. ff. de usurp. & l. 13. ff. de acquir. rer. dom. Ex decimo l. 118. ff. de legat. 1. Præterea epistolarum libros edidit quatuor. Quarti meminit Ulpianus l. 12. §. 43. ff. de instr. vel instrum. leg. Denique Neratius lib. 4. Epistolarum Marcelli fratri respondit. &c. Fit quoque mentio epistolæ Neratii ad Aristonem in l. 19. §. 2. ff. locat. cond. Librum etiam de nuptiis scripsisse testatur Gellius lib. 4. cap. 4. in fine. Hæc eadem, inquit, Neratius scripsit in libro, quem de nuptiis composuit. Eundem quoque ad Plantium libros composuisse, tradit Ulpianus in l. 5. ff. de servit. prad. rust. Colligitur etiam ad Priscum Fulcinium quasdam scripsisse notas, ex l. penult. ff. de mortis caus. donat.*

*Aburnus Valens* ] Pandectæ Florentinæ legunt *Aburnius*; alii *Eburnius*. Fuit hic Javoleni successor, diversus ab eo *Valente*, quo consule Domitianus occisus traditur. Floruisse quidam opinantur nostrum sub Adriani & D. Pii imperio, ex Capitolini loco in vita Pii, cap. 12. ubi inquit, *Multa de jure sanxit, ususque est jurisperitis, Vindio Vero, Salvio Valente &c.* Neque obstat inquit *Grotius*, quod eum *Salvium Valentem* nuncupat *Capitolinus*, potuit enim eidem *Salvius Aburnius Valens* nomen esse. *Salvio* cuidam *Valenti* *Divum Pium* rescripsisse testis est *Ulpianus* in l. 7. §. 2. ff. de accus. *Isdem* (inquit) *criminibus*, quibus quis liberatus est, non debet *Præses* pati, eundem accusari: & ita *Divus Salvius Valenti* rescripsit. Libri, quos reliquit, in *Indice* habentur. *Fideicommissorum* septem scripsit, ut constat ex inscriptione l. 15. ff. de annu. leg.



ad quos pertinent, quæ legimus in *l. 78. §. 6. ff. de legat. 3. Actionum* quoque libros composuisse, & quidem septem vel plures videtur colligi posse ex inscriptione *l. fin. ff. ut in possess. legat. eatur*. Meminit ejus Paulus in *l. 82. §. fin. ff. de legat. 2. Servo alieno*, inquit, *posse rem domini legari Valens scribit*. Et *l. 78. ff. penult. ff. de legat. 3.* aliisque in locis.

*Tuscanus* ] Quisnam hic fuerit, nusquam legitur, itaque nec de eo nihil dicere vel annotare possumus: putant hic Fuscianum aliquem posse intelligi; meminit Tryphonius constitutionis D. Pii ad Tuscium Fuscianum Numidiæ legatum in *l. 7. ff. de legat. præstand.* verum an hæc ad nostrum referri debeant, cujus nomen mutatum volumus, mera conjectura est, ideoque nihil de eo certi affirmare possumus; erubescimus enim sine lege vel testimonio veterum aliquo monumentorum auctore loqui.

*Salvius Julianus* ] Facile Jurisconsultorum princeps, quamobrem nonnulli Græci scriptores ipsum quoque appellant *ῥωμαϊκῶν*, & fortasse eum Justinianus eadem de causa in indice, primum obtinere locum voluit, cognomento Severus, origine Mediolanensis, nobilissima oriundus familia, proavus Didii Juliani, ut refert Spartianus in ejus vita, cum inquit, *Didio Juliano, qui post Pertinacem imperium adeptus est, proavus fuit Salvius Julianus, bis consul, præfectus urbi, & jurisconsultus. Quod magis eum nobilem fecit.* Tanta in existimatione semper habita fuit Jurisprudentia. Ipse consulatus sui, sicut & præturæ suæ meminit in *l. 5. ff. de manumiss. vind.* Quo autem anno V. C. consulatum gessit, non satis constat: volunt nonnulli eum D. Pio imperante consulatu functum fuisse cum Torquato tertium, ut apud Cassiod. in *Chron.* Ad tempora enim D. Pii vixisse perspicimus ex *l. 18. ff. quod met. caus.* ubi de Imperatore Tito Antonino sermonem habet, quem tum temporis adhuc in vivis fuisse ex eo constat, quod Imperatorem eum appellat. Verum an primus hic fuerit  
ejus

ejus consulatus, quem sub imperio D. Pii gessit, dubitari posset, quippe, ut inquit Guielm. Grotius, non possum induci ut credam eum, cujus tanta sub Hadriano fuit celebritas, tam sero consulatum obtinuisse; potius itaque crediderim suffectum sub dicto Imperatore gessisse honorem. Cujus & consiliarium fuisse ex supra allegato Spartiani in *vita Hadriani*, loco ostendimus. Fuit autem discendi cupiditate adeo inflammatus, ut eam solam optimam vivendi rationem ducens, etiam agens annum octavum & septuagesimum, memor semper fuerit ejus sententiæ, qui dixisse fertur. *Etsi alterum pedem in tumulto haberem, non pigeret aliquid addiscere. l. 20. ff. de fideicom. libert.* Non mirum itaque nostrum Jurisconsultum ea discendi aviditate agitatum, tantos in juris civilis excolenda disciplina fecisse progressus, ut summæ autoritatis Jurisconsultus evaserit; ita ut in consilio semper eum habuerit Hadrianus, testante Spartiano, nomenque ejus magnæ semper apud antiquos commendationis fuerit. Hinc aliquando ab ipsis Imperatoribus *amicus, clarissimus* vir appellatur. Sub Hadriano autem perpetuum Edictum composuit, egregium & tanto Jurisconsulto dignum, summæ juris scientiæ, quæ præditus fuit, singulare argumentum, & specimen, unde a Justiniano *legum & Edicti perpetui subtilissimus conditor l. 2. §. 18. Cod. de veter. jur. enucl.* & in *l. 10. Cod. de cond. indeb. summa auctoritatis homo, & prætorii Edicti perpetui ordinator* dicitur. Et in *l. 15. Cod. de usufr. summus juris scientiæ auctor*, & in *l. 5. Cod. de bon. quæ liber. tantæ existimationis & disertissimus jurisperitus*, in *Novell. 87. sapientissimus* vocatur. Quantum autem laboris & studii impenderit, ut ex tot sparsis annuis Prætorum Edictis, perpetuum & nullis mutationibus obnoxium conderet Edictum, facile perspicere potest, qui ad jus civile addiscendum animum applicuit. De hisce prætorum Edictis, quæ Prætores initio magistratus solebant proponere, in quibus admonebant cives, quomodo de singulis controversiis



jus dicturi esse in suo magistratu, qui anno finiebatur: quamobrem a Cicerone annuas leges edicta vocari, diximus in prima nostrarum exercitationum parte, ad §. 10. Cujusmodi Edicta perpetua quidem vocantur, scil. respectu eorum, quæ pro ut res incidit, quæ apud ipsos in jure agebatur, ponebantur. *d. l. 7. ff. de jurid.* quorum in numero habetur edictum peremptorium, cujus meminit Ulpianus in *l. 68. ff. de judic.* Ex hisce Prætorum Edictis non tantum perpetuum quoddam Edictum composuit Julianus, verum etiam clausulas quasdam, quæ novæ dicuntur, de suo addidit, ut perspicimus ex *l. 3. ff. de conjung. cum emancip. lib.* Quemadmodum & quædam eis detraxit, quæ necessaria vel forte non magis in usu erant, quædam etiam immutavit. Tradit enim Gell. *lib. 10. cap. 15.* verba Prætoris Edicti perpetui de Flammine Diali & de Sacerdote Vestæ in hunc modum concepta. SACERDOTEM. VESTALEM. ET. FLAMINEM. DIALEM. IN. OMNI. MEA. JURIS. DICTIONE. JURARE. NON. COGAM. Quæ hodie in Edicto perpetuo non habentur. Mutationis exemplum habemus in *l. ff. de commod.* ubi inquit Ulpianus, Ait Prætor, *Quod quis commodasse dicetur, de eo judicium dabo.* Hujus Edicti interpretatio non est difficilis: unum solummodo notandum, quod qui Edictum concepit (quæ verba ad Julianum pertinent, qui & ejus conditor quoque appellatur, ut mox annotavimus) commodari fecit mentionem, cum Pacuvius utendi fecit mentionem. Et in *l. 1. ff. quod met. caus.* Ait Prætor: *Quod metus causa gestum erit, ratum non habebo.* Olim ita dicebatur: *Quod vi metusve causa.* Quod autem ad scripta ejus attinet, sunt ea multa & plurima. Digestorum libri, qui & Edictorum libri dicuntur, utpote in quibus late explicavit, quæ Edicto perpetuo continebantur, numerantur nonaginta, ut patet ex indice, vel si fidem habeamus inscriptioni *l. 31. ff. de ll.* crevit eorum numerus ad 93, ad quos Scævola quasdam

notas scripsisse colligi posse videtur ex l. 10. §. 1. ff. de peric. & commod. rei vend. Scripsit etiam ad *Ursinum Feroce* libros quatuor. Vid. l. 28. ff. de act. emp. & vend. De ambiguitatibus unum, ad *Minucium* libros sex composuit, ut ex inscriptione videre est l. 29. ff. de act. emp. & vend. l. 61. ff. de rei. vind. Ad Edictum quoque scripsisse constat ex l. 1. ff. de his. qui not. infam. Meminerunt autem ejus in numeris in legibus omnes fere jurisperiti. Atque ad eum scripserunt notas, ut *Scavola* ex l. 1. statim allegata ff. de peric. rei. commod. rei. vend. itemque *Marcellus* & *Paulus* l. 16. ff. de pecul. & l. 4. ff. de Rescind. vend. & *Mauricianus* l. 7. §. 2. ff. de pact. ut & *Africanus* l. 19. ff. ad S. C. Vellej. Quoniam vero in summi hujus jurisconsulti vitæ commemoratione, (quamquam & plurimi iique maximi viri memorantur in indice, quorum non meminit Ictus) subsistit hic Pomponius, cum ad ejus Historiam tantum commentati simus, & nobis hic finem imponendum arbitramur, si quis cæterorum Jurisconsultorum vitas & Historiam desiderat, adeat *Bertrandum*, *Rutilium*, *Grotium*, & inspiciat *Ælium Lamprid.* *Spartianum*, *Vopiscum*, *Capitolinum*, aliosque scriptores, viros doctrina & eruditione florentes, & a nobis sæpius laudatos, in quibus passim veterum Jurisconsultorum Historiam descriptam lector inveniet.

F I N I S.

E R-



# ERRATA.

## PARTIS. II.

**P** Ag. 13. lin. ult. leg. *obedientem*. p. 19. lin. 18. leg. *vel delendum*.  
p. 20. lin. 13. leg. *Senatum*. & lin. penult. leg. *Zonaras*. p. 21. lin.  
24. leg. *inter quas virgas*. p. 23. lin. 20. leg. *Gellii*. & lin. 30. leg.  
*Gellius*. p. 29. lin. 14. leg. *Servilinm*. p. 30. lin. 23. leg. *licentiam*. p.  
49. lin. 14. leg. *Latii*. p. 64. lin. 31. leg. *voce*. p. 65. lin. 15. leg. *Huic*.  
p. 82. lin. 17. leg. *cui*. p. 92. lin. 31. leg. *ex argento &c*. p. 93. lin. 17.  
*difficillimus*. p. 99. lin. 27. leg. *crebrior*. p. 123. lin. 4. leg. *discrimen*.  
p. 146. lin. 32. leg. *orationis*. p. 178. lin. 20. leg. *finiatur*.

---

# ERRATA.

## PARTIS. III.

**P** Ræfat. pag. 4. lin. 9. leg. *internecino*. p. 38. lin. 26. adde. *cap. 4. n. 9*.  
p. 44. lin. ult. leg. *præditus*. p. 54. lin. 6. leg. *Ostiensem*. p. 87. lin.  
2. leg. *noxia*. p. 92. lin. 24. leg. *Quartino*. pag. 98. lin. 14. leg. *De eo*.  
pag. 102. lin. 14. leg. *se posse*. ead. lin. 32. leg. *pariant*.

Quod si plura menda irrepererint, ea candidi lectoris dexte-  
ritati corrigenda relinquimus.

E R A T A

P A R T I I


THESE are the names of the  
persons who have been  
examined and found  
to be fit to be  
admitted to the  
degree of Bachelor  
of Arts in the  
University of  
Cambridge in the  
year 1711.


E R A T A

P A R T I I


THESE are the names of the  
persons who have been  
examined and found  
to be fit to be  
admitted to the  
degree of Bachelor  
of Arts in the  
University of  
Cambridge in the  
year 1712.
















# John Adams Library.



IN THE CUSTODY OF THE  
BOSTON PUBLIC LIBRARY.



SHELF N<sup>o</sup>

★ ★ ADAMS  
241.11

